

Namo tassa bhagavato arahato sammāsambuddhassa

Khuddakanikāye

Theragāthā-aṭṭhakathā

(Paṭhamo bhāgo)

Ganthārambhakathā

Mahākāruṇikaṃ **nāthaṃ**, ñeyyasāgarapāraguṃ;
Vande nipuṇagambhīra-vicitranayadesanaṃ.

Vijjācaraṇasampannā, yena niyyanti lokato;
Vande tamuttamaṃ **dhammaṃ**, sammāsambuddhapūjitaṃ.

Sīlādiguṇasampanno, ṭhito maggaphalesu yo;
Vande **ariyaśṅhaṃ** taṃ, puññakkhettaṃ anuttaraṃ.

Vandanājanitaṃ puññaṃ, iti yaṃ ratanattaye;
Hatantarāyo sabbattha, hutvāhaṃ tassa tejasā.

Yā tā subhūtiādīhi, katakiccehi tādihi;
Therehi bhāsītā gāthā, therīhi ca nirāmisā.

Udānanādaavidhinā, gambhīrā nipuṇā subhā;
Suññatāpaṭisaṃyuttā, ariyadhammappakāsikā.

Theragāthāti nāmena, **therīgāthā**ti tādino;
Yā khuddakanikāyamhi, śaṅgāyimsu mahesayo.

Tāsaṃ gambhīraññehi, ogāhetabbabhāvato;
Kiñcāpi dukkarā kātum, **atthasaṃvaṇṇanā** mayā.

Sahasamvaṇṇanaṃ yasmā, dharate satthu sāsanaṃ;
Pubbācariyasīhānaṃ, tiṭṭhateva vinicchayo.

Tasmā taṃ avalambitvā, ogāhetvāna pañcapi;
Nikāye upanissāya, porāṇaṭṭhakathānayaṃ.

Suvisuddhaṃ asaṃkiṇṇaṃ, nipuṇatthavinicchayaṃ;
Mahāvihāravāsīnaṃ, samayaṃ avilomayaṃ.

Yāsaṃ attho duviññeyyo, anupubbikathaṃ vinā;
Tāsaṃ tañca vibhāvento, dīpayanto vinicchayaṃ.

Yathābalaṃ karissāmi, atthasaṃvaṇṇanaṃ subhaṃ;
Sakkaccaṃ theragāthānaṃ, therīgāthānameva ca.

Iti ākaṅkhamānassa, saddhammassa ciraṭṭhitim;
Tadatthaṃ vibhajantassa, nisāmayatha sādhavoti.

Kā panetā **theragāthā therīgāthā** ca, kathaṅca pavattāti, kāmañcāyamattho gāthāsu vuttoyeva pākaṭakaraṇatthaṃ pana punapi vuccate – tattha theragāthā tāva subhūtittherādīhi bhāsītā. Yā hi te attanā yathādhiḡataṃ maggaphalasukhaṃ paccavekkhitvā kāci udānavasena, kāci attano samāpattivihārapaccavekkhaṇavasena, kāci pucchāvasena, kāci parinibbānasamaye sāsanaṃ niyyānikabhāvavibhāvanavasena abhāsiṃsu, tā sabbā saṅgītikāle ekajjhaṃ katvā “theragāthā” icceva dhammasaṅgāhakehi saṅgītā. Therīgāthā pana theriyo uddissa desitā.

Tā pana vinayapiṭakaṃ, suttantapiṭakaṃ abhidhammapiṭakanti tīsu piṭakesu suttantapiṭakapariyāpanā. Dīghanikāyo, majjhimanikāyo, saṃyuttanikāyo, aṅguttaranikāyo, khuddakanikāyoti pañcasu nikāyesu khuddakanikāyapariyāpanā, suttam, geyyam, veyyākaraṇam, gāthā, udānam, itivuttakam, jātakam, abbhutadhammam, vedallanti navasu sāsanaṅgesu gāthaṅgasāṅgahaṃ gatā.

“Dvāsīti buddhato gaṇhim, dvesahassāni bhikkhuto;
Caturāsītisahassāni, ye me dhammā pavattino”ti.

Evam dhammabhaṇḍāgārikena paṭiññātesu caturāsītiyā dhammakhandhasahassesu katipayadhammakhandhasāṅgahaṃ gatā.

Tattha theragāthā tāva nipātato ekanipāto ekuttaravasena yāva cuddasanipātāti cuddasanipāto soḷasanipāto vīsatinipāto tiṃsanipāto cattālisanipāto paññāsanipāto saṭṭhinipāto sattatinipātoti ekavīsatinipātasāṅgahā. Nipātanam nikkhipananti nipāto. Eko ekeko gāthānam nipāto nikkhepo etthāti ekanipāto. Iminā nayena sesesupi attho veditabbo.

Tattha ekanipāte dvādasa vaggā. Ekekasmim vage dasa dasa katvā vīsuttarasatam therā, tattikā eva gāthā. Vuttañhi –

“Vīsuttarasatam therā, katakiccā anāsavā;
Ekakamhi nipātamhi, susāṅgītā mahesibhī”ti.

Dukanipāte ekūnapaññāsa therā, aṭṭhanavuti gāthā; tikanipāte soḷasa therā, aṭṭhacattālīsa gāthā; catukkanipāte terasa therā, dvepaññāsa gāthā; pañcakanipāte dvādasa therā, saṭṭhi gāthā; chakkanipāte cuddasa therā, caturāsīti gāthā; sattakanipāte pañca therā, pañcatimṣa gāthā; aṭṭhakanipāte tayo therā, catuvīsati gāthā; navakanipāte eko thero, nava gāthā; dasanipāte satta therā, sattati gāthā; ekādasanipāte eko thero, ekādasa gāthā; dvādasanipāte dve therā, catuvīsati gāthā; terasanipāte eko thero, terasa gāthā; cuddasanipāte dve therā, aṭṭhavīsati gāthā; pannarasanipāto natthi, soḷasanipāte dve therā, dvattimṣa gāthā; vīsatinipāte dasa therā, pañcattālīsādhikāni dve gāthāsātāni; tiṃsanipāte tayo therā, satam pañca ca gāthā; cattālisanipāte eko thero, dve cattālīsa gāthā; paññāsanipāte eko thero, pañcapaññāsa gāthā; saṭṭhinipāte eko thero, aṭṭhasaṭṭhi gāthā; sattatinipāte eko thero, ekasattati gāthā. Sampiṇḍetvā pana dvesātāni catusaṭṭhi ca therā, sahasam tīṇi satāni saṭṭhi ca gāthāti. Vuttampi cetam –

“Sahasam honti tā gāthā, tīṇi saṭṭhi satāni ca;
Therā ca dve satā saṭṭhi, cattāro ca pakāsītā”ti.

Therīgāthā pana ekanipāto ekuttaravasena yāva navanipātāti navanipāto ekādasanipāto, dvādasanipāto, soḷasanipāto, vīsatinipāto, tiṃsanipāto, cattālisanipāto, mahānipātoti soḷasanipātasāṅgahā. Tattha ekanipāte aṭṭhārasa theriyo, aṭṭhāraseva gāthā; dukanipāte dasa theriyo, vīsati gāthā; tikanipāte aṭṭha theriyo, catuvīsati gāthā; catukkanipāte ekā therī, catasso gāthā;

pañcakanipāte dvādasa theriyo saṭṭhi gāthā; chakkanipāte aṭṭha theriyo aṭṭhacattālīsa gāthā; sattanipāte tisso theriyo, ekavīsati gāthā; aṭṭha nipātato paṭṭhāya yāva soḷasanipātā ekekā theriyo taṃtaṃnipātaparimāṇā gāthā; vīsatinipāte pañca theriyo, aṭṭhārasasatagāthā; tiṃsanipāte ekā therī, catuttiṃsa gāthā; cattālīsanipāte ekā therī, aṭṭhacattālīsa gāthā; mahānipātepi ekā therī, pañcasattati gāthā. Evamettha nipātānaṃ gāthāvaggānaṃ gāthānañca parimāṇaṃ veditabbaṃ.

Nidānagāthāvaṇṇanā

Evam paricchinnaparimāṇāsu panetāsu theragāthā ādi. Tatthāpi –

“Sīhānaṃva nadantānaṃ, dāṭhīnaṃ girigabbhare;
Suṇātha bhāvitattānaṃ, gāthā atthupanāyikā”ti.

Ayaṃ paṭhamamahāsaṅgītikāle āyasmata ānandena tesam therānaṃ thomanattham bhāsītā gāthā ādi. Tattha **sīhānanti** sīhasaddo “sīho, bhikkhave, migarājā”tiādīsu (a. ni. 4.33) migarāje āgato. “Atha kho sīho senāpati yena bhagavā tenupasaṅkamī”tiādīsu (a. ni. 5.34) paññattiyam. “Sīhoti kho, bhikkhave, tathāgatassetam adhivacanaṃ arahato sammāsambuddhassā”tiādīsu (a. ni. 5.99; 10.21) tathāgate. Tattha yathā tathāgate sadisakappanāya āgato, evam idhāpi sadisakappanāvaseva veditabbo, tasmā **sīhānaṃvāti** sīhānaṃ iva. Sandhivasena saralopo “evaṃsa te”tiādīsu (ma. ni. 1.22) viya. Tattha **ivāti** nipātapadaṃ. **Suṇāthāti** ākhyātapadaṃ. Itarāni nāmapadāni. **Sīhānaṃvāti** ca sambandhe sāmivacanaṃ. Kāmañcetha sambandhī sarūpato na vutto, atthato pana vuttova hoti. Yathā hi “oṭṭhasseva mukhaṃ etassā”ti vutte oṭṭhasseva mukhaṃ viya mukhaṃ etassāti ayamatto vutto eva hoti, evamidhāpi “sīhānaṃvā”ti vutte sīhānaṃ nādo viyāti ayamatto vutto eva hoti. Tattha mukhasaddasannidhānaṃ hotīti ce, idhāpi “nadantāna”nti padasannidhānato, tasmā **sīhānaṃvāti** nidassanavacanaṃ. **Nadantānanti** tassa nidassitabbena sambandhadassanaṃ. **Dāṭhīnanti** tabbisesanaṃ. **Girigabbharetī** tassa pavattiṭṭhānadassanaṃ. **Suṇāthāti** savane niyojanaṃ. **Bhāvitattānanti** sotabbassa pabhavadassanaṃ. **Gāthāti** sotabbavatthudassanaṃ. **Atthupanāyikāti** tabbisesanaṃ. Kāmañcetha “sīhānaṃ nadantānaṃ dāṭhīna”nti pullīngavasena āgataṃ, līngaṃ pana parivattetvā “sīhīna”ntiādīna itthilīngavasenāpi attho veditabbo. Ekasesavasena vā sīhā ca sīhiyo ca sīhā, tesam sīhānantiādīna sādharmaṇā hetā tisso nidānagāthā theragāthānaṃ therīgāthānañcāti.

Tattha sahanato hananato ca sīho. Yathā hi sīhassa migarañño balavisesayogato sarabhamigamattavaravāraṇādītopi parissayo nāma natthi, vātātapādīparissayampi so sahatiyeva, gocarāya pakkamantopi tejussadatāya mattagandhahatthivanamahimsādike samāgantvā abhīrū achambhī abhibhavati, abhibhavanto ca te aññadatthu hantvā tattha mudumaṃsāni bhakkhayitvā sukheva viharatī, evametepi mahātherā ariyabalavisesayogena sabbesampi parissayānaṃ sahanato, rāgādīsaṃkilesabalassa abhibhavitvā hananato pajahanato tejussadabhāvena kutocīpi abhīrū achambhī jhānādisukhena viharantīti sahanato hananato ca sīhā viyāti sīhā. Saddatthato pana yathā kantanatthena ādiantavipallāsato takkaṃ vuccati, evam himsanaṭṭhena sīho veditabbo. Tathā sahanaṭṭhena. Pisodarādīpakkhepena niruttinayena pana vuccamāne vattabbameva natthi.

Atha vā yathā migarājā kesarasīho attano tejussadatāya ekacārī viharatī, na kañci sahāyaṃ paccāsīsati, evametepi tejussadatāya vivekābhīratīyā ca ekacārīnoti ekacariyaṭṭhenapi sīhā viyāti sīhā, tenāha – bhagavā “sīhaṃvekkacamaṃ nāga”nti (saṃ. ni. 1.30; su. ni. 168).

Atha vā asantāsanajavaparakkamādivisesayogato sīhā viyāti sīhā, ete mahātherā. Vuttañhetam bhagavatā –

“Dveme, bhikkhave, asaniyā phalantiyā na santasanti, katameva dve? Bhikkhu ca khīṇāsavo sīho ca migarājā”ti (a. ni. 2.60).

Javopi sīhassa aññehi asādhāraṇo, tathā parakkamo. Tathā hi so usabhasatampi laṅghitvā vanamahimsādīsu nipatati, potakopi samāno pabhinnamadānampi mattavaravāraṇānaṃ paṭimānaṃ bhinditvā dantakaḷīraṃva khādati. Etesaṃ pana ariyamaggajavo iddhijavo ca aññehi asādhāraṇo, sammappadhānaparakkamo ca niratisayo. Tasmā **sīhānaṃvā**ti sīhasadisānaṃ viya. Sīhassa cettha hīnūpamatā daṭṭhabbā, accantavisiṭṭhassa sahanādiatthassa theresveva labbhanato.

Nadantānanti gajjantānaṃ. Gocaraparakkamatutṭhivelādīsu hi yathā sīhā attano āsayato nikkhamitvā vijambhitvā sīhanādaṃ abhītanādaṃ nadanti, evaṃ etepi visayajjhatappaccavekkhaṇaudānādikālesu imaṃ abhītanādaṃ nadīmsu. Tena vuttaṃ – “sīhānaṃva nadantāna”nti. **Dāṭhīnanti** dāṭhāvantaṃ. Pasaṭṭhadāṭhīnaṃ, atisayadāṭhānanti vā attho. Yathā hi sīhā ativiya daḷhānaṃ tikkhānaṃ ca catunnaṃ dāṭhānaṃ balena paṭipakkhaṃ abhibhavitvā attano manorathaṃ matthakaṃ pūrenti, evametepi catunnaṃ ariyamaggadāṭhānaṃ balena anādimati saṃsāre anabhībhūtapubbapaṭipakkhaṃ abhibhavitvā attano manorathaṃ matthakaṃ pāpesuṃ. Idhāpi dāṭhā viyāti dāṭhāti sadisakappanāvaseneva attho veditabbo.

Girigabbharetī pabbataguhāyaṃ, samīpatthe bhumavacanaṃ. “Girigavhare”ti keci paṭhanti. Pabbatesu vanagahane vanasaṇḍeti attho. Idaṃ pana nesaṃ virocanaṭṭhānadassanañceva sīhanādassa yogyabhūmidassanañca. Nadantānaṃ girigabbharetī yojanā. Yathā hi sīhā yebhuyyena girigabbhare aññehi durāsadatāya janavivitte vasantā attano dassanena uppajjanakassa khuddakamigasantāsassa pariharaṇatthaṃ gocaragamane sīhanādaṃ nadanti, evametepi aññehi durāsadagirigabbharasadiseva suññāgārevasantā guṇehi khuddakānaṃ puthujjanānaṃ taṇhādīṭṭhiparittāsaparivajjanatthaṃ vakkhamānagāthāsāṅkhātāṃ abhītanādaṃ nadīmsu. Tena vuttaṃ “sīhānaṃva nadantānaṃ, dāṭhīnaṃ girigabbhare”ti.

Suṇāthāti savanāṇattikavacanaṃ, tena vakkhamānānaṃ gāthānaṃ sannipatitāya parisāya sotukāmatāṃ uppādentō savane ādaraṃ janeti, ussāhaṃ samuṭṭhāpentō gāraṃva bahumānañca upaṭṭhapeti. Atha vā “sīhāna”ntiādīnaṃ padānaṃ sadisakappanāya vinā mukhyavaseneva attho veditabbo. Tasmā daḷhatikkhabhāvena pasaṭṭhātīsayadāṭhatāya dāṭhīnaṃ girigabbhare nadantānaṃ sīhagajjitaṃ gajjantānaṃ sīhānaṃ migarājūnaṃ viya tesāṃ abhītanādasadisā gāthā suṇāthāti attho. Idaṃ vuttaṃ hoti – “yathā sīhanādaṃ nadantānaṃ sīhānaṃ migarājūnaṃ kutocipi bhayābhāvato so abhītanādo tadanāṃmigasantāsakaro, evaṃ bhāvitattānaṃ appamattānaṃ therānaṃ sīhanādasadisīyo sabbaso bhayahetūnaṃ suppahīnattā abhītanādabhūtā, pamattajanasantāsakarā gāthā suṇāthā”ti.

Bhāvitattānanti bhāvitacittānaṃ. Cittañhi “attā hi kira duddamo (dha. pa. 159) yo ve ṭhitatto tasaraṃva ujjū”ti (su. ni. 217) ca “attasammāpaṇidhī”ti (khu. pā. 5.4; su. ni. 263) ca evamādīsu attāti vuccati, tasmā adhicittānuyogena samathavipassanābhivaḍḍhitacittānaṃ samathavipassanābhāvanāmatthakaṃ pāpetvā ṭhitānanti attho. Atha vā **bhāvitattānanti** bhāvitasabhāvanānaṃ, sabhāvabhūtasīlādībhāvitānanti attho. Gīyatīti **gāthā**, anuṭṭhubhādivasena isīhi pavattitaṃ catuppadaṃ chappadaṃ vā vacanaṃ. Aññesampi taṃsadisatāya tathā vuccanti. Attatthādibhede atthe upanenti tesu vā upaniyantīti **atthūpanāyikā**.

Atha vā **bhāvitattānanti** bhāvitattābhāvanānaṃ, attabhāvo hi āhito ahaṃ māno etthāti “attā”ti vuccati, so ca tehi appamādabhāvanāya anavajjabhāvanāya bhāvito sammadeva guṇagandhaṃ gāhāpito. Tena tesāṃ kāyabhāvanā sīlabhāvanā cittabhāvanā paññābhāvanāti catunnaṃpi bhāvanānaṃ paripuṇṇabhāvaṃ dasseti. “Bhāvanā”ti ca sambodhipaṭipadā idhādhippetā. Yāyaṃ saccasambodhi atthi, sā duvidhā abhisamayato tadatthato ca. Sambodhi pana tividhā sammāsambodhi paccekasambodhi sāvakasambodhīti. Tattha sammā sāmaṃ sabbadhamānaṃ bujjanato bodhanato ca sammāsambodhi. Sabbaññutaññānapadaṭṭhānaṃ maggaññānaṃ maggaññānapadaṭṭhānañca sabbaññutaññānaṃ “sammāsambodhī”ti vuccati. Tenāha –

“Buddhoti yo so bhagavā sayambhū anācariyako pubbe ananussutesu dhammesu sāmaṃ

saccāni abhisambujjhi, tatha ca sabbaññutaṃ patto balesu ca vasībhāva’nti (mahāni. 192; cūḷani. pārāyanatthutigāthānidessa 97; paṭi. ma. 1.161).

Bodhaneyyabodhanattho hi balesu vasībhāvo. Paccekaṃ sayameva bodhīti paccekasambodhi, ananubuddho sayambhūñāṇena saccābhisamayoti attho. Sammāsambuddhānañhi sayambhūñāṇatāya sayameva pavattamānopi saccābhisamayo sānubuddho aparimāṇānaṃ sattānaṃ saccābhisamayassa hetubhāvato. Imesaṃ pana so ekassāpi sattassa saccābhisamayahetu na hoti. Satthu dhammadesanāya savanante jātāti sāvakā. Sāvakanāṃ saccābhisamayo sāvakasambodhi. Tividhāpesā tiṇṇaṃ bodhisattānaṃ yathāsakaṃ āgamanīyapaṭipadāya matthakappattiyā satipaṭṭhānādīnaṃ sattatimsāya bodhipakkhiyadhammānaṃ bhāvanāpāripūrīti veditabbā itarābhisamayānaṃ tadavinābhāvato. Na hi sacchikiriyābhisamayena vinā bhāvanābhisamayo sambhavati, sati ca bhāvanābhisamaye pahānābhisamayo pariññābhisamayo ca siddhoyeva hotīti.

Yadā hi mahābodhisatto paripūrītabodhisambhāro carimabhava katapubbakicco bodhimaṇḍaṃ āruyha – “na tāvimaṃ pallaṅkaṃ bhindissāmi, yāva na me anupādāya āsavehi cittaṃ vimuccissatī”ti paṭiññaṃ katvā aparājītapallaṅke nisinna asampattāya eva sañjhāvelāya mārabalaṃ vidhamitvā purimayāme pubbenivāsānussatiñāṇena anekākāravokāre pubbe nivutthakkhandhe anussaritvā majjhimayāme dibbacakkhuvisodhanena cutūpapātañāṇaanāgataṃsañāṇāni adhigantvā pacchimayāme “kiccaṃ vatāyaṃ loko āpanno jāyati ca jīyati ca mīyati ca cavati ca upapajjati ca, atha ca panimassa dukkhassa nissaraṇaṃ nappajānāti jarāmaraṇassa”tiādīna (dī. ni. 2.57) jarāmaraṇato paṭṭhāya paṭiccasamuppādamukhena vipassanaṃ abhinivisitvā mahāgahanaṃ chinditūṃ nisadasilāyaṃ pharaṣuṃ nisento viya kilesagahanaṃ chinditūṃ lokanātho ñāṇapharaṣuṃ tejento buddhabhāvāya hetusampattiyā paripākaṃ gatattā sabbaññutaññādhigamāya vipassanaṃ gabbhaṃ gaṇhāpento antarantarā nānāsamāpattiyā samāpajjītvā yathāvavattāpīte nāmarūpe tilakkhaṇaṃ āropetvā anupadadhammavipassanāvasena anekākāravokārasaṅkhāre sammasanto chattimsakoṭṭisatasahassamukhena sammasanavāraṃ vitthāretvā tatha mahāvajjirañāṇasaṅkhāte vipassanāñāṇe tikkhe sūre pasanne vuṭṭhānagāminibhāvena pavattamāne yadā taṃ maggena ghaṭeti, tadā maggapāṭipāṭiyā diyaḍḍhakilesasahassaṃ khepento aggamaggakkhaṇe sammāsambodhiṃ adhigacchati nāma, aggaphalakkhaṇato paṭṭhāya adhigato nāma. Sammāsambuddhabhāvato dasabalacatuvesārajjādayopi tassa tadā hatthagatāyeva hontīti ayaṃ tāva abhisamayato sammāsambodhipaṭipadā. Tadattatho pana mahābhinihārato paṭṭhāya yāva tusitabhavane nibbatti, etthantare pavattaṃ bodhisambhārasambharaṇaṃ. Tatha yaṃ vattabbaṃ, taṃ sabbākārasampannaṃ cariyāpiṭakavaṇṇanāyaṃ vitthārato vuttamevāti tatha vuttanayeneva gahetabbaṃ.

Paccekabodhisattāpi paccekabodhiyā katābhinihārā anupubbena sambhatapaccekasambodhisambhārā tādisse kāle carimattabhāve ṭhitā ñāṇassa paripākagatabhāvena upaṭṭhitam saṃveganimittaṃ gahetvā savisesaṃ bhavādīsu ādīnavaṃ disvā sayambhūñāṇena pavatti pavattihetuṃ nivatti nivattihetuñca paricchinditvā “so ‘idaṃ dukkha’nti yoniso manasi karotī”tiādīna āgatanayena catusaccakammaṭṭhānaṃ paribrūhentā attano abhinīhārānurūpaṃ saṅkhāre parimaddantā anukkamena vipassanaṃ ussukkāpetvā maggapāṭipāṭiyā aggamaggaṃ adhigacchantā paccekasambodhiṃ abhisambujjhanti nāma, aggaphalakkhaṇato paṭṭhāya paccekasambuddhā nāma hutvā sadevakassa lokassa aggadakkhiṇeyyā honti.

Sāvakā pana satthu sabrahmacārino vā catusaccakammaṭṭhānakathaṃ sutvā tasmimīyeva khaṇe kālantare vā tajaṃ paṭipattim anuṭṭhantā ghaṭentā vāyamantā vipassanaṃ ussukkāpetvā, yadi vā paṭipadāya vaḍḍhantiyā, saccāni paṭivijjhantā attano abhinīhārānurūpasiddhiaggasāvakaḥhūmiyā vā kevalaṃ vā aggamaggakkhaṇe sāvakasambodhiṃ adhigacchanti nāma. Tato paraṃ sāvakabuddhā nāma honti sadevake loke aggadakkhiṇeyyā. Evaṃ tāva abhisamayato paccekasambodhi sāvakasambodhi ca veditabbā.

Tadattatho pana yathā mahābodhisattānaṃ heṭṭhimaparicchidena cattāri asaṅkhyeyyāni kappānaṃ

satasahassañca bodhisambhārasambharaṇaṃ icchitabbaṃ majjhimaparichedena aṭṭha asaṅkhyeyyāni kappānaṃ satasahassañca, uparimaparichedena soḷasa asaṅkhyeyyāni kappānaṃ satasahassañca ete ca bhedā paññādhikasaddhādhikavīriyādhikavasena veditabbā. Paññādhikānañhi saddhā mandā hoti paññā tikkhā, tato ca upāyako sallassa visadanipuṇabhāvena nacirasseva pāramiyo pāripūriṃ gacchanti. Saddhādhikānaṃ paññā majjhimā hotīti tesam nātisīghaṃ nātisaṅikaṃ pāramiyo pāripūriṃ gacchanti. Vīriyādhikānaṃ pana paññā mandā hotīti tesam cireneva pāramiyo pāripūriṃ gacchanti. Na evaṃ paccekabodhisattānaṃ. Tesañhi satipi paññādhikabhāve dve asaṅkhyeyyāni kappānaṃ satasahassañca bodhisambhārasambharaṇaṃ icchitabbaṃ, na tato oraṃ. Saddhādhikavīriyādhikāpi vuttaparichedato paraṃ katipaye eva kappe atikkamivā paccekasambodhiṃ abhisambujjhanti, na tatiyaṃ asaṅkhyeyyanti. Sāvaka bodhisattānaṃ pana yesaṃ aggasāvaka bhāvāya abhinīhāro, tesam ekaṃ asaṅkhyeyyaṃ kappānaṃ satasahassañca sambhārasambharaṇaṃ icchitabbaṃ. Yesam mahāsāvaka bhāvāya, tesam kappānaṃ satasahassameva, tathā buddhassa mātāpitūnaṃ upaṭṭhākassa puttassa ca. Tattha yathā –

“Manussattaṃ liṅgasampatti, hetu satthāradassanaṃ;
Pabbajjā guṇasampatti, adhikāro ca chandatā;
Aṭṭhadhammasamohānā, abhinīhāro samijjhatī’ ti. (bu. vaṃ. 2.59) –

Evaṃ vutte aṭṭha dhamme samodhānetvā katapañidhānānaṃ mahābodhisattānaṃ mahābhinīhāro pabhuti savisesaṃ dānādīsu yuttappayuttānaṃ divase divase vessantaradānasadisam mahādānaṃ dentānaṃ tadanurūpasilādike sabbapāramidhamme ācinantānaṃ pi yathāvuttakālaparichedaṃ asampatvā antarā eva buddhabhāvappatti nāma natthi. Kasmā? Nāṇassa aparipaccanato. Paricchinnakāle nipphāditaṃ viya hi sassaṃ buddhañānaṃ yathāparicchinnakālavaseneva vuddhiṃ viruḷhiṃ vepullaṃ āpajjantaṃ gabbhaṃ gaṇhantaṃ paripākaṃ gacchatīti evaṃ –

“Manussattaṃ liṅgasampatti, vigatāsavadassanaṃ;
Adhikāro chandatā ete, abhinīhāra kāraṇā’ ti. (su. nī. aṭṭha. 1.khaggavisāṇasuttavaṇṇanā) –

Ime pañca dhamme samodhānetvā katābhinīhārānaṃ paccekabodhisattānaṃ “adhikāro chandatā’ ti dvaṅgasamannāgatāya patthanāya vasena katapañidhānānaṃ sāvaka bodhisattānañca tattha tattha vuttakālaparichedaṃ asampatvā antarā eva paccekasambodhiyā yathāvuttasāvakasambodhiyā ca adhiḡamo natthi. Kasmā? Nāṇassa aparipaccanato. Imesampi hi yathā mahābodhisattānaṃ dānādīpāramīhi paribrūhitā paññāpāramī anukkamena gabbhaṃ gaṇhantī paripākaṃ gacchantī buddhañānaṃ paripūreti, evaṃ dānādīhi paribrūhitā anupubbena yathārahaṃ gabbhaṃ gaṇhantī paripākaṃ gacchantī paccekabodhiñānaṃ sāvaka bodhiñānañca paripūreti. Dānapariyeyya heta tattha tattha bhava alobhajjhāsaya tāya sabbattha asaṅgamānasā anapekkhacittā hutvā, silapariyeyya susaṃvutakāyavācatāya suparisuddhakāyavacīkammantā parisuddhājīvā indriyesu guttadvārā bhojane mattaññuno hutvā jāgariyānuyogena cittaṃ samādahanti, svāyaṃ tesam jāgariyānuyogo gatapaccāgatikavattavasena veditabbo.

Evaṃ pana paṭipajjantānaṃ adhikārasampattiyā appakasireneva aṭṭha samāpattiyō pañcābhiññā chaḷabhiññā adhiṭṭhānabhūtā pubbabhāgavipassanā ca hatthagatāyeva hontī. Vīriyādayo pana tadantogadhā eva. Yañhi paccekabodhiyā sāvaka bodhiyā vā atthāya dānādīpuññasambharaṇe abhussahanaṃ, idaṃ vīriyaṃ. Yaṃ tadanuparodhassa sahanaṃ, ayaṃ khanti. Yaṃ dānasīlādīsamādānāvisamvādanaṃ, idaṃ saccaṃ. Sabbatthameva acalasaṃmādhānādhiṭṭhānaṃ, idaṃ adhiṭṭhānaṃ. Yā dānasīlādīnaṃ pavattiṭṭhānabhūtesu sattesu hitesitā, ayaṃ mettā. Yaṃ sattānaṃ katavipakkāresu ajjupekkhanaṃ, ayaṃ upekkhāti. Evaṃ dānasīlabhāvanāsu sīlasamādhipaññāsu ca sijjhamānāsu vīriyādayo siddhā eva hontī. Sāyeva paccekabodhiatthāya sāvaka bodhiatthāya ca dānādīpaṭipadā tesam bodhisattānaṃ santānassa bhāvanato paribhāvanato bhāvanā nāma. Viseso dānasīlādīhi svābhisāṅkhathe santāne pavattā samathavipassanāpaṭipadā, yato te bodhisattā pubbayogāvācarasamudāgamasampannā hontī. Tenāha bhagavā –

“Pañcime, ānanda, ānisaṃsā pubbayogāvacare. Katame pañca? Idhānanda, pubbayogāvacaro diṭṭheva dhamme paṭikacca aññaṃ ārādheti, no ce diṭṭheva dhamme paṭikacca aññaṃ ārādheti, atha maraṇakāle aññaṃ ārādheti, atha devaputto samāno aññaṃ ārādheti, atha buddhānaṃ sammukhībhāve khippābhiñño hoti, atha pacchime kāle paccekasambuddho hoti”’ti (su. ni. aṭṭha. 1.khaggavisāṇasuttavaṇṇanā).

Iti pubbabhāgapaṭipadābhūtāya pāramitāparibhāvitāya samathavipassanābhāvanāya nirodhagāminipaṭipadābhūtāya abhisamayasaṅkhātāya maggabhāvanāya ca bhāvitattabhāva buddhapačekabuddhabuddhasāvaka bhāvitattā nāma. Tesu idha buddhasāvaka adhippetā.

Ettha ca “sīhānaṃvā”’ti iminā therānaṃ sīhasamānavuttitādassanena attano paṭipakkhehi anabhibhavanīyataṃ, te ca abhibhuyya pavattiṃ dasseti. “Sīhānaṃva nadantānaṃ...pe... gāthā”’ti iminā theragāthānaṃ sīhanādasadisatādassanena tāsāṃ paravādehi anabhibhavanīyataṃ, te ca abhibhavivā pavattiṃ dasseti. “Bhāvitattāna”’nti iminā tadubhayassa kāraṇaṃ vibhāveti. Bhāvitattabhāvena therā idha sīhasadisā vuttā, tesaṅca gāthā sīhanādasadisiyo. “Atthūpanāyikā”’ti iminā abhibhavane payojanaṃ dasseti. Tattha therānaṃ paṭipakkho nāma saṃkilesadhammo, tadabhibhavo tadaṅgavikkhambhanappahānehi saddhiṃ samucchedappahānaṃ. Tasmim sati paṭipassaddhīppahānaṃ nissaraṇappahānaṅca siddhameva hoti, yato te bhāvitattāti vuccanti. Maggakkhaṇe hi ariyā appamādashāvaṇaṃ bhāventi nāma, aggaphalakkhaṇato paṭṭhāya bhāvitattā nāmāti vuttovāyamattho.

Tesu tadaṅgappahānena nesāṃ sīlasampadā dassitā, vikkhambhanappahānena samādhisampadā, samucchedappahānena paññāsampadā, itarena tāsāṃ phalaṃ dassitaṃ. Sīlena ca tesāṃ paṭipattiyā ādikalyāṇatā dassitā, “ko cādi kusalānaṃ dhammānaṃ? Sīlaṅca suvisuddhaṃ” (saṃ. ni. 5.369), “sīle patiṭṭhāya” (saṃ. ni. 1.23; visuddhi. 1.1), “sabbapāpassa akaraṇa”’nti (dha. pa. 183; dī. ni. 2.90) ca vacanato sīlaṃ paṭipattiyā ādikalyāṇaṃva avipparisārādiguṇāvahattā. Samādhinā majjhakalyāṇatā dassitā, “cittaṃ bhāvayaṃ”, “kusalassa upasampadā”’ti ca vacanato samādhipaṭipattiyā majjhakalyāṇova, iddhividhādiguṇāvahattā. Paññāya pariyosānakalyāṇatā dassitā, “sacittapariyodapanāṃ” (dha. pa. 183; dī. ni. 2.90), “paññaṃ bhāvaya”’nti (saṃ. ni. 1.23; visuddhi. 1.1) ca vacanato paññā paṭipattiyā pariyosānaṃva, paññuttarato kusalānaṃ dhammānaṃ sāva kalyāṇā iṭṭhāniṭṭhesu tādibhāvāvahattā.

“Selo yathā ekaghano, vātena na samīrati; (Mahāva. 244);
Evaṃ nindāpasāṃsāsu, na samīñjanti paṇḍitā”’ti. (dha. pa. 81) –

Hi vuttaṃ.

Tathā sīlasampadāya tevijjabhāvo dassito. Sīlasampattiñhi nissāya tisso vijjā pāpuṇanti. Samādhisampadāya chaḷabhiññābhāvo. Samādhisampattiñhi nissāya chaḷabhiññā pāpuṇanti. Paññāsampadāya pabhinnapaṭisambhidābhāvo. Paññāsampadañhi nissāya catasso paṭisambhidā pāpuṇanti. Iminā tesāṃ therānaṃ keci tevijjā, keci chaḷabhiññā, keci paṭisambhidāpattāti ayamattho dassitoti veditabbaṃ.

Tathā sīlasampadāya tesāṃ kāmasukhānuyogasaṅkhātassa antassa parivajjanaṃ dasseti. Samādhisampadāya attakilamathānuyogasaṅkhātassa, paññāsampadāya majjhimāya paṭipadāya sevanaṃ dasseti. Tathā sīlasampadāya tesāṃ vītikamappahānaṃ kilesānaṃ dasseti. Samādhisampadāya pariyuṭṭhānappahānaṃ, paññāsampadāya anusayappahānaṃ dasseti. Sīlasampadāya vā ducaritasāṃkilesavisodhanaṃ, samādhisampadāya taṇhāsāṃkilesavisodhanaṃ, paññāsampadāya diṭṭhisāṃkilesavisodhanaṃ dasseti. Tadaṅgappahānena vā nesāṃ apāyasamatikkamo dassito. Vikkhambhanappahānena kāmadhātusamatikkamo, samucchedappahānena sabbabhavasamatikkamo dassitoti veditabbaṃ.

“Bhāvitattāna”nti vā ettha sīlabhāvanā, cittabhāvanā paññābhāvanāti tisso bhāvanā veditabbā kāyabhāvanāya tadantogadhattā. Sīlabhāvanā ca paṭipattiyā ādīti sabbam purimasadisam. Yathā pana sīhanādaṃ pare migagaṇā na sahani, kuto abhibhave, aññadatthu sīhanādova te abhibhavati evameva aññatitthiyavādā therānaṃ vāde na sahani, kuto abhibhave, aññadatthu theravādāva te abhibhavanti. Taṃ kissa hetu? “Sabbe saṅkhārā aniccā, sabbe saṅkhārā dukkhā, sabbe dhammā anattā”ti (dha. pa. 277-279) “nibbānadhātū”ti ca pavattanato. Na hi dhammato sakkā kenaci aññathā kātuṃ appaṭivattanīyato. Yaṃ panettha vattabbaṃ, taṃ parato āvibhavissati. Evamettha saṅkhepeveva paṭhamagāthāya atthavibhāvanā veditabbā.

Dutiyagāthāyaṃ pana ayaṃ sambandhadassanamukhena atthavibhāvanā. Tattha yesaṃ therānaṃ gāthā sāvetaṃ, te sādharmaṇasena nāmato gottato guṇato ca kittetuṃ “yathānāmā”tiādi vuttaṃ. Asādharmaṇato pana tattha tattha gāthāsveva āvibhavissati. Tattha **yathānāmā**ti yaṃyaṃnāmā, subhūti mahākoṭṭhikotiādinā nayena nāmadheyyena paññātāti attho. **Yathāgottā**ti yaṃyaṃgottā, gotamo kassapotiādinā nayena kulapadesena yāya yāya jātiyā paññātāti attho. **Yathādhammavihārinoti** yādisadhammavihārino, pariyaṭṭiparamatāyaṃ aṭṭhatvā yathānurūpaṃ samāpattivihārino hutvā viharimsūti attho. Atha vā **yathādhammavihārinoti** yathādhammā vihārino ca, yādisasīlādiddhammā dibbavihārādīsu abhiṇhaso viharamānā yādisavihārā cāti attho. **Yathādhimuttā**ti yādisadhimuttikā saddhādhimuttipaññādhimuttīsu yaṃyaṃadhimuttikā suññatamukhādīsu vā yathā yathā nibbānaṃ adhimuttāti yathādhimuttā. “Nibbānaṃ adhimuttānaṃ, atthaṃ gacchanti āsavā”ti (dha. pa. 226) hi vuttaṃ. Ubhayañcetam pubbabhāgavasena veditabbā. Arahattappattito pubbeveva hi yathāvuttamadhimuccanaṃ, na parato. Tenāha bhagavā –

“Assaddho akataññū ca, sandhicchedo ca yo naro”tiādi. (dha. pa. 97).

“Yathāvimuttā”ti vā pāṭho, paññāvimuttiubhatobhāgavimuttīsu yaṃyaṃvimuttikāti attho. **Sappaññā**ti tihetukapaṭisandhipaññāya pārihārikapaññāya bhāvanāpaññāya cāti tividdhāyapi paññāya paññavanto. **Viharimsūti** tāya eva sappaññatāya yathāladhena phāsuvihārenea vasimsu. **Atanditā**ti analasā, atthitapaṭipattiyāṃ yathābalaṃ parahitapaṭipattiyāṃca uṭṭhānavantoti attho.

Ettha ca pana nāmagottaggaṇaṇena tesam therānaṃ pakāsapaññātabhāvaṃ dasseti. Dhammavihāraggaṇaṇena sīlasampadaṃ samādhisampadaṇca dasseti. “Yathādhimuttā sappaññā”ti iminā paññāsampadaṃ. “Atanditā”ti iminā sīlasampadādīnaṃ kāraṇabhūtaṃ vīriyasampadaṃ dasseti. “Yathānāmā”ti iminā tesam pakāsanaṃnāmataṃ dasseti. “Yathāgottā”ti iminā saddhānusārīdhammānusārīgottasampattisamudāgamaṃ, “yathādhammavihārino”tiādinā sīlasamādhipaññāvimuttivimuttiñānadassanaṃ sampattisamudāgamaṃ, “atanditā”ti iminā evaṃ atthitasampattiyāṃ ṭhitānaṃ parahitapaṭipattim dasseti.

Atha vā “yathānāmā”ti idaṃ tesam therānaṃ garūhi gahitanāmadheyyadassanaṃ samaññāmatkittanato. “Yathāgottā”ti idaṃ kulaputtabhāvadassanaṃ kulāpadesa kittanato. Tena nesaṃ saddhāpabbajitabhāvaṃ dasseti. “Yathādhammavihārino”ti idaṃ caraṇasampattidassanaṃ sīlasamvarādīhi samaṅgībhāvadīpanato. “Yathādhimuttā sappaññā”ti idaṃ nesaṃ vijjāsampattidassanaṃ āsavakkhayapariyosānāya ñāṇasampattiyā adhiḡamaparidīpanato. “Atanditā”ti idaṃ vijjācaraṇasampattīnaṃ adhiḡamūpāyadassanaṃ. “Yathānāmā”ti vā iminā tesam pakāsanaṃnāmataṃyeveva dasseti. “Yathāgottā”ti pana iminā pacchimacakkadvayasampattim dasseti. Na hi sammāappaṇihitattano pubbe ca akatapuññassa saddhānusārīdhammānusārīno gottasampattisamudāgamo sambhavati. “Yathādhammavihārino”ti iminā tesam purimacakkadvayasampattim dasseti. Na hi appatirūpe dese vasato sappurisūpanissayarahitassa ca tādisā guṇavisesā sambhavanti. “Yathādhimuttā”ti iminā saddhammasavanasampadāsamāyogaṃ dasseti. Na hi paratoghosena vinā sāvakanāṃ saccasampāṭivedho sambhavati. “Sappaññā atanditā”ti iminā yathāvuttassa guṇavisesassa abyabhicārihetuṃ dasseti ñāyārambhadassanato.

Aparo nayo – “yathāgottā”ti ettha gottakittanena tesam therānaṃ yonisomanasikārasampadaṃ dasseti yathāvutttagottasampannassa yonisomanasikārasambhavato. “Yathādharmavīhārino”ti ettha dhammavīhāraggaḥaṇena saddhammasavanāsampadaṃ dasseti saddhammasavanena vinā tadabhāvato. “Yathādhimuttā”ti iminā matthakappattaṃ dhammānudhammapaṭipadaṃ dasseti. “Sappaññā”ti iminā sabbattha sampajānakāritam. “Atanditā”ti iminā vuttanayena attahitasampattiṃ paripūretvā ṭhitānaṃ paresam hitasukhāvahāya paṭipattiyam akilāsubhāvaṃ dasseti. Tathā “yathāgottā”ti iminā nesam saraṇagamanāsampadā dassitā saddhānusārīgottakittanato. “Yathādharmavīhārino”ti iminā silakkhandhapubbāṅgamo samādhikkhandho dassito. “Yathādhimuttā sappaññā”ti iminā paññakkhandhādayo. Saraṇagamaṇaṇa sāvakaḡuṇānaṃ ādī, samādhī majjhe, paññā pariyoṣānanti ādimajjhapariyoṣānadassanena sabbepi sāvakaḡuṇā dassitā honti.

Īdisī pana ḡuṇavibhūti yāya sammāpaṭipattiyā tehi adhigatā, tam dassetuṃ “**tattha tattha vipassitvā**”tiādī vuttaṃ. **Tattha tatthā**ti tesu tesu araṇṇarukkhamūlapabbatādīsū vivittasenāsanesu. Tattha tatthāti vā tasmim tasmim udānādikāle. **Vipassitvā**ti sampassitvā. Nāmarūpavavattāpanapaccayapariggahehi diṭṭhivisuddhikaṅkhāvitarāṇavisuddhiyo sampādetvā kalāpasammasanādikkamena pañcamam visuddhim adhigantvā paṭipadāññānadassanavisuddhiyā matthakam pāpanavasena vipassanam ussukkāpetvā **phusitvā**ti patvā sacchikatvā. **Accutam padanti** nibbānaṃ. Tañhi sayam acavanadhammatā adhigatānaṃ accutihetubhāvato ca natthi ettha cutīti “accutam”. Saṅkhatadhammehi asammissabhāvātāya tadatthikehi paṭipajjitabbatāya ca “pada”nti ca vuccati. **Katantanti** katassa antam. Yo hi tehi adhigato ariyamaggo, so attano paccayehi uppāditattā kato nāma. Tassa pana pariyoṣānabhūtam phalam katantoti adhippetam. Tam katantam aggaphalam. Atha vā paccayehi katattā nipphāditattā katā nāma saṅkhatadhammā, tannissaraṇabhāvato katanto nibbānaṃ. Tam katantam. **Paccavekkhantā**ti “adhigatam vata mayā ariyamaggādhigamena idam ariyaphalam, adhigatā asaṅkhatā dhātū”ti ariyaphalanibbānāni vimuttiññānadassanena paṭipattiṃ avekkhamānā. Atha vā saccasampāvedhavasena yam ariyena karaṇīyam pariññādisoḷasavidham kiccam aggaphale ṭhitena nipphāditattā pariyoṣāpitattā katam nāma, evam katam tam paccavekkhantā. Etena pahīnakilesapaccavekkhaṇam dassitam. Purimanayena pana itarapaccavekkhaṇānīti ekūnavīsati paccavekkhaṇāni dassitāni honti.

Imamatthanti ettha **imanti** sakalo theratherīgāthānaṃ attho attano itaresaṇca tattha sannipatitānaṃ dhammasaṅgāhakamahātherānaṃ buddhiyam viparivattamānatāya āsanno paccakkhoti ca katvā vuttaṃ. **Atthanti** “channā me kuṭikā”tiādīhi gāthāhi vuccamānaṃ attūpanāyikam parūpanāyikam lokiyalokuttarapaṭisaṃyuttaṃ attham. **Abhāsisunti** gāthābandhavasena kathesum, tamdīpaniyo idāni mayā vuccamānā tesam bhāvitattānaṃ gāthā attūpanāyikā suṇāthāti yojanā. Te ca mahātherā evam kathentā attano sammāpaṭipattipakāsanīhi gāthāhi sāsanaṃ ekantaniyyānikavibhāvanena parepi tattha sammāpaṭipattiyam niyojentīti etamattham dīpeti āyasmā dhammabhaṇḡāgāriko, tathā dīpento ca imāhi gāthāhi tesam thomaṇam tāsāṇca tesam vacanassa nidānabhāvena ṭhapanam ṭhānagatamevāti dassitīti daṭṭhabbam.

Nidānagāthāvaṇṇanā niṭṭhitā.

1. Ekakanipāto

1. Paṭhamavaggo

1. Subhūtittheragāthāvaṇṇanā

Idāni **channā me kuṭikā**tiādinayappavattānaṃ theragāthānaṃ atthavaṇṇanā hoti. Sā panāyam atthavaṇṇanā yasmā tāsam tāsam gāthānaṃ aṭṭhuppattiṃ pakāsetvā vuccamānā pakāṭā hoti suviññeyyā ca. Tasmā tattha tattha aṭṭhuppattiṃ pakāsetvā atthavaṇṇanaṃ karissāmāti.

Tattha **channā me kuṭikā**tigāthāya kā uppatti? Vuccate – ito kira kappasatasahassamatthake anuppanneyeva padumuttare bhagavati lokanāthe haṃsavatīnāmake nagare aññatarassa brāhmaṇamahāsālassa eko putto uppajji. Tassa “nandamāṇavo”ti nāmaṃ akāmsu. So vayappatto tayo vede uggaṇhitvā tattha sāraṃ apassanto attano parivārabhūtehi catucattālīsāya māṇavakahashehi saddhiṃ pabbatapāde isipabbajjaṃ pabbajitvā aṭṭha samāpattiyo pañca ca abhiññāyo nibbatesi. Antevāsikānampi kammaṭṭhānaṃ ācikkhi. Tepi na cireneva jhānalābhino ahesuṃ.

Tena ca samayena padumuttaro bhagavā loke uppajjitvā haṃsavatīnagaraṃ upanissāya viharanto ekadivasaṃ paccūsasamaye lokaṃ volokento nandatāpasassa antevāsikajaṭilānaṃ arahattūpanissayaṃ nandatāpasassa ca dvīhaṅgehi samannāgatassa sāvakaṭṭhānantarassa patthanaṃ disvā pātova sarīrapaṭijagganaṃ katvā pubbaṇhasamaye pattacīvaramādāya aññaṃ kañci anāmantetvā sīho viya ekacaro nandatāpasassa antevāsikesu phalāphalathāya gatesu “buddhabhāvaṃ me jānātū”ti passantasseva nandatāpasassa ākāso otarivā pathaviyaṃ paṭiṭṭhāsi. Nandatāpaso buddhānubhāvañceva lakkhaṇapāripūriṇca disvā lakkhaṇamante sammasitvā “imehi lakkhaṇehi samannāgato nāma agāraṃ ajjhāvasanto rājā hoti cakkavattī, pabbajanto loke vivatacchado sabbaññū buddho hoti. Ayaṃ purisājānīyo nissamsayaṃ buddhoti ñatvā paccuggamaṃ katvā, pañcapaṭiṭṭhitena vanditvā, āsanaṃ paññāpetvā, adāsi. Nisīdi bhagavā paññatte āsane. Nandatāpasopi attano anucchavikaṃ āsanaṃ gahetvā ekamantaṃ nisīdi.

Tasmīṃ samaye catucattālīsasahassajaṭilā paṇītapāṇīṭāni ojavantāni phalāphalāni gahetvā ācariyassa santikaṃ sampattā buddhānañceva ācariyassa ca nisinnāsanāṃ olokentā āhaṃsu – “ācariya, mayaṃ ‘imasmiṃ loke tumhehi mahantataro natthī’ti vicarāma, ayaṃ pana puriso tumhehi mahantataro maññe”ti. Nandatāpaso, “tātā, kiṃ vadetha, sāsapena saddhiṃ aṭṭhasaṭṭhisatasahassayojanubbedhaṃ sineruṃ upametuṃ icchatha, sabbaññūbuddhena saddhiṃ mā maṃ upamitthā”ti āha. Atha te tāpasā “sace ayaṃ orako abhavissa, na amhākaṃ ācariyo evaṃ upamaṃ āhareyya, yāva mahā vatāyaṃ purisājānīyo”ti pādesu nipatitvā sirasā vandimsu. Atha te ācariyo āha – “tātā, amhākaṃ buddhānaṃ anucchaviko deyyadhammo natthi, bhagavā ca bhikkhācāraṇāyaṃ idhāgato, tasmā mayaṃ yathābalaṃ deyyadhammaṃ dassāma, tumhe yaṃ yaṃ paṇītaṃ phalāphalaṃ ānītaṃ, taṃ taṃ āharathā”ti vatvā āharāpetvā hatthe dhovitvā sayāṃ tathāgatassa patte paṭiṭṭhāpesi. Satthārā phalāphale paṭiggahitamatte devatā dibbojaṃ pakkhipimsu. Tāpaso udakampi sayameva parissāvetvā adāsi. Tato bhojanakiccaṃ niṭṭhāpetvā nisinne satthari sabbe antevāsike pakkosivā satthu santike sārāṇīyaṃ kathaṃ kathento nisīdi. Satthā “bhikkhusaṅgho āgacchatū”ti cintesi. Bhikkhū satthu cittaṃ ñatvā satasahassamattā khīṇāsavā āgantvā satthāraṃ vanditvā ekamantaṃ aṭṭhaṃsu.

Nandatāpaso antevāsike āmantesi – “tātā, buddhānaṃ nisinnāsanampi nīcaṃ, samaṇasatasahassassapi āsanaṃ natthi, tumhehi ajja uḷāraṃ bhagavato bhikkhusaṅghassa ca sakkāraṃ kātuṃ vaṭṭati, pabbatapādato vaṇṇagandhasampannāni pupphāni āharathā”ti. Acinteyyattā iddhivisaṃyassa muhutteneva vaṇṇagandhasampannāni pupphāni āharitvā buddhānaṃ yojanappamāṇaṃ pupphāsaṃ paññāpesuṃ. Aggasāvakaṇaṃ tigāvutaṃ, sesabhikkhūnaṃ aḍḍhayaṃjanikādibhedhaṃ, saṅghanavakassa usabhamattaṃ ahoṣi. Evaṃ paññātesu āsanesu nandatāpaso tathāgatassa purato añjaliṃ paggayha ṭhito, “bhante, mayhaṃ dīgharattaṃ hitāya sukhāya imaṃ pupphāsaṃ abhiruṭṭhā”ti āha. Nisīdi bhagavā pupphāsane. Evaṃ nisinne satthari satthu ākāraṃ ñatvā bhikkhū attano attano pattāsane nisīdīmsu. Nandatāpaso mahantaṃ pupphachattaṃ gahetvā tathāgatassa matthake dhārento aṭṭhāsi. Satthā “tāpasānaṃ ayaṃ sakkāro mahapphalo hotū”ti nirodhasamāpattiṃ samāpajji. Satthu samāpanabhāvaṃ ñatvā bhikkhūpi samāpajjīmsu. Tathāgate sattāhaṃ nirodhaṃ samāpajjitvā nisinne antevāsikā bhikkhācāraṇāle sampatte vanamūlaphalāphalaṃ paribhuñjitvā sesakāle buddhānaṃ añjaliṃ paggayha tiṭṭhanti. Nandatāpaso pana bhikkhācārampi āgantvā pupphachattaṃ dhārento sattāhaṃ pītisukheneva vītināmeti.

Satthā nirodhato vuṭṭhāya araṇavihāriaṅgena dakkhiṇeyyaṅgena cāti dvīhi aṅgehi samannāgataṃ ekaṃ sāvakaṃ “isigaṇassa pupphāsanānumodanaṃ karohī”ti āṇāpesi. So cakkavattirañño santikā

paṭiladdhamahālābho mahāyodho viya tuṭṭhamānaso attano visaye ṭhatvā tepiṭakaṃ buddhavacanaṃ sammasitvā anumodanaṃ akāsi. Tassa desanāvasāne satthā sayamaṃ dhammaṃ desesi. Desanāpariyosāne sabbe catucattālīsasahassatāpasā arahattaṃ pāpuṇiṃsu. Satthā “etha, bhikkhavo” ti hatthaṃ pasāresi. Tesamaṃ tāvadeva kesamassu antaradhāyi. Aṭṭha parikkhārā kāye paṭimukkāva ahesuṃ saṭṭhivassattherā viya satthāraṃ parivārayiṃsu. Nandatāpaso pana vikkhittacittatāya viśesaṃ nādhigacchi. Tassa kira araṇavihārittherassa santike dhammaṃ sotuṃ āradhakālato paṭṭhāya “aho vatāhampi anāgate uppajjanakabuddhassa sāsane iminā sāvakena laddhadhuraṃ labheyya” nti cittaṃ udapādi. So tena parivittakkena maggaphalapaṭivedhaṃ kātuṃ nāsakkhi. Tathāgataṃ pana vanditvā sammukhe ṭhatvā āha – “bhante, yena bhikkhunā isigaṇassa pupphāsanaṇumodanā katā, ko nāmāyaṃ tumhākaṃ sāsane” ti. “Araṇavihāriaṅge dakkhiṇeyyaṅge ca etadaggaṃ patto eso bhikkhū” ti. “Bhante, yvāyaṃ mayā sattāhaṃ pupphachattaṃ dhārentena sakkāro kato, tena adhikārena na aññaṃ sampattiṃ patthemī, anāgate pana ekassa buddhassa sāsane ayaṃ thero viya dvīhaṅgehi samannāgato sāvako bhaveyya” nti patthanamakāsi.

Satthā “samijjhissati nu, kho imassa tāpasassa patthanā” ti anāgataṃsaññaṃ pesetvā olokento kappasatasahassaṃ atikkamitvā samijjhanakabhāvaṃ disvā nandatāpasamaṃ āha – “na te ayaṃ patthanā moghā bhavissati, anāgate kappasatasahassaṃ atikkamitvā gotamo nāma buddho uppajjissati, tassa santike samijjhissati” ti vatvā dhammakathaṃ kathetvā bhikkhusaṅghaparivuto ākāsaṃ pakkhandi. Nandatāpaso yāva cakkhupathasamatikkamā satthāraṃ bhikkhusaṅghaṅca uddissa añjaliṃ paggayha aṭṭhāsi. So aparabhāge kālena kālaṃ satthāraṃ upasaṅkamitvā dhammaṃ suṇi. Aparihīnājjhānova kālaṅkatvā brahmaloke nibbato. Tato pana cuto aparānipi pañca jātisatāni pabbajitvā āraññaṃ ahoṣi. Kassapasammāsambuddhakālepi pabbajitvā āraññaṃ hutvā gatapaccāgatavattaṃ pūresi. Etaṃ kira vattaṃ aparipūretvā mahāsāvakaṃbhāvaṃ pāpuṇantā nāma natthi. Gatapaccāgatavattaṃ pana āgamaṭṭhakathāsu vuttanayeneva veditabbaṃ. So vīsativassasahassāni gatapaccāgatavattaṃ pūretvā kālaṅkatvā kāmāvacaradevaloke tāvatīṃsabhavane nibbatti. Vuttañhetamaṃ **apadāne** (apa. thera 1.3.151)

“Himavantassāvidūre, nisabho nāma pabbato;
Assamo sukato mayhaṃ, paṇṇasālā sumāpitā.

“Kosiyo nāma nāmena, jaṭilo uggatāpano;
Ekākiyo adutiyo, vasāmi nisabhe tadā.

“Phalaṃ mūlaṅca paṇṇaṅca, na bhuñjāmi ahaṃ tadā;
Pavattaṃva supātāhaṃ, upajīvāmi tāvade.

“Nāhaṃ kopemi ājīvaṃ, cājamānopi jīvitamaṃ;
Ārādhemi sakaṃ cittaṃ, vivajjemi anesanaṃ.

“Rāgūpasamaṃhitamaṃ cittaṃ, yadā uppajjate mama;
Sayamaṃva paccavekkhāmi, ekaggo taṃ damemahaṃ.

“Rajjase rajjanīye ca, dussanīye ca dussase;
Muyhase mohanīye ca, nikkhamassu vanā tuvaṃ.

“Visuddhānaṃ ayaṃ vāso, nimmalānaṃ tapassinaṃ;
Mā kho visuddhaṃ dūsesi, nikkhamassu vanā tuvaṃ.

“Agāriko bhavitvāna, yadā puttaṃ labhissasi;
Ubhopi mā virādhesi, nikkhamassu vanā tuvaṃ.

“Chavālātaṃ yathā kaṭṭhaṃ, na kvaci kiccakāraṃ;
Neva gāme araṇṇe vā, na hi taṃ kaṭṭhasammaṃtaṃ.

“Chavālātūpamo tvaṃ si, na gihī nāpi saṇṇato;
Ubhato muttako ajja, nikkhamassu vanā tuvaṃ.

“Siyā nu kho tava etaṃ, ko pajānāti te idaṃ;
Saddhādhuraṃ vahisi me, kosajjabahulāya ca.

“Jigucchissanti taṃ viññū, asuciṃ nāgariko yathā;
Ākaḍḍhitvāna isayo, codayissanti taṃ sadā.

“Taṃ viññū pavadissanti, samatikkantasāsanam;
Saṃvāsaṃ alabhanto hi, kathaṃ jīvihisi tuvaṃ.

“Tidhāpabhinnaṃ mātaṅgaṃ, kuñjaraṃ saṭṭhihāyanaṃ;
Balī nāgo upagantvā, yūthā nīharate gajaṃ.

“Yūthā vinissaṭo santo, sukhaṃ sātaṃ na vindati;
Dukkhiro vimano hoti, pajjhāyanto pavedhati.

“Tatheva jaṭilā tampi, nīharissanti dummatim;
Tehi tvaṃ nissaṭo santo, sukhaṃ sātaṃ na lacchasi.

“Divā vā yadi vā rattim, sokasallasamappito;
Dayhati pariḷāhena, gajo yūthāva nissaṭo.

“Jātarūpaṃ yathā kūṭaṃ, neva jhāyati katthaci;
Tathā silavīhino tvaṃ, na jhāyissasi katthaci.

“Agāraṃ vasamānopi, kathaṃ jīvihisi tuvaṃ;
Mattikaṃ pettikañcāpi, natthi te nihitaṃ dhanam.

“Sayam kammaṃ karitvāna, gatte sedaṃ pamocayaṃ;
Evaṃ jīvihisi gehe, sādhu te taṃ na rucati.

“Evāhaṃ tattha vāremi, saṃkilesagataṃ manam;
Nānādharmakathaṃ katvā, pāpā cittaṃ nivārayim.

“Evaṃ me viharantassa, appamādavihārino;
Tiṃsavassasahassāni, vipine me atikkamuṃ.

“Appamādarataṃ disvā, uttamattaṃ gavesakaṃ;
Padumuttarasambuddho, āgacchi mama santikaṃ.

“Timbarūsakavaṇṇābhho, appameyyo anūpamo;
Rūpenāsadiso buddho, ākāse caṅkamī tadā.

“Suphullo sālārājāva, vijjūvabbhaghanantare;
Ñānenāsadiso buddho, ākāse caṅkamī tadā.

“Sīharājāvasambhīto, gajarājāva dappito;
Lāsīto byaggharājāva, ākāse caṅkamī tadā.

“Siṅghīnikkhasavaṇṇābho, khadiraṅgārasannibho;
Maṇi yathā jotiraso, ākāse caṅkamī tadā.

“Visuddhakilāsanibho, puṇṇamāyeva candimā;
Majjhanhikeva sūriyo, ākāse caṅkamī tadā.

“Disvā nabhe caṅkamantaṃ, evaṃ cintesaṃ tadā;
Devo nu kho ayaṃ satto, udāhu manujo ayaṃ.

“Na me suto vā diṭṭho vā, mahiyā ediso naro;
Api mantapadaṃ atthi, ayaṃ satthā bhavissati.

“Evāhaṃ cintayitvāna, sakaṃ cittaṃ pasādayiṃ;
Nānāpupphaṅca gandhaṅca, sannipātesahaṃ tadā.

“Pupphāsaṇaṃ paññāpetvā, sādhuṇṇaṃ manoramaṃ;
Narasārathinaṃ aggaṃ, idaṃ vacanamabravīṃ.

“Idaṃ me āsaṇaṃ vīra, paññattaṃ tavanucchavaṃ;
Hāsayaṃto mamaṃ cittaṃ, nisīda kusumāsane.

“Nisīdi tattha bhagavā, asambhītova kesarī;
Sattarattindivaṃ buddho, pavare kusumāsane.

“Namassamāno aṭṭhāsīṃ, sattarattindivaṃ ahaṃ;
Vuṭṭhahitvā samādhimhā, satthā loke anuttaro;
Mama kammaṃ pakittento, idaṃ vacanamabravi.

“Bhāvehi buddhānussatiṃ, bhāvanānāmanuttaraṃ;
Imaṃ satīṃ bhāvayitvā, pūrayissasi māsaṃ.

“Tīṃsakappasahassāni, devaloke ramissasi;
Asītikkhattaṃ devinda, devarajjaṃ karissasi;
Sahasakkhattaṃ cakkavattī, rājā raṭṭhe bhavissasi.

“Padesarajjaṃ vipulaṃ, gaṇanāto asaṅkhiyaṃ;
Anubhossasi taṃ sabbaṃ, buddhānussatiyā phalaṃ.

“Bhavābhava saṃsaranto, mahābhogaṃ labhissasi;
Bhoge te ūnatā natthi, buddhānussatiyā phalaṃ.

“Kappasatasahassamhi, okkākakulasambhavo;
Gotamo nāma gottena, satthā loke bhavissati.

“Asītikotiṃ chaḍḍetvā, dāse kammaṃ bahū;
Gotamassa bhagavato, sāsane pabbajissasi.

“Ārādhayitvā sambuddhaṃ, gotamaṃ sakyapuṅgavaṃ;
Subhūti nāma nāmena, hessasi satthu sāvako.

“Bhikkhusaṅghe nisīditvā, dakkhiṇeyyaguṇamhi taṃ;
Tathāraṇavihāre ca, dvīsu agge ṭhappessasi.

“Idaṃ vatvāna sambuddho, jalajuttamanāmaṃ;
Nabhaṃ abbhuggamī vīro, haṃsarājāva ambare.

“Sāsito lokanāthena, namassitvā tathāgataṃ;
Sadā bhāvēmi mudito, buddhānussatimuttamaṃ.

“Tena kammaṃ sukateṇa, cetanāpaṇidhīhi ca;
Jahitvā mānuṣaṃ dehaṃ, tāvatimsaṃ agacchamaṃ.

“Asītikkhattuṃ devindo, devarajjamakārayiṃ;
Sahassakkhattuṃ rājā ca, cakkavattī ahasamaṃ.

“Padesarajjaṃ vipulaṃ, gaṇanāto asaṅkhiyaṃ;
Anubhomi susampattiṃ, buddhānussatiyā phalaṃ.

“Bhavābhava saṃsaranto, mahābhogaṃ labhāmamaṃ;
Bhoge me ūnatā natthi, buddhānussatiyā phalaṃ.

“Satasahassito kappe, yaṃ kammamakariṃ tadā;
Duggatiṃ nābhijānāmi, buddhānussatiyā phalaṃ.

“Paṭisambhidā catasso, vimokkhāpi ca aṭṭhime;
Chalābhiññā sacchikatā, kataṃ buddhassa sāsana’nti. –

Itthaṃ sudaṃ āyasmā subhūtithero imā gāthāyo abhāsithāti.

Evamaṃ pana so tāvatimsabhavane aparāparaṃ uppajjanavasena dibbasampattiṃ anubhavitvā tato cuto manussaloke anekasatakkhattuṃ cakkavattirājā ca padesarājā ca hutvā ulāraṃ manussasampattiṃ anubhavitvā atha amhākaṃ bhagavato kāle sāvattiiyaṃ sumanasetṭhissa gehe anāthapiṇḍikassa kaniṭṭho hutvā nibbatti “**subhūti**”tissa nāmaṃ ahoṣi.

Tena ca samayena amhākaṃ bhagavā loke uppajjitvā pavattavaradhammacakko anupubbena rājagahaṃ gantvā tattha veḷuvanapaṭiggahaṇādinā lokānuggahaṃ karonto rājagahaṃ upanissāya sītavane viharati. Tadā anāthapiṇḍiko seṭṭhi sāvattiiyaṃ uṭṭhānakabhaṇḍaṃ gahetvā attano sahāyassa rājagahasetṭhino gharaṃ gato buddhuppādaṃ sutvā sathhāraṃ sītavane viharantaṃ upasaṅkamitvā paṭhamadassaneneva sotāpattiṃphale patiṭṭhāya sathhāraṃ sāvattiiyaṃ āgamanatthāya yācitvā tato pañcattālīsajoyane magge yojane yojane satasahassapariccāgena vihāre patiṭṭhāpetvā sāvattiiyaṃ rājāmānena aṭṭhakarīsappamaṇaṃ jetassa rājakumārassa uyyānabhūmiṃ koṭisanthārena kiṇitvā tattha bhagavato vihāraṃ kāretvā adāsi. Vihārapariggahaṇādivase ayaṃ subhūtikūṭumbiko anāthapiṇḍikasetṭhinā saddhiṃ gantvā dhammaṃ suṇanto saddhaṃ paṭilabhitvā pabbaji. So upasampajjitvā dve mātikā paguṇā katvā kammaṭṭhānaṃ kathāpetvā araṇṇe samaṇadhammaṃ karonto mettājhānapādaṃ vipassanaṃ vaḍḍhetvā arahattaṃ pāpuṇi. So dhammaṃ desento yasmā sathhārā desitanīyāmena anodissakaṃ katvā dhammaṃ deseti. Tasmā araṇavihārīnaṃ aggo nāma jāto. Piṇḍāya caranto ghare ghare mettājhānaṃ samāpajjitvā vuṭṭhāya bhikkhaṃ paṭiggaṇhāti “evamaṃ dāyakaṇaṃ mahapphalaṃ bhavissati”ti. Tasmā dakkhiṇeyyānaṃ aggo nāma jāto. Tenāha bhagavā – “etadaggaṃ,

bhikkhave, mama sāvakaṇaṃ bhikkhūnaṃ araṇavihārīnaṃ yadidaṃ subhūti, dakkhiṇeyyānaṃ yadidaṃ subhūti”ti (a. ni. 1.198, 201). Evamayaṃ mahāthero arahatte patitṭhāya attanā pūritapāramīnaṃ phalassa matthakaṃ patvā loke abhiññāto abhilakkhito hutvā bahujanahitāya janapadacārikaṃ caranto anupubbena rājagahaṃ agamāsi.

Rājā bimbisāro therassa āgamaṇaṃ sutvā upasaṅkamitvā vanditvā “idheva, bhante, vasathā”ti vatvā “nivāsanaṭṭhānaṃ karissāmī”ti pakkanto vissari. Thero senāsaṇaṃ alabhanto abbhokāse vītināmesi. Therassa ānubhāvena devo na vassati. Manussā avuṭṭhitāya upaddutā rañño nivesanadvāre ukkuṭṭhimakaṃsu. Rājā “kena nu kho kāraṇena devo na vassatī”ti vīmaṃsanto “therassa abbhokāsavāsena maññe na vassatī”ti cintetvā tassa paṇṇakuṭiṃ kārāpetvā “imissā, bhante, paṇṇakuṭiyā vasathā”ti vatvā vanditvā pakkāmi. Thero kuṭikaṃ pavisitvā tiṇasanthārake pallaṅkena nisīdi. Tadā pana devo thokaṃ thokaṃ phusāyati, na sammā dhāraṃ anuppaveccati. Atha thero lokassa avuṭṭhikabhayaṃ visamitukāmo attano ajjhattikabāhiravatthukassa parissayassa abhāvaṃ pavedento –

1. “Channā me kuṭikā sukhā nivātā, vassa deva yathāsukhaṃ;
Cittaṃ me susamāhitaṃ vimuttaṃ, ātāpī viharāmi vassa devā”ti. –

Gāthamāha.

Tattha **channa**-saddo tāva “channā sā kumārikā imassa kumārakassa” (pārā. 296) “nacchannaṃ nappatirūpa”ntiādīsu (pārā. 383) patirūpe āgato. “Channaṃ tveva, phagguṇa, phassāyatanāna”ntiādīsu vacanaviṣiṭṭhe saṅkhyāvisese. “Channamativassati, vivaṭṭaṃ nātivassatī”tiādīsu (udā. 45; cūlava. 385) gahaṇe. “Kyāhaṃ te nacchannopi karissāmī”tiādīsu nivāsanapārūpane “āyasmā channo anācāraṃ ācaratī”tiādīsu (pārā. 424) paññattiyā. “Sabbacchannaṃ sabbapariicchannaṃ (pāci. 52, 54), channā kuṭi āhito ginī”ti (su. ni. 18) ca ādīsu tiṇādīhi chādane. Idhāpi tiṇādīhi chādaneveva daṭṭhabbo, tasmā tiṇena vā paṇṇena vā channā yathā na vassati vassodakapataṇaṃ na hoti na ovassati, evaṃ sammadeva chādītāti attho.

Me-saddo “kicchena me adhigataṃ, halaṃ dāni pakāsitu”ntiādīsu (mahāva. 8; dī. ni. 2.65; ma. ni. 1.281; 2.337; saṃ. ni. 1.172) karaṇe āgato, mayāti attho. “Tassa me, bhante, bhagavā saṃkhittena dhammaṃ desetū”tiādīsu (saṃ. ni. 3.182; a. ni. 4.257) sampadāne, mayhanti attho. “Pubbeva me, bhikkhave, sambodhā anabhisambuddhassa bodhisattasseva sato”ādīsu (ma. ni. 1.206; saṃ. ni. 4.14) sāmīatthe āgato. Idhāpi sāmīatthe eva daṭṭhabbo, mamāti attho. Kiñcāpi khīṇāsavānaṃ mamāyitabbaṃ nāma kiñci natthi lokadhammehi anupalittabhāvato, lokasamaññāvasena pana tesampi “ahaṃ mamā”ti vohāramattaṃ hoti. Tenāha bhagavā – “kinti me sāvakā dhammāyādā bhavēyyuṃ, no āmisadāyādā”ti (ma. ni. 1.29).

Kuṭikāti pana mātukucchipi karajakāyopi tiṇādicchadano patissayopi vuccati. Tathā hi –

“Mātaraṃ kuṭikaṃ brūsi, bhariyaṃ brūsi kulāvakaṃ;
Putte santānake brūsi, taṇhā me brūsi bandhana”nti. (saṃ. ni. 1.19) –

Ādīsu mātukucchi “kuṭikā”ti vuttā.

“Aṭṭhikaṅkalakuṭike, maṃsanhārupasibbite;
Dhiratthu pūre duggandhe, paragatte mamāyasī”ti. (theragā. 1153) –

Ādīsu kesādisamūhabhūto karajakāyo. “Kassapassa bhagavato bhagini kuṭi ovassati” (ma. ni. 2.291) “kuṭi nāma ullittā vā hoti avalittā vā”tiādīsu (pārā. 349) tiṇachadanapatissayo. Idhāpi so eva veditabbo paṇṇasālāya adhippetattā. Kuṭi eva hi kuṭikā, apākaṭakuṭi “kuṭikā”ti vuttā.

Sukha-saddo pana “vipiṭṭhikatvāna sukhaṃ dukhañca, pubbeva ca somanassadomanassa”ntiādīsu (su. ni. 67) sukhavedanāyaṃ āgato. “Sukho buddhānamuppādo, sukhā saddhammadesanā”tiādīsu (dha. pa. 194) sukhamūle. “Sukhassetam, bhikkhave, adhivacanaṃ yadidaṃ puññāni”tiādīsu (a. ni. 7.62; itivu. 22) sukhahetumhi. “Yasmā ca, kho, mahāli, rūpaṃ sukhaṃ sukhānupatitaṃ sukhāvakkanta”ntiādīsu (saṃ. ni. 3.60) sukhārammaṇe, “diṭṭhadhammasukhavihārā ete, cunda, ariyassa vinaye”tiādīsu (ma. ni. 1.82) abyāpajje. “Nibbānaṃ paramaṃ sukha”ntiādīsu (ma. ni. 2.215; dha. pa. 203-204) nibbāne. “Yāvañcidaṃ, bhikkhave, na sukaraṃ akkhānena pāpuṇituṃ yāva sukhā saggā”tiādīsu (ma. ni. 3.225) sukhappaccayaṭṭhāne. “Sovaggikaṃ sukhavipākaṃ saggasaṃvattanika”ntiādīsu (dī. ni. 1.163; saṃ. ni. 1.130) iṭṭhe, piyamanāpeti attho. Idhāpi iṭṭhe sukhappaccaye vā daṭṭhabbo. Sā hi kuṭi anto bahi ca manāpabhāvena sampādītā nivāsanaphāsutāya “sukhā”ti vuttā. Tathā nātisītanātiuphatāya utusukhasampattiyogena kāyikacetasikasukhassa paccayabhāvato.

Nivātāti avātā, phusitaggaḷapihitavātapānattā vātaparissayarahitāti attho. Idaṃ tassā kuṭikā sukhabhāvavibhāvanaṃ. Savāte hi senāsane utusappāyo na labbhati, nivāte so labbhatīti. **Vassā**ti pavassa sammā dhāraṃ anuppaveccha. **Devā**ti ayaṃ **deva**-saddo “imāni te, deva, caturāsīti nagarasahassāni kusavatīrājadhānippamukhāni, ettha, deva, chandaṃ janehi jīvite apekkha”ntiādīsu (dī. ni. 2.266) sammutideve khattiye āgato. “Cātumahārājikā devā vaṇṇavanto sukhabahulā”tiādīsu (dī. ni. 3.337) upapattidevesu. “Tassa devātiddevassa, sāsanaṃ sabbadassino”tiādīsu visuddhidevesu. Visuddhidevānañhi bhagavato atidevabhāve vutte itaresaṃ vutto eva hoti. “Viddhe vigatavalāhake deve”tiādīsu (ma. ni. 1.486; saṃ. ni. 1.110; itivu. 27) ākāse. “Devo ca kālena kālaṃ na sammā dhāraṃ anuppavecchatī”tiādīsu (a. ni. 4.70) meghe pajjunne vā. Idhāpi meghe pajjunne vā daṭṭhabbo. Vassāti hi te āṇāpento thero ālapati. **Yathāsukhanti** yathārucim. Tava vassanena mayhaṃ bāhiro parissayo natthi, tasmā yathākāmaṃ vassāti vassūpajjivisatte anuggaṇhanto vadati.

Idāni abbhantare parissayābhāvaṃ dassento “**citta**”ntiādīmāha. Tattha **cittaṃ me susamāhitanti** mama cittaṃ suṭṭhu ativiya sammā sammadeva ekaggabhāvena ārammaṇe ṭhapitaṃ. Tañca kho na nīvaraṇādivikkhambhanamattena; api ca kho vimuttaṃ orambhāgiyauddhaṃbhāgiyasaṅgahehi sabbasaṃyojanehi sabbakilesadhammato ca vīsesena vimuttaṃ, samucchadappahānavasena paṭipassaddhippahānavasena te pajahitvā ṭhitanti attho. **Ātāpī**ti vīriyavā. Phalasaṃpattiatthaṃ vipassanārambhavasena diṭṭhadhammasukhavihāratthañca āradhāvīriyo hutvā viharāmi, dibbavīhārādīhi attabhāvaṃ pavattemi, na pana kilesappahānatthaṃ, pahātābbasseva abhāvato adhippāyo. “Yathā pana bāhiraparissayābhāvena, deva, mayā tvaṃ vassane niyojito, evaṃ abbhantaraparissayābhāvenapī”ti dassento punapi “**vassa, devā**”ti āha.

Aparo nayo **channā**ti chādītā pihitā. **Kuṭikā**ti attabhāvo. So hi “anekāvayavassa samudāyassa avijjānīvaraṇassa, bhikkhave, puggalassa taṇhāsaṃyuttassa ayañceva kāyo samudāgato, bahiddhā ca nāmarūpa”ntiādīsu (saṃ. ni. 2.19) kāyoti āgato. “Siñca, bhikkhu, imaṃ nāvaṃ, sittā te lahumessatī”tiādīsu (dha. pa. 66) nāvāti āgato. “Gahakāraka diṭṭhosi, gahakūṭaṃ visaṅkhata”nti (dha. pa. 154) ca ādīsu gahanti āgato. “Satto guhāyaṃ bahunābhichanno, tiṭṭhaṃ naro mohanasmim pagālho”tiādīsu (su. ni. 778) guhāti āgato. “Nelaṅgo setapacchādo, ekāro vattatī ratho”tiādīsu (udā. 65) rathoti āgato. “Puna gehaṃ na kāhasī”tiādīsu (dha. pa. 154) gehanti āgato. “Vivaṭā kuṭi nibbuto ginī”tiādīsu (su. ni. 19) kuṭīti āgato. Tasmā idhāpi so “kuṭikā”ti vutto. Attabhāvo hi kaṭṭhādīni paṭicca labbhamānā gehanāmikā kuṭikā viya aṭṭhiādīsaññite pathavīdhātuādike phassādike ca paṭicca labbhamāno “kuṭikā”ti vutto, cittamakkaṭassa nivāsabhāvato ca. Yathāha –

“Aṭṭhikaṅkalakuṭivesā, makkaṭāvasatho iti;
Makkaṭo pañcadvārāya, kuṭikāya pasakkiya;
Dvārenānupariyāti, ghaṭṭayanto punappuna”nti ca.

Sā panesā attabhāvakuṭikā therassa tiṇṇaṃ channaṃ aṭṭhannañca asaṃvaradvārānaṃ vasena samati

vijjhanakassa rāgādiavassutassa paññāya saṃvutattā sammadeva pihitattā “channā”ti vuttā. Tenāha bhagavā – “sotānaṃ saṃvaraṃ brūmi, paññāyete pidhīyare”ti (su. ni. 1041). Vuttanayena channattā eva kilesadukkhābhāvato nirāmisasukhasamaṅgītāya ca **sukhā** sukhappattā, tato eva ca **nivātā** nihataṃāmadathambhasārāmbhatāya nivātavuttikā. Ayañca nayo “mayhaṃ na saṃkilesadhammaṃ saṃvaraṇamattena siddho, atha kho aggamaggasamādhiṇā suṭṭhu samāhitacittatāya ceva aggamaggapaññāya sabbasaṃyojanehi vippamuttacittatāya cā”ti dassento āha “**cittaṃ me susamāhitaṃ vimutta**”nti. Evambhūto ca “idānāhaṃ katakaraṇīyo”ti na apposukko homi, atha kho **ātāpī viharāmi**, sadevakassa lokassa hitasukhūpasamhāre ussāhajāto bhikkhācārakālepi anugharaṃ brahmavihāreṇeva viharāmi. Tasmā tvampī, **deva**, pajjunna mayhaṃ piyaṃ kātukāmatāyapi vassūpajīvīnaṃ sattānaṃ anukampāyapi **vassa** sammā dhāraṃ anuppaveccāti evamettha attho daṭṭhabbo.

Ettha ca thero “channā me kuṭikā sukhā nivātā”ti iminā lokiyalokuttarabhedam attano adhisīlasikkhaṃ dasseti. “Cittaṃ me susamāhita”nti iminā adhicitasikkhaṃ. “Vimutta”nti iminā adhipaññāsikkhaṃ. “Ātāpī viharāmi”ti iminā diṭṭhadhammasukhavihāraṃ. Atha vā “channā me kuṭikā sukhā nivātā”ti iminā animittavihāraṃ dasseti kilesavassapidhānamukhena niccādinimittugghāṇanadīpanato. “Cittaṃ me susamāhita”nti iminā appañihitavihāraṃ. “Vimutta”nti iminā suññatavihāraṃ. “Ātāpī viharāmi”ti iminā tesam tiṇṇaṃ viharānaṃ adhigamūpāyaṃ. Paṭhamena vā dosappahānaṃ, dutiyena rāgappahānaṃ, tatiyena mohappahānaṃ. Tathā dutiyena paṭhamadutiyeḥi vā dhammavihārasampattiyo dasseti. Tatiyena vimuttisampattiyo. “Ātāpī viharāmi”ti iminā parahitapaṭipattiyaṃ atanditabhāvaṃ dasseti daṭṭhabbaṃ.

Evam “yathānāmā”ti gāthāya vuttānaṃ dhammavihārādīnaṃ imāya gāthāya dassitattā tattha adassitesu nāmagottesu nāmaṃ dassetuṃ “**itthaṃ suda**”ntiādi vuttaṃ. Ye hi therā nāmamattena pākaṭā, te nāmena, ye gottamattena pākaṭā, te gottena, ye ubhayathā pākaṭā, te ubhayenapi dassissa”nti. Ayaṃ pana thero nāmena abhilakkhito, na tathā gottenāti “**itthaṃ sudaṃ āyasmā subhūti**”ti vuttaṃ. Tattha **itthanti** idaṃ pakāraṃ, iminā ākārenāti attho. **Sudanti** su idaṃ, sandhivasena ikāralopo. **Sūti** ca nipātamattaṃ, idaṃ gāthanti yojanā. **Āyasmāti** piyavacanametam garugāravasappatisavacanametam. **Subhūti**ti nāmakittanaṃ. So hi sarīrasampattiyāpi dassanīyo pāsādiko, guṇasampattiyāpi. Iti sundarāya sarīravayavavibhūtiyā silasampattiyādivibhūtiyā ca samannāgatattā subhūti paññāyittha silasārādithiraguṇayogato **thero**. **Abhāsithāti** kathesi. Kasmā panete mahātherā attano guṇe pakāseti? Iminā dīghena addhunā anadhigatapubbaṃ paramagambhīraṃ ativiya santam pañītam attanā adhigataṃ lokuttaradhammaṃ paccavekkhitvā pīivegasamussāhitaudānavasena sāsanaṃ niyyānikabhāvavibhāvanavasena ca paramappicchā ariyā attano guṇe pakāseti, yathā taṃ lokanātho bodhaneyyaajjhāsayasena “dasabalasamannāgato, bhikkhave, tathāgato catuvesārajjavīsārado”tiādinā attano guṇe pakāseti, evamayaṃ therassa aññābyākaraṇagāthā hotīti.

Paramatthadīpaniyā theragāthāsaṃvaṇṇanāya

Subhūtittheragāthāvaṇṇanā niṭṭhitā.

2. Mahākoṭṭhikattheragāthāvaṇṇanā

Upasantoti āyasmato mahākoṭṭhikattherassa gāthā. Tassa kā uppatti? Ayampi thero padumuttarassa bhagavato kāle haṃsavatīnagare mahābhogakule nibbattivā viññutaṃ patto mātāpitūnaṃ accayena kuṭumbaṃ saṅṭhapetvā gharāvāsaṃ vasanto ekadivasam padumuttarassa bhagavato dhammadesanākāle haṃsavatīnagaravāsike gandhamālādihatthe yena buddho yena dhammo yena saṅgho, tanninne tappoṇe tappabbhāre gacchante disvā mahājanena saddhiṃ upagato sathāraṃ ekaṃ bhikkhūṃ paṭisambhidāpattānaṃ aggaṭṭhāne ṭhapentaṃ disvā “ayaṃ kira imasmiṃ sāsane paṭisambhidāpattānaṃ aggo, aho vatāhampī ekassa buddhassa sāsane ayaṃ viya paṭisambhidāpattānaṃ aggo bhavēyya”nti cintetvā satthu desanāpariyosāne vuṭṭhitāya parisāya bhagavantaṃ upasaṅkamitvā, “bhante, sve

mayhaṃ bhikkhaṃ gaṇhathā’’ti nimantesi. Satthā adhivāsesi. So bhagavantaṃ abhivādetvā padakkhiṇaṃ katvā sakanivesanaṃ gantvā sabbarattiṃ buddhassa bhikkhusaṅghassa ca nisajjattḥānaṃ gandhadāmaṃālādāmaṃdīhi alaṅkaritvā paṇītaṃ khādanīyaṃ bhojanīyaṃ paṭiyādāpetvā tassā rattiyā accayena sake nivesane bhikkhusatasahassaparivāraṃ bhagavantaṃ vividhayāgukhajakaparivāraṃ nānārasasūpabyaṇjanaṃ gandhasālibhojanaṃ bhojetvā bhattakiccapariyosāne cintesi – ‘‘mahantaṃ, kho, ahaṃ ṭhānantaraṃ patthemī na kho pana mayhaṃ yuttaṃ ekadivasameva dānaṃ datvā taṃ ṭhānantaraṃ patthetum, anupaṭipāṭiyā satta divase dānaṃ datvā patthessāmi’’ti. So teneva niyāmena satta divase mahādānāni datvā bhattakiccapariyosāne dussakoṭṭhāgāraṃ vivarāpetvā uttamaṃ ticīvarappahonakaṃ sukhumavatthaṃ buddhassa pādāmūle ṭhapetvā bhikkhusatasahassassa ca ticīvaraṃ datvā tathāgataṃ upasaṅkamitvā, ‘‘bhante, yo so bhikkhu tumhehi ito sattamadivasamatthake etadagge ṭhapito, ahampi so bhikkhu viya anāgate uppajjanakabuddhassa sāsane pabbajitvā paṭisambhidāpattānaṃ aggo bhaveyya’’nti vatvā satthu pādāmūle nipajjitvā patthanaṃ akāsi. Satthā tassa patthanaṃ samijjhanabhāvaṃ disvā ‘‘anāgate ito kappasatasahassamatthake gotamo nāma buddho loke uppajjissati, tassa sāsane tava patthanaṃ samijjhissatī’’ti byākāsi. Vuttampi cetāṃ **apadāne** (apa. therā 2.54.221-250)

‘‘Padumuttaro nāma jino, sabbalokavidū muni;
Ito satasahassamhi, kappe uppajji cakkhumā.

‘‘Ovādako viññāpako, tāraṅko sabbapāṇinaṃ;
Desanākusalo buddho, tāresi janataṃ bahum.

‘‘Anukampako kāruṇiko, hitesī sabbapāṇinaṃ;
Sampatte titthiye sabbe, pañcasīle paṭiṭṭhapi.

‘‘Evaṃ nirākulaṃ āsi, suññataṃ titthiyehi ca;
Vicittaṃ arahantehi, vasībhūtehi tāḍibhi.

‘‘Ratanānaṭṭhapaññāsaṃ, uggato so mahāmuni;
Kaṅcanagghiyasaṅkāso, bāṭṭimsavaralakkhaṇo.

‘‘Vassasatasahassāni, āyu vijjati tāvade;
Tāvataṃ titthamāno so, tāresi janataṃ bahum.

‘‘Tadāhaṃ haṃsavatiyaṃ, brāhmaṇo vedapāragū;
Upecca sabbalokaggaṃ, assosiṃ dhammadešanaṃ.

‘‘Tadā so sāvakaṃ vīro, pabhinnamatigocaraṃ;
Atthe dhamme nirutte ca, paṭibhāne ca kovidaṃ.

‘‘Ṭhapesi etadaggamhi, taṃ sutvā mudito ahaṃ;
Sasāvakaṃ jinavaraṃ, sattāhaṃ bhojayiṃ tadā.

‘‘Dussehacchādayitvāna, sasissaṃ buddhisāgaraṃ;
Nipacca pādāmūlamhi, taṃ ṭhānaṃ patthayiṃ ahaṃ.

‘‘Tato avoca lokaggo, passathetaṃ dijuttamaṃ;
Vinataṃ pādāmūle me, kamalodarasappabhaṃ.

‘‘Buddhaseṭṭhassa bhikkhussa, ṭhānaṃ patthayate ayaṃ;
Tāya saddhāya cāgena, saddhammassavanena ca.

“Sabbattha sukhito hutvā, saṃsaritvā bhavābhavē;
Anāgatamhi addhāne, lacchasetam manoratham.

“Satasahassito kappe, okkākakulasambhavo;
Gotamo nāma gottena, satthā loke bhavissati.

“Tassa dhammesu dāyādo, oraso dhammanimmito;
Koṭṭhiko nāma nāmena, hessati satthu sāvako.

“Tam sutvā mudito hutvā, yāvajīvam tadā jinam;
Mettacitto paricarim, sato paññā samāhito.

“Tena kammavipākena, cetanāpaṇidhīhi ca;
Jahitvā mānusaṃ deham, tāvatimsamagacchaham.

“Satānaṃ tīṇikkhattuñca, devarajjamakārayim;
Satānaṃ pañcakkhattuñca, cakkavattī ahosaham.

“Padesarajjam vipulam, gaṇanāto asaṅkhiyam;
Sabbattha sukhito āsim, tassa kammaṃ vāhasā.

“Duve bhavē saṃsarāmi, devatte atha mānuse;
Aññaṃ gatiṃ na gacchāmi, suciṇṇassa idaṃ phalam.

“Duve kule pajāyāmi, khattiye atha brāhmaṇe;
Nīce kule na jāyāmi, suciṇṇassa idaṃ phalam.

“Pacchime bhavē sampatte, brahmabandhu ahosaham;
Sāvatthiyam vippakule, paccājāto mahaddhane.

“Mātā candavatī nāma, pitā me assalāyano;
Yadā me pitaram buddho, vinayī sabbasuddhiyā.

“Tadā pasanno sugate, pabbajim anagāriyam;
Moggallāno ācariyo, upajjhā sārisambhavo.

“Kesesu chijjamānesu, diṭṭhi chinnā samūlikā;
Nivāsento ca kāsāvam, arahattamapāpuṇim.

“Atthadhammaniruttīsu, paṭibhāne ca me mati;
Pabhinnā tena lokaggo, etadagge ṭhapesi maṃ.

“Asandiṭṭham viyākāsim, upatissena pucchito;
Paṭisambhidāsu tenāham, aggo sambuddhasāsane.

“Kilesā jhāpitā mayham, bhavā sabbe samūhatā;
Nāgo va bandhanam chetvā, viharāmi anāsavo.

“Svāgataṃ vata me āsi, mama buddhassa santike;
Tisso vijjā anuppattā, kataṃ buddhassa sāsanaṃ.

“Paṭisambhidā catasso, vimokkhāpi ca aṭṭhime;
Chalabhiññā sacchikatā, kataṃ buddhassa sāsana’’nti.

Evam so tattha tattha bhava puññañānasambhāraṃ sambharanto aparāparaṃ devamanussesu saṃsaranto imasmiṃ buddhuppāde sāvattiyāṃ brāhmaṇasippe nipphattiṃ gato ekadivasāṃ satthu santikaṃ gantvā dhammaṃ sutvā paṭiladdhasaddho pabbajitvā upasampannakālato paṭṭhāya vipassanāya kammaṃ karonto saha paṭisambhidāhi arahattaṃ patvā paṭisambhidāsu ciṅṅavasī hutvā abhiññāte abhiññāte mahāthere upasaṅkamitvā pañhaṃ pucchantopi dasabalaṃ upasaṅkamitvā pañhaṃ pucchantopi paṭisambhidāsuveva pañhaṃ pucchi. Evamayāṃ thero tattha katādhikāratāya ciṅṅavasībhāvena ca paṭisambhidāpattānaṃ aggo jāto. Atha naṃ satthā mahāvedallasuttaṃ (ma. ni. 1.449 ādayo) aṭṭhuppattiṃ katvā paṭisambhidāpattānaṃ aggaṭṭhāne ṭhapesi – “etadaggaṃ, bhikkhave, mama sāvakanāṃ bhikkhūnaṃ paṭisambhidāpattānaṃ yadidaṃ mahākoṭṭhiko’’ti (a. ni. 1.209, 218). So aparena samayena vimuttisukhaṃ paṭisaṃvedento udānavasena –

2. “Upasanto uparato, mantabhāṇī anuddhato;
Dhunāti pāpake dhamme, dumapattaṃva māluto’’ti. –

Itthaṃ sudam āyasmā mahākoṭṭhikatthero gāthaṃ abhāsi.

Tattha **upasantoti** manacchaṭṭhānaṃ indriyānaṃ upasamanena nibbisevanabhāvakarāṇena upasanto. **Uparatoti** sabbasmā pāpakaraṇato orato virato. **Mantabhāṇīti** mantā vuccati paññā, tāya pana upaparikkhitvā bhaṇatīti mantabhāṇī, kālavādīādibhāvaṃ avissajjentoyeva bhaṇatīti attho. Mantabhāṇanavasena vā bhaṇatīti mantabhāṇī, dubbhāsitato vinā attano bhāsanavasena caturāṅgasamannāgataṃ subhāsitaṃveva bhaṇatīti attho. Jātiādivasena attano anukkaṃsanato na uddhatoti **anuddhato** atha vā tiṅṅaṃ kāyaduccaritānaṃ vūpasamanena tato paṭiviratiyā upasanto, tiṅṅaṃ manoduccaritānaṃ uparamaṇena pajahanena uparato, catunnaṃ vacīduccaritānaṃ appavattiyā parimitabhāṇitāya mantabhāṇī, tividhaduccaritanimittauppajjanakassa uddhaccassa abhāvato anuddhato. Evam pana tividhaduccaritappahānena suddhe sīle patiṭṭhito, uddhaccappahānena samāhito, tameva samādhiṃ padaṭṭhānaṃ katvā vipassanaṃ vadḍhetvā maggapaṭipāṭiyā **dhunāti pāpake dhamme** lāmakatṭhena pāpake sabbepi saṃkilesadhamme niddhunāti, samucchedavasena pajahati. Yathā kiṃ? **Dumapattaṃva māluto**, yathā nāma dumassa rukkhassa pattaṃ paṇḍupalāsaṃ māluto vāto dhunāti, bandhanato viyojento nīharati, evam yathāvuttapaṭipattiyāṃ ṭhito pāpadhamme attano santānato nīharati, evamayāṃ therassa aññāpadesena aññābyākaraṇagāthāpi hotīti veditabbā.

Ettha ca kāyavacīduccaritappahānavacanena payogasuddhiṃ dasseti, manoduccaritappahānavacanena āsayasuddhiṃ. Evam payogāsayasuddhassa “anuddhato’’ti iminā uddhaccābhāvavacanena tadekaṭṭhatāya nīvaraṇappahānaṃ dasseti. Tesu payogasuddhiyā sīlasampatti vibhāvitā, āsayasuddhiyā samathabhāvanāya upakāradhammapariggaho, nīvaraṇappahānena samādhibhāvanā, “dhunāti pāpake dhamme’’ti iminā paññābhāvanā vibhāvitā hoti. Evam adhisīlasikkhādayo tisso sikkhā, tividhakalyāṇaṃ sāsanaṃ, tadaṅgappahānādīni tṇi pahānāni, antadvayaparivajjanena saddhiṃ majjhimāya paṭipattiyā paṭipajjanaṃ, apāyabhavādīnaṃ samatikkamanūpāyo ca yathārahaṃ niddhāretvā yojetabbā. Iminā nayena sesagāthāsūpi yathārahaṃ atthayojanā veditabbā. Atthamattameva pana tattha tattha apubbaṃ vaṇṇayissāma. “Itthaṃ sudam āyasmā mahākoṭṭhiko’’ti idaṃ pūjāvacaṇaṃ, yathā taṃ mahāmogallānoti.

Mahākoṭṭhikattheragāthāvaṇṇanā niṭṭhitā.

3. Kaṅkhārevatatheragāthāvaṇṇanā

Paññaṃ imaṃ passāti āyasmato kaṅkhārevatassa gāthā. Kā uppatti? Ayampi thero

padumuttarabhagavato kāle haṃsavatīnagare brāhmaṇamahāsālakule nibbato. Ekadivasam buddhānaṃ dhammadesanākāle heṭṭhā vuttanayena mahājanena saddhiṃ vihāraṃ gantvā parisapariyante ṭhito dhammaṃ suṇanto satthāraṃ ekaṃ bhikkhuṃ jhānābhiraṭānaṃ aggaṭṭhāne ṭhapentaṃ disvā “mayāpi anāgate evarūpena bhavitum vaṭṭatī”ti cintetvā desanāvasāne satthāraṃ nimantetvā heṭṭhā vuttanayena mahāsakkāraṃ katvā bhagavantaṃ āha – “bhante, ahaṃ iminā adhiṅgāraṃ aṅṅhaṃ sampattiṃ na patthemī, yathā pana so bhikkhu tumhehi ito sattamaḍḍivasamatthake jhāyīnaṃ aggaṭṭhāne ṭhapito, evaṃ ahampi anāgate ekassa buddhassa sāsane jhāyīnaṃ aggo bhavēyya”nti patthanamakāsi. Satthā anāgataṃ oloketvā nipphajjanabhāvaṃ disvā “anāgate kappasatasahassāvasāne gotamo nāma buddho uppajjissati, tassa sāsane tvaṃ jhāyīnaṃ aggo bhavissasī”ti byākaritvā pakkāmi.

So yāvajīvaṃ kalyāṇakammaṃ katvā kappasatasahassaṃ devamanussesu saṃsaritvā amhākaṃ bhagavato kāle sāvattinagare mahābhogakule nibbato pacchābhattaṃ dhammassavanatthaṃ gacchantena mahājanena saddhiṃ vihāraṃ gantvā parisapariyante ṭhito dasabalassa dhammakathaṃ sutvā paṭiladdhasaddho pabbajitvā upasampadaṃ labhitvā kammaṭṭhānaṃ kathāpetvā jhānaparikammaṃ karonto jhānalābhī hutvā jhānaṃ pādaṃ katvā arahattaṃ pāpuṇi. So yebhuyyena dasabalena samāpajjitabbasamāpattiṃ samāpajjanto ahorattaṃ jhānesu ciṅṅavasī ahosi. Atha naṃ satthā “etadaggaṃ, bhikkhave, mama sāvakānaṃ bhikkhūnaṃ jhāyīnaṃ yadidaṃ kaṅkhārevato”ti (a. ni. 1.198, 204) jhāyīnaṃ aggaṭṭhāne ṭhapesi. Vuttampi cetam **apadāne** (apa. therā 2.55.34-53) –

“Padumuttaro nāma jino, sabbadhammesu cakkhumā;
Ito satasahassamhi, kappe uppajji nāyako.

“Sīhahanu brahmagiro, haṃsadundubhinissano;
Nāgavikkantagamano, candasūrādhikappabho.

“Mahāmati mahāvīro, mahājhāyī mahābalo;
Mahākāruṇiko nātho, mahātamapanūdano.

“Sa kadāci tilokaggo, veneyyaṃ vinayaṃ bahum;
Dhammaṃ desesi sambuddho, sattāsayaividū muni.

“Jhāyīṃ jhānarataṃ vīraṃ, upasantaṃ anāvilaṃ;
Vaṇṇayanto parisatiṃ, tosesi janataṃ jino.

“Tadāhaṃ haṃsavatiyaṃ, brāhmaṇo vedapāragū;
Dhammaṃ sutvāna mudito, taṃ ṭhānamabhipatthayīṃ.

“Tadā jino viyākāsi, saṅghamajjhe vināyako;
Mudito hohi tvaṃ brahme, lacchase taṃ manorathaṃ.

“Satasahassito kappe, okkākakulasambhavo;
Gotamo nāma gottena, satthā loke bhavissati.

“Tassa dhammesu dāyādo, oraso dhammanimmitto;
Revato nāma nāmena, hessati satthu sāvako.

“Tena kammaṃ sukateṇa, cetanāpaṇidhīhi ca;
Jahitvā mānuṣaṃ dehaṃ, tāvatimsamagacchahaṃ.

“Pacchime ca bhava dāni, jātohaṃ koliye pure;
Khattiye kulasampanne, iddhe phīte mahaddhane.

“Yadā kapilavatthusmiṃ, buddho dhammadesayī;
Tadā pasanno sugate, pabbajīṃ anagāriyaṃ.

“Kaṅkhā me bahulā āsi, kappākappe taṃ taṃ;
Sabbāṃ taṃ vinayī buddho, desevā dhammattamaṃ.

“Tatohaṃ tiṇṇasaṃsāro, tadā jhānasukhe rato;
Viharāmi tadā buddho, maṃ disvā etadabravi.

“Yā kāci kaṅkhā idha vā huraṃ vā, savediyā vā paravediyā vā;
Ye jhāyino tā pajahanti sabbā, ātāpino brahmacariyaṃ carantā.

“Satasahassee kataṃ kammaṃ, phalaṃ dassesi me idha;
Sumutto saravegova, kilese jhāpayiṃ mama.

“Tato jhānarattaṃ disvā, buddho lokantagū muni;
Jhāyīnaṃ bhikkhūnaṃ aggo, paññāpesi mahāmati.

“Kilesā jhāpitā mayhaṃ, bhavā sabbe samūhatā;
Nāgo va bandhanaṃ chetvā, viharāmi anāsavo.

“Svāgataṃ vata me āsi, mama buddhassa santike;
Tisso vijjā anuppattā, kataṃ buddhassa sāsanaṃ.

“Paṭisambhidā catasso, vimokkhāpi ca aṭṭhime;
Chalābhīññā sacchikatā, kataṃ buddhassa sāsana’nti.

Tathā katakicco panāyaṃ mahāthero pubbe dīgharattaṃ attano kaṅkhāpakatacittataṃ idāni sabbaso vigatakaṅkhataṃ paccavekkhitvā “aho nūna mayhaṃ satthuno desanānubhāvo, tenetarahi evaṃ vigatakaṅkho ajjhataṃ vūpasantacitto jāto”ti sañjātabahumāno bhagavato paññaṃ pasamsanto “**paññaṃ imaṃ passā**”ti imaṃ gāthamāha.

3. Tatha **paññanti** pakāre jānāti, pakārehi ñāpetīti ca paññā. Veneyyānaṃ āsayānusayacariyādhimuttiādiṃpakāre dhammānaṃ kusalādi ke khandhādi ke ca desetabbappakāre jānāti, yathāsabhāvato paṭivijjhati, tehi ca pakārehi ñāpetīti attho. Satthu desanāññaṃ idhādhippettaṃ, tenāha “**ima**”nti. Tañhi attani siddhena desanābalena nayaggāhato paccakkhaṃ viya upaṭṭhitaṃ gahetvā “**ima**”nti vuttaṃ. Yadaggena vā satthu desanāññaṃ sāvakehi nayato gayhati, tadaggena attano visaye paṭivedhaññaṃpi nayato gayhateva. Tenāha āyasmā dhammasenāpati – “apica me, bhante, dhammanvayo vidito”ti (dī. ni. 2.146; 3.143). **Passāti** vimhayappatto aniyamato ālapati attanoyeva vā cittaṃ, yathāha bhagavā udānento – “lokamimaṃ passa; puthū avijjāya parettaṃ bhūtaṃ bhūtarattaṃ bhavā aparimutta’nti (udā. 30). **Tathāgatānanti** tathā āgamanādiatthena tathāgatānaṃ. Tathā āgatoti hi tathāgato, tathā gatoti tathāgato, tathalakkhaṇaṃ āgatoti tathāgato, tathadhamme yāthāvato abhisambuddhoti tathāgato, tathadassitāya tathāgato, tathavādītāya tathāgato, tathākāritāya tathāgato, abhibhavanaṭṭhena tathāgatoti evaṃ aṭṭhahi kāraṇehi bhagavā tathāgato. Tathāya āgatoti tathāgato, tathāya gatoti tathāgato, tathalakkhaṇaṃ gatoti tathāgato, tathāni āgatoti tathāgato, tathāvidhoti tathāgato, tathā pavattitoti tathāgato, tathehi āgatoti tathāgato, tathā gatabhāvena tathāgatoti evampi aṭṭhahi kāraṇehi bhagavā tathāgatoti ayamettha saṅkhepo. Vitthāro pana paramatthadīpaniyā udānaṭṭhakathāya (udā. aṭṭha. 18) itivuttakaṭṭhakathāya (itivu. aṭṭha. 38) ca vuttanayeneva veditaṃbo.

Idāni tassā paññāya asādhāraṇavisesaṃ dassetuṃ “**aggi yathā**”tiādi vuttaṃ. **Yathā aggīti** upamāvacaṇaṃ. **Yathāti** tassa upamābhāvadassanaṃ. **Pajjalitoti** upameyyena sambandhadassanaṃ.

Nisītheti kiccakaraṇakāladassanaṃ. Ayañhettha attho – yathā nāma nisīthe rattiyaṃ caturāṅgasamānāgate andhakāre vattamāne unnate thāne pajjalito aggi tasmim padese tayagataṃ vidhamantaṃ tiṭṭhati, evameva tathāgatānaṃ imaṃ desanāñāṇasaṅkhātāṃ sabbaso veneyyānaṃ saṃsayatamaṃ vidhamantaṃ paññaṃ passāti. Yato desanāvīlāsena sattānaṃ ñāṇamayamaṃ ālokaṃ dentīti **ālokadā**. Paññāmayameva cakkhuṃ dadantīti **cakkhudadā**. Tadubhayampi kaṅkhāvīnayaṃ padatṭhānameva katvā dassento “**ye āgatānaṃ vinayanti kaṅkha**”nti āha, **ye** tathāgatā attano santikaṃ **āgatānaṃ** upagatānaṃ veneyyānaṃ “ahosiṃ nu kho ahamatītamaddhāna”nti ādinayappavattaṃ (ma. ni. 1.18; saṃ. ni. 2.20) soḷasavattthukaṃ, “buddhe kaṅkhati dhamme kaṅkhati”ti ādinayappavattaṃ (dha. sa. 1008) aṭṭhavattthukañca **kaṅkhaṃ** vicikicchaṃ **vinayanti** desanānubhāvena anavasesato vidhamanti viddhamasenti. Vinayakukkuccasaṅkhātā pana kaṅkhā tabbinayeneva vinītā hontīti.

Aparo nayo – yathā aggi nisīthe rattibhāge pajjalito paṭutarajālo samujjalaṃ uccāsane thitānaṃ obhāsādānamattena andhakāraṃ vidhamitvā samavisamaṃ vibhāvento ālokadado hoti. Accāsanne pana thitānaṃ taṃ supākaṭaṃ karonto cakkhukiccakaraṇato cakkhudado nāma hoti, evameva tathāgato attano dhammakāyassa dūre thitānaṃ akatādhikārānaṃ paññāpajjotena mohandhakāraṃ vidhamitvā kāyavisamādisamavisamaṃ vibhāvento ālokadā bhavanti, āsanne thitānaṃ pana katādhikārānaṃ dhammacakkhuṃ uppādentō cakkhudadā bhavanti. Ye evaṃbhūtā attano vacīgocaraṃ āgatānaṃ mādisānampi kaṅkhābahulānaṃ kaṅkhaṃ vinayanti ariyamaggasamuppādanena vidhamanti, tesamaṃ tathāgatānaṃ paññaṃ ñāṇātisayaṃ passāti yojanā. Evamayaṃ therassa attano kaṅkhāvīnayaṃ appakāsanena aññābyākaraṇagāthāpi hoti. Ayañhi thero puthujjanakāle kappiyepi kukkuccako hutvā kaṅkhābahulatāya “kaṅkhārevato”ti paññāto, pacchā khīṇāsavakālepi tattheva voharayıttha. Tenāha – “itthaṃ sudama āyasmā kaṅkhārevato gāthaṃ abhāsītthā”ti. Taṃ vuttatthameva.

Kaṅkhārevatattheragāthāvaṇṇanā niṭṭhitā.

4. Puṇṇattheragāthāvaṇṇanā

Sabbhireva samāsethāti āyasmato puṇṇattherassa gāthā. Kā uppatti? Ayaṃ kira padumuttarassa dasabalassa uppattito puretameva haṃsavatīnagare brāhmaṇamaḥāsālakule nibbato anukkamena viññutaṃ patto satthari loke uppajjante ekadivasamaṃ buddhānaṃ dhammadesanākāle heṭṭhā vuttanayena mahājanena saddhiṃ vihāraṃ gantvā parisapariyante nisīditvā dhammaṃ suṇanto satthāraṃ ekaṃ bhikkhuṃ dhammakathikānaṃ aggaṭṭhāne thapentaṃ disvā “mayāpi anāgate evarūpena bhavituṃ vaṭṭatī”ti cintetvā desanāvasāne vuṭṭhitāya parisāya satthāraṃ upasaṅkamtivā nimantetvā heṭṭhā vuttanayeneva mahāsakkāraṃ katvā bhagavantaṃ evamaḥa – “bhante, ahaṃ iminā adhikārakamma nāññaṃ sampattim patthemī. Yathā pana so bhikkhu ito sattamadivasamatthake dhammakathikānaṃ aggaṭṭhāne thapito, evamaṃ ahampi anāgate ekassa buddhassa sāsane dhammakathikānaṃ bhikkhūnaṃ aggo bhaveyya”nti patthanaṃ akāsi. Satthā anāgataṃ oloketvā tassa patthanāya samijjhanabhāvaṃ disvā “anāgate kappasatasahassamatthake gotamo nāma buddho uppajjissati, tassa sāsane tvaṃ pabbajitvā dhammakathikānaṃ aggo bhavissasi”ti byākāsi.

So tattha yāvajīvaṃ kalyāṇadhammaṃ katvā tato cuto kappasatasahassaṃ puññañāṇasambhāraṃ sambharanto devamanussesu saṃsaritvā amhākaṃ bhagavato kāle kapilavatthunagarassa avidūre doṇavatthunāmake brāhmaṇagāme brāhmaṇamaḥāsālakule aññāsikoṇḍaññattherassa bhāgineyyo hutvā nibbatti. Tassa nāmaggaḥādivase “puṇṇo”ti nāmaṃ akāmsu. So satthari abhisambodhiṃ patvā pavattavaradhammacakke anupubbena rājagahaṃ gantvā taṃ upanissāya viharante aññāsikoṇḍaññattherassa santike pabbajitvā laddhūpasampado sabbaṃ pubbakiccaṃ katvā padhānamanuyuñjanto pabbajitakiccaṃ matthakaṃ pāpetvāva “dasabalassa santikaṃ gamissāmī”ti mātulattherena saddhiṃ satthu santikaṃ agantvā kapilavatthusāmantāyeva ohīyitvā yonisomanasikāre kammaṃ karonto nacirasseva vipassanaṃ ussukkāpetvā arahattaṃ pāpuṇi. Vuttampi cetamaṃ **apadāne** (apa. therā 1.1.434-440) –

“Ajjhāyako mantadharo, tiṇṇaṃ vedāna pārāgū;
Purakkhatomhi sissehi, upagacchimiṃ naruttamaṃ.

“Padumuttaro lokavidū, āhutaṇaṃ paṭiggaho;
Mama kammaṃ pakittesi, saṃkhittena mahāmuni.

“Tāhaṃ dhammaṃ suṇitvāna, abhivādetvāna satthuno;
Añjaliṃ paggahetvāna, pakkamiṃ dakkhiṇāmukho.

“Saṃkhittena suṇitvāna, vitthārena abhāsayaṃ;
Sabbe sissā attamanā, sutvāna mama bhāsato.

“Sakaṃ diṭṭhiṃ vinodetvā, buddhe cittaṃ pasādayaṃ;
Saṃkhittena napaṭiṇṇaṃ, vitthārena tathevaṃ.

“Abhidhammanayaññūhaṃ, kathāvatthuvisuddhiyā;
Sabbesaṃ viññāpetvāna, viharāmi anāsavo.

“Ito pañcasate kappe, caturo suppakāsakā;
Sattaratanasampannā, catudīpamhi issarā.

“Paṭisambhidā catasso...pe... kataṃ buddhassa sāsana’nti.

Tassa pana puṇṇattherassa santike pabbajitā kulaputtā pañcasatā ahesuṃ. Thero sayaṃ dasakathāvatthulābhīyā tepi dasahi kathāvatthūhi ovadi. Te tassa ovāde ṭhatvā sabbeva arahattaṃ pattā. Te attano pabbajitakiccaṃ matthakappattaṃ ñatvā upajjhāyaṃ upasaṅkamitvā āhaṃsu – “bhante, amhākaṃ kiccaṃ matthakappattaṃ, dasannañcamha kathāvatthūnaṃ lābhino, samayo, dāni no dasabalaṃ passitu’nti. Thero tesāṃ vacanaṃ sutvā cintesi – “mama dasakathāvatthulābhīyā satthā jānāti ahaṃ dhammaṃ desento dasa kathāvatthūni amuñcitvāva desemi, mayi gacchante sabbepime bhikkhū maṃ parivāretvā gacchissanti, evaṃ gaṇasaṅgaṇikāya gantvā pana ayuttaṃ mayhaṃ dasabalaṃ passituṃ, ime tāva gantvā passantū’nti te bhikkhū āha – “āvuso, tumhe purato gantvā tathāgataṃ passatha, mama vacanena cassa pāde vandatha, ahampi tumhākaṃ gatamaggenāgamissāmi’nti. Te therā sabbepi dasabalassa jātibhūmiratṭhavāsino sabbe khīṇāsavā sabbe dasakathāvatthulābhīyā attano upajjhāyassa ovādaṃ sampaṭicchitvā therāṃ vanditvā anupubbena cārikaṃ carantā saṭṭhiyojanamaggaṃ atikkamma rājagahe veḷuvanamahāvihāraṃ gantvā dasabalassa pāde vanditvā ekamantaṃ nisīdiṃsu.

Āciṇṇaṃ kho panetaṃ buddhānaṃ bhagavantānaṃ āgantukehi bhikkhūhi saddhiṃ paṭisammoditunti bhagavā tehi saddhiṃ – “kacci, bhikkhave, khamāyā’ntiādinā nayena madhuraṭṭhaṇāraṃ katvā “kuto ca tumhe, bhikkhave, āgacchathā’nti pucchi. Atha tehi “jātibhūmito’nti vutte “ko nu kho, bhikkhave, jātibhūmiyaṃ jātibhūmakānaṃ bhikkhūnaṃ sabrahmacārīnaṃ evaṃ sambhāvito ‘attanā ca appiccho appicchakathaṇā bhikkhūnaṃ kattā’nti (ma. ni. 1.252) dasakathāvatthulābhīyā bhikkhuṃ pucchi. Tepi “puṇṇo nāma, bhante, āyasmā mantāṇiputto’nti ārocayaṃsu. Taṃ kathaṃ sutvā āyasmā sārīputto therassa dassanakāmo ahoṣi. Atha satthā rājagahato sāvattiyaṃ agamāsi. Puṇṇattheropi dasabalassa tattha āgatabhāvaṃ sutvā – “satthāraṃ passissāmi’nti gantvā antogandhakuṭiyaṃyeva tathāgataṃ sampāpuṇi. Satthā tassa dhammaṃ desesi. Thero dhammaṃ sutvā dasabalaṃ vanditvā paṭisallānatthāya andhavanaṃ gantvā aññataramhi rukkhamūle divāvihāraṃ nisīdi.

Sārīputtattheropi tassāgamaṇaṃ sutvā sīsānulokiko gantvā okāsaṃ sallakkhetvā taṃ rukkhamūle nisinnaṃ upasaṅkamitvā therena saddhiṃ sammoditvā, taṃ sattavisuddhikkamaṃ pucchi. Theropissa pucchitapucchitaṃ byākaronto rathavinītūpamāya cittaṃ ārādhesi, te aññamaññassa subhāsitaṃ samanumodiṃsu. Atha satthā aparabhāge bhikkhusaṅghamajjhe nisinnaṃ therāṃ “etadaggaṃ,

bhikkhave, mama sāvakānaṃ bhikkhūnaṃ dhammakathikānaṃ yadidaṃ puṇṇo”ti (a. ni. 1.188, 196) dhammakathikānaṃ aggaṭṭhāne ṭhapesi. So ekadivasam attano vimuttisampattiṃ paccavekkhitvā “sathhāraṃ nissāya ahañceva aññe ca bahū sattā saṃsāradukkhato vippamuttā, bahūpakārā vata sappurisasamsevā”ti pītisomanassajāto udānavasena pītivegavissatṭhaṃ “**sabbhireva samāsethā**”ti gāthaṃ abhāsi.

4. Tattha **sabbhirevā**ti sappurisehi eva. Santoti panettha buddhādayo ariyā adhippetā. Te hi anavasesato asataṃ dhammaṃ pahāya saddhamme ukkaṃsagatatā sātisayaṃ pasamsiyattā ca visesato “santo sappurisa”ti ca vuccanti. **Samāsethā**ti samaṃ āsetha saha vaseyya. Te payirupāsanto tesam sussūsanto diṭṭhānugatiñca āpajjanto samānavāso bhavyeyyāti attho. **Paṇḍitehatthadassibhī**ti tesam thomanā. **Paṇḍā** vuccati paññā, sā imesaṃ sañjātāti **paṇḍitā**. Tato eva attatthādibhedam atthaṃ aviparītato passantīti **atthadassino**. Tehi paṇḍitehi atthadassībhi samāsetha. Kasmāti ce? Yasmā te santo paṇḍitā, te vā sammā sevantā ekantahitabhāvato maggañānādīheva araṇīyato **atthaṃ**, mahāguṇatāya santatāya ca **mahantaṃ**, agādhabhāvato gambhīrañānagocarato ca **gambhīraṃ**, hīnacchandādīhi daṭṭhuṃ asakkuṇeyyattā itarehi ca kicchena daṭṭhabbattā **duddasaṃ**, duddasattā saṅghanipuṇasabhāvattā nipuṇañānagocarato ca **nipuṇaṃ**, nipuṇattā evaṃ sukhumasabhāvattāya **aṇuṃ** nibbānaṃ, aviparītattāthena vā paramatthasabhāvattā **atthaṃ**, ariyabhāvakarattā mahattanimittatāya **mahantaṃ**, anuttānasabhāvattāya **gambhīraṃ**, dukkhena daṭṭhabbaṃ na sukkena daṭṭhuṃ sakkāti **duddasaṃ**, gambhīrattā duddasaṃ, duddasattā **gambhīraṃ**ti catusaccaṃ, visesato **nipuṇaṃ aṇuṃ**, nirodhasaccanti evametam catusaccaṃ **dhīrā samadhigacchanti** dhitisampannatāya dhīrā catusaccakammaṭṭhānabhāvanam ussukkāpetvā sammadeva adhigacchanti. **Appamattā**ti sabbattha satiavippavāseṇa appamādapaṭipattiṃ pūrentā. **Vicakkhaṇā**ti vipassanābhāvanāya chekā kusalā. Tasmā sabbhireva samāsethāti yojanā. Paṇḍitehatthadassibhīti vā etaṃ nissakkavacanaṃ. Yasmā paṇḍitehi atthadassībhi samudāyabhūtehi dhīrā appamattā vicakkhaṇā mahantādivisesavantaṃ atthaṃ samadhigacchanti, tasmā tādisehi sabbhireva samāsethāti sambandho. Evamesā therassa paṭivedhadīpanena aññābyākaraṇagāthāpi ahoṣīti.

Puṇṇattheragāthāvaṇṇanā niṭṭhitā.

5. Dabbattheragāthāvaṇṇanā

Yo duddamiyoti āyasmato dabbattherassa gāthā. Kā uppatti? Ayampi padumuttarabuddhakāle haṃsavatīnagare kulagehe nibbattivā vayappatto heṭṭhā vuttanayeneva dhammadesanaṃ suṇanto sathhāraṃ ekaṃ bhikkhuṃ senāsanapaññāpakānaṃ aggaṭṭhāne ṭhapentaṃ disvā adhikārakammaṃ katvā taṃ ṭhānantaraṃ patthetvā sathhārā byākato yāvajjivam kusalaṃ katvā devamanussesu saṃsaritvā kassapadasabalassa sāsanosakkanakāle pabbaji. Tadā tena saddhiṃ apare cha janāti satta bhikkhū ekacittā hutvā aññe sāsaṇe agāravaṃ karonte disvā – “idha kiṃ karoma ekamante samaṇadhammaṃ katvā dukkhassantaṃ karissāma”ti nisseṇiṃ bandhitvā uccaṃ pabbatasikharaṃ āruhitvā, “attano cittabalaṃ jānantā nisseṇiṃ nipātentu, jīvite sālāyā otarantu, mā pacchānutappino ahuvatthā”ti vatvā sabbe ekacittā hutvā nisseṇiṃ pātetvā – “appamattā hotha, āvuso”ti aññamaññaṃ ovaditvā cittarucikesu ṭhānesu nisīditvā samaṇadhammaṃ kātuṃ ārabhiṃsu.

Tatreko thero pañcame divase arahattaṃ patvā, “mama kiccaṃ nipphannaṃ, ahaṃ imasmiṃ ṭhāne kiṃ karissāmi”ti iddhiyā uttarakuruto piṇḍapātaṃ āharitvā, “āvuso, imaṃ piṇḍapātaṃ paribhuñjatha, bhikkhācārikiccaṃ mamāyattaṃ hotu, tumhe attano kammaṃ karothā”ti āha. “Kiṃ nu kho mayaṃ, āvuso, nisseṇiṃ pātentā evaṃ avocumha – ‘yo paṭhamaṃ dhammaṃ sacchikaroti, so bhikkhaṃ āharatu, tenābhatam sesā paribhuñjitvā samaṇadhammaṃ karissanti’”ti. “Natthi, āvuso”ti. Tumhe attano pubbahetunā labhittha, mayampi sakkontā vaṭṭassantaṃ karissāma, gacchatha tumheti. Thero te saññāpetum asakkonto phāsukaṭṭhāne piṇḍapātaṃ paribhuñjitvā gato. Aparo thero sattame divase anāgāmiṃ phalaṃ patvā tato cuto suddhāvāsabrahmaloke nibbato. Itare therā tato cutā ekaṃ buddhantaraṃ devamanussesu saṃsaritvā tesu tesu kulesu nibbattā. Eko gandhāraṭṭhe takkasīlānagare

rājagehe nibbato, eko majjhantikaraṭṭhe paribbājikāya kucchimhi nibbato, eko bāhiyaraṭṭhe kuṭumbiyagehe nibbato, eko bhikkhunupassaye jāto.

Ayaṃ pana dabbatthero mallaraṭṭhe anupiyanaḡare ekassa mallaraṅṅo gehe paṭisandhiṃ gaṇhi. Tassa mātā upavijaṅṅā kālamakāsi, matasarīraṃ susānaṃ netvā dārucitakaṃ āropetvā aggimā adamsu. Tassā aggivegasantattaṃ udarapaṭalaṃ dvedhā ahoṣi. Dārako attano puṅṅabalena uppattivā ekasmiṃ dabbatthambhe nipati. Taṃ dārakaṃ gahetvā ayyikāya adamsu. Sā tassa nāmaṃ gaṇhantī dabbatthambhe pativā laddhajīvitattā “dabbo” tissa nāmaṃ akāsi. Tassa ca sattavassikakāle satthā bhikkhusaṅghaparivāro mallaraṭṭhe cārikaṃ caramāno anupiyambavane viharati. Dabbakumāro satthāraṃ disvā dassaneneva pasīditvā pabbajitukāmo hutvā “ahaṃ dasabalassa santike pabbajissāmī” ti ayyikaṃ āpucchi. Sā “sādhu, tātā” ti dabbakumāraṃ ādāya satthu santikaṃ gantvā, “bhante, imaṃ kumāraṃ pabbājethā” ti āha. Satthā aññatarassa bhikkhuno saṅṅaṃ adāsi – “bhikkhu imaṃ dārakaṃ pabbājehī” ti. So thero satthu vacanaṃ sutvā dabbakumāraṃ pabbājento tacapaṅcakakammaṭṭhānaṃ ācikkhi. Pubbahetusampanno katābhinīhāro satto paṭhamakesavaṭṭiyā voropanakkaṇe sotāpattiphale patitṭhahi, dutiyāya kesavaṭṭiyā oropiyamānāya sakadāgāmiphale, tatiyāya anāgāmiphale, sabbakesānaṃ pana oropanaṅca arahattaphalasaṅghikiriyaṃ ca apacchā apure ahoṣi. Satthā mallaraṭṭhe yathābhirantaṃ viharitvā rājagahaṃ gantvā veḷuvane vāsaṃ kappesi.

Tatrāyasmā dabbo mallaputto rahogato attano kiccaṅṅipphattiṃ oloketvā saṅghassa veyyāvaccakaraṇe kāyaṃ yojetukāmo cintesi – “yaṃnūnāhaṃ saṅghassa senāsanaṅca paṅṅāpeyyaṃ bhattāni ca uddiseyya” nti. So satthu santikaṃ gantvā attano parivittakkaṃ ārocesi. Satthā tassa sādhuḡaraṃ datvā senāsanaṅca paṅṅāpakattaṅca bhattuddesaṅca sampatiṅchi. Atha naṃ “ayaṃ dabbo daharova samāno mahante ṭhāne ṭhito” ti sattavassikakāleyeva upasampādesi. Thero upasampannakālato paṭṭhāya rājagahaṃ upanissāya viharantānaṃ sabbabhikkhūnaṃ senāsanaṅca paṅṅāpeti, bhikkhaṅca uddisati. Tassa senāsanaṅca paṅṅāpakabhāvo sabbadisāsu pākaṭo ahoṣi – “dabbo kira mallaputto sabhāgasabhāgānaṃ bhikkhūnaṃ ekaṭṭhāne senāsanaṅca paṅṅāpeti, āsannepi dūrepi senāsanaṃ paṅṅāpeti, gantaṃ asakkante iddhiyā neti” ti.

Atha naṃ bhikkhū kālepi vikālepi – “amhākaṃ, āvuso, jīvakambavane senāsanaṃ paṅṅāpehi, amhākaṃ maddakucchismiṃ migadāye” ti evaṃ senāsanaṃ uddisāpetvā tassa iddhiṃ passantā gacchanti. Sopi iddhiyā manomāye kāye abhisankharitvā ekekassa therassa ekekaṃ attanā sadisaṃ bhikkhuṃ datvā aṅguliyaṃ jalamānāya purato gantvā “ayaṃ maṅco idaṃ pīṭha” ntiādīni vatvā senāsanaṃ paṅṅāpetvā puna attano vasanaṭṭhānameva āgacchati. Ayamettha saṅkhepo, vitthārato panidaṃ vatthu pāliyaṃ āgatameva. Satthā idameva kāraṅca aṭṭhuppattiṃ katvā aparabhāge ariyagaṇamajjhe nisinna therāṃ senāsanaṅca paṅṅāpakānaṃ aggaṭṭhāne ṭhapesi – “etadaggaṃ, bhikkhave, mama sāvakaṅca bhikkhūnaṃ senāsanaṅca paṅṅāpakānaṃ yadidaṃ dabbo mallaputto” ti (a. ni. 1.209; 214). Vuttampi cetāṃ **apadāne** (apa. thera 2.54, 108-149) –

“Padumuttaro nāma jino, sabbalokavidū muni;
Ito sataṣaṅghasamhi, kappe uppajji cakkhumā.

“Ovādako viṅṅāpako, tāraḡo sabbapāṅinaṃ;
Desanākusalo buddho, tāresi janataṃ bahuṃ.

“Anukampako kāruṅiko, hitesī sabbapāṅinaṃ;
Sampatte titthiye sabbe, paṅcasīle patitṭhapi.

“Evaṃ nirākulaṃ āsi, suṅṅataṃ titthiyehi ca;
Vicittaṃ arahantehi, vasībhūtehi tādibhi.

“Ratanānaṭṭhapaṅṅāsaṃ, uggato so mahāmuni;

Kaṅcanagghiyasaṅkāso, bāttimsavaralakkhaṇo.

“Vassasatasahassāni, āyu vijjati tāvade;
Tāvataṭṭiṭṭhamāno so, tāresi janataṃ bahum.

“Tadāhaṃ haṃsavatiyaṃ, seṭṭhiputto mahāyaso;
Upetvā lokapajjotaṃ, assosiṃ dhammadesanaṃ.

“Senāsanāni bhikkhūnaṃ, paññāpentaṃ sasāvakaṃ;
Kittayantassa vacanaṃ, suṇitvā mudito ahaṃ.

“Adhikāraṃ sasaṅghassa, katvā tassa mahesino;
Nipacca sirasā pāde, taṃ ṭhānamabhipatthayaṃ.

“Tadāha sa mahāvīro, mama kammaṃ pakittayaṃ;
Yo sasaṅghamabhojesi, sattāhaṃ lokanāyakaṃ.

“Soyaṃ kamalapattakkho, sīhaṃso kanakattaco;
Mama pādāmūle nipati, patthayaṃ ṭhānamuttamaṃ.

“Satasahassito kappe, okkākakulasambhavo;
Gotamo nāma gottena, satthā loke bhavissati.

“Sāvako tassa buddhassa, dabbo nāmena vissuto;
Senāsanapaññāpako, aggo hessatiyaṃ tadā.

“Tena kammena sukatenā, cetanāpaṇidhīhi ca;
Jahitvā mānusaṃ dehaṃ, tāvatimsamagacchahaṃ.

“Satānaṃ tīṇikkhattuñca, devarajjamakārayaṃ;
Satānaṃ pañcakkhattuñca, cakkavattī ahasahaṃ.

“Padesarajjaṃ vipulaṃ, gaṇanāto asaṅkhiyaṃ;
Sabbattha sukhito āsiṃ, tassa kammaṃsā vāhasā.

“Ekanavutito kappe, vipassī nāma nāyako;
Uppajji cārudassano, sabbadhammavipassako.

“Duṭṭhacitto upavadiṃ, sāvakaṃ tassa tādino;
Sabbāsavaparikkhīṇaṃ, suddhoti ca vijāniya.

“Tasseva naravīrassa, sāvakānaṃ mahesinaṃ;
Salākañca gahetvāna, khīrodanamadāsahaṃ.

“Imamhi bhaddake kappe, brahmabandhu mahāyaso;
Kassapo nāma gottena, uppajji vadataṃ varo.

“Sāsaṇaṃ jotayitvāna, abhibhuyya kutitthiye;
Vineyye vinayitvāna, nibbuto so sasāvako.

“Sasisse nibbute nāthe, atthamentamhi sāsane;
Devā kandimsu saṃviggā, muttakesā rudammukhā.

“Nibbāyissati dhammakkho, na passisāma subbate;
Na suṇissāma saddhammaṃ, aho no appapuññatā.

“Tadāyaṃ pathavī sabbā, acalā sā calācalā;
Sāgaro ca sasokova, vinadī karuṇaṃ giraṃ.

“Catuddisā dundubhiyo, nādayimsu amānusā;
Samantato asaniyo, phalimsu ca bhayāvahā.

“Ukkā patimsu nabhasā, dhūmaketu ca dissati;
Sadhūmā jālavatṭā ca, ravimsu karuṇaṃ migā.

“Uppāde dāruṇe disvā, sāsanaṭṭhaṅgasūcake;
Saṃviggā bhikkhavo satta, cintayimha mayaṃ tadā.

“Sāsanena vināmhākaṃ, jīvitena alaṃ mayaṃ;
Pavisitvā mahāraññaṃ, yuñjāma jīnasāsane.

“Addasamha tadāraññe, ubbidhamṃ selamuttamaṃ;
Nisseṇiyā tamāruyha, nisseṇiṃ pātayimhase.

“Tadā ovadi no thero, buddhuppādo sudullabho;
Saddhātīdullabhā laddhā, thokaṃ sesaṅca sāsanaṃ.

“Nipatanti khaṇātītā, anante dukkhasāgare;
Tasmā payogo kattabbo, yāva ṭhāti mune mataṃ.

“Arahā āsi so thero, anāgāmī tadānugo;
Susīlā itare yuttā, devalokaṃ agamhase.

“Nibbuto tiṇṇasaṃsāro, suddhāvāse ca ekako;
Ahaṅca pakkusāti ca, sabhiyo bāhiyo tathā.

“Kumārakassapo, ceva, tattha tatthūpagā mayaṃ;
Saṃsārabandhanā muttā, gotamenānukampitā.

“Malle su kusiṇārāyaṃ, gabbhe jātassa me sato;
Mātā matā citāruḷhā, tato nipatito ahaṃ.

“Patito dabbapuñjamhi, tato dabboti vissuto;
Brahmacārībalenāhaṃ, vimutto sattavassiko.

“Khīrodanabalenāhaṃ, pañcahaṅgehupāgato;
Khīṇāsavopavādena, pāpehi bahu codito.

“Ubho puññaṅca pāpaṅca, vītivattomhi dānihaṃ;
Patvāna paramaṃ santiṃ, viharāmi anāsavo.

“Senāsanam paññāpayim, hāsayingvāna subbate;
Jino tasmim guṇe tuṭṭho, etadagge ṭhapesi maṃ.

“Kilesā jhāpitā mayhaṃ, bhavā sabbe samūhatā;
Nāgo va bandhanaṃ chetvā, viharāmi anāsavo.

“Svāgataṃ vata me āsi, buddhaseṭṭhassa santike;
Tisso vijjā anuppattā, kataṃ buddhassa sāsanaṃ.

“Paṭisambhidā catasso...pe...kataṃ buddhassa sāsana”nti.

Evambhūtaṃ pana taṃ yena pubbe ekassa khīṇāsavatttherassa anuddhaṃsanavasena katena pāpakamma bahūni vassasatasahassāni niraye pacci, tāya eva kamma pilotikāya codiyamānā mettiyabhūmajakā bhikkhū “iminā mayhaṃ kalyāṇabhikkhū gahapatino antare paribheditā”ti duggahitagāhino amūlakena pārājikena dhammena anuddhaṃsesuṃ. Tasmīṇa adhikaraṇe saṅghena sativinayena vūpasamite ayaṃ thero lokānukampāya attano guṇe vibhāvento “yo duddamiyo”ti imaṃ gāthaṃ abhāsi.

5. Tattha yoti aniyamitaniddeso, tassa “so”ti iminā niyamattaṃ daṭṭhabbaṃ. Ubhayenapi aññaṃ viya katvā attānameva vadati. **Duddamiyoti** duddamo, dametuṃ asakkuṇeyyo. Idañca attano puthujjanakāle diṭṭhigatānaṃ visūkāyikānaṃ kilesānaṃ madālepacittassa vipphanditaṃ indriyānaṃ avūpasamanañca cintetvā vadati. **Damenāti** uttamena aggamaggadama, tena hi danto puna dametabbatābhāvato “danto”ti vattabbataṃ arahati, na aññaena. Atha vā **damenāti** damakena purisadammasārathinā damito. **Dabboti** drabyo, bhabboti attho. Tenāha bhagavā imameva theram sandhāya – “na kho, dabba, dabbā evaṃ nibbēṭṭenti”ti (pārā. 384; cūḷava. 193). **Santusitoti** yathā laddhapaccayasantosa jhānasamāpattisantosa maggaphalasantosa ca santuṭṭho. **Vitiṇṇakaṅkhoti** soḷasavattukāya aṭṭhavattukāya ca kaṅkhāya paṭhamamaggeneva samugghāṭitattā vigatakaṅkho. **Vijitāvīti** purisājānīyena vijetabbassa sabbasapī saṃkilesapakkhassa vijitattā vidhamitattā vijitāvī. **Apetabheravoti** pañcavīsatiyā bhayānaṃ sabbaso apetattā apagatabheravo abhayūparato. Puna **dabboti** nāmakittanaṃ. **Parinibbutoti** dve parinibbānāni kilesaparinibbānañca, yā saupādisesanibbānadhātu, khandhaparinibbānañca, yā anupādisesanibbānadhātu. Tesu idha kilesaparinibbānaṃ adhippettaṃ, tasmā pahātabbadhammānaṃ maggena sabbaso pahīnattā kilesaparinibbānena parinibbutoti attho. **Ṭhitattoti** ṭhitasabhāvo acalo iṭṭhādīsu tāḍibhāvappattiyā lokadhammehi akampaṇīyo. **Hīti** ca hetuatthe nipāto, tena yo pubbe duddamo hutvā ṭhito yasmā dabbattā satthārā uttamena damena damito santusito vitiṇṇakaṅkho vijitāvī apetabheravo, tasmā so dabbo parinibbuto tato yeva ca ṭhitatto, evambhūte ca tasmim citta pasādova kātabbo, na pasādaññathattanti paraneyyabuddhike satte anukampanto thero aññaṃ byākāsi.

Dabbattheragāthāvaṇṇanā niṭṭhitā.

6. Sītavanīyattheragāthāvaṇṇanā

Yo sītavananti āyasmato sambhūtattherassa gāthā. Kā uppatti? Ito kira aṭṭhārasādhikassa kappasatassa matthake atthadassī nāma sambuddho loke uppajjivā sadevakaṃ lokaṃ saṃsāramahoghato tārento ekadivasaṃ mahatā bhikkhusaṅghena saddhim gaṅgātīraṃ upagacchi. Tasmim kāle ayaṃ gahapatikule nibbatta tattha bhagavantaṃ passitvā pasannamānaso upasaṅkamitvā vanditvā “kiṃ, bhante, pārāṃ gantukāmatthā”ti pucchi. Bhagavā “gamissāmā”ti avoca. So tāvadeva nāvāsāṅghātaṃ yojetvā upanesi. Satthā taṃ anukampanto saha bhikkhusaṅghena nāvaṃ abhiruhi. So sayampī abhiruyha sukheva paratīraṃ sampāpetvā bhagavantaṃ bhikkhusaṅghaṇca dutiyadivase mahādānaṃ pavattetvā anugantvā pasannacitto vanditvā nivatti. So tena puññakamma devamanussesu saṃsāritvā ito terasādhikakappasatassa matthake khattiyakule nibbattitvā rājā aho si cakkavattī dhammiko dhammarājā. So satte sugatimagge patiṭṭhāpetvā tato cuto ekanavutikappe vipassissa

bhagavato sāsane pabbajitvā dhutadhamme samādāya susāne vasanto samaṇadhammaṃ akāsi. Puna kassapassa bhagavato kālepi tassa sāsane tīhi sahāyehi saddhiṃ pabbajitvā vīsativassasahassāni samaṇadhammaṃ katvā ekaṃ buddhantaraṃ devamanussesu saṃsaritvā imasmiṃ buddhuppāde rājagahe brāhmaṇamahāsālassa putto hutvā nibbatti. Tassa “sambhūto”ti nāmaṃ akāmsu. So vayappatto brāhmaṇasippesu nipphattiṃ gato. Bhūmijo jeyyaseno abhirādhanoti tīhi sahāyehi saddhiṃ bhagavato santikaṃ gato dhammadesanaṃ sutvā paṭiladdhasaddho pabbaji. Ye sandhāya vuttaṃ –

“Bhūmijo jeyyaseno ca, sambhūto abhirādhanoti;
Ete dhammaṃ abhiññāsuṃ, sāsane varatādino”ti.

Atha sambhūto bhagavato santike kāyagatāsatikammaṭṭhānaṃ gahetvā nibaddhaṃ sītavane vasati. Tenevāyasmā “sītavaniyo”ti paññāyittha. Tena ca samayena vessavaṇo mahārājā kenacideva karaṇīyena jambudīpe dakkhiṇadisābhāgaṃ uddissa ākāseṇa gacchanto therāṃ abbhokāse nisīditvā kammaṭṭhānaṃ manasikarantaṃ disvā vimānato oruyha therāṃ vanditvā, “yadā thero samādhito vuṭṭhahissati, tadā mama āgamaṇaṃ ārocetha, ārakkhañcassa karothā”ti dve yakkhe āṇāpetvā pakkāmi. Te therassa samīpe ṭhatvā manasikāraṃ paṭisaṃharitvā nisinnakāle ārocesuṃ. Taṃ sutvā thero “tumhe mama vacanena vessavaṇamahārājassa kathetha, bhagavatā attano sāsane ṭhitānaṃ satiārakkhā nāma ṭhapitā atthi, sāyeva mādise rakkhati, tvam tatha apposukko hohi, bhagavato ovāde ṭhitānaṃ edisāya ārakkhāya karaṇīyaṃ natthi”ti te vissajjetvā tāvadeva vipassanaṃ vaḍḍhetvā vijjāttayaṃ sacchākāsi. Tato vessavaṇo nivattamāno therassa samīpaṃ patvā mukhākārasallakkhaṇenevassa katakiccabhāvaṃ ṇatvā sāvattiṃ gantvā bhagavato ārocetvā satthu sammukhā therāṃ abhitthavanto –

“Satiārakkhasampanno, dhitimā vīriyasamāhito;
Anujāto satthu sambhūto, tevijjo maccupāragū”ti. –

Imāya gāthāya therassa guṇe vaṇṇesi. Tena vuttaṃ **apadāne** (apa. thera 1.21.15-20) –

“Atthadassī tu bhagavā, dvipadindo narāsabho;
Purakkhato sāvakehi, gaṅgātīramupāgami.

“Samatitti kākapeyyā, gaṅgā āsi duruttarā;
Uttārayiṃ bhikkhusaṅghaṃ, buddhañca dvipaduttamaṃ.

“Aṭṭhārase kappasate, yaṃ kammamakariṃ tadā;
Duggatiṃ nābhijānāmi, taraṇāya idaṃ phalaṃ.

“Teraseto kappasate, pañca sabbobhavā ahuṃ;
Sattaratanasampannā, cakkavattī mahabbalā.

“Pacchime ca bhava asmim, jātohaṃ brāhmaṇe kule;
Saddhiṃ tīhi sahāyehi, pabbajim satthu sāsane.

“Kilesā jhāpitā mayhaṃ...pe... kataṃ buddhassa sāsana”nti.

Athāyasmā sambhūto bhagavantaṃ dassanāya gacchante bhikkhū disvā “āvuso, mama vacanena bhagavato pāde sirasā vandatha, evañca vadethā”ti vatvā dhammādhikaraṇaṃ attano satthu aviheṭhitabhāvaṃ pakāseṇo “yo sītavana”nti gāthamāha. Te bhikkhū bhagavantaṃ upasaṅkamtivā vanditvā sambhūtatherassa sāsanaṃ sampavedentā, “āyasmā, bhante, sambhūto bhagavato pāde sirasā vandati, evañca vadati”ti vatvā taṃ gāthaṃ ārocesuṃ, taṃ sutvā bhagavā “paṇḍito, bhikkhave, sambhūto bhikkhu paccapādi dhammassānudhammaṃ, na ca maṃ dhammādhikaraṇaṃ viheṭheti. Vessavaṇena tassattho mayhaṃ ārocitā”ti āha.

6. Yaṃ pana te bhikkhū sambhūtattherena vuttaṃ “yo sītavana”nti gātham satthu nivedesum. Tattha sītavananti evaṃnāmakam rājagahasamīpe mahantaṃ bheravasusānavanam. Upagāti nivāsanavasena upagacchi. Etena bhagavatā anuññātam pabbajitānurūpaṃ nivāsanatṭhānam dasseti. **Bhikkhūti** saṃsārabhayassa ikkhanato bhinnakilesatāya ca bhikkhu. **Ekoti** adutiyo, etena kāyavivekam dasseti. **Santusitoti** santuṭṭho. Etena catupaccayasantosalakkaṇam ariyavaṃsam dasseti. **Samāhitattoti** upacārappanābhedenā samādhinā samāhitacitto, etena cittavivekabhāvanāmukhena bhāvanārāmaṃ ariyavaṃsam dasseti. **Vijitāvīti** sāsane sammāpaṭipajjantena vijetabbaṃ kilesagaṇam vijitvā ṭhito, etena upadhivivekam dasseti. Bhayahetūnam kilesānam apagatatā **apetalomahaṃso**, etena sammāpaṭipattiyā phalaṃ dasseti. **Rakkhanti** rakkhanto. **Kāyagatāsati**nti kāyārammaṇam satim, kāyagatāsaticammaṭṭhānam paribrūhanavasena avissajjento. **Dhitimāti** dhīro, samāhitattam vijitāvibhāvataṃ vā upādāya paṭipattidassanametaṃ. Ayañhettha saṅkhepattho – so bhikkhu vivekasukhānupekkhāya eko sītavanam upāgami, upāgato ca lolabhāvābhāvato santuṭṭho dhitimā kāyagatāsaticammaṭṭhānam bhāvento tathādhigataṃ jhānam pādakaṃ katvā āradhāvipassanam ussukkāpetvā adhigatena aggamaggena samāhito vijitāvī ca hutvā katakiccatāya bhayahetūnam sabbaso apagatatā apetalomahaṃso jātoti.

Sītavaniyattheragāthāvaṇṇanā niṭṭhitā.

7. Bhalliyattheragāthāvaṇṇanā

Yopānudīti āyasmato bhalliyattherassa gāthā. Kā uppatti? Ayaṃ kira ito ekatiṃse kappe anuppanne buddhe sumanassa nāma paccekabuddhassa pasannacitto phalāphalaṃ datvā sugatīsu eva saṃsaranto sikhissa sammāsambuddhassa kāle aruṇavatīnagare brāhmaṇakule nibbatta “sikhissa bhagavato paṭhamābhisambuddhassa ujita, ojitā nāma dve satthavāhaputtā paṭhamāhāraṃ adaṃsū”ti sutvā attano sahāyakena saddhiṃ bhagavantaṃ upasaṅkamtivā vanditvā svātanāya nimantetvā mahādānam pavattetvā patthanaṃ akaṃsu – “ubhopi mayaṃ, bhante, anāgate tumhādisassa buddhassa paṭhamāhāradāyakā bhaveyyāma”ti. Te tattha tattha bhava puññakammaṃ katvā devamanussesu saṃsarantā kassapassa bhagavato kāle gopālakasetṭhissa puttā bhātaro hutvā nibbattā. Bahūni vassāni bhikkhusaṅgham khīrabhojanena upaṭṭhahiṃsu. Amhākam pana bhagavato kāle pokkharavatīnagare satthavāhassa puttā bhātaro hutvā nibbattā. Tesu jeṭṭho taphusso nāma, kaniṭṭho bhalliyō nāma, te pañcamattāni sakaṭasatāni bhaṇḍassa pūretvā vāṇijjāya gacchantā bhagavati paṭhamābhisambuddhe sattaṣattāhaṃ vimuttisukhadhammapaccavekkhaṇāhi vītināmetvā aṭṭhame sattāhe rājāyatanamūle viharante rājāyatanassa avidūre mahāmaggena atikkamanti, tesam tasmim samaye samepi bhūmibhāge akaddamodake sakaṭāni nappavattiṃsu, “kiṃ nu, kho, kāraṇa”nti ca cintentānam porāṇasālohitā devatā rukkhaviṭṭapantare attānam dassenti āha – “mādisā, ayaṃ bhagavā acirābhisambuddho sattaṣattāhaṃ anāhāro vimuttisukhāpaṭisaṃvedī idāni rājāyatanamūle nisinno, taṃ āhārena paṭimānetha, yadassa tumhākaṃ dīgharattaṃ hitāya sukhāyā”ti. Taṃ sutvā te ulāraṃ pītisomanassaṃ paṭisaṃvedentā, “āhārasampādanam papañca”nti maññamānā manthañca madhupiṇḍikañca bhagavato datvā dvevācikasaraṇam gantvā kesadhātuyo labhitvā agamaṃsu. Te hi paṭhamam upāsakā ahesum. Atha bhagavati bārāṇasiṃ gantvā dhammacakkaṃ pavattetvā anupubbena rājagahe viharante taphussabhalliyā rājagahaṃ upagatā bhagavantaṃ upasaṅkamtivā vanditvā ekamantaṃ nisīdiṃsu. Tesam bhagavā dhammaṃ desesi. Tesu taphusso sotāpattiṭṭhale paṭiṭṭhāya upāsakova ahoṣi. Bhalliyō pana pabbajitvā chaḷabhiñño ahoṣi. Tena vuttaṃ **apadāne** (apa. therā 2.48.66-70) –

“Sumano nāma sambuddho, takkarāyaṃ vasī tadā;
Vallikāraphalaṃ gayha, sayambhussa adāsahaṃ.

“Ekatiṃse ito kappe, yaṃ phalaṃ adadiṃ tadā;
Duggatiṃ nābhijānāmi, phaladānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Athekadivasam māro bhalliyattherassa bhimsāpanattham bhayānakam rūpaṃ dassesi. So attano sabbabhayātikkaṃ pakāsentō “**yopānudi**”ti gāthamabhāsi.

7. Tattha **yopānudi**ti yo apānudi khiṇi pajahi viddhamsesi. **Maccurājassāti maccu** nāma maraṇam khandhānam bhedo, so eva ca sattānam attano vase anuvattāpanato issaraṭṭhena **rājāti** maccurājā, tassa. **Senanti** jarārogādiṃ, sā hissa vasavattane aṅgabhāvato senā nāma, tena hesa mahatā nānāvidhena vipulena “mahāseno”ti vuccati. Yathāha – “na hi no saṅgaram tena, mahāsenena maccunā”ti (ma. ni. 1.272; jā. 2.22.121; netti. 103). Atha vā guṇamāraṇaṭṭhena “maccū”ti idha devaputtamāro adhippeto, tassa ca sahāyabhāvūpagamanato kāmādayo senā. Tathā cāha –

“Kāmā te paṭhamā senā, dutiyā arati vuccati;
Tatiyā khuppiṇā te, catutthī taṇhā pavuccati.

“Pañcamī thinamiddham te, chaṭṭhā bhīrū pavuccati;
Sattamī vicikicchā te, māno makkho ca aṭṭhamī”ti. (su. ni. 438-439; mahāni. 28;cūḷani. nandamāṇavapucchānidessa 47);

Naḷasetumva sudubbalaṃ mahoghoti sāravirahitato naḷasetusadisam ativiya abalabhāvato suṭṭhu dubbalaṃ saṃkilesasenaṃ navalokuttaradhammānaṃ mahābalavabhāvato mahoghasadisena aggamaḅgena yo apānudi vijitāvī apetaḅheravo danto, so parinibbuto ṭhitattoti yojanā. Taṃ sutvā māro “jānāti maṃ samaṇo”ti tatthevantaradhāyīti.

Bhalliyattheragāthāvaṇṇanā niṭṭhitā.

8. Vīrattheragāthāvaṇṇanā

Yo duddamiyoti āyasmato vīrattherassa gāthā. Kā uppatti? Ayaṃ kira ito ekanavute kappe vipassissa bhagavato vasanaāvāsam paṭijaggi. Ekadivasañca sindhuvārapupphasadisāni nigguṇṭhipupphāni gahetvā bhagavantaṃ pūjesi. So tena puññakamma devamanussesu saṃsaranto ito pañcatimse kappe khattiyakule nibbattivā mahāpatāpo nāma rājā ahoṣi cakkavattī. So dhammena samena rajjaṃ kārento satte saggamagge paṭiṭṭhāpesi. Puna imasmim kappe kassapassa bhagavato kāle mahāvibhavo seṭṭhi hutvā kapaṇaddhikādīnaṃ dānaṃ dento saṅghassa khīrabhattaṃ adāsi. Evaṃ tattha tattha dānamayaṃ puññasambhāraṃ karonto itarañca nibbānatthaṃ sambharanto devamanussesu saṃsaritvā imasmim buddhuppāde sāvattinagare rañño pasenadissa amaccakule nibbatti, “vīro”tissa nāmaṃ akaṃsu. So vayappatto nāmanugatehi pattabalajavādiguṇehi samannāgato saṅgāmasūro hutvā mātāpitūhi nibandhavasena kārite dārapariggahe ekaṃyeva puttaṃ labhitvā pubbahetunā codiyamāno kāmesu saṃsāre ca ādīnavam disvā saṃvegajāto pabbajitvā ghaṭento vāyamanto nacirasseva chaḷabhiñño ahoṣi. Tena vuttaṃ **apadāne** (apa. therā 1.21.21-24) –

“Vipassissa bhagavato, āsimārāmiko ahaṃ;
Nigguṇṭhipupphaṃ paggayha, buddhassa abhiropayim.

“Ekanavutito kappe, yaṃ pupphamabhipūjayim;
Duggatiṃ nābhijānāmi, buddhapūjāyidaṃ phalaṃ.

“Pañcavīse ito kappe, eko āsim janādhipo;
Mahāpatāpanāmena, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana”nti.

Evaṃ pana arahattaṃ patvā phalasaṃpattisukhena vītināmentaṃ theram purānadutiyaikā uppabbājetukāmā antarantarā nānāyehi palobhetuṃ parakkamantī ekadivasam divāvihāraṭṭhānaṃ

gantvā itthikuttādāni dassetuṃ ārabhi. Athāyasmā vīro “maṃ palobhetukāmā sineruṃ makasapakkhavātena cāletukāmā viya yāva bālā vatāyaṃ itthi”ti tassā kiriyāya niratthakabhāvaṃ dīpento “**yo duddamiyo**”ti gāthaṃ abhāsi.

8. Tattha **yo duddamiyoti**ādānaṃ padānaṃ attho heṭṭhā vuttoyeva. Idaṃ panettha yojanāmatṭaṃ **yo** pubbe adanta kilesatāya paccatthikehi vā saṅgamasīse dametuṃ jetuṃ asakkuṇeyyatāya **aduddamiyo**, idāni pana uttamena damena danto catubbidhasammappamadhānavīriyasampattiyā **vīro**, vuttanayeneva santusīto viṭṭhakaṅkho vijitāvī apetalomahaṃso **vīro** vīranāmako anavasesato kilesaparinibbānena **parinibbuto**, tato eva ṭhitasabhāvo, na tādisānaṃ satenapi sahasenapi cālanīyoti. Taṃ sutvā sā itthi – “mayhaṃ sāmike evaṃ paṭipanne ko mayhaṃ gharāvāsena attho”ti saṃvegajātā bhikkhunīsu pabbajitvā nacirasseva tevijjā ahoṣīti.

Vīrattheragāthāvaṇṇanā niṭṭhitā.

9. Pilindavacchattheragāthāvaṇṇanā

Svāgatanti āyasmato pilindavacchattherassa gāthā. Kā uppatti? Ayaṃ kira padumuttarabuddhakāle haṃsavatīnagare mahābhogakule nibbato heṭṭhā vuttanayeneva satthu santike dhammaṃ suṇanto satthāraṃ ekaṃ bhikkhuṃ devatānaṃ piyamaṇāpabhāvena aggaṭṭhāne ṭhapentaṃ disvā taṃ ṭhānantaraṃ patthetvā yāvajīvaṃ kusalaṃ katvā tato cuto devamanussesu saṃsaranto sumedhassa bhagavato kāle manussaloke nibbattitvā bhagavati parinibbuta satthu thūpassa pūjaṃ katvā saṅhe ca mahādānaṃ pavattetvā tato cuto devamanussesu eva saṃsaranto anuppanne buddhe cakkavattī rājā hutvā mahājanaṃ pañcasu sīlesu paṭiṭṭhāpetvā saggaparāyaṇaṃ akāsi. So anuppanneyeva amhākaṃ bhagavati sāvattiyā brāhmaṇagehe nibbatti. “Pilindo”tissa nāmaṃ akaṃsu. Vacchoti pana gottaṃ. Tena so aparabhāge “pilindavaccho”ti paññāyittha. Saṃsāre pana saṃvegabahulatāya paribbājakapabbajjaṃ pabbajitvā cūlagandhāraṃ nāma vijjaṃ sādhetvā tāya vijjāya ākāsacārī paracittavidū ca hutvā rājagahe lābhagayasaggappatto paṭivasati.

Atha yadā amhākaṃ bhagavā abhisambuddho hutvā anukkamena rājagahaṃ upagato, tato paṭṭhāya buddhānubhāvena tassa sā vijjā na sampajjati, attano kiccaṃ na sādheti. So cintesi – “sutaṃ kho pana metaṃ ācariyapācariyānaṃ bhāsamānānaṃ ‘yattha mahāgandhāravijjā dharati, tattha cūlagandhāravijjā na sampajjati’ti, samaṇassa pana gotamassa āgatakālate paṭṭhāya nāyaṃ mama vijjā sampajjati, nissamsayaṃ samaṇo gotamo mahāgandhāravijjaṃ jānāti, yaṃnūnāhaṃ taṃ payirupāsivā tassa santike taṃ vijjaṃ pariyāpuṇeyya”nti. So bhagavantaṃ upasaṅkamitvā etadavoca – “ahaṃ, mahāsamaṇa, tava santike ekaṃ vijjaṃ pariyāpuṇitukāmo, okāsaṃ me karohī”ti. Bhagavā “tena hi pabbajā”ti āha. So “vijjāya parikammaṃ pabbajjā”ti maññamāno pabbajī. Tassa bhagavā dhammaṃ kathetvā caritānukūlaṃ kammaṭṭhānaṃ adāsi. So upanissayasampannatāya nacirasseva vipassanaṃ vadḍhetvā arahattaṃ pāpuṇi. Yā pana purimajātiyaṃ tassovāde ṭhatvā sagge nibbattā devatā, taṃ kataññutaṃ nissāya sañjātabahumānā sāyaṃ pātaṃ therāya payirupāsivā gacchanti. Tasmā therā devatānaṃ piyamaṇāpatāya aggaṭṭaṃ patto. Tena vuttaṃ **apadāne** (apa. therā 1.2.55-67) –

“Nibbuta lokanāthamhi, sumedhe aggapuggale;
Pasannacitto sumano, thūpapūjaṃ akāsahaṃ.

“Ye ca khīṇāsavā tattha, chaḷabhiññā mahiddhikā;
Tehaṃ tattha samānetvā, saṅghabhattaṃ akāsahaṃ.

“Sumedhassa bhagavato, upaṭṭhāko tadā ahu;
Sumedho nāma nāmena, anumodittha so tadā.

“Tena cittappasādena, vimānaṃ upapajjahaṃ;

Chaḷāsītisahassāni, accharāyo ramimsu me.

“Mameva anuvattanti, sabbakāmehi tā sadā;
Aññe deve abhibhomī, puññakammassidaṃ phalaṃ.

“Pañcavīsamhi kappamhi, varuṇo nāma khattiyo;
Visuddhabhojano āsiṃ, cakkavattī ahaṃ tadā.

“Na te bījaṃ pavappanti, napi nīyanti naṅgalā;
Akaṭṭhapākimaṃ sālīṃ, paribhuñjanti mānusa.

“Tattha rajjaṃ karitvāna, devattaṃ puna gacchahaṃ;
Tadāpi edisā mayhaṃ, nibbattā bhogasampadā.

“Na maṃ mittā amittā vā, hiṃsanti sabbapāṇino;
Sabbesampī piyo homi, puññakammassidaṃ phalaṃ.

“Timsakappasahassamhi, yaṃ dānamadadiṃ tadā;
Duggatiṃ nābhijānāmi, gandhālepassidaṃ phalaṃ.

“Imasmiṃ bhaddake kappe, eko āsiṃ janādhipo;
Mahānubhāvo rājāhaṃ, cakkavattī mahabbalo.

“Sohaṃ pañcasu sīlesu, ṭhapetvā janataṃ bahuṃ;
Pāpetvā sugatiṃyeva, devatānaṃ piyo ahuṃ.

“Kilesā jhāpitā mayhaṃ...pe... kataṃ buddhassa sāsana’nti.

Tathā devatāhi ativiya piyāyitabbabhāvato imaṃ theram bhagavā devatānaṃ piyamanāpabhāvena aggaṭṭhāne ṭhapesi – “etadaggaṃ, bhikkhave, mama sāvakanānaṃ bhikkhūnaṃ devatānaṃ piyamanāpānaṃ yadidaṃ pilindavaccho”ti (a. ni. 1.209, 215) so ekadivasam bhikkhusaṅghamajjhe nisinno attano guṇe paccavekkhitvā tesam kāraṇabhūtaṃ vijjānimittaṃ bhagavato santike āgamaṃ pasamsanto “**svāgataṃ nāpagata**”nti gāthaṃ abhāsi.

9. Tattha **svāgatanti** sundaraṃ āgamaṃ, idaṃ mamāti sambandho. Atha vā **svāgatanti** suṭṭhu āgataṃ, mayāti vibhatti vipariṇāmetabbā. **Nāpagatanti** na apagataṃ hitābhivuddhito na apetaṃ. **Nayidaṃ dumantitaṃ mamāti** idaṃ mama duṭṭhu kathitaṃ, duṭṭhu vā vīmaṃsitaṃ na hoti. Idaṃ vuttaṃ hoti – yaṃ bhagavato santike mamāgamaṃ, yaṃ vā mayā tattha āgataṃ, taṃ svāgataṃ, svāgatattāyeva na durāgataṃ. Yaṃ “bhagavato santike dhammaṃ sutvā pabbajissāmī”ti mama mantitaṃ gaditaṃ kathitaṃ, cittaṃ vā vīmaṃsitaṃ idampi na dummantinti. Idāni tattha kāraṇaṃ dassento “**saṃvibhattesū**”tiādīmāha. **Samvibhattesūti** pakārato vibhattesu. **Dhammesūti** ñeyyadhammesu samathadhammesu vā, nānātitthiyehi pakatiādivasena, sammāsambuddhehi dukkhādivasena saṃvibhajitvā vuttadhammesu. **Yaṃ seṭṭhaṃ tadupāgaminti** yaṃ tattha seṭṭhaṃ, taṃ catusaccadhammaṃ, tassa vā bodhakaṃ sāsanaḍḍhammaṃ upāgamiṃ, “ayaṃ dhammo ayaṃ vinayo”ti upagacchiṃ. Sammāsambuddhehi eva vā kusalādivasena khandhādivasena yathāsabhāvato saṃvibhattesu sabhāvadhammesu yaṃ tattha seṭṭhaṃ uttamaṃ pavaraṃ, taṃ maggaphalanibbānadhammaṃ upāgamiṃ, attapaccakkhato upagacchiṃ sacchākāsiṃ, tasmā svāgataṃ mama na apagataṃ sumantitaṃ na dummantitanti yojanā.

Pilindavacchattheragāthāvaṇṇanā niṭṭhitā.

10. Puṇṇamāsatheragāthāvaṇṇanā

Vihari apekkhanti āyasmato puṇṇamāsattherassa gāthā. Kā uppatti? So kira vipassissa bhagavato kāle cakkavākayoniyaṃ nibbato bhagavantaṃ gacchantaṃ disvā pasannamānaso attano mukhatuṇḍakena sālappupphaṃ gahetvā pūjaṃ akāsi. So tena puññakammena devamanussesu saṃsaranto ito sattarase kappe aṭṭhakkhattuṃ cakkavattī rājā ahoṣi. Imasmiṃ pana kappe kassapassa bhagavato sāsane osakkamāne kuṭumbiyakule nibbattitvā pabbajitvā samaṇadhammaṃ katvā tato cuto devamanussesu saṃsaranto imasmiṃ buddhuppāde sāvattinagare samiddhissa nāma brāhmaṇassa putto hutvā nibbatti. Tassa jātadivase tasmiṃ gehe sabbā rittakumbhiyo suvaṇṇamāsānaṃ puṇṇā ahesuṃ. Tenassa **puṇṇamāsoti** nāmaṃ akaṃsu. So vayappatto brāhmaṇavijjāsu nipphattiṃ patvā vivāhakammaṃ katvā ekaṃ puttaṃ labhitvā upanissayasampannatāya gharāvāsaṃ jīgucchanto bhagavantaṃ upasaṅkamitvā dhammaṃ sutvā paṭiladdhasaddho pabbajitvā laddhūpasampado pubbakiccasampanno catusaccakammaṭṭhāne yuttappayutto vipassanaṃ ussukkāpetvā arahattaṃ pāpuṇi. Tena vuttaṃ **apadāne** (apa. thera 1.7.13-19) –

“Sindhuyā nadiyā tīre, cakkavāko ahaṃ tadā;
Suddhasevālabhakkhoṃ, pāpesu ca susaṇṇato.

“Addasaṃ virajaṃ buddhaṃ, gacchantaṃ anilañjase;
Tuṇḍena sālaṃ paggayha, vipassissābhiropayim.

“Yassa saddhā tathāgate, acalā suppatiṭṭhitā;
Tena cittappasādena, duggatiṃ so na gacchati.

“Svāgataṃ vata me āsi, buddhaseṭṭhassa santike;
Vihaṅgadena, subījaṃ ropitaṃ mayā.

“Ekanavutito kappe, yaṃ pupphamabhiropayim;
Duggatiṃ nābhijānāmi, buddhapūjāyidaṃ phalaṃ.

“Sucārudassanā nāma, aṭṭhete ekanāmakā;
Kappe sattarase āsuṃ, cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana”nti.

Athassa purānadutiyaikā taṃ palobhetukāmā alaṅkatapaṭiyattā puttana saddhiṃ upagantvā piyālāpabhāvādikehi bhāvavivaraṅkammaṃ nāma kātuṃ ārabhi. Thero tassā kāraṇaṃ disvā attano katthacipi alaggabhāvaṃ pakāsento “**vihari apekkha**”nti gāthaṃ abhāsi.

10. Tattha **viharīti** visesato hari apahari apanesi. **Apekkhanti** taṇhaṃ. **Idhāti** imasmiṃ loke attabhāve vā. **Huranti** aparasmiṃ anāgate attabhāve vā. **Idhāti** vā ajjhattikesu āyatanesu. **Huranti** bāhiresu. **Vā**-saddo samuccayattho “apadā vā dvipadā vā” tiādīsu (itivu. 90; a. ni. 4.34; 5.32) viya. **Yoti** attānameva paraṃ viya dasseti. **Vedagūti** vedena gato maggañāṇena nibbānaṃ gato adhigato, cattāri vā saccāni pariññāpahānasacchikiriyābhāvanābhisamayavasena abhisamecca ṭhito. **Yatattoti** maggasamvarena saṃyatasabhāvo, sammāvāyāmena vā saṃyatasabhāvo. **Sabbesu dhammesu anūpalittoti** sabbesu ārammaṇesu dhammesu taṇhādiṭṭhilepavasena na upalitto, tena lābhādilokadhamme samatikkamaṃ dasseti. **Lokassāti** upādānakkhandhapañcakassa. Tañhi lujjanapalujjanatṭhena loko. **Jaññāti** jānitvā. **Udayabbayañcāti** uppādañceva vayañca, etena yathāvuttagaṇānaṃ pubbabhāgapaṭipadaṃ dasseti. Ayaṃ panettha attho – yo sakalassa khandhādilokassa samapaññāsāya ākārehi udayabbayaṃ jānitvā vedagū yatatto katthaci anupalitto, so sabbattha apekkhaṃ vineyya santusito tādisānaṃ vipakārānaṃ na kiñci maññati, tasmā tvaṃ andhabāle yathāgatamaggeneva gacchāti. Atha sā itthī “ayaṃ samaṇo mayi putte ca nirapekkho, na sakkā imaṃ palobhetu”nti pakkāmi.

Puṇṇamāsattheragāthāvaṇṇanā niṭṭhitā.

Paramatthadīpaniyā theragāthāsaṃvaṇṇanāya

Paṭhamavaggavaṇṇanā niṭṭhitā.

2. Dutiyavaggo

1. Cūlavacchattheragāthāvaṇṇanā

Pāmojjabahuloti āyasmato cūlavacchattherassa gāthā. Kā uppatti? So kira padumuttarassa bhagavato kāle daliddakule nibbattitvā paresaṃ bhatiyā jīvikamaṃ kappento bhagavato sāvakaṃ sujātaṃ nāma theramaṃ paṃsukūlaṃ pariyesantaṃ disvā pasannamānaso upasaṅkamitvā vatthaṃ datvā pañcapatiṭṭhitena vandi. So tena puññakammena tettiṃsakkhattuṃ devarajjamaṃ kāresi. Sattasattatikkhattuṃ cakkavattī rājā ahoṣi. Anekavāraṃ padesarājā. Evaṃ devamanussesu saṃsaranto kassapassa bhagavato sāsane osakkamāne pabbajitvā samaṇadhammaṃ katvā ekaṃ buddhantaṃ devamanussagatīsu aparāparaṃ parivattanto amhākaṃ bhagavato kāle kosambiyamaṃ brāhmaṇakule nibbatti. **Cūlavaccho**tissa nāmaṃ ahoṣi. So vayappatto brāhmaṇasippesu nipphattiṃ gato buddhagūṇe sutvā pasannamānaso bhagavantaṃ upasaṅkami, tassa bhagavā dhammaṃ kathesi. So paṭiladdhasaddho pabbajitvā laddhūpasampado katapubbakicco caritānukūlaṃ kammaṭṭhānaṃ gahetvā bhāvento vihari. Tena ca samayena kosambikā bhikkhū bhaṇḍanaajātā ahesuṃ. Tadā cūlavacchatthero ubhayesaṃ bhikkhūnaṃ laddhiṃ anādāya bhagavatā dinnovāde ṭhatvā vipassanaṃ brūhetvā arahattaṃ pāpuṇi. Tena vuttaṃ **apadāne** (apa. therā 2.50.31-40) –

“Padumuttarabhagavato, sujāto nāma sāvako;
Paṃsukūlaṃ gavesanto, saṅkāre caratī tadā.

“Nagare haṃsavatīyā, paresaṃ bhatako ahaṃ;
Upaḍḍhudussaṃ datvāna, sirasā abhivādayiṃ.

“Tena kammaṃ sukateṇa, cetanāpaṇidhīhi ca;
Jahitvā mānusaṃ dehaṃ, tāvatīṃsamagacchahaṃ.

“Tettiṃsakkhattuṃ devindo, devarajjamakārayiṃ;
Sattasattatikkhattuñca, cakkavattī ahoṣahaṃ.

“Padesarajjamaṃ vipulaṃ, gaṇanāto asaṅkhiyaṃ;
Upaḍḍhadussadānena, modāmi akutobhaya.

“Icchamāno cahaṃ ajja, sakānanaṃ sapabbataṃ;
Khomadussehi chādeyyaṃ, aḍḍhudussassidaṃ phalaṃ.

“Satasahassito kappe, yaṃ dānamadadiṃ tadā;
Duggatiṃ nābhijānāmi, aḍḍhudussassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Atha cūlavacchatthero arahattaṃ patvā tesamaṃ bhikkhūnaṃ kalahābhiratīyā sakatthavināsaṃ disvā dhammasaṃvegappatto, attano ca pattavisesaṃ paccavekkhitvā pītisomanassavasena “**pāmojjabahulo**”ti gāthaṃ abhāsi.

11. Tattha **pāmojjabahuloti** suparisuddhasīlatāya vipphaṭṭisārābhāvato adhikusalesu dhammesu abhirativasena pamodabahulo. Tenevāha “**dhamme buddhappavedite**”ti. Tattha **dhammeti**. Sattatiṃsāya bodhipakkhiyadhamme navavidhe vā lokuttaradhamme. So hi sabbaññubuddhena sāmukkamaṃsīkāya desanāya pakāsitattā sātisayaṃ buddhappavedito nāma. Tassa pana adhigamūpāyabhāvato desanādhammopi idha labbhateva. **Padam santanti** nibbānaṃ sandhāya vadati. Evarūpo hi bhikkhu santam padam santam koṭṭhāsam sabbasaṅkhārānaṃ upasamabhāvato **saṅkhārūpasamaṃ** paramasukhatāya **sukhaṃ** nibbānaṃ adhigacchati vindatiyeva. Parisuddhasīlo hi bhikkhu vipphaṭṭisārābhāvena pāmojjabahulo saddhamme yuttappayutto vimuttipariyosānā sabbasampattiyo pāpuṇāti. Yathāha – “avipphaṭṭisārathāni kho, ānanda, kusalāni sīlāni, avipphaṭṭisāro pāmojjatthāyā”tiādi (a. ni. 10.1). Atha vā **pāmojjabahuloti** sammāsambuddho bhagavā, svākkhāto dhammo, suppaṭṭipanno saṅghoti ratanattayaṃ sandhāya pamodabahulo. Tattha pana so pamodabahulo kiṃ vā karotīti āha “dhamme buddhappavedite”tiādi. Saddhāsampannassa hi sappurisasamaṃsevanasaddhammassavanayonisomanasikāradhammānudhammapaṭṭipattīnaṃ sukheneva sambhavato sampattiyo hatthagatā eva honti, yathāha – “saddhājāto upasaṅkamati, upasaṅkamanto payirupāsati”tiādi (ma. ni. 2.183).

Cūlavacchattheragāthāvaṇṇanā niṭṭhitā.

2. Mahāvacchattheragāthāvaṇṇanā

Paññābalīti āyasmato mahāvacchattherassa gāthā. Kā uppatti? Ayaṃ kira padumuttarassa bhagavato bhikkhusaṅghassa ca pānīyadānamadāsi. Puna sikhissa bhagavato kāle upāsako hutvā vivaṭṭūpanissayaṃ bahuṃ puññakammaṃ akāsi, so tehi puññakammehi tattha tattha sugatīsuyeva saṃsaranto imasmiṃ buddhuppāde magadharatṭhe nālakagāme samiddhissa nāma brāhmaṇassa putto hutvā nibbatti. Tassa **mahāvacchoti** nāmaṃ ahosi. So vayappatto āyasmato sārīputtassa bhagavato sāvakabhāvaṃ sutvā “sopi nāma mahāpañño. Yassa sāvakattaṃ upāgato, so eva maññe imasmiṃ loke aggapuggalo”ti bhagavati saddhaṃ uppādetvā satthu santike pabbajitvā kammaṭṭhānaṃ anuyuñjanto nacirasseva arahattaṃ pāpuṇi. Tena vuttaṃ **apadāne** (apa. thera 2.50.51-56) –

“Padumuttarabuddhassa, bhikkhusaṅghe anuttare;
Pasannacitto sumano, pānīyaghaṭamapūrayiṃ.

“Pabbatagge dumagge vā, ākāse vātha bhūmiyaṃ;
Yadā pānīyamicchāmi, khippaṃ nibbattate mama.

“Satasahassito kappe, yaṃ dānamadadiṃ tadā;
Duggatiṃ nābhijānāmi, dakadānassidaṃ phalaṃ.

“Kilesā jhāpitā mayhaṃ...pe... bhavā sabbe samūhatā;
Chaḷabhiññā sacchikatā, kataṃ buddhassa sāsana”nti.

Evam pana arahattaṃ patvā vimuttisukhaṃ anubhavanto sāsanaṃ niyyānikabhāvavibhāvanena sabrahmacārīnaṃ ussāhajanatthaṃ “**paññābalī**”ti gāthaṃ abhāsi.

12. Tattha **paññābalīti** pārihāriyapaññāya vipassanāpaññāya ca vasena abhiñhaso sātisayena paññābalena samannāgato. **Sīlavatūpapannoti** ukkaṃsagatena catupārisuddhisīlena, dhutadhammasaṅkhātehi vatehi ca upapanno samannāgato. **Samāhitoti** upacārappanābhedenā samādhinā samāhito. **Jhānaratoti** tato eva ārammaṇūpanijjhāne lakkhaṇūpanijjhāne ca rato satatābhīyutto. Sabbakālaṃ satiyā avippavāsavasena **satimā**. **Yadatthiyanti** atthato anapetaṃ atthiyaṃ, yena atthiyaṃ yadatthiyaṃ. Yathā paccaye paribhuñjantassa paribhuñjanaṃ atthiyaṃ hoti, tathā **bhojanaṃ bhuñjamāno**. Sāmaparibhogena hi taṃ atthiyaṃ hoti dāyajjaparibhogena vā, na aññathā

bhojananti ca nidassanamattam datthabham. Bhuñjyati paribhuñjyati vā bhojanam, cattāro paccayā. “Yadatthika”nti vā pātho. Yadattham yassatthāya satthārā paccayā anuññātā, tadattham kāyassa t̥hitiādiattham, tañca anupādisesanibbānattham. Tasmā anupādāparinibbānattham bhojanapaccaye bhuñjamāno tato eva **kañkhettha kālam** attano anupādāparinibbānakālam āgameyya. **Idha** imasmiṃ sāsane **vītarāgo**. Bāhirakassa pana kāmesu vītarāgassa idaṃ natthīti adhippāyo.

Mahāvacchattheragāthāvaṇṇanā niṭṭhitā.

3. Vanavacchattheragāthāvaṇṇanā

Nīlabbhavaṇṇātī āyasmato vanavacchattherassa gāthā. Kā uppatti? So kira atthadassino bhagavato kāle kacchapayoniyam nibbato vinatāya nāma nadiyā vasati. Tassa khuddakanāvappamāṇo attabhāvo ahoṣi. So kira ekadivasam bhagavantam nadiyā tīre t̥hitam disvā, “pāram gantukāmo maññe bhagavā”ti attano piṭṭhiyam āropetvā netukāmo pādamūle nipajji. Bhagavā tassa ajjhāsayaṃ ñatvā tam anukampanto āruhi. So pītisomanassajāto sotam chindanto jiyāya vegena khittasaro viya tāvadeva paratīram pāpesi. Bhagavā tassa puññassa phalam etarahi nibbattanakasampattiñca byākāritvā pakkāmi. So tena puññakamma devamanussesu saṃsaranto anekasatakkhattum tāpasapabbajjam pabbajitvā araññavāsīyeva ahoṣi. Puna kassapabuddhakāle kapotayoniyam nibbattitvā araññe viharantaṃ mettāvihāriṃ ekaṃ bhikkhum disvā cittaṃ pasādesi.

Tato pana cuto bārānasiyam kulagehe nibbattitvā vayappatto saṃvegajāto pabbajitvā vivaṭṭūpanissayaṃ bahum puññakammaṃ upacini. Evaṃ tattha tattha devamanussesu saṃsaritvā imasmiṃ buddhuppāde kapilavatthunagare vacchagottassa nāma brāhmaṇassa gehe paṭisandhiṃ gaṇhi. Tassa mātā paripakkagabbhā araññam dassanatthāya sañjātadohaḷā araññam pavisitvā vicarati, tāvadevassā kammajavātā calimsu, tirokaraṇiṃ parikkhipitvā adamsu. Sā dhaññapuññalakkhaṇam puttam vijāyi. So bodhisattena saha paṃsukīlikasahāyo ahoṣi. “Vaccho”tissa nāmañca ahoṣi. Vanābhīratīyā vasena **vanavacchoti** paññāyittha. Aparabhāge mahāsatte mahābhīnikkhamanam nikkhamitvā mahāpadhānam padahante, “ahampi siddhatthakumārena saha araññe viharissāmī”ti nikkhamitvā tāpasapabbajjam pabbajitvā himavante vasanto abhisambuddhabhāvaṃ sutvā bhagavato santikam upagantvā pabbajitvā kammaṭṭhānam gahetvā araññe vasamāno nacirasseva vipassanam ussukkāpetvā arahattam sacchākāsi. Tena vuttam **apadāne** (apa. therā 2.49-148-163) –

“Atthadassī tu bhagavā, sayambhū lokanāyako;
Vinatānadiyā tīram, upagacchi tathāgato.

“Udakā abhinikkamma, kacchapo vārigocarō;
Buddham tāretukāmoḥam, upesiṃ lokanāyakam.

“Abhirūhatu maṃ buddho, atthadassī mahāmuni;
Ahaṃ tam tārayissāmi, dukkhassantakaro tuvaṃ.

“Mama saṅkappamaññāya, atthadassī mahāyaso;
Abhirūhitvā me piṭṭhiṃ, aṭṭhāsi lokanāyako.

“Yato sarāmi attānam, yato pattosmi viññutaṃ;
Sukham me tādisam natthi, phuṭṭhe pādātale yathā.

“Uttarivāna sambuddho, atthadassī mahāyaso;
Naditīramhi t̥hatvāna, imā gāthā abhāsatha.

“Yāvātā vattate cittaṃ, gaṅgāsotaṃ tarāmaḥam;

Ayañca kacchapo rājā, tāresi mama paññavā.

“Iminā buddhatarāṇena, mettacittavatāya ca;
Aṭṭhārase kappasate, devaloke ramissati.

“Devalokā idhāgantvā, sukkamūlena codito;
Ekāsane nisīditvā, kañkhāsotaṃ tarissati.

“Yathāpi bhaddake khetto, bījaṃ appampi ropitaṃ;
Sammādhāre pavecchante, phalaṃ toseti kassakaṃ.

“Tathevidaṃ buddhakhettaṃ, sammāsambuddhadesitaṃ;
Sammādhāre pavecchante, phalaṃ maṃ tosayissati.

“Padhānapahitattomhi, upasanto nirūpadhi;
Sabbāsava pariññāya, viharāmi anāsavo.

“Aṭṭhārase kappasate, yaṃ kammakariṃ tadā;
Duggatiṃ nābhijānāmi, taraṇāya idaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Evam pana arahattaṃ patvā bhagavati kapilavatthusmiṃ viharante tattha gantvā sathhāraṃ vanditvā bhikkhūhi samāgato paṭisanthāravasena “kiṃ, āvuso, araṇṇe phāsuvihāro laddho”ti puṭṭho “ramaṇīyā, āvuso, araṇṇe pabbatā”ti attanā vuṭṭhapabbate vaṇṇento “**nīlabbhavaṇṇā**”ti gāthaṃ abhāsi.

13. Tattha **nīlabbhavaṇṇā**ti nīlavalāhakanibhā nīlavalāhakasaṅghānā ca. **Rucirā**ti ruciyā sakiraṇā pabhassarā ca. **Sītavarī**ti sītalasālilā. **Sucindharā**ti sucisuddhabhūmibhāgatāya suddhacittānaṃ vā ariyānaṃ nivāsanaṭṭhānatāya sucindharā. Gāthāsukhatthañhi sānūnāsikaṃ katvā niddeso. “Sītavarīsucindharā”ti pi pāṭho, sītasucivarīdharā sītalavimalasālilāsavavantoti attho. **Indagopakasañchannā**ti indagopakanāmakehi pavāḷavaṇṇehi rattakimīhi sañchādītā pāvussakālavasena evamāha. Keci pana “indagopakanāmāni rattatīṇāni”ti vadanti. Apare “kaṇikārarukkhā”ti. **Selā**ti silāmayā pabbatā, na paṃsupabbatāti attho. Tenāha – “yathāpi pabbato selo”ti (udā. 24). **Ramayanti mantī** maṃ ramāpentī, mayhaṃ vivekābhirattiṃ paribrūhenti. Evam thero attano cīrakālaparibhāvitāṃ araṇṇābhirattiṃ pavedento tividhaṃ vivekābhiratimeva dīpeti. Tattha upadhivivekena aññābyākaraṇaṃ dīpitameva hotīti.

Vanavacchattheragāthāvaṇṇanā niṭṭhitā.

4. Sivakasāmaṇeragāthāvaṇṇanā

Upajjhāyoti sivakassa sāmaṇerassa gāthā. Kā uppatti? So kira ito ekatiṃse kappe vessabhussa bhagavato kāle kulagehe nibbato ekadivasaṃ kenacideva karaṇīyena araṇṇaṃ pavīṭṭho tattha pabbatantare nisinnaṃ vessabhuṃ bhagavantaṃ disvā pasannacitto upasaṅkamtivā vanditvā añjaliṃ paggayha aṭṭhāsi. Puna tattha manoharāni kāsūmarīkaphalāni disvā tāni gahetvā bhagavato upanesi, paṭiggahesi bhagavā anukampaṃ upādāya. So tena puññakamma devamanussesu saṃsaranto kassapassa bhagavato sāsane mātule pabbajante tena saddhiṃ pabbajitvā bahuṃ vivaṭṭūpanissayaṃ kusalaṃ upacinitvā imasmiṃ buddhuppāde vanavacchattherassa bhāgineyyo hutvā nibbato, **sivakotissa** nāmaṃ aho. Tassa mātā attano jeṭṭhabhātike vanavacche sāsane pabbajitvā pabbajitakiccaṃ matthakaṃ pāpetvā araṇṇe viharante taṃ pavattiṃ sutvā puttā āha – “tāta sivaka, therassa santike pabbajitvā therāṃ upaṭṭhaha, mahallako dāni thero”ti. So mātu ekavacaneneva ca pubbe katādhikāratāya ca mātulattherassa santikaṃ gantvā pabbajitvā taṃ upaṭṭhahanto araṇṇe vasati.

Tassa ekadivasam kenacideva karanīyena gāmantam gatassa kharo ābādho uppajji. Manussesu bhesajjam karontesupi na paṭippassambhi. Tasmim cirāyante thero “sāmaṇero cirāyati, kiṃ nu kho kāraṇa”nti tattha gantvā tam gilānam disvā tassa tam tam kattabbayuttakam karonto divasabhāgam vītīnāmetvā rattibhāge balavapaccūsavelāyam āha – “sivaka, na mayā pabbajitakālato paṭṭhāya gāme vasitapubbam, ito araṇṇameva gacchāmā”ti. Tam sutvā sivako “yadipi me, bhante, idāni kāyo gāmate ṭhito, cittaṃ pana araṇṇe, tasmā sayānopi araṇṇameva gamissāmi”ti, tam sutvā thero tam bāhāyam gahetvā araṇṇameva netvā ovādam adāsi. So therassa ovāde ṭhatvā vipassitvā arahattam pāpuṇi. Tena vuttam **apadāne** (apa. thera 1.38.53-58) –

“Kaṇikāramva jotantam, nisinnam pabbatantare;
Addasam virajam buddham, lokajettham narāsabham.

“Pasannacitto sumano, kire katvāna añjalim;
Kāsumārikamādāya, buddhaseṭṭhassadāsaham.

“Ekatimse ito kappe, yam phalam adadim tadā;
Duggatim nābhijānāmi, phaladānassidam phalam.

“Kilesā jhāpitā mayham...pe... katam buddhassa sāsana”nti.

So arahattam patvā upajjhāyena attanā ca vuttamattham saṃsanditvā attano vivekābhīratikatam katakiccataṇca pavedento “**upajjhāyo maṃ avacā**”ti gātham abhāsi.

14. Tattha **upajjhāyoti** vajjāvajjam upanijjhāyati hitesitam paccupaṭṭhapetvā nāṇacakkhunā pekkhatīti upajjhāyo. **Manti** attānam vadati. **Avacāti** abhāsi. **Iti gacchāma sīvakāti** vuttākāradassanam, sivaka, ito gāmantato araṇṇaṭṭhānameva ehi gacchāma, tadeva amhākam vasanayogganti adhippāyo. Evaṃ pana upajjhāyena vutto sivako bhadro assājāniyo viya kasābhīhato sañjātasamvego hutvā araṇṇameva gantukāmatam pavedento –

“Gāme me vasati kāyo, araṇṇam me gataṃ mano;
Semānakopi gacchāmi, natthi saṅgo vijānata”nti. –āha;

Tassattho – yasmā idāni yadipi me idam sarīram gāmate ṭhitam, ajjhāsayo pana araṇṇameva gato, tasmā semānakopi gacchāmi gelaṇṇena ṭhānanisajjāgamanesu asammatthāya sayānopi iminā sayitākārena sarīsapo viya sarīsapanto, etha, bhante, araṇṇameva gacchāma, kasmā? **Natthi saṅgo vijānatanti**, yasmā dhammasabhāvā kāmesu saṃsāre ca ādīnavam, nekkhamme nibbāne ca ānisaṃsam yāthāvato jānantassa na katthaci saṅgo, tasmā ekapadeneva upajjhāyassa āṇā anuṭṭhitāti, tadapadesena añṇam byākāsi.

Sivakasāmaṇeragāthāvaṇṇanā niṭṭhitā.

5. Kuṇḍadhānattheragāthāvaṇṇanā

Pañca chinde pañca jaheti āyasmato kuṇḍadhānattherassa gāthā. Kā uppatti? So kira padumuttarassa bhagavato kāle haṃsavatīnagare kulagehe uppanno vayappatto heṭṭhā vuttanayeneva bhagavantam upasaṅkamitvā dhammam suṇanto satthārā ekaṃ bhikkhum paṭhamam salākam gaṇhantānam aggaṭṭhāne ṭhapiyamānam disvā tam ṭhānantaram patthetvā tadanurūpaṃ puñṇam karonto vicari. So ekadivasam padumuttarassa bhagavato nirodhasamāpattito vuṭṭhāya nisinnassa manosilācuṇṇapiñjaram mahantam kadaliṭhalakāṇṇikam upanesi, tam bhagavā paṭiggahetvā paribhuñji. So tena puñṇakammena ekādasakkhattum devesu devarajjam kāresi. Catuvīsativāre rājā ahoṣi cakkavattī. Evaṃ so punappunam puñṇāni katvā aparāparam devamanussesu saṃsaranto kassapabuddhakāle bhummadevatā hutvā nibbatti. Dīghāyukabuddhānaṇca nāma na anvaddhamāsiko

uposatho hoti. Tathā hi vipassissa bhagavato chabbassantare chabbassantare uposatho ahosi. Kassapadasabalo pana chaṭṭhe chaṭṭhe māse pātimokkhaṃ osāresi. Tassa pātimokkhassa osāraṇakāle disāvāsikā dve saḥāyakā bhikkhū “uposathaṃ karissāmā”ti gacchanti.

Ayaṃ bhummadevatā cintesi – “imesaṃ dvinnaṃ bhikkhūnaṃ metti ativiya dalhā, kiṃ nu kho, bhedake sati bhijjeyya, na bhijjeyyā”ti, sā tesam okāsaṃ olokayamānā tesam avidūreneva gacchati. Atheko thero ekassa hatthe pattacīvaraṃ datvā sarīraṇaṃ janatthaṃ udakaphāsukaṭṭhānaṃ gantvā dhotahatthapādo hutvā gumbasamīpato nikkhamati bhummadevatā tassa therassa pacchato uttamarūpā itthī hutvā kese vidhunitvā saṃvidhāya sambandhantī viya piṭṭhiyaṃ paṃsuṃ puñchamānā viya sātakaṃ saṃvidhāya nivāsayaṃ viya ca hutvā therassa padānupadikā hutvā gumbato nikkhantā. Ekamante ṭhito saḥāyakatthero taṃ kāraṇaṃ disvāva domanassajāto “naṭṭho dāni me iminā bhikkhūnā saddhiṃ dīgharattānugato sineho, sacāhaṃ evaṃvidhabhāvaṃ jāneyyaṃ, ettakaṃ addhānaṃ iminā saddhiṃ vissāsaṃ na kareyya”nti cintetvā āgacchantassevassa, “handāvuso, tuyhaṃ pattacīvaraṃ, tādīsena pāpena saddhiṃ ekamaggaṃ nāgacchāmī”ti āha. Taṃ kathaṃ sutvā tassa lajjibhikkhuno hadayaṃ tikhiṇasattiṃ gahetvā viddhaṃ viya ahosi. Tato naṃ āha – “āvuso, kiṃ nāmetaṃ vadasi, ahaṃ ettakaṃ kālaṃ dukkaṭamattampi āpattiṃ na jānāmi. Tvaṃ pana maṃ ajja ‘pāpo’ti vadasi, kiṃ te diṭṭha”nti. “Kiṃ aññena diṭṭhena, kiṃ tvaṃ evaṃvidhena alaṅkatapaṭiyattena mātugāmena saddhiṃ ekaṭṭhāne hutvā nikkhanto”ti. “Natthetaṃ, āvuso, mayhaṃ, nāhaṃ evarūpaṃ mātugāmaṃ passāmī”ti. Tassa yāvatiyaṃ kathentassāpi itaro thero kathaṃ asaddahitvā attanā diṭṭhakāraṇaṃ yeva bhūtattaṃ katvā gaṇhanto tena saddhiṃ ekamaggena agantvā aññena maggena satthu santikaṃ gato. Itaropi bhikkhu aññena maggena satthu santikaṃ yeva gato.

Tato bhikkhusaṅghassa uposathāgāraṃ pavisanavelāya so bhikkhu taṃ bhikkhuṃ uposathagge sañjānitvā, “imasmim uposathagge evarūpo nāma pāpabhikkhu atthi, nāhaṃ tena saddhiṃ uposathaṃ karissāmī”ti nikkhamitvā bahi atṭhāsi. Atha bhummadevatā “bhāriyaṃ mayā kammaṃ kata”nti mahallakaupāsakavaṇṇena tassa santikaṃ gantvā “kasmā, bhante, ayyo imasmim ṭhāne ṭhito”ti āha. “Upāsaka, imaṃ uposathaggaṃ eko pāpabhikkhu pavitṭho, ‘nāhaṃ tena saddhiṃ uposathaṃ karomī’ti bahi ṭhitomhī”ti. “Bhante, mā evaṃ gaṇhatha, parisuddhasīlo esa bhikkhu. Tumhehi diṭṭhamātugāmo nāma ahaṃ, mayā tumhākaṃ vīmaṃsanatthāya ‘dalhā nu kho imesaṃ therānaṃ metti, no dalhā’ti bhijjanābhijjanabhāvaṃ olokentena taṃ kammaṃ kata”nti. “Ko pana, tvaṃ sappurisā”ti? “Ahaṃ ekā bhummadevatā, bhante”ti devaputto kathento dibbānubhāvena ṭhatvā therassa pādesu nipatitvā “mayhaṃ, bhante, khamatha, etaṃ dosaṃ thero na jānāti, uposathaṃ karothā”ti theram yācitvā uposathaggaṃ pavesesi. So thero uposathaṃ tāva ekaṭṭhāne akāsi, mittasanthavavasena pana puna tena saddhiṃ na ekaṭṭhāne ahosīti. Imassa therassa kammaṃ na kathīyati, cudītakatthero pana aparāparaṃ vipassanāya kammaṃ karonto arahattaṃ pāpuṇi.

Bhummadevatā tassa kammaṃ nissandena ekaṃ buddhantaṃ apāyabhayato na muccittha. Sace pana kismiñci kāle manussattaṃ āgacchati, aññena yena kenaci kato doso tasseva upari patati. So amhākaṃ bhagavato kāle sāvattiyaṃ brāhmaṇakule nibbatti. “Dhānamāṇavo”tissa nāmaṃ akāmsu. So vayappatto tayo vede uggaṇhitvā mahallakakāle satthu dhammadesanaṃ sutvā paṭiladdhasaddho pabbaji, tassa upasampannadivasato paṭṭhāya ekā alaṅkatapaṭiyattā itthī tasmiṃ gāmaṃ pavisante saddhiṃ yeve gāmaṃ pavisati, nikkhamante nikkhamati. Vihāraṃ pavisantepe saddhiṃ pavisati, tiṭṭhantepe tiṭṭhatīti evaṃ niccānubandhā paññāyati. Thero taṃ na passati. Tassa puna purimakammaṃ nissandena sā aññesaṃ upaṭṭhāti. Gāme yāguṃ bhikkhaṇca dadamānā itthiyo “bhante, ayaṃ eko yāguṇko tumhākaṃ, eko imissā amhākaṃ saḥāyikāyā”ti parihāsaṃ karonti. Therassa mahatī vihesā hoti. Vihāragatampi naṃ sāmaṇerā ceva daharā bhikkhū ca parivāretvā “dhāno koṇḍo jāto”ti parihāsaṃ karonti. Athassa teneva kāraṇena **kuṇḍadhānattheroti** nāmaṃ jātaṃ. So utṭhāya samuṭṭhāya tehi kariyamānaṃ keḷiṃ sahituṃ asakkonto ummādaṃ gahetvā “tumhe koṇḍā, tumhākaṃ upajjhāyo koṇḍo, ācariyo koṇḍo”ti vadati. Atha naṃ satthu ārocesuṃ “kuṇḍadhāno, bhante, daharasāmaṇerehi saddhiṃ evaṃ pharusavācaṃ vadatī”ti. Sathā taṃ pakkosāpetvā “saccaṃ kira tvaṃ, dhāna, sāmaṇerehi saddhiṃ pharusavācaṃ vadasi”ti vatvā tena “saccaṃ bhagavā”ti vutte “kasmā

evaṃ vadesī”ti āha. “Bhante, nibaddhaṃ vihesaṃ asahanto evaṃ kathemī”ti. “Tvaṃ pubbe katakammaṃ yāvajjadivasā jīrāpetuṃ na sakkosi, puna evarūpaṃ pharusam māvaḍi bhikkhū”ti vatvā āha –

“Māvoca pharusam kañci, vuttā paṭivadeyyu taṃ;
Dukkhā hi sārambhakathā, paṭidaṇḍā phuseyyu taṃ.

“Sace neresi attānaṃ, kaṃso upahato yathā;
Esa pattosi nibbānaṃ, sārambho te na vijjati”ti. (dha. pa. 133-134);

Imaṅca pana tassa therassa mātugāmena saddhiṃ vicaraṇabhāvaṃ kosalaraññopi kathayimṃsu. Rājā “gacchatha, bhaṇe, vīmaṃsathā”ti pesetvā sayampi mandeneva parivārena therassa vasanaṭṭhānaṃ gantvā ekamante olokento aṭṭhāsi. Tasmīṃ khaṇe thero sūcikkammaṃ karonto nisinno hoti, sāpi itthī avidūre ṭhāne ṭhitā viya paññāyati. Rājā disvā “atthidaṃ kāraṇa”nti tassā ṭhitaṭṭhānaṃ agamāsi. Sā tasmīṃ āgacchante therassa vasanaṇṇasālaṃ pavitṭhā viya ahosi. Rājāpi tāya saddhiṃ tameva paṇṇasālaṃ pavisitvā sabbattha olokento adisvā “nāyaṃ mātugāmo, therassa eko kammavipāko”ti saññaṃ katvā paṭhamaṃ therassa samīpena gacchantopi theram avanditvā tassa kāraṇassa abhūtabhāvaṃ ñatvā āgamma theram vanditvā ekamantaṃ nisinno “kacci, bhante, piṇḍakena na kilamathā”ti pucchi. Thero “vaṭṭati, mahārājā”ti āha. “Jānāmaṃ, bhante, ayyassa kathaṃ, evarūpena parikkilesena saddhiṃ carantānaṃ tumhākaṃ ke nāma pasīdissanti, ito paṭṭhāya vo katthaci gamanakiccaṃ natthi, ahaṃ catūhi paccayehi tumhe upaṭṭhahissāmi, tumhe yoniso manasikāre mā pamajjitthā”ti nibaddhabhikkhaṃ paṭṭhapesi. Thero rājānaṃ upatthambhakaṃ labhitvā bhojanasappāyena ekaggacitto hutvā vipassanaṃ vaḍḍhetvā arahattaṃ pāpuṇi. Tato paṭṭhāya sā itthī antaradhāyi.

Tadā mahāsubhaddā ugganagare micchādittṭhikakule vasamānā “sathā maṃ anukampatū”ti uposathaṃ adhiṭṭhāya nirāmagandhā hutvā uparipāsadatale ṭhitā “imāni pupphāni antare aṭṭhatvā dasabalassa matthake vitānaṃ hutvā tiṭṭhantu, dasabalo imāya saññāya sve pañcahi bhikkhusatehi saddhiṃ mayhaṃ bhikkhaṃ gaṇhatū”ti saccakiriyaṃ katvā aṭṭha sumanapupphamuṭṭhiyo vissajjesi. Pupphāni gantvā dhammadesanāvelāya satthu matthake vitānaṃ hutvā aṭṭhaṃsu. Sathā taṃ sumanapupphavitānaṃ disvā citteneva subhaddāya bhikkhaṃ adhivāsetvā punadivase aruṇe uṭṭhite ānandattheraṃ āha – “ānanda, mayaṃ ajja dūraṃ bhikkhācāraṃ gamissāma, puthujjanānaṃ adatvā ariyānaṃyeva salākaṃ dehī”ti. Thero bhikkhūnaṃ ārocesi – “āvuso, sathā ajja dūraṃ bhikkhācāraṃ gamissati, puthujjanā mā gaṇhantu, ariyāva salākaṃ gaṇhatū”ti. Kuṇḍadhānatthero “āhara, āvuso salāka”nti paṭhamaṃyeva hatthaṃ pasāresi. Ānando “sathā tādisānaṃ bhikkhūnaṃ salākaṃ na dāpeti, ariyānaṃyeva dāpeti”ti vitakkaṃ uppādetvā gantvā satthu ārocesi. Sathā “āharāpentassa salākaṃ dehī”ti āha. Thero cintesi – “sace kuṇḍadhānassa salākā dātuṃ na yuttā, atha sathā paṭibāheyya, bhavissati ettha kāraṇa”nti “kuṇḍadhānassa salākaṃ dassāmi”ti gamanaṃ abhinīhari. Kuṇḍadhāno tassa pure āgamaṇā eva abhiññāpādaṃ catutthajjhānaṃ samāpajjitvā iddhiyā ākāse ṭhatvā “āharāvuso, ānanda, sathā maṃ jānāti, mādisaṃ bhikkhuṃ paṭhamaṃ salākaṃ gaṇhantaṃ na sathā nivāretī”ti hatthaṃ pasāretvā salākaṃ gaṇhi. Sathā taṃ aṭṭhuppattim katvā theram imasmiṃ sāsane paṭhamaṃ salākaṃ gaṇhantānaṃ aggaṭṭhāne ṭhapesi. Yasmā ayaṃ thero rājānaṃ upatthambhakaṃ labhitvā sappāyāhāralābhena samāhitacitto vipassanāya kammaṃ karonto upanissayasampannatāya chaḷabhiñño ahosi. Tena vuttaṃ **apadāne** (apa. thera 1.4.1-16) –

“Sattāhaṃ paṭisallīnaṃ, sayambhuṃ aggapuggalaṃ;
Pasannacitto sumano, buddhaseṭṭhaṃ upaṭṭhahim.

“Vuṭṭhitaṃ kālamaññāya, padumuttaraṃ mahāmunim;
Mahantiṃ kadalīkaṇṇim, gahetvā upagacchaham.

“Paṭiggahetvā bhagavā, sabbaññū lokanāyako;
Mama cittaṃ pasādentō, paribhuñji mahāmuni.

“Paribhuñjītvā sambuddho, satthavāho anuttaro;
Sakāsane nisīditvā, imā gāthā abhāsatha.

“Ye ca santi samitāro, yakkhā imamhi pabbate;
Araññe bhūtabhabyāni, suṇantu vacanaṃ mama.

“Yo so buddhaṃ upaṭṭhāsi, migarājaṃva kesariṃ;
Tamaḥaṃ kittayissāmi, suṇātha mama bhāsato.

“Ekādasañcakkhattuṃ so, devarājā bhavissati;
Catuvīsaticchattuñca, cakkavattī bhavissati.

“Kappasatasahassamhi, okkākulasambhavo;
Gotamo nāma gottena, satthā loke bhavissati.

“Akkositvāna samaṇe, sīlavante anāsavo;
Pāpakammavipākena, nāmadheyyaṃ labhissati.

“Tassa dhamme sudāyādo, oraso dhammanimmito;
Kuṇḍadhānoti nāmena, sāvako so bhavissati.

“Pavivekamanuyutto, jhāyī jhānarato ahaṃ;
Tosayitvāna satthāraṃ, viharāmi anāsavo.

“Sāvakehi parivuto, bhikkhusaṅghapurakkhato;
Bhikkhusaṅghe nisīditvā, salākaṃ gāhayī jino.

“Ekaṃsaṃ cīvaram katvā, vanditvā lokanāyakaṃ;
Vadataṃ varassa purato, paṭhamam aggahe sahaṃ.

“Tena kamma bhagavā, dasasahassikampako;
Bhikkhusaṅghe nisīditvā, aggaṭṭhāne ṭhapesi maṃ.

“Vīriyaṃ me dhuradhorayaṃ, yogakkhemādhivāhanaṃ;
Dhāremi antimam deham, sammāsambuddhasāsane.

“Kilesā jhāpitā mayhaṃ...pe... kataṃ buddhassa sāsana’nti.

Evambhūtassapi imassa therassa guṇe ajānantā ye puthujjanā bhikkhū tadā paṭhamam salākaggahaṇe “kiṃ nu kho eta’nti samacintesuṃ. Tesam vimatividhamanattam thero ākāsam abbhuggantvā iddhipaṭihāriyaṃ dassetvā aññāpadesena aññaṃ byākaronto “**pañca chinde**”ti gātham abhāsi.

15. Tattha **pañca chindeti** apāyūpapattinibbattanakāni pañcorambhāgiyāni saṃyojanāni pāde bandhanarajjukam viya puriso satthena heṭṭhimamaggattayena chindeyya pajaheyya. **Pañca jaheti** uparidevalokūpapattihetubhūtāni pañcuddhambhāgiyasamyojanāni puriso gīvāya bandhanarajjukam viya arahattamaggena jaheyya, chindeyya vāti attho. **Pañca cuttari bhāvayeti** tesamyeva uddhambhāgiyasamyojanānam pahānāya saddhādīni pañcindriyāni uttari anāgāmimaggādhihamato upari

bhāveyya aggamaggādhigamavasena vaḍḍheyya. **Pañcasāṅgātigoti** evambhūto pana pañcannaṃ rāgadosamohamānadiṭṭhisāṅgānaṃ atikkamanena pahānena pañcasāṅgātigo hutvā. **Bhikkhu oghatiṇṇoti vuccatīti** sabbathā bhinnakilesatāya bhikkhūti, kāmabhavadiṭṭhiavijoghe taritvā tesam pārabhūte nibbāne ṭhitoti ca vuccatīti attho.

Kuṇḍadhānattheragāthāvaṇṇanā niṭṭhitā.

6. Belaṭṭhasīsatheragāthāvaṇṇanā

Yathāpi bhaddo ājañṇoti āyasmato belaṭṭhasīsatherassa gāthā. Kā uppatti? So kira padumuttarassa bhagavato kāle kulagehe nibbato bhagavantaṃ upasaṅkamitvā dhammaṃ sutvā paṭiladdhasaddho pabbajitvā samaṇadhammaṃ karonto upanissayasampattiyā abhāvena viśesaṃ nibbattetuṃ nāsakkhi. Vivaṭṭūpanissayaṃ pana baḥuṃ kusalaṃ upacinitvā devamanussesu saṃsaranto ito ekatiṃse kappe vessabhuṃ bhagavantaṃ passitvā pasannacitto mātuluṅgaphalaṃ adāsi. So tena puññakammena devesu nibbattitvā aparāparaṃ puññāni katvā sugatito sugatiṃ upagacchanto imasmiṃ buddhuppāde sāvattiyāṃ brāhmaṇakule nibbato bhagavato abhisambodhiyā puretameva uruvelakassapassa santike tāpasapabbajjaṃ pabbajitvā aggim paricaranto uruvelakassapadamane **ādittapariyāyadesanāya** (mahāva. 54; saṃ. ni. 4.28) purāṇajaṭṭilasaḥsena saddhiṃ arahattaṃ pāpuṇi. Tena vuttaṃ **apadāne** (apa. therā 2.51.68-73) –

“Kaṇikāraṃva jotantaṃ, puṇṇamāyeva candimaṃ;
Jalantaṃ dīparukkhaṃva, addasaṃ lokanāyakaṃ.

“Mātuluṅgaphalaṃ gayha, adāsiṃ satthuno ahaṃ;
Dakkhiṇeyyassa vīrassa, pasanno sehi pāṇibhi.

“Ekatiṃse ito kappe, yaṃ phalaṃ adadiṃ tadā;
Duggatiṃ nābhijānāmi, phaladānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Evam adhigatāraḥatto āyasmato dhammabhaṇḍāgārikassa upajjhāyo ayaṃ thero ekadivasam phalasaṃpattito utthāya taṃ santaṃ paṇītaṃ nirāmisam sukhaṃ attano pubbayogaṇca paccavekkhitvā pīṭivegavasena “**yathāpi bhaddo ājañṇo**”ti gāthaṃ abhāsi.

16. Tattha **yathāpīti** opammaṇapaṭipādanatthe nipāto. **Bhaddoti** sundaro thāmabalasamatthajavaparakkamādisampanno. **Ājañṇoti** ājānīyo jātimā kāraṇākāraṇānaṃ ājānanako. So tividho usabhājañṇo assājañṇo hatthājañṇoti. Tesu usabhājañṇo idhādhippeto. So ca kho chekakanakicce niyutto, tenāha “**naṅgalāvattani**”ti. Naṅgalassa phālassa āvattanako, naṅgalaṃ ito cito ca āvattetvā khetto kasanakoti attho. Naṅgalaṃ vā āvattayati etthāti naṅgalāvattaṃ, khetto naṅgalapatho, tasmim naṅgalāvattani. Gāthāsukhatthañhettha “vattani”ti dīghaṃ katvā vuttaṃ. **Sikhīti** matthake avaṭṭhānato sikhāsadisatāya sikhā, siṅgaṃ. Tadassa atthīti sikhī. Apare pana “kakudhaṃ idha ‘sikhā’ti adhippeta”nti vadanti, ubhayathāpi padhānaṅgakkittanametaṃ “sikhī”ti. **Appakasirenāti** appakīlamathena. **Rattindivāti** rattiyo divā ca, evaṃ mamaṃ appakasirena gacchantīti yojanā. Idaṃ vuttaṃ hoti – yathā “bhaddo usabhājānīyo kasane niyutto ghanatiṇṇamūlādikepi naṅgalapathe taṃ agaṇento appakasirena ito cito ca parivattento gacchati, yāva kasanatiṇṇānaṃ parissamaṃ dasseti, evaṃ mamaṃ rattindivāpi appakasireneva gacchanti atikkamanti”ti. Tattha kāraṇamāha “**sukhe laddhe nirāmise**”ti. Yasmā kāmāmisalokāmisavaṭṭāmisēhi asammissaṃ santaṃ paṇītaṃ phalasaṃpattisukhaṃ laddhaṃ, tasmāti attho. Paccatte cetam bhummavacanaṃ yathā “vanappagumbe” (khu. pā. 6.13; su. ni. 236) “tena vata re vattabbe”ti (kathā. 1) ca. Atha vā tato pabhuti rattindivā appakasirena gacchantīti vicāraṇāya āha – “sukhe laddhe nirāmise”ti, nirāmise sukhe laddhe sati tassa laddhakālato paṭṭhāyāti attho.

Belatthasīsatttheragāthāvaṇṇanā niṭṭhitā.

7. Dāsakattheragāthāvaṇṇanā

Middhī yadāti āyasmato dāsakattherassa gāthā. Kā uppatti? So kira ito ekanavute kappe anuppanne tathāgate ajitassa nāma paccekabuddhassa gandhamādanato manussapatham otarivā aññatarasmim gāme piṇḍāya carantassa manoramāni ambaphalāni adāsi. So tena puññakammena devamanussesu saṃsaranto kassapassa bhagavato kāle sāsane pabbajitvā vivaṭṭūpanissayam bahum puññam akāsi. Evaṃ kusalakammappasuto hutvā sugatito sugatim upagacchanto imasmim buddhuppāde sāvattthiyam kulagehe nibbatti. **Dāsakotissa** nāmam ahosi. So anāthapiṇḍikena gahapatinā vihārapaṭijagganakamme ṭhapito sakkaccam vihāram paṭijagganto abhiṇham buddhadassanena dhammassavanena ca paṭiladdhasaddho pabbaji. Keci pana bhaṇanti – ‘‘ayam kassapassa bhagavato kāle kulagehe nibbattitvā vayappatto aññataram khīṇāsavatttheram upaṭṭhahanto kiñci kammaṃ kārāpetukāmo theram āṇāpesi. So tena kamma amhākam bhagavato kāle sāvattthiyam anāthapiṇḍikassa dāsiyā kucchimhi nibbatto vayappatto seṭṭhinā vihārapaṭijaggane ṭhapito vuttanayeneva paṭiladdhasaddho ahosi. Mahāseṭṭhi tassa sīlacāram ajjhāsayañca ñatvā bhujissam katvā ‘yathāsukham pabbajā’ ti āha. Tam bhikkhū pabbājesu’ nti. So pabbajitakālate paṭṭhāya kusīto hīnavīriyo hutvā na kiñci vattapaṭivattam karoti, kuto samaṇadhammam, kevalam yāvadattham bhuñjitvā niddābahulo viharati. Dhammassavanakālepi ekaṃ koṇam pavisitvā parisapariyante nisinnō ghurughurupassāsī niddāyateva. Athassa bhagavā pubbūpanissayam oloketvā saṃvegajananattham ‘‘**middhī yadā hoti mahagghaso cā**’’ti gātham abhāsi.

17. Tattha **middhī**ti thinamiddhābhībhūto, yañhi middham abhībhavati, tam thinampi abhībhavateva. **Yadāti** yasmim kāle. **Mahagghasoti** mahābhojano, āharahattakāalamasātakatattavaṭṭakakākamāsakabhuttavamitakānam aññataro viya. **Niddāyitāti** supanasīlo. **Samparivattasāyīti** samparivattakam samparivattakam nipajjitvā ubhayenapi seyyasukham passasukham middhasukham anuyuttoti dasseti. **Nivāpapuṭṭhoti** kuṇḍakādīnā sūkarabhattena puṭṭho bharito. Gharasūkarō hi bālakālate paṭṭhāya posiyamāno thūlasarīrakāle gehā bahi nikkhamitum alabhanto heṭṭhāmañcādīsū samparivattetvā samparivattetvā sayateva. Idam vuttam hoti – yadā puriso middhī ca hoti mahagghaso ca nivāpapuṭṭho mahāvarāho viya aññena iriyāpathena yāpetum asakkonto niddāyanasīlo samparivattasāyī, tadā so ‘‘aniccam dukkham anattā’’ti tīṇi lakkhaṇāni manasikātum na sakkoti. Tesam amanasikārā mandapañño punappunam gabbham upeti, gabbhāvāsato na parimuccatevāti. Tam sutvā dāsakatthero saṃvegajāto vipassanam paṭṭhapetvā nacirasseva arahattam sacchākāsi. Tena vuttam **apadāne** (apa. therā 2.51.74, 80-84) –

‘‘Ajito nāma sambuddho, himavante vasī tadā;
Caraṇena ca sampanno, samādhikusalo muni.

‘‘Suvaṇṇavaṇṇe sambuddhe, āhutīnam paṭiggahe;
Rathiyam paṭipajante, ambaphalamadāsaham.

‘‘Ekanavute ito kappe, yam phalam adadim tadā;
Duggatim nābhijānāmi, phaladānassidam phalam.

‘‘Kilesā jhāpitā mayham...pe... katam buddhassa sāsana’’nti.

Arahattam pana patvā thero imāya gāthāya mam bhagavā ovadī, ‘‘ayam gāthā mayham ākusabhūtā’’ti tameva gātham paccudāhāsi. Tayidam therassa parivattāhāranayena aññābyākaraṇam jātam.

Dāsakattheragāthāvaṇṇanā niṭṭhitā.

8. Siṅgālapitutttheragāthāvaṇṇanā

Ahu buddhassa dāyādoti siṅgālakapitutttherassa gāthā. Kā uppatti? So kira ito catunavute kappe sataraṃsiṃ nāma paccekasambuddhaṃ piṇḍāya carantaṃ disvā pasannamānaso vanditvā attano hatthagataṃ tālaphalaṃ adāsi. Tena puññakammena devaloke nibbatta aparāparaṃ puññāni katvā sugatīsuyeva saṃsaranto kassapassa bhagavato kāle manussayoniyam nibbatta sāsane paṭiladdhasaddho hutvā pabbajitvā aṭṭhikasaññaṃ bhāvesi. Puna imasmiṃ buddhuppāde sāvattiyam kulagehe nibbattitvā vayappatto dārapariggahaṃ katvā ekaṃ puttaṃ labhitvā tassa “siṅgālako”ti nāmaṃ akāsi. Tena naṃ **siṅgālakapitāti** voharanti. So aparabhāge gharabandhanaṃ pahāya sāsane pabbaji. Tassa bhagavā ajjhāsayaṃ olokeno aṭṭhikasaññakammaṭṭhānaṃ adāsi. So taṃ gahetvā bhaggesu viharati susumāragire bhesakaḷāvane, athassa tasmim vane adhivatthā devatā ussāhajananatthaṃ “bhāvanāphalaṃ nacirasseva hatthagataṃ karissatī”ti imamatthaṃ aññāpadesena vibhāventī “**ahu buddhassa dāyādo**”ti gāthaṃ abhāsi.

18. Tattha **ahūti** hoti, vattamānatthe hi idaṃ atītakālavacanaṃ. **Buddhassāti** sabbaññubuddhassa. **Dāyādoti** dhammadāyādo navavidhassa lokuttaradhammadāyassa attano sammāpaṭipattiyā ādāyako gaṇhanako. Atha vā **ahūti** ahosi. Evaṃnāmassa buddhassa dāyādabhāve koci vibandho idāneva bhavissatīti adhippāyo. Tenāha “**maññehaṃ kāmāragam so, khippameva vahissatī**”ti. **Bhesakaḷāvaneti** bhesakena nāma yakkhena labhitattā pariggahitattā, bhesakaḷānaṃ vā kaṭṭhādīnaṃ bahulatāya “bhesakaḷāvana”nti laddhanāme araññe. Tassa bhikkhuno buddhassa dāyādabhāve kāraṇaṃ vadanto “**kevalam aṭṭhisaññāya, aphaṛī pathaviṃ ima**”nti āha. Tattha **kevalanti** sakalam anavasesaṃ. **Aṭṭhisaññāyāti** aṭṭhikabhāvanāya. **Aphaṛīti** “aṭṭhī”ti adhimuccanavasena patthari. **Pathavinti** attabhāvapathaviṃ. Attabhāvo hi idha “pathavī”ti vutto “ko imaṃ pathaviṃ viccessatī”tiādīsū viya. **Maññehanti** maññe ahaṃ. “Maññāha”ntipi pāṭho. **Soti** so bhikkhu. **Khippameva** nacirasseva kāmāragam pahissati pajahissatīti maññe. Kasmā? Aṭṭhikasaññāya kāmāragassa ujupaṭipakkhabhāvato. Idaṃ vuttaṃ hoti – yo ekasmiṃ padese laddhāya atthikasaññāya sakalam attano sabbesaṃ vā attabhāvaṃ “aṭṭhī”tveva pharitvā ṭhito, so bhikkhu taṃ aṭṭhikajhānaṃ pādakaṃ katvā vipassanto nacireneva anāgāmi maggena kāmāragam, sabbam vā kāmanatthena “kāmo”, rañjanatthena “rāgo”ti ca laddhanāmaṃ taṃham aggamaggena pajahissatīti. Imaṃ gāthaṃ sutvā so thero “ayaṃ devatā mayhaṃ ussāhajananatthaṃ evamāhā”ti appaṭivānavīriyaṃ adhiṭṭhāya vipassanaṃ vaḍḍhetvā arahattaṃ pāpuṇi. Tena vuttaṃ **apadāne** (apa. thera 2.51.85-90) –

“Sataraṃsī nāma bhagavā, sayambhū aparājito;
Vivekā uṭṭhahitvāna, gocarāyābhinikkhami.

“Phalahattho ahaṃ disvā, upagacchiṃ narāsabhaṃ;
Pasannacitto sumano, tālaphalamadāsahaṃ.

“Catunnavutito kappe, yaṃ phalaṃ adadiṃ tadā;
Duggatiṃ nābhijānāmi, phaladānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā tāya devatāya vuttavacanaṃ patimānento tameva gāthaṃ udānavasena abhāsi. Tadevassa therassa aññābyākaraṇaṃ ahosīti.

Siṅgālapitutttheragāthāvaṇṇanā niṭṭhitā.

9. Kulattheragāthāvaṇṇanā

Udakañhi nayantīti āyasmato kulattherassa gāthā. Kā uppatti? Ayaṃ kira thero pubbepi vivaṭṭūpanissayaṃ bahuṃ kusalaṃ upacinitvā adhikārasampanno vipassiṃ bhagavantaṃ ākāse

gacchantam disvā pasannamānaso nāḷikeraphalam dātukāmo atthāsi. Sathā tassa cittaṃ ñatvā otarivā paṭiggaṇhi. So ativiya pasannacitto hutvā teneva saddhāpaṭilābhena sathhāraṃ upasankamitvā pabbajjāṃ yāci, sathā aññataraṃ bhikkhuṃ āṇāpesi – “imaṃ purisaṃ pabbājehī”ti. So pabbajitvā laddhūpasampado samaṇadhammaṃ katvā tato cuto chapī buddhantarāni devamanussesu saṃsaranto imasmiṃ buddhuppāde sāvattiyāṃ brāhmaṇakule nibbatti. **Kulotissa** nāmaṃ ahoṣi. So vayappatto sāsane laddhappasādo bhagavato santike pabbajitvā vikkhepabahulatāya visesaṃ nibbattetuṃ nāsakkhi. Athekadivasaṃ gāmaṃ piṇḍāya pavisanto antarāmagge bhūmiṃ khaṇitvā udakavāhakaṃ katvā icchiticchitaṭṭhāne udakaṃ nente purise disvā taṃ sallakkhetvā gāmaṃ pavittho aññataraṃ usukāraṃ usudaṇḍakaṃ usuyante pakkhipitvā akkhikoṭiyā oloketvā ujum karontaṃ disvā tampi sallakkhetvā gacchanto purato gantvā araneminābhīdike rathacakkāvayave tacchante tacchake disvā tampi sallakkhetvā vihāraṃ pavisitvā katabhattakicco pattacīvaraṃ paṭisāmetvā divāvihāre nisinnō attanā diṭṭhanimittāni upamābhāvena gahetvā attano cittadamane upanento “acetanaṃ udakampi manussā icchicchitaṭṭhānaṃ nayanti tathā acetanaṃ vaṅkampi saradaṇḍaṃ upāyena namento ujum karonti, tathā acetanaṃ kaṭṭhakaḷiṅgarādiṃ tacchakā nemiādivasena vaṅkaṃ ujuṅca karonti. Atha kasmā ahaṃ sakacittaṃ ujum na karissāmi”ti cintetvā vipassanaṃ paṭṭhapetvā ghaṭento vāyamanto nacirasseva arahattaṃ pāpuṇi. Tena vuttaṃ **apadāne** (apa. thera 2.51.91-99) –

“Nagare bandhumatiyā, ārāmiko ahaṃ tadā;
Addasaṃ virajaṃ buddhaṃ, gacchantaṃ anilañjase.

“Nāḷikeraphalam gayha, buddhasettḥassadāsahaṃ;
Ākāse ṭhitako santo, paṭiggaṇhi mahāyaso.

“Vittisañjanano mayhaṃ, diṭṭhadhammasukhāvaho;
Phalaṃ buddhassa datvāna, vipassanna cetasā.

“Adhigacchiṃ tadā pītiṃ, vipulaṅca sukhattamaṃ;
Uppajjateva ratanaṃ, nibbattassa tahiṃ tahiṃ.

“Ekanavutito kappe, yaṃ phalaṃ adadiṃ tadā;
Duggatiṃ nābhijānāmi, phaladānassidaṃ phalaṃ.

“Dibbacakkhu visuddhaṃ me, samādhikusalo ahaṃ;
Abhiññāpāramippatto, phaladānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Evam yāni nimittāni ānkuse katvā vipassanaṃ vaḍḍhetvā arahattaṃ pāpuṇi, tehi saddhiṃ attano cittadamaṃ saṃsanditvā aññaṃ byākaronto “**udakañhi nayanti nettikā**”ti gāthaṃ abhāsi.

19. Tattha **udakaṃ hīti hi**-saddo nipātamattaṃ. **Nayantīti** pathaviyā taṃ taṃ thalaṭṭhānaṃ khaṇitvā ninnaṭṭhānaṃ pūretvā mātikaṃ vā katvā rukkhadoṇiṃ vā ṭhapetvā attano icchiticchitaṭṭhānaṃ nenti. Tathā te nentīti **nettikā**. **Tejananti** kaṇḍaṃ. Idaṃ vuttaṃ hoti – nettikā attano ruciyā icchiticchitaṭṭhānaṃ udakaṃ **nayanti**, **usukārāpi** tāpetvā tejanaṃ **namayanti** ujum karonti. Namanavasena **tacchakā** nemiādīnaṃ atthāya tacchantaṃ **dāruṃ namayanti** attano ruciyā ujum vā vaṅkaṃ vā karonti. Evam ettakaṃ ārammaṇaṃ katvā **subbatā** yathāsamādinna sīlādīnā sundaravatā dhīrā sotāpattimaggādīnaṃ uppādentā **attānaṃ damenti**, arahattaṃ pana pattesu ekantadantā nāma hontīti.

Kulattheragāthāvaṇṇanā niṭṭhitā.

10. Ajitatheragāthāvaṇṇanā

Marañe me bhayaṃ natthī āyasmato ajitattherassa gāthā. Kā uppatti? So kira ekanavute kappe vipassiṃ bhagavantam passitvā pasannacitto kapitthaphalam adāsī. Tato parampi taṃ taṃ puññaṃ katvā devamanussesu saṃsaranto imasmiṃ kappe anuppanne eva ambhākaṃ satthari sāvattthiyaṃ mahākosalarāñño aggāsaniyassa brāhmaṇassa putto hutvā nibbatti. Tassa **ajitoti** nāmaṃ ahoṣi. Tasmiṃca samaye sāvattthivāsī bāvarī nāma brāhmaṇo tīhi mahāpurisalakkhaṇehi samannāgato tiṇṇaṃ vedānaṃ pāragū sāvattthito nikkhamitvā tāpasapabbajjaṃ pabbajitvā godhāvarītīre kapitthārāme vasati. Atha ajito tassa santike pabbajito atthakāmāya devatāya coditena bāvarinā satthu santikaṃ pesito tissametteyyādīhi saddhiṃ bhagavantam upasankamitvā manasāva pañhe pucchitvā tesu vissajjitesu pasannacitto satthu santike pabbajitvā kammaṭṭhānaṃ gahetvā vipassanaṃ vadḍhetvā arahattaṃ pāpuṇi. Tena vuttaṃ **apadāne** (apa. therā 2.52.7-11) –

“Suvaṇṇavaṇṇaṃ sambuddhaṃ, āhutiṇaṃ paṭiggahaṃ;
Rathiyaṃ paṭipajantaṃ, kapitthaṃ adadiṃ phalaṃ.

“Ekanavutito kappe, yaṃ phalaṃ adadiṃ dadā;
Duggatiṃ nābhijānāmi, phaladānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.
Arahattaṃ pana patto sīhanādaṃ nadanto “**marañe me bhayaṃ natthī**”ti gāthaṃ abhāsi.

20. Tattha **marañeti** marañanimittaṃ marañahetu. **Meti** mayhaṃ, bhayaṃ natthi ucchinnabhavamūlatāya parikkhīṇajātikattā. Anucchinnabhavamūlānañhi “kīdisī nu kho mayhaṃ āyatiṃ uppatti”ti marañato bhayaṃ bhaveyya. **Nikantīti** apekkhā taṇhā, sā natthi jīvite suparimadditasankhāratāya upādānakkhandhānaṃ dukkhāsārakādibhāvena suṭṭhu upaṭṭhahanato. Evaṃbhūto cāhaṃ **sandehaṃ** sarīraṃ, sakaṃ vā dehaṃ dehasankhātaṃ dukkhabhāraṃ **nikkhipissāmi** chaḍḍessāmi, nikkhipanto ca “iminā sarīrakena sādhetabbaṃ sādhitam, idāni taṃ ekamsena chaḍḍaniyamevā”ti paññāvepullappattiyā **sampajāno** sativepullappattiyā **paṭissato** nikkhipissāmī”ti. Imaṃ pana gāthaṃ vatvā therō jhānaṃ samāpajjitvā tadanantaraṃ parinibbāyīti.

Ajitattheragāthāvaṇṇanā niṭṭhitā.

Dutiyavaggavaṇṇanā niṭṭhitā.

3. Tatiyavaggo

1. Nigrodhattheragāthāvaṇṇanā

Nāhaṃ bhayassa bhāyāmīti āyasmato nigrodhattherassa gāthā. Kā uppatti? Ayaṃ kira ito aṭṭhārāse kappasate brāhmaṇamahāsālakule nibbattitvā vayappatto kāmesu ādīnavaṃ nekkhamme ca ānisamsaṃ disvā gharabandhanaṃ pahāya araññāyatanaṃ pavisitvā aññatarasmiṃ sālavanaṃ paṇṇasālaṃ katvā tāpasapabbajjaṃ pabbajitvā vanamūlaphalāhāro vasati. Tena samayena piyadasī nāma sammāsambuddho loke uppajjitvā sadevakassa lokassa dhammāmatavassena kilesasantāpaṃ nibbāpento ekadivasaṃ tāpase anukampāya taṃ sālavanaṃ pavisitvā nirodhasamāpattiṃ samāpanno. Tāpaso vanamūlaphalathāya gacchanto bhagavantam disvā pasannamānaso pupphitasāladaṇḍasākhāyo gahetvā sālamaṇḍapaṃ katvā taṃ sabbatthakameva sālappuphehi sañchādetvā bhagavantam vanditvā pītisomanassavaseneva āhāratthāyapi agantvā namassamāno aṭṭhāsī. Satthā nirodhato vuṭṭhāya tassa anukampāya “bhikkhusaṅgho āgacchatū”ti cintesi, “bhikkhusaṅghepi cittaṃ pasādessaṭī”ti. Tāvadeva bhikkhusaṅgho āgato. So bhikkhusaṅghampi disvā pasannamānaso vanditvā añjaliṃ paggayha aṭṭhāsī. Satthā sitassa pātukaraṇāpadesena tassa bhāvinim sampattiṃ pakāsento dhammaṃ kathetvā pakkāmi saddhiṃ bhikkhusaṅghena. So tena puññakamma devamanussesuyeva saṃsaranto vivaṭṭūpanissayaṃ bahuṃ kusalaṃ upacinitvā imasmiṃ buddhuppāde sāvattthiyaṃ brāhmaṇamahāsālakule nibbatti,

nigrodhotissa nāmaṃ ahoṣi. So jetavanapaṭiggahaṇādivase buddhānubhāvadassanena sañjātappasādo pabbajitvā vipassanaṃ ārabhitvā nacirasseva chaḷabhiñño ahoṣi. Tena vuttaṃ **apadāne** (apa. therā 2.49.190-220) –

“Ajjhogāhetvā sālavanaṃ, sukato assamo mama;
Sālapupphehi sañchanno, vasāmi vipine tadā.

“Piyadassī ca bhagavā, sayambhū aggapuggalo;
Vivekakāmo sambuddho, sālavanamupāgami.

“Assamā abhinikkhamma, pavanaṃ agamāsahaṃ;
Mūlaphalaṃ gavesanto, āhindāmi vane tadā.

“Tatthaddasāsiṃ sambuddhaṃ, piyadassiṃ mahāyasaṃ;
Sunisinnaṃ samāpannaṃ, virocantaṃ mahāvane.

“Catudaṇḍe ṭhapetvāna, buddhassa uparī ahaṃ;
Maṇḍapaṃ sukataṃ katvā, sālapupphehi chādayiṃ.

“Sattāhaṃ dhārayitvāna, maṇḍapaṃ sālachāditāṃ;
Tattha cittaṃ pasādetvā, buddhaseṭṭhamavandahaṃ.

“Bhagavā tamhi samaye, vuṭṭhahitvā samādhito;
Yugamattaṃ pekkhamāno, nisīdi purisuttamo.

“Sāvako varuṇo nāma, piyadassissa satthuno;
Vasīsatasahasseehi, upagacchi vināyakaṃ.

“Piyadassī ca bhagavā, lokajetṭho narāsabho;
Bhikkhusaṅghe nisīditvā, sitaṃ pātukarī jino.

“Anuruddho upaṭṭhāko, piyadassissa satthuno;
Ekaṃsaṃ cīvaraṃ katvā, apucchittha mahāmuniṃ.

“Ko nu kho bhagavā hetu, sitakammaṃ satthuno;
Kāraṇe vijjamaṇamhi, sathā pātukare sitaṃ.

“Sattāhaṃ sālacchadanaṃ, yo me dhāresi māṇavo;
Tassa kammaṃ saritvāna, sitaṃ pātukariṃ ahaṃ.

“Anokāsaṃ na passāmi, yattha puññaṃ vipaccati;
Devaloke manusse vā, okāsova na sammati.

“Devaloke vasantassa, puññakammasamaṅgino;
Yāvataṃ parisā tassa, sālacchannā bhavissati.

“Tattha dibbehi naccehi, gītehi vāditehi ca;
Ramissati sadā santo, puññakammasamāhito.

“Yāvataṃ parisā tassa, gandhagandhī bhavissati;

Sālassa pupphavasso ca, pavassissati tāvade.

“Tato cutoyaṃ manujo, mānusaṃ āgamissati;
Idhāpi sālaccchadanaṃ, sabbakālaṃ dharissati.

“Idha naccañca gītañca, sammatāḷasamāhitāṃ;
Parivāressanti maṃ niccaṃ, buddhapūjāyidaṃ phalaṃ.

“Uggacchante ca sūriye, sālavassaṃ pavassate;
Puññakammena saṃyuttaṃ, vassate sabbakālikaṃ.

“Aṭṭhārase kappasate, okkākakulasambhavo;
Gotamo nāma nāmena, satthā loke bhavissati.

“Tassa dhamme sudāyādo, oraso dhammanimitto;
Sabbāsava pariññāya, nibbāyissatināsavo.

“Dhammaṃ abhisamentassa, sālaccchannaṃ bhavissati;
Cītake jhāyamānassa, chadanaṃ tattha hessati.

“Vipākaṃ kittayitvāna, piyadassī mahāmuni;
Parisāya dhammaṃ desesi, tappento dhammavutṭhiyā.

“Tiṃsakappāni devesu, devarajjamakārayiṃ;
Satṭhi ca sattakkhattuñca, cakkavattī ahasahaṃ.

“Devalokā idhāgantvā, labhāmi vipulaṃ sukhaṃ;
Idhāpi sālaccchadanaṃ, maṇḍapassa idaṃ phalaṃ.

“Ayaṃ pacchimako mayhaṃ, carimo vattate bhavo;
Idhāpi sālaccchadanaṃ, hessati sabbakālikaṃ.

“Mahāmuniṃ tosayitvā, gotamaṃ sakyapuṅgavaṃ;
Pattomhi acalaṃ ṭhānaṃ, hitvā jayaparājayaṃ.

“Aṭṭhārase kappasate, yaṃ buddhamabhipūjayiṃ;
Duggatiṃ nābhijānāmi, buddhapūjāyidaṃ phalaṃ.

“Kilesā jhāpitā mayhaṃ, bhavā sabbe samūhatā;
Nāgoḃa bandhanaṃ chetvā, viharāmi anāsavo.

“Svāgataṃ vata me āsi, buddhaseṭṭhassa santike;
Tisso vijjā anuppattā, kataṃ buddhassa sāsanaṃ.

“Paṭisambhidā catasso, vimokkhāpi ca aṭṭhime;
Chalābhiññā sacchikatā, kataṃ buddhassa sāsana’nti.

Evamaṃ pana chalābhiññā hutvā phalasukhena vītināmento sāsanaṃ niyyānikabhāvavibhāvanatthaṃ aññābyākaraṇavasena “**nāhaṃ bhayassa bhāyāmi**”ti gāthaṃ abhāsi.

21. Tattha bhāyanti etasmāti **bhayaṃ**, jātijarādi. **Bhayassāti** nissakke sāmivacanam, bhayato bhāyitabbanimittam jātijarāmarañādīnā hetunā nāham bhāyāmīti attho. Tattha kāraṇamāha “**sathā no amatassa kovidō**”ti. Amhākaṃ sathā amate kusalo veneyyānam amatadāne cheko. **Yattha bhayaṃ nāvatiṭṭhatīti** yasmim nibbāne yathāvuttam bhayaṃ na tiṭṭhati okāsam na labhati. **Tenāti** tato nibbānato. **Vajantīti** abhayaṭṭhānameva gacchanti. Nibbānañhi abhayaṭṭhānam nāma. Kena pana vajantīti āha “**maggena vajanti bhikkhavo**”ti, aṭṭhaṅgikena ariyamaggena satthu ovādakaraṇā bhikkhū saṃsāre bhayassa ikkhanakāti attho. **Yatthāti** vā yaṃ nimittam yassa ariyamaggassa adhigamahetu attānuvādādīkaṃ pañcavīsatividhampi bhayaṃ nāvatiṭṭhati patiṭṭham na labhati, tena ariyena maggena vajanti abhayaṭṭhānam satthu sāsane bhikkhū, tena maggena ahampi gato, tasmā nāham bhayassa bhāyāmīti therō aññaṃ byākāsi.

Nigrodhattheragāthāvaṇṇanā niṭṭhitā.

2. Cittakattheragāthāvaṇṇanā

Nīlasugīvāti āyasmato cittakattherassa gāthā. Kā uppatti? So kira padumuttarabuddhakālato paṭṭhāya vivaṭṭūpanissayaṃ kusalam ācinanto ito ekanavute kappe manussayoniyam nibbattivā viññuttam patto vipassim bhagavantam passivā pasannamānaso pupphehi pūjam katvā vandivā “santadhammena nāma ettha bhavitabba”nti sathari nibbāne ca adhimucci. So tena puññakammena tato cuto tāvatimsabhavane nibbato aparāparam puññāni katvā devamanussesu saṃsaranto imasmim buddhuppāde rājagahe vibhavasampannassa brāhmaṇassa putto hutvā nibbatti **cittako** nāma nāmena. So bhagavati rājagaham gantvā veḷuvane viharante sathāram upasaṅkamivā dhammam sutvā paṭiladdhasaddho pabbajivā cariyānukūlam kammaṭṭhānam gahetvā araññāyatanaṃ pavisivā bhāvanānuyutto jhānam nibbattetvā jhānapādakaṃ vipassanam vadḍhetvā nacireneva arahattam pāpuṇi. Tena vuttam **apadāne** (apa. therā 2.50.1-7) –

“Kaṇikāramva jotantam, nisinnam pabbatantare;
Addasam virajam buddham, vipassim lokanāyakaṃ.

“Tṇi kiṅkaṇipupphāni, paggayha abhiropayim;
Sambuddham abhipūjetvā, gacchāmi dakkhiṇāmukho.

“Tena kamma sukatenā, cetanāpaṇidhīhi ca;
Jahivā mānusaṃ deham, tāvatimsam agacchaham.

“Ekanavute ito kappe, yam buddhamabhipūjayim;
Duggatim nābhijānāmi, buddhapūjayidaṃ phalam.

“Kilesā jhāpitā mayham...pe... katam buddhassa sāsana”nti.

Arahattam pana patvā sathāram vanditum rājagaham upagato tattha bhikkhūhi “kim, āvuso, araṇṇe appamatto vihāsi”ti puṭṭho attano appamādavihāranivedanena aññaṃ byākaronto “**nīlasugīvā**”ti gātham abhāsi.

22. Tattha **nīlasugīvāti** nīlasugīvā, gāthāsukhatthañhettha dīgho kato, rājivantatāya sundarāya gīvāya samannāgatoti attho. Te yebhuyyena ca nīlavaṇṇatāya **nīlā**. Sobhanakaṇṭhatāya **sugīvā**. **Sikhinoti** matthake jātāya sikhāya sassirikabhāvena **sikhino**. **Morāti** mayūrā. **Kārambhiyanti** kārambarukkhe. **Kārambhiyanti** vā tassa vanassa nāmaṃ. Tasmā kārambhiyanti kārambhanāmake vaneti attho. **Abhinadantīti** pāvussakāle meghagajitam sutvā kekāsaddam karontā utusampadāsiddhena sarena haṃsādiḷe abhibhavatā viya nadanti. **Teti** te morā. **Sītavātakilīti** sītena meghavātena sañjātakilīti madhuravassitam vassantā. **Suttanti** bhattasammadavinodanattam sayitam, kāyakilamathapaṭipassambhānāya vā anuññātaḷayam supantam. **Jhāyanti** samathavipassanājhānehi

jhāyanasīlaṃ bhāvanānuyuttaṃ. **Nibodhentīti** pabodhenti. “Imepi nāma niddaṃ anupagantvā jāgarantā attanā kattabbaṃ karonti, kimaṅgaṃ panāha”nti evaṃ sampajaññuppādanena sayanato vuṭṭhāpentīti adhippāyo.

Cittakattheragāthāvaṇṇanā niṭṭhitā.

3. Gosālattheragāthāvaṇṇanā

Ahaṃ kho veḷugumbasminti āyasmato gosālattherassa gāthā. Kā uppatti? Sopi purimabuddhesu katādhikāro tattha tattha vivaṭṭūpanissayaṃ kusalaṃ ācīnanto ito ekanavute kappe aññatarasmiṃ pabbate rukkhasākhāyaṃ olambamānaṃ paccekabuddhassa paṃsukūlacīvaraṃ disvā “arahaddhajo vatāya”nti pasannacitto pupphehi pūjehi. So tena puññakammena tāvatimsabhavane nibbatto. Tato paṭṭhāya devamanussesuyeva saṃsaranto imasmiṃ buddhuppāde magadharaṭṭhe ibbhakule nibbatto **gosālo** nāma nāmena. Soṇena pana koṭikaṇṇena kataparicayattā tassa pabbajitabhāvaṃ sutvā “sopi nāma mahāvibhavo pabbajissati, kimaṅgaṃ panāha”nti sañjātasamvego bhagavato santike pabbajitvā cariyānukūlaṃ kammaṭṭhānaṃ gahetvā sappāyaṃ vasanaṭṭhānaṃ gavesanto attano jātagāmassa avidūre ekasmiṃ sānupabbate vihāsi. Tassa mātā divase divase bhikkhaṃ deti. Atheadivasam gāmaṃ piṇḍāya pavitṭhassa mātā madhusakkharābhisaṅkhataṃ pāyasaṃ adāsi. So taṃ gahetvā tassa pabbatassa chāyāyaṃ aññatarassa veḷugumbassa mūle nisīditvā paribhuñjitvā dhovitaṭṭappāṇī vipassanaṃ ārabhi. Bhojanasappāyalābhena kāyaccittānaṃ kallaṭāya samāhito udayabbayaññādikē tikkhe sūre vahante appakasireneva vipassanaṃ ussukkāpetvā maggapaṭipāṭiyā bhāvanaṃ matthakaṃ pāpento saha paṭisambhidāhi arahattaṃ sacchākāsi. Tena vuttaṃ **apadāne** (apa. thera 2.50.8-14) –

“Himavantassa avidūre, udaṅgaṇo nāma pabbato;
Tatthaddasaṃ paṃsukūlaṃ, dumaggamhi vilambitaṃ.

“Tīṇi kinkaṇipupphāni, ocinitvānahaṃ tadā;
Heṭṭhā pahaṭṭhena cittena, paṃsukūlaṃ apūjayiṃ.

“Tena kammena sukatenā, cetanāpaṇidhīhi ca;
Jahitvā mānusaṃ dehaṃ, tāvatimsaṃ agacchahaṃ.

“Ekanavute ito kappe, yaṃ kammamakariṃ tadā;
Duggatiṃ nābhijānāmi, pūjitvā arahaddhajaṃ.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana adhigantvā diṭṭhadhammasukhavihāratthaṃ pabbatasānumeva gantukāmo attano paṭipattiṃ pavedento “**ahaṃ kho veḷugumbasmi**”nti gāthaṃ abhāsi.

23. Tattha **veḷugumbasminti** veḷugacchassa samīpe, tassa chāyāyaṃ. **Bhutvāna madhupāyasanti** madhupasittapāyāsaṃ bhuñjitvā. **Padakkhiṇanti** padakkhiṇaggāhena, satthu ovādassa sammā sampaṭicchānenāti attho. **Sammasanto khandhānaṃ udayabbayanti** pañcanaṃ upādānakkhandhānaṃ udayabbayañca vipassanto, yadipi idāni katakicco, phalasaṃpattiṃ pana samāpajjituṃ vipassanaṃ paṭṭhapentoti adhippāyo. **Sānuṃ paṭigamissāmīti** pubbe mayā vuttapabbatasānumeva uddissa gacchissāmi. **Vivekamanubrūhayanti** paṭipassaddhivivekaṃ phalasaṃpattikāyavivekañca paribrūhayanto, tassa vā paribrūhanahetu gamissāmīti. Evaṃ pana vatvā therō tattheva gato, ayameva ca imassa therassa aññābyākaraṇagāthā ahoṣi.

Gosālattheragāthāvaṇṇanā niṭṭhitā.

4. Sugandhattheragāthāvaṇṇanā

Anuvassiko pabbajitoti āyasmato sugandhattherassa gāthā. Kā uppatti? So kira ito dvānavute kappe tissassa nāma sammāsambuddhassa kāle manussayoniyam nibbattivā viññutam patto migabyadhanena araṇṇe vicarati. Satthā tassa anukampāya padavaḷaṅgaṃ dassetvā gato. So satthu padacetiyaṇi disvā purimabuddhesu katādhikāratāya “sadevake loke aggapuggalassa imāni padāni”ti pītisomanassajāto koraṇḍakapupphāni gahetvā pūjaṃ katvā cittaṃ pasādesi. So tena puñṇakammena devaloke nibbattivā tato cuto aparāparaṃ puñṇāni katvā devamanussesu saṃsaranto kassapassa bhagavato kāle kuṭumbiko hutvā satthu bhikkhusaṅghassa ca mahādānaṃ pavattetvā gandhakuṭiṃ mahagghagositacandaṇaṃ pisitvā tena paribhaṇḍaṃ katvā patthanaṃ paṭṭhapesi – “nibbattanibbattaṭṭhāne mayhaṃ sarīraṃ evaṃsugandhaṃ hotū”ti. Evaṃ aññānīpi tattha tattha bhava bahūni puñṇakammāni katvā sugatīsu eva parivattamāno imasmiṃ buddhuppāde sāvatthiyaṃ vibhavasampannassa brāhmaṇassa gehe nibbatti. Nibbattassa ca tassa mātukucchigatakālate paṭṭhāya mātu sarīraṃ sakalampi gehaṃ surabhigandhaṃ vāyati. Jātadivase pana visesato paramasugandhaṃ sāmantaḡhesupi vāyateva. Tassa mātāpitaro “amhākaṃ putto attanāva attano nāmaṃ gahetvā āgato”ti **sugandhotveva** nāmaṃ akaṃsu. So anupubbena vayappatto mahāselattheraṃ disvā tassa santike dhammaṃ sutvā pabbajitvā vipassanāya kammaṃ karonto sattāhabbhantare eva arahattaṃ pāpuṇi. Tena vuttaṃ **apadāne** (apa. thera 2.50.15-24) –

“Vanakammiko pure āsiṃ, pitumātumatenaṃ;
Pasumārena jīvāmi, kusalaṃ me na vijjati.

“Mama āsayasāmantā, tisso lokaggaṇāyako;
Padāni tīṇi dassesi, anukampāya cakkhumā.

“Akkante ca pade disvā, tissanāmassa satthuno;
Haṭṭho haṭṭhena cittena, pade cittaṃ pasādayiṃ.

“Koraṇḍaṃ pupphitaṃ disvā, pādapaṃ dharaṇīruhaṃ;
Sakosakaṃ gahetvāna, padaseṭṭhaṃ apūjayiṃ.

“Tena kammaṇa sukateṇa, cetanāpaṇidhīhi ca;
Jahitvā mānusaṃ dehaṃ, tāvatimsamagacchahaṃ.

“Yaṃ yaṃ yonupapajjāmi, devattaṃ atha mānusaṃ;
Koraṇḍakachavī homi, suppabhāso bhavāmaṃ.

“Dvenavute ito kappe, yaṃ kammamakariṃ tadā;
Duggatiṃ nābhijānāmi, padapūjāyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.
Arahattaṃ pana patvā aññaṃ byākaronto “**anuvassiko pabbajito**”ti imaṃ gāthaṃ abhāsi.

24. Tattha **anuvassikoti** anugato upagato vassaṃ anuvasso, anuvassova anuvassiko. **Pabbajitoti** pabbajjaṃ upagato, pabbajito hutvā upagatavassamatto ekavassikoti attho. Atha vā anugataṃ pacchāgataṃ apagataṃ vassaṃ anuvassaṃ, taṃ assa atthīti anuvassiko. Yassa pabbajitassa vassaṃ aparipuṇṇatāya na gaṇanūpagataṃ, so evaṃ vutto, tasmā avassikoti vuttaṃ hoti. **Passa dhammasudhammatanti** tava satthu dhammassa sudhammabhāvaṃ svākkhātataṃ ekantaniyyānikaṃ passa, yattha anuvassiko tuvaṃ pabbajito. Pubbenivāsaññaṃ dibbacakkuṇṇaṃ āsavakkhayaññaṃti **tisso vijjā** tayā **anuppattā** sacchikatā, tato eva **kataṃ buddhassa sāsanaṃ** sammāsambuddhassa sāsanaṃ anusitṭhi ovādo anusikkhitoti katakiccatam nissāya pītisomanassajāto thero attānaṃ paraṃ viya katvā vadatīti.

Sugandhattheragāthāvaṇṇanā niṭṭhitā.

5. Nandiyattheragāthāvaṇṇanā

Obhāsajātanti āyasmato nandiyattherassa gāthā. Kā uppatti? So kira padumuttarassa bhagavato kāle sathhari parinibbute cetiye candanasārena vedikaṃ kāretvā uḷāraṃ pūjāsakkāraṃ pavattesi. Tato paṭṭhāya ajjhāsayasampanno hutvā tatha tatha vivaṭṭūpanissayaṃ bahuṃ puññakammaṃ ācinitvā devesu ca manussesu ca saṃsaranto imasmiṃ buddhuppāde kapilavatthusmiṃ sakyarājakule nibbatti. Tassa mātāpitaro nandiṃ janento jātoti **nandiyoti** nāmaṃ akaṃsu. So vayappatto anuruddhādīsu satthu santike pabbajantesu sayampi pabbajitvā vipassanāya kammaṃ karonto katādhikāratāya nacirasseva arahattaṃ pāpuṇi. Tena vuttaṃ **apadāne** (apa. thera 1.15.15-20) –

“Padumuttaro nāma jino, lokajetṭho narāsabho;
Jalivā aggikhandhova, sambuddho parinibbuto.

“Nibbute ca mahāvīre, thūpo vitthāriko ahu;
Dūratova upaṭṭhenti, dhātugehavaruttame.

“Pasannacitto sumano, akaṃ candanavedikaṃ;
Dissati thūpakhandho ca, thūpānucchaviko tadā.

“Bhave nibbattamānamhi, devatte atha mānuse.
Omattaṃ me na passāmi, pubbakammassaḍaṃ phalaṃ.

“Pañcadasakappasate, ito aṭṭha janā ahuṃ;
Sabbe samattanāmā te cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā anuruddhattherādīhi saddhiṃ pācīnavamsamigadāye viharante imasmiṃ there ekadivasam māro pāpimā bhimsāpetukāmo tassa bheravarūpaṃ dasseti. Thero taṃ “māro aya”nti ñatvā “pāpima, ye mārādheyyaṃ vītivattā, tesam tava kiriyā kiṃ karissati, tatonidānaṃ pana tvaṃ eva vighātaṃ anattaṃ pāpuṇissasi”ti dassento “**obhāsajātaṃ phalaga**”nti gāthaṃ abhāsi.

25. Tatha **obhāsajātanti** ñāṇobhāsena jātobhāsaṃ aggamaggañāṇassa adhigatattā. Tena anavasesato kilesandhakārassa vihataviddhaṃsitabhāvato ativiya pabhassaranti attho. **Phalaganti** phalaṃ gataṃ upagataṃ, aggaphalañāṇasahitanti adhippāyo. **Cittanti** khīṇāsavassa cittaṃ sāmāñña vadati. Tenāha “**abhiṇhaso**”ti. Tañhi nirodhaninnatāya khīṇāsavānaṃ niccakappaṃ arahattaphalasaṃpattisaṃpajjanato “phalena sahita”nti vattabattaṃ arahati. **Tādisanti** tathārūpaṃ, arahantanti attho. **Āsajjāti** visodhetvā paribhuyya. **Kaṇhāti** māraṃ ālapati, so hi kaṇhakammattā kaṇhābhijātītāya ca “kaṇho”ti vuccati. **Dukkhaṃ nigacchasīti** idha kucchianuppavesādīnā niraṭṭhakaṃ kāyaparissamaṃ dukkhaṃ, samparāye ca appatikāraṃ apāyadukkhaṃ upagamissasi pāpuṇissasi. Taṃ sutvā māro “jānāti maṃ samaṇo”ti tatthevantaradhāyīti.

Nandiyattheragāthāvaṇṇanā niṭṭhitā.

6. Abhayattheragāthāvaṇṇanā

Sutvā subhāsitaṃ vācanti āyasmato abhayattherassa gāthā. Kā uppatti? So kira padumuttarassa bhagavato sāsane pabbajitvā dhammakathiko hutvā dhammakathanakāle paṭhamaṃ catūhi gāthāhi bhagavantaṃ abhiṭṭhavitvā pacchā dhammaṃ kathesi. Tenassa puññakammabalena kappānaṃ satahassaṃ apāyapaṭisaṃdhi nāma nāhosi. Tathā hi vuttaṃ –

“Abhithavitvā padumuttaraṃ jinaṃ, pasannacitto abhayo sayambhuṃ;
Na gacchi kappāni apāyabhūmiṃ, satahassāni ulārasaddho”ti. (apa. therā 2.55.221)

Khettasampattiyādīhi tassa ca pubbapacchimasanniṭṭhānacetanānaṃ ativiya ulārabhāvena so aparimeyyo puññābhisando kusalābhisando tādiso ahoṣi. “Acintiye pasannānaṃ, vipāko hoti acintiyo”ti (apa. therā 1.1.82) hi vuttaṃ. Tattha tattha hi bhavē upacitaṃ puññaṃ tassa upatthambhakamaḥosi. Tathā hi so vipassissa bhagavato ketakapupphehi pūjamaḥosi. Evaṃ ulārehi puññavisesehi sugatīsu eva saṃsaranto imasmiṃ buddhuppāde rañño bimbisārassa putto hutvā nibbatti. **Abhayotissa** nāmaṃ ahoṣi. Tassa uppatti parato āvi bhavissati. So nigaṇṭhena nāṭaputtana ubhatokoṭikaṃ pañhaṃ sikkhāpetvā “imaṃ pañhaṃ pucchivā samaṇassa gotamassa vādaṃ āropehī”ti vissajjito bhagavantaṃ upasaṅkamtivā taṃ pañhaṃ pucchivā tassa pañhassa anekaṃsabyākaraṇabhāve bhagavatā kathite nigaṇṭhānaṃ parājayaṃ, satthu ca sammāsambuddhabhāvaṃ viditvā upāsakattaṃ paṭivedesi. Tato rañño bimbisāre kālaṅkate sañjātasamvego sāsane pabbajitvā tālacchiggaḷūpamasuttadesanāya sotāpanno hutvā puna vipassanaṃ ārabhitvā arahattaṃ sacchākaṣi. Tena vuttaṃ **apadāne** (apa. therā 2.52.17-22) –

“Vinatānadiyā tīre, vihāsi purisuttamo;
Addasaṃ virajaṃ buddhaṃ, ekaggaṃ susamāhitaṃ.

“Madhugandhassa pupphena, ketakassa ahaṃ tadā;
Pasannacitto sumano, buddhaseṭṭhamapūjayiṃ.

“Ekanavute ito kappe, yaṃ pupphamabhipūjayiṃ;
Duggatiṃ nābhijānāmi, buddhapūjāyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā attano paṭipattikittanena aññaṃ byākaronto “**sutvā subhāsitaṃ vāca**”nti gāthaṃ abhāsi.

26. Tattha **sutvāti** sotaṃ odahitvā, sotadvārānusāreṇa upadhāretvā. **Subhāsitaṃ** sutṭhu bhāsitaṃ, sammadeva bhāsitaṃ, sammāsambuddhabhāvato mahākāruṇikatāya ca kiñci avisaṃvādetvā yathādhīpetassa atthassa ekantato sādhanavasena bhāsitaṃ catusaccavibhāvanīyadhammakathaṃ. Na hi saccavinimuttā bhagavato dhammadesanā atthi. **Buddhassāti** sabbaññubuddhassa. **Ādiccabandhunoti** ādiccavaṃse sambhūtattā ādicco bandhu etassāti ādiccabandhu, bhagavā. Tassa ādiccabandhuno. Ādiccassa vā bandhūti ādiccabandhu, bhagavā. Tassa bhagavato orasaputtabhāvato. Tenāha bhagavā –

“Yo andhakāre tasmā pabhaṅkaro, verocano maṇḍalī uggatejo;
Mā rāhu gilī caramantalikkhe, pajaṃ mamaṃ rāhu pamañca sūriya”nti. (saṃ. ni. 1.91);

Paccabyadhinti paṭivijjhīṃ. **Hī**-ti nipātamattaṃ. **Nipuṇanti** saṅhaṃ paramasukhamaṃ, nirodhasaccaṃ, catusaccameva vā. **Hī**-ti vā hetuatthe nipāto. Yasmā paccabyadhiṃ nipuṇaṃ catusaccaṃ, tasmā na dāni kiñci paṭivijjhitaḥṭhi attho. Yathā kiṃ paṭivijjhīti āha “**vālaggaṃ usunā yathā**”ti. Yathā sattadhā bhinnassa vālassa koṭiṃ susikkhito kusalo issāso usunā kaṇḍena avirajjhanto vijjheyya, evaṃ paccabyadhiṃ nipuṇaṃ ariyasaccanti yojanā.

Abhayattheragāthāvaṇṇanā niṭṭhitā.

7. Lomasakaṅgiyattheragāthāvaṇṇanā

Dabbaṃ kusanti āyasmato lomasakaṅgiyattherassa gāthā. Kā uppatti? So kira ito ekanavute kappe vipassīṃ bhagavantaṃ passitvā pasannamānaso nānāpupphehi pūjetvā tena puññakamma devaloke nibbatta puna aparāparaṃ puññāni katvā sugatīsuveva saṃsaranto kassapassa bhagavato sāsane

pabbajitvā samaṇadhammaṃ karoti. Tena ca samayena sathhārā bhaddekarattapaṭipadāya kathitāya aññataro bhikkhu bhaddekarattasuttavasena tena sākacchaṃ karoti. So taṃ na sampāyāsi. Asampāyanto “ahaṃ anāgate tuyhaṃ bhaddekarattaṃ kathetuṃ samattho bhaveyya”nti paṇidhānaṃ akāsi, itaro “puccheyya”nti. Etesu paṭhama ekaṃ buddhantaraṃ devamanussesu saṃsaritvā amhākaṃ bhagavato kāle kapilavatthusmiṃ sākiyārājakule nibbatti. Tassa sukhumālabhāvena soṇassa viya pādātalesu lomāni jātāni, tenassa **lomasakaṅgiyoti** nāmaṃ ahoṣi. Itaro devaloke nibbattitvā **candanoti** paññāyittha. Lomasakaṅgiyo anuruddhādīsu sakyakumāresu pabbajantesu pabbajitūṃ na icchi. Atha naṃ saṃvejetūṃ candano devaputto upasaṅkamitvā bhaddekarattaṃ pucchi. Itaro “na jānāmi”ti. Puna devaputto “atha kasmā tayā ‘bhaddekarattaṃ katheyya’nti saṅgāro kato, idāni pana nāmaṃattampi na jānāsi”ti codesi. Itaro tena saddhiṃ bhagavantaṃ upasaṅkamitvā, “mayā kira, bhante, pubbe ‘imassa bhaddekarattaṃ kathessāmi’nti saṅgāro kato”ti pucchi. Bhagavā “āma, kulaputta, kassapassa bhagavato kāle tayā evaṃ kata”nti āha. Svāyamattho uparipaññāsake āgatanayena vitthārato veditabbo. Atha lomasakaṅgiyo “tena hi, bhante, pabbājetha ma”nti āha. Bhagavā “na, kho, tathāgatā mātāpitūhi ananuññātaṃ puttāṃ pabbājenti”ti paṭikkhipi. So mātu santikaṃ gantvā “anujānāhi maṃ, amma, pabbajitūṃ, pabbajissāma”nti vatvā, mātara “tāta, sukhumālo tvaṃ kathaṃ pabbajissāsi”ti vutte, “attano parissayasahanabhāvaṃ pakāsento **“dabbaṃ kusaṃ poṭakila”**nti gāthaṃ abhāsi.

27. Tattha **dabbanti** dabbatiṇamaṃha, yaṃ “saddulo”tipi vuccati. **Kusanti** kusatiṇaṃ, yo “kāso”ti vuccati. **Poṭakilanti** sakaṅṭakaṃ akaṅṭakaṃ gacchaṃ. Idha pana sakaṅṭakameva adhippettaṃ. Usīrādīni suviññeyyāni. Dabbādīni tiṇāni bīraṇatiṇāni pādehi akkantaṃsāpi dukkhajanakāni gamanantarāyakarāni ca, tāni ca panāhaṃ **urasā panudissāmi** urasāpi apanessāmi. Evaṃ apanento taṃ nimittaṃ dukkhaṃ sahanto araññāyatane gumbantaraṃ pavisitvā samaṇadhammaṃ kātuṃ sakkhissāmi. Ko pana vādo pādehi akkamaneti dasseti. **Vivekamanubrūhayanti** kāyavivekaṃ cittavivekaṃ upadhivivekaṃ anubrūhayanto. Gaṇasaṅgaṇikaṃhi pahāya kāyavivekaṃ anubrūhayantasseva aṭṭhatimsāya ārammaṇesu yattha katthaci cittaṃ samādahantassa cittaviveko, na saṅgaṇikāratassa. Samāhitasseva vipassanāya kammaṃ karontassa samathavipassanaṃ yuganaddhaṃ karontassa kilesānaṃ khepanena upadhivivekādhigamo, na asamāhitassa. Tena vuttaṃ “vivekamanubrūhayanti kāyavivekaṃ cittavivekaṃ upadhivivekaṃ anubrūhayanto”ti. Evaṃ pana puttana vutte mātā “tena hi, tāta, pabbajā”ti anujāni. So bhagavantaṃ upasaṅkamitvā pabbajjaṃ yāci. Taṃ sathhā pabbājesi. Taṃ pabbajitvā katapubbakiccaṃ kammaṭṭhānaṃ gahetvā araññaṃ pavisaṃtaṃ bhikkhū āhaṃsu – “āvuso, tvaṃ sukhumālo kiṃ sakkhissasi araññe vasitu”nti. So tesampi tameva gāthaṃ vatvā araññaṃ pavisitvā bhāvaṃ anuyuñjanto nacirasseva chaḷabhiñño ahoṣi. Tena vuttaṃ **apadāne** (apa. thera 2.52.23-27) –

“Suvaṇṇavaṇṇaṃ sambuddhaṃ, āhutīnaṃ paṭiggahaṃ;
Rathiyaṃ paṭipajantaṃ, nānāpupphehi pūjayiṃ.

“Ekanavutito kappe, yaṃ pupphamabhipūjayiṃ;
Duggatiṃ nābhijānāmi, buddhapūjāyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.
Arahattaṃ pana patvā thero aññaṃ byākaronto taṃyeva gāthaṃ abhāsīti.

Lomasakaṅgiyattheragāthāvaṇṇanā niṭṭhitā.

8. Jambugāmiyaputtattheragāthāvaṇṇanā

Kacci no vatthapasutoti āyasmato jambugāmiyaputtattherassa gāthā. Kā uppatti? So kira purimabuddhesu katādhikāro hutvā tattha tattha vivatṭūpanissayaṃ kusalaṃ ācinanto ito ekatiṃse kappe vessabhussa bhagavato kāle ekadivasaṃ kiṃsukāni pupphāni dīsvā tāni pupphāni gahetvā buddhagūṇe anussaranto bhagavantaṃ uddissa ākāse khipanto pūjesi. So tena puññakammaṃ tāvatimsesu nibbatto. Tato paraṃ puññāni katvā aparāparaṃ devamanussesu saṃsaranto imasmim bhuddhuppāde campāyaṃ

jambugāmiyassa nāma upāsakassa putto hutvā nibbatti. Tena puññakammena tāvatim̄sesu nibbatto. Tato param̄ puññāni katvā aparāparam̄ devamanussesu saṃsaran̄to imasmim̄ buddhuppāde campāyam̄ jambugāmiyassa nāma upāsakassa putvā nibbatti. Tenassa **jambugāmiyaputtot**veva samaññā ahoṣi. So vayappatto bhagavato santike dhammam̄ sutvā paṭiladdhasam̄vego pabbajitvā katapubbakicco kammaṭṭhānam̄ gahetvā sākete añjanavane vasati. Athassa pitā “kiṃ nu kho mama putto sāsane abhirato viharati, udāhu no”ti vīmamsanattam̄ “**kacci no vatthapasuto**”ti gātham̄ likhitvā pesesi. So tam̄ vācetvā, “pitā me pamādavihāram̄ āsaṅkati, ahañca ajjāpi puthujjanabhūmim̄ nātivatto”ti sam̄vegajāto ghaṭento vāyamanto nacirasseva chaḷabhiñño ahoṣi. Tena vuttam̄ **apadāne** (apa. thera 2.50.25-30) –

“Kimsukam̄ pupphitam̄ disvā, paggahetvāna añjalim̄;
Buddhassetṭham̄ saritvāna, ākāse abhipūjayim̄.

“Tena kammaena sukatenā, cetanāpaṇidhīhi ca;
Jahitvā mānuṣam̄ deham̄, tāvatimsamagaccham̄.

“Ekatiṃse ito kappe, yaṃ kammamakariṃ tadā;
Duggatiṃ nābhijānāmi, buddhapūjāyidaṃ phalam̄.

“Kilesā jhāpitā mayham̄...pe... katam̄ buddhassa sāsana”nti.

Arahattam̄ pana patvā ñātīnam̄ vasananagaram̄ gantvā sāsanaṃ niyyānikabhāvam̄ pakāsento iddhipāṭihāriyam̄ dassesi. Tam̄ disvā ñātakā pasannamānasā bahū saṅghārāme kāresuṃ. Theropi sakapitarā pesitam̄ gātham̄ aṅkusam̄ katvā ghaṭento vāyamanto arahattam̄ sacchākāsi. Aññam̄ byākarontopi pitupūjanattam̄ “**kacci no vatthapasuto**”ti tameva gātham̄ abhāsi.

28. Tattha **kaccīti** pucchāyam̄ nipāto. **Noti** paṭisedhe. **Vatthapasutoti** vatthe pasuto vatthapasuto, cīvaramaṇḍanābhirato. Nidassanamattañcetaṃ pattamaṇḍanādicāpallapaṭikkhepassāpi adhippetattā. “Kacci na vatthapasuto”tipi pāṭho, so evattho. **Bhūsanāratoti** attabhāvavibhūsanāya rato abhirato, yathekacce pabbajitvāpi capalā kāyadaḷhibahulā cīvarādiparikkhārassa attano sarīrassa ca maṇḍanavibhūsanāṭṭhānāya yuttā honti. Kimeva parikkhārapasuto bhūsanārato ca nāhosīti ayamettha padadvayassāpi attho. **Sīlamayam̄ gandhanti** akhaṇḍādibhāvāpādanena suparisuddhassa catubbidhassāpi sīlassa vasena yvāyam̄ “yo ca sīlavatam̄ pajāti na itarā dussīlapajā, dussīlattāyeva dussīyamayam̄ duggandham̄ vāyati, evam̄ tvam̄ duggandham̄ avāyitvā kacci sīlamayam̄ gandham̄ vāyasīti attho. Atha vā **netarā pajāti** na itarā dussīlapajā, tam̄ kacci na hoti, yato sīlamayam̄ gandham̄ vāyasīti byatirekena sīlagandhavāyanameva vibhāveti.

Jambugāmiyaputtattheragāthāvaṇṇanā niṭṭhitā.

9. Hāritattheragāthāvaṇṇanā

Samunnamayamattānanti āyasmato hāritattherassa gāthā. Kā uppatti? So kira purimabuddhesu katādhikāro hutvā tattha tattha vivaṭṭūpanissayam̄ puññasambhāram̄ upacinanto ito ekatiṃse kappe sudassanam̄ nāma paccekasambuddham̄ disvā pasannamānaso kuṭajapupphehi pūjam̄ katvā tena puññakammena sugatīsuyeva parivattento imasmim̄ buddhuppāde sāvattinagare brāhmaṇamahāsālakule nibbatti. **Hāritotissa** nāmam̄ ahoṣi. Tassa vayappattassa mātāpitaro kularūpādīhi anucchavikam̄ kumārikam̄ brāhmaṇadhītarā ānesuṃ. So tāya saddhim̄ bhogasukham̄ anubhavanto ekadivasaṃ attano tassā ca rūpasampattiṃ oloketvā dhammatāya codiyamāno “īdisam̄ nāma rūpam̄ nacirasseva jarāya maccunā ca abhippamaddīyati”ti sam̄vegam̄ paṭilabhi. Katipayadivasātikkameneva cassa bhariyam̄ kaṅhasappo ḍamsitvā māresi. So tena bhīyyosomattāya sañjātasam̄vego satthu santikam̄ gantvā dhammam̄ sutvā gharabandhane chinditvā pabbaji. Tassa ca cariyānukūlam̄ kammaṭṭhānam̄ gahetvā viharantassa kammaṭṭhānam̄ na sampajjati, cittam̄ ujugatam̄ na hoti. So gāmam̄ piṇḍāya pavīṭṭho aññatarā usukāram̄ usudaṇḍam̄ yante pakkhipitvā ujum̄ karontam̄ disvā “ime acetanampi nāma ujum̄

karonti, kasmā ahaṃ cittaṃ ujuṃ na karissāmi’ ti cintetvā tatova paṭinivattitvā divāṭṭhāne nisinno vipassanaṃ ārabhi. Athassa bhagavā upari ākāse nisīditvā ovādaṃ dento “**samunnamayamattāna**”nti gāthaṃ abhāsi. Ayameva thero attānaṃ paraṃ viya ovaḍanto abhāsīti ca vadanti.

29. Tattha **samunnamayanti** sammā unnamento, samāpattivasena kosajjapakkhe patituṃ adatvā tato uddharanto vīriyasamataṃ yojentoti attho. **Attānanti** cittaṃ, atha vā **samunnamayāti** kosajjapakkhato samunnamehi. **Ma-kāro** padasandhikaro. Hīnavīriyatāya tava cittaṃ kammaṭṭhānavīthiṃ nappaṭipajjati ce, taṃ vīriyārambhavasena sammā unnamehi, anonataṃ anapanataṃ karohīti adhippāyo. Evaṃ pana karonto **usukārova tejanaṃ. Cittaṃ ujuṃ karitvāna, avijjaṃ bhinda hāritāti.** Yathā nāma usukāro kaṇḍaṃ īsakampi onataṃ apanatañca vijjhanto lakkhaṃ bhindanattaṃ ujuṃ karoti, evaṃ kosajjapātato arakkhaṇena onataṃ uddhaccapātato arakkhaṇena apanataṃ vijjhanto appanāpattiyā cittaṃ ujuṃ karitvāna samāhitacitto vipassanaṃ usukkāpetvā sīghaṃ aggamaggaññaṇena avijjaṃ bhinda padālehīti. Taṃ sutvā thero vipassanaṃ vaḍḍhetvā nacireneva arahā ahoṣi. Tena vuttaṃ **apadāne** (apa. thera 1.35.39-43) –

“Himavantassāvidūre, vasalo nāma pabbato;
Buddho sudassano nāma, vasate pabbatantare.

“Pupphaṃ hemavantaṃ gayha, vehāsaṃ agamāsahaṃ;
Tatthaddasāsiṃ sambuddhaṃ, oghatiṇṇamanāsavaṃ.

“Pupphaṃ kuṭajamādāya, sīse katvānahaṃ tadā;
Buddhassa abhiropesiṃ, sayambhussa mahesino.

“Ekatiṃse ito kappe, yaṃ pupphamabhipūjayiṃ;
Duggatiṃ nābhijānāmi, pupphapūjayidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.
Arahattaṃ pana patvā aññaṃ byākarontopi tameva gāthaṃ abhāsi.

Hāritattheragāthāvaṇṇanā niṭṭhitā.

10. Uttiyattheragāthāvaṇṇanā

Ābādhe me samuppanneti āyasmato uttiyattherassa gāthā. Kā uppatti? So kira purimabuddhesu katādhikāro tattha tattha vivaṭṭūpanissayaṃ puññaṃ upacinanto ito catunavute kappe siddhatthassa bhagavato kāle candabhāgāya nadiyā mahārūpo susumāro hutvā nibbato. So pāraṃ gantuṃ nadiyā tīraṃ upagataṃ bhagavantaṃ disvā pasannacitto pāraṃ netukāmo tīrasamīpe nipajji. Bhagavā tassa anukampāya piṭṭhiyaṃ pāde ṭhapesi. So haṭṭho udaggo pītivegena diguṇussāho hutvā sotaṃ chindanto sīghena javena bhagavantaṃ paratīraṃ nesi. Bhagavā tassa cittappasādaṃ oloketvā “ayaṃ ito cuto devaloke nibbattitvā tato paṭṭhāya sugatīsuyeva saṃsaranto ito catunavute kappe amataṃ pāpuṇissati’ ti byākaritvā pakkāmi.

So tathā sugatīsuyeva paribbhamanto imasmiṃ buddhuppāde sāvattihyaṃ aññatarassa brāhmaṇassa putto hutvā nibbatti **uttiyo** nāma nāmena. So vayappatto “amataṃ pariyesissāmi’ ti paribbājako hutvā vicaranto ekadivasaṃ bhagavantaṃ upasaṅkamitvā dhammaṃ sutvā sāsane pabbajitvāpi sīlādīnaṃ avisodhitattā visesaṃ nibbattetuṃ asakkonto aññe bhikkhū visesaṃ nibbattetvā aññaṃ byākaronte disvā satthāraṃ upasaṅkamitvā saṅkhepeneva ovādaṃ yāci. Satthāpi tassa “tasmātiha tvam, uttiya, ādimeva visodhehi’ tiādīnā (saṃ. ni. 5.369) saṅkhepeneva ovādaṃ adāsi. So tassa ovāde ṭhatvā vipassanaṃ ārabhi. Tassa āradhāvippassanassa ābādho uppajji. Uppanne pana ābādhe sañjātasamvego vīriyārambhavatthuṃ katvā vipassanāya kammaṃ karonto vipassanaṃ usukkāpetvā arahattaṃ pāpuṇi.

Tena vuttam **apadāne** (apa. thera 1.3.169-179) –

“Candabhāgānadītīre, susumāro ahaṃ tadā;
Sagocarapasutohaṃ, nadititthaṃ agacchahaṃ.

“Siddhattho tamhi samaye, sayambhū aggapuggalo;
Nadiṃ taritukāmo so, nadititthaṃ upāgami.

“Upagate ca sambuddhe, ahampi tatthupāgamiṃ;
Upagantvāna sambuddhaṃ, imaṃ vācaṃ udīrayiṃ.

“Abhirūha mahāvīra, tāressāmi ahaṃ tuvaṃ;
Pettikaṃ visayaṃ mayhaṃ, anukampa mahāmuni.

“Mama uggajjanaṃ sutvā, abhirūhi mahāmuni;
Haṭṭho haṭṭhena cittaṃ, tāresiṃ lokanāyakaṃ.

“Nadiyā pārime tīre, siddhattho lokanāyako;
Assāsesi mamaṃ tattha, amataṃ pāpuṇissati.

“Tamhā kāyā cavitvāna, devalokaṃ agacchahaṃ;
Dibbasukhaṃ anubhaviṃ, accharāhi purakkhato.

“Sattakkhattuñca devindo, devarajjamakāsahaṃ;
Tīṇikkhattuṃ cakkavattī, mahiyā issaro ahuṃ.

“Vivekamanuyuttohaṃ, nipako ca susaṃvuto;
Dhāremi antimāṃ dehaṃ, sammāsambuddhasāsane.

“Catunnavutito kappe, tāresiṃ yaṃ narāsabhaṃ;
Duggatiṃ nābhijānāmi, taraṇāya idaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā attano sammā paṭipattiyā pariṇaṇṇākaravibhāvanamukhena aññaṃ byākaronto “**ābādhe me samuppanne**”ti gāthaṃ abhāsi.

30. Tattha **ābādhe me samuppanneti** sarīrassa ābādhanato “ābādho”ti laddhanāme visabhāgadhātukkhobhahetuke roge mayhaṃ sañjāte. **Sati me udapajjathāti** “uppanno kho me ābādho, ṭhānaṃ kho panetaṃ vijjati, yadidaṃ ābādho vaḍḍheyya. Yāva panāyaṃ ābādho na vaḍḍhati, handāhaṃ vīriyaṃ ārabhāmi ‘appattassa pattiyā anadhigatassa adhigamāya asacchikatassa sacchikiriyāyā’”ti vīriyārambhavatthubhūtā sati tasseva ābādhassa vasena dukkhāya vedanāya pīḷiyamānassa mayhaṃ udapādi. Tenāha “**ābodho me samuppanno, kālo me nappamajjitu**”nti. Evaṃ uppannañhi satim ānkusaṃ katvā ayaṃ thero arahattaṃ pattoti.

Uttiyattheragāthāvaṇṇanā niṭṭhitā.

Tatīyavaggavaṇṇanā niṭṭhitā.

4. Catutthavaggo

1. Gahvaratīriyattheragāthāvaṇṇanā

Phuṭṭho ḍaṃsehī āyasmato gahvaratīriyattherassa gāthā. Kā uppatti? So kira purimabuddhesu katādhikāro ito ekatiṃse kappe sikhissa bhagavato kāle migaluddo hutvā araṇṇe vicaranto addasa sikhim bhagavantam aññatarasmim rukkhamūle devanāgayakkhānam dhammam desentam, disvā pana pasannamānaso “dhammo esa vuccatī”ti sare nimittam aggahesi. So tena cittappasādena devaloke uppanno puna aparāparam sugatīsuyeva saṃsaranto imasmim buddhuppāde sāvattiyam brāhmaṇakule nibbattivā “aggidatto”ti laddhanāmo vayappatto bhagavato yamakapāṭihāriyam disvā sañjātappasādo sāsane pabbajitvā kammaṭṭhānam gahetvā gahvaratīre nāma araṇṇaṭṭhāne vasati. Tenassa **gahvaratīrayoti** samaññā ahoṣi. So vipassanam vaḍḍhetvā nacirasseva arahattam pāpuṇi. Tena vuttam **apadāne** (apa. therā 2.52.44-50) –

“Migaluddo pure āsi, araṇṇe vipine aham;
Addasam virajam buddham, devasaṅghapurakkhatam.

“Catusaccam pakāsentaṃ, desentaṃ, amataṃ padaṃ;
Assosim madhuraṃ dhammaṃ, sikhino lokabandhuno.

“Ghose cittaṃ pasādesim, asamappaṭipuggale;
Tattha cittaṃ pasādetvā, uttarim duttaram bhavam.

“Ekatiṃse ito kappe, yam saññamalabhim tadā;
Duggatiṃ nābhijānāmi, ghosasaññāyidaṃ phalam.

“Kilesā jhāpitā mayham...pe... kataṃ buddhassa sāsana”nti.

Arahattam pana patvā bhagavantam vanditvā sāvattiyam agamāsi. Tassa āgatabhāvam sutvā ñātakā upagantvā mahādānam pavattesuṃ. So katipayadivase vasitvā araṇṇameva gantukāmo ahoṣi. Tam ñātakā, “bhante, araṇṇam nāma ḍaṃsamakasādivasena bahuparissayam, idheva vasathā”ti āhaṃsu. Tam sutvā thero “araṇṇavāsoyeva mayham rucati”ti vivekābhīratikittanamukhena aññam byākaronto “phuṭṭho ḍaṃsehī”ti gātham abhāsi.

31. Tattha **phuṭṭho ḍaṃsehi makasehī** ḍaṃsanasilātāya “ḍaṃsā”ti laddhanāmāhi andhakamakkhikāhi, makasanaññitehi ca sūcimukhapāṇehi phussito daṭṭhoti attho. **Araññasminti** “pañcadhanusatikam pacchima”nti (pārā. 654) vuttaaraṇṇalakkhaṇayogato araṇṇe. **Brahāvaneti** mahārukkagacchagahanatāya mahāvane araṇṇāniyam. **Nāgo saṅgāmasīsevāti** saṅgāmāvacaro hatthināgo viya saṅgāmamuddhani parasenāsampahāram. “Araṇṇavāso nāma buddhādīhi vaṇṇito thomito”ti ussāhajāto **sato** satimā hutvā **tatra** tasmim araṇṇe, tasmim vā ḍaṃsādisamphasse upaṭṭhite **adhivāsaye** adhvāseyya saheyya, “ḍaṃsādayo maṃ ābādhenti”ti araṇṇavāsam na jaheyyāti attho.

Gahvaratīriyattheragāthāvaṇṇanā niṭṭhitā.

2. Suppiyattheragāthāvaṇṇanā

Ajaram jīramānenāti āyasmato suppiyattherassa gāthā. Kā uppatti? So kira padumuttarassa bhagavato kāle kulagehe nibbattivā tāpasapabbajam pabbajitvā araṇṇāyatane vasanto tattha bhagavantam disvā pasannamānaso phalāphalam adāsi, tathā bhikkhusaṅghassa. So tena puññakammena devamanussesu saṃsaranto kassapassa sammāsambuddhassa kāle khattiyakule nibbattivā anukkamena viññutaṃ patto kalyāṇamittasannissayena laddhasamvego sāsane pabbajitvā bahussuto ahoṣi. Jātimadena sutamadena ca attānam ukkaṃsento pare ca vambhento vihāsi. So imasmim buddhuppāde tassa kamma nissandena sāvattiyam paribhūtarūpe susānagopakakule nibbatti. **Suppiyotissa** nāmam ahoṣi. Atha viññutaṃ patto attano sahāyabhūtam sopākattheram upasaṅkamitvā tassa santike dhammam

sutvā paṭiladdhasaṃvego pabbajitvā sammāpaṭipattiṃ pūretvā “**ajaraṃ jīramānenā**”ti gātham abhāsi.

32. Tattha **ajaranti** jarārahitaṃ, nibbānaṃ sandhāyāha. Tañhi ajātattā natthi ettha jarā, etasmiṃ vā adhigate puggalassa sā natthīti jarābhāvahetutopi ajaraṃ nāma. **Jīramānenāti** jīrantena, khaṇe khaṇe jaraṃ pāpuṇantena. **Tappamānenāti** santappamānena, rāgādīhi ekādasahi aggīhi dayhamānena. **Nibbutinti** yathāvuttasantāpābhāvato nibbutasabhāvaṃ nibbānaṃ. **Nimiyanti** parivatteyyaṃ cetāpeyyaṃ. **Paramaṃ santinti** anavasesakilesābhisaṅkhārapariḷāhavūpasamadhammatāya uttamaṃ santim. Catūhi yogehi ananubandhattā **yogakkhemaṃ**. Attano uttaritarassa kassaci abhāvato **anuttaraṃ**. Ayañhettha saṅkhepattho – khaṇe khaṇe jarāya abhibhuyyamānattā jīramānena, tathā rāgaggiādīhi santappamānena gato evaṃ aniccena dukkhena asārena sabbathāpi anupasantasabhāvena saupaddavena, tappaṭipakkhabhāvato ajaraṃ paramupasamabhūtaṃ kenaci anupaddutaṃ anuttaraṃ nibbānaṃ nimiyāṃ parivatteyyaṃ “mahā vata me lābho mahā udayo hatthagato”ti. Yathā hi manussa yaṃ kiñci bhaṇḍaṃ parivattentā nirapekkhā gayhamānena sambahumānā honti, evamayāṃ thero pahitatto viharanto attano kāye ca jīvite ca nirapekkhataṃ, nibbānaṃ paṭipesitattañca pakāsento “nimiyāṃ paramaṃ santim, yogakkhemaṃ anuttara”nti vatvā tameva paṭipattiṃ paribrūhayanto vipassanaṃ ussukkāpetvā arahattaṃ pāpuṇi. Tena vuttaṃ **apadāne** (apa. therā 2.52.51-77) –

“Varuṇo nāma nāmena, brāhmaṇo mantapāragū;
Chaddetvā dasa puttāni, vanamajjhogaṃ tadā.

“Assamaṃ sukataṃ katvā, suvibhattaṃ manoramaṃ;
Paṇṇasālaṃ karitvāna, vasāmi vipine ahaṃ.

“Padumuttaro lokavidū, āhutaṃ paṭiggaho;
Mamuddharitukāmo so, āgacchi mama assamaṃ.

“Yāvata vanasaṇḍamhi, obhāso vipulo ahu;
Buddhassa ānubhāvena, pajjalī vipinaṃ tadā.

“Disvāna taṃ pāṭihīraṃ, buddhaseṭṭhassa tādīno;
Pattapuṭaṃ gahetvāna, phalena pūjayaṃ ahaṃ.

“Upagantvāna sambuddhaṃ, sahaḥārimadāsahaṃ;
Anukampāya me buddho, idaṃ vacanamabravi.

“Khāribhāraṃ gahetvāna, pacchato ehi me tuvaṃ;
Paribhutte ca saṅghamhi, puññaṃ tava bhavissati.

“Puṭakaṃ taṃ gahetvāna, bhikkhusaṅghassadāsahaṃ;
Tattha cittaṃ pasādetvā, tusitaṃ upapajjahaṃ.

“Tattha dibbehi naccehi, gītehi vāditehi ca;
Puññaḥkammaṃ saṃyuttaṃ, anubhomi sadā sukhaṃ.

“Yaṃ yaṃ yonupapajjāmi, devattaṃ atha mānusaṃ;
Bhoge me ūnatā natthi, phaladānassidaṃ phalaṃ.

“Yāvata caturo dīpā, sasamuddā sapabbatā;
Phalaṃ buddhassa datvāna, issaraṃ kārayāmaṃ.

“Yāvatā ye pakkhigaṇā, ākāse uppatanti ce;
Tepi me vasamanventi, phaladānassidaṃ phalaṃ.

“Yāvatā vanasaṇḍamhi, yakkhā bhūtā ca rakkhasā;
Kumbhaṇḍā garuḷā cāpi, pāricariyaṃ upenti me.

“Kummā soṇā madhukārā, ḍaṃsā ca makasā ubho;
Tepi maṃ vasamanventi, phaladānassidaṃ phalaṃ.

“Supaṇṇā nāma sakuṇā, pakkhijātā mahabbalā;
Tepi maṃ saraṇaṃ yanti, phaladānassidaṃ phalaṃ.

“Yepi dīghāyukā nāgā, iddhimanto mahāyasā;
Tepi maṃ vasamanventi, phaladānassidaṃ phalaṃ.

“Sīhā byagghā ca dīpī ca, acchakokataracchakā;
Tepi maṃ vasamanventi, phaladānassidaṃ phalaṃ.

“Osadhī tiṇavāsī ca, ye ca ākāsavāsino;
Sabbe maṃ saraṇaṃ yanti, phaladānassidaṃ phalaṃ.

“Suddasā sunipuṇaṃ, gambhīraṃ suppakāsitaṃ;
Phassayitvā viharāmi, phaladānassidaṃ phalaṃ.

“Vimokkhe aṭṭha phusitvā, viharāmi anāsavo;
Ātāpī nipako cāhaṃ, phaladānassidaṃ phalaṃ.

“Ye phalaṭṭhā buddhaputtā, khīṇadosā mahāyasā;
Ahamaññataro tesāṃ, phaladānassidaṃ phalaṃ.

“Abhiññāpāramiṃ gantvā, sukkamūlena codito;
Sabbāsava pariññāya, viharāmi anāsavo.

“Tevijjā iddhipattā ca, buddhaputtā mahāyasā;
Dibbasotaṃ samāpannā, tesāṃ aññataro ahaṃ.

“Satasahassito kappe, yaṃ phalaṃ adadiṃ tadā;
Duggatiṃ nābhijānāmi, phaladānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.
Arahattaṃ pana patvāpi tameva gāthaṃ aññābyākaraṇavasena abhāsi.

Suppiyattheragāthāvaṇṇanā niṭṭhitā.

3. Sopākattheragāthāvaṇṇanā

Yathāpi ekaputtasminti āyasmato sopākattherassa gāthā. Kā uppatti? So kira purimabuddhesu katādhikāro hutvā tattha tattha vivaṭṭūpanissayaṃ kusalaṃ upacinanto kakusandhassa bhagavato kāle aññatarassa kuṭumbikassa putto hutvā nibbatta ekadivasāṃ satthāraṃ disvā pasannacitto bījapūraphalāni satthu upanesi. Paṭiggahesi bhagavā anukampaṃ upādāya. So bhikkhusaṅghe ca abhippasanno

salākabhataṃ paṭṭhapetvā saṅghuddesavasena tiṇṇaṃ bhikkhūnaṃ yāvātāyukaṃ khīrabhattaṃ adāsi. So tehi puññakammehi aparāparaṃ devamanussesu sampattiṃ anubhavanto ekadā manussayoniyaṃ nibbatta ekassa paccekabuddhassa khīrabhattaṃ adāsi. Evaṃ tattha tattha puññāni katvā sugatīsu eva paribbhamanto imasmim buddhuppāde purimakammaṇissandena sāvattīyaṃ aññatarāya duggatitthiyā kucchimhi paṭisandhiṃ gaṇhi. Tassa mātā dasa māse kucchina parihaṛitvā paripakke gabbhe vijāyanakāle vijāyitum asakkontī mucchaṃ āpajjitvā bahuvelaṃ matā viya nipajji. Taṃ nātakā “matā”ti saññāya susānaṃ netvā citakaṃ āropetvā devatānubhāvena vātavutthiyā utthitāya aggiṃ adatvā pakkamiṃsu. Dārako pacchimabhāvikkattā devatānubhāvena mātukucchito arogo nikkhami. Mātā pana kālamakāsi. Devatā taṃ gahetvā manussarūpena susānagopakassa gehe ṭhapetvā katipayakālaṃ patirūpena āhārena posesi. Tato paraṃ susānagopako ca naṃ attano puttaṃ katvā vaḍḍheti. So tathā vaḍḍhento tassa puttena supiyena nāma dārakena saddhiṃ kīlanto vicarati. Tassa susāne jātasaṃvaḍḍhabhāvato **sopākoti** samaññā ahoṣi.

Athekadivasam sattivassikaṃ taṃ bhagavā paccūsavēlāya nāṇajālaṃ pattharivā veneyyabandhave oloketvā nāṇajalantogadhaṃ disvā susānaṭṭhānaṃ agamāsi. Dārako pubbahetunā codiyamāno pasannamānaso satthāraṃ upasaṅkamitvā vanditvā aṭṭhāsi. Satthā tassa dhammaṃ kathesi. So dhammaṃ sutvā pabbajjaṃ yācitvā “pitarā anuññātosī”ti vutto pitaraṃ satthu santikaṃ nesi. Tassa pitā satthāraṃ upasaṅkamitvā vanditvā “bhante, imaṃ dārakaṃ pabbājethā”ti anujāni. Satthā taṃ pabbājetvā mettābhāvanāya niyojesi. So mettākammaṭṭhānaṃ gahetvā susāne viharanto ca cirasseva mettājhānaṃ nibbattetvā jhānaṃ pādakaṃ katvā vipassanaṃ vaḍḍhetvā arahattaṃ sacchākāsi. Tena vuttaṃ **apadāne** (apa. therā 2.45.1-7) –

“Kakusandho mahāvīro, sabbadhammāna pāragū;
Gaṇamhā vūpakaṭṭho so, agamāsi vanantaraṃ.

“Bījamiñjaṃ gahetvāna, latāya āvuṇiṃ ahaṃ;
Bhagavā tamhi samaye, jhāyate pabbatantare.

“Disvānaṃ devadevaṃ, vipassanna cetasā;
Dakkhiṇeyyassa vīrassa, bījamiñjamadāsahaṃ.

“Imasmimyeva kappamhi, yaṃ miñjamadadiṃ tadā;
Duggatiṃ nābhijānāmi, bījamiñjassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Arahā hutvā pana aññesaṃ sosānikabhikkhūnaṃ mettābhāvanāvidhiṃ dassento “**yathāpi ekaputtasmi**”nti gāthaṃ abhāsi.

33. Tattha **yathā**ti opammatthe nipāto. **Ekaputtasmi**nti punāti ca kulavaṃsaṃ tāyati cāti putto, atrajādibhedo putto. Eko putto ekaputto, tasmim ekaputtasmiṃ. Visaye cetam bhummavacanaṃ. **Piyasmi**nti piyāyitabbatāya ceva ekaputtatāya ca rūpasīlācārādīhi ca pemakaraṇaṭṭhānabhūte. **Kusalī**ti kusalaṃ vuccati khemaṃ sotthibhāvo, taṃ labhitabbaṃ etassa atthīti kusalī, sattānaṃ hitesī mettājjhāsayo. **Sabbesu pānesūti** sabbesu sattesu. **Sabbatthāti** sabbāsu disāsu sabbesu vā bhavādīsu, sabbāsu vā avatthāsu. Idaṃ vuttaṃ hoti – yathā ekaputtake piye manāpe mātāpitā kusalī ekantahitesī bhavēyya, evaṃ puratthimādibhedāsu sabbāsu disāsu, kāmabhavādibhedesu sabbesu bhavesu daharādibhedāsu sabbāsu avatthāsu ca ṭhitesu sabbesu sattesu ekantahitesitāya kusalī bhavēyya, “mitto udāsīno pañcatthiko”ti sīmaṃ akatvā sīmāsambhedavasena sabbattha ekaraṣaṃ mettaṃ bhāveyyāti. Imaṃ pana gāthaṃ vatvā “sace tumhe āyasmanto evaṃ mettābhāvanaṃ anuyuñjeyyātha, ye te bhagavatā ‘sukhaṃ supatī’tiādīnā (a. ni. 11.15) ekādasa mettānisamsā vuttā, ekaṃsena tesam bhāgino bhavathā”ti ovādamadāsi.

Sopākattheragāthāvaṇṇanā niṭṭhitā.

4. Posiyattheragāthāvaṇṇanā

Anāsannavarāti āyasmato posiyattherassa gāthā. Kā uppatti? So kira purimabuddhesu katādhikāro tattha tattha vivaṭṭūpanissayaṃ bahuṃ kusalaṃ upacinitvā sugatīsu eva saṃsaranto ito dvenavute kappe tissassa bhagavato kāle migaluddo hutvā araṇṇe vicarati. Atha bhagavā tassa anuggahaṃ kātuṃ araṇṇaṃ gantvā tassa cakkhupathe attānaṃ dassesi. So bhagavantam disvā pasannacitto āvudhaṃ nikkhipitvā upasaṅkamitvā aṅgalaṃ paggayha aṭṭhāsi. Bhagavā nisīditukāmatam dassesi. So tāvadeva tiṇamuṭṭhiyo gahetvā same bhūmibhāge sakkaccaṃ santharivā adāsi. Nisīdi tattha bhagavā anukampaṃ upādāya. Nisinne pana bhagavati anappakaṃ pītisomanassaṃ paṭisaṃvedento bhagavantam vanditvā sayampi ekamantaṃ nisīdi. Atha bhagavā ‘‘ettakaṃ vaṭṭati imassa kusalabīja’’nti uṭṭhāyāsanā pakkāmi. Acirapakkante bhagavati taṃ siho migarājā ghātesi. So kālaṅkato devaloke nibbatti. ‘‘So kira bhagavati anupagacchante sihena ghātito niraye nibbattissatī’’ti taṃ disvā bhagavā sugatiyaṃ nibbattanatthaṃ kusalabījaropanatthaṃ upasaṅkami.

So tattha yāvatāyukaṃ thatvā tato devalokato cavitvā sugatīsuveva parivattento imasmiṃ buddhuppāde sāvatthiyaṃ aṅgatarassa mahāvibhavassa seṭṭhino putto saṅgāmajitatherassa kaniṭṭhabhātā hutvā nibbatti. **Posiyotissa** nāmaṃ ahosi. So vayappatto dārapariggahaṃ katvā ekam puttaṃ labhitvā antimabhavikatāya dhammatāya codiyamāno jātiādiṃ paṭicca uppannasamvego pabbajitvā araṇṇaṃ pavisitvā vūpakaṭṭho hutvā catusaccakammaṭṭhānabhāvanaṃ anuyuñjanto nacirasseva vipassanaṃ usukkāpetvā arahattaṃ pāpuṇi. Tena vuttaṃ **apadāne** (apa. therā 2.53.1-12) –

‘‘Himavantassāvidūre, lambako nāma pabbato;
Tattheva tisso sambuddho, abbhokāsamhi caṅkamaṃ.

‘‘Migaluddo tadā āsiṃ, araṇṇe kānane ahaṃ;
Disvāna taṃ devadevaṃ, tiṇamuṭṭhimadāsahaṃ.

‘‘Nisīdanatthaṃ buddhassa, datvā cittaṃ pasādayiṃ;
Sambuddhaṃ abhivādetvā, pakkāmiṃ uttarāmukho.

‘‘Aciraṃ gatamattassa, migarājā apothayi;
Sohena pothito, santo tattha kālaṅkato ahaṃ.

‘‘Āsanne me kataṃ kammaṃ, buddhaseṭṭhe anāsave;
Sumutto saravegova, devalokamagacchahaṃ.

‘‘Yūpo tattha subho āsi, puñṇakammābhinimmito;
Sahassakaṇḍo satabheṇḍu, dhajālu haritāmayo.

‘‘Pabhā niddhāvate tassa, sataraṃsīva uggato;
Ākiṇṇo devakaṇṇāhi, āmodiṃ kāmakāmihaṃ.

‘‘Devalokā cavitvāna, sukkamūlena codito;
Āgantvāna manussattaṃ, pattomhi āsavakkhayaṃ.

‘‘Catunnavutito kappe, nisīdanamadāsahaṃ;
Duggatiṃ nābhijānāmi, tiṇamuṭṭhe idaṃ phalaṃ.

‘‘Kilesā jhāpitā mayhaṃ...pe... kataṃ buddhassa sāsana’’nti.

Arahattaṃ pana patvā bhagavantaṃ vanditūṃ sāvattiṃ āgato ñātiṃ anukampāya ñātigeḥaṃ agamāsi. Tattha naṃ purāṇadutiyaikā vanditvā āsanadānādinaṃ paṭhamaṃ upāsikā viya vattaṃ dassetvā therassa ajjhāsayaṃ ajānantī pacchā itthikuttādīhi palobhetukāmā ahoṣi. Thero “aho andhabālā mādisepi nāma evaṃ paṭipajjati”ti cintetvā kiñci avatvā uṭṭhāyāsanaṃ araṇṇameva gato. Taṃ āraṇṇakā bhikkhū “kiṃ, āvuso, atilahuṃ, nivattosi, ñātakehi na diṭṭhosi”ti pucchimsu. Thero tattha pavattiṃ ācikkhanto “**anāsannavarā etā**”ti gāthaṃ abhāsi.

34. Tattha **anāsannavarāti etā** itthiyo na āsanā anupagatā, dūre eva vā ʒhitā hutvā varā purisassa seṭṭhā hitāvahā, tañca kho **niccomeva** sabbakālemeva, na rattimeva, na divāpi, na rahovelāyapi. **Vijānatāti** vijānanta. “Anāsannaparā”ti pi pāli, so evattho. Ayañhettha adhippāyo – caṇḍahatthiassamahimsasīhabyagghayakkharakkhasapisācāpi manussānaṃ anupasaṅkamanto varā seṭṭhā, na anathāvahā, te pana upasaṅkamantā diṭṭhadhammikaṃyeva anattaṃ kareyyuṃ. Itthiyo pana upasaṅkamitvā diṭṭhadhammikaṃ samparāyikaṃ vimokkhanissitampi atthaṃ vināsetvā mahantaṃ anattaṃ āpādentī, tasmā anāsannavarā etā niccomeva vijānatāti. Idāni tamattaṃ attūpanāyikaṃ katvā dassento “**gāmā**”tiādimāha. Tattha **gāmāti** gāmaṃ. Upayogatthe hi etaṃ nissakkavacanaṃ. **Araṇṇamāgammāti** araṇṇato āgantvā. **Ma**-kāro padasandhikaro, nissakke cetāṃ upayogavacanaṃ. **Tatoti** mañcakato. **Anāmantetvāti** anālapitvā purāṇadutiyaikāṃ “appamattā hohī”ti ettakampi avatvā. **Posiyoti** attānameva paraṃ viya vadati. Ye pana “pakkāmi”nti paṭhanti, tesāṃ ahaṃ posiyō pakkāminti yojanā. Ye pana “sā itthī therāṃ gharaṃ upagataṃ bhojetvā palobhetukāmā jātā, taṃ disvā thero tāvadeva gehato nikkhamitvā vihāraṃ gantvā attano vasanaṭṭhāne mañcake nisīdi. Sāpi kho itthī pacchābhattaṃ alaṅkatapaṭiyattā vihāre therassa vasanaṭṭhānaṃ upasaṅkami. Taṃ disvā thero kiñci avatvā uṭṭhāya divāṭṭhānameva gato”ti vadanti, tesāṃ “gāmā araṇṇamāgammā”ti gāthāpadassa attho yathārutavaseneva niyyati. Vihāro hi idha “araṇṇa”nti adhippeto.

Posiyattheragāthāvaṇṇanā niṭṭhitā.

5. Sāmaññakānittheragāthāvaṇṇanā

Sukhaṃ sukhatthoti āyasmato sāmaññakānittherassa gāthā. Kā uppatti? So kira purimabuddhesu katādhikāro hutvā tattha tattha bhava kusalaṃ upacinanto ito ekanavute kappe vipassissa bhagavato kāle manussayoniyaṃ nibbatta vipassiṃ bhagavantaṃ disvā pasannamānaso ekaṃ mañcaṃ adāsi. So tena puññakamma devamanussesu saṃsaranto imasmiṃ buddhuppāde aññatarassa paribbājakassa putto hutvā nibbatti. **Sāmaññakānītissa** nāmaṃ ahoṣi. So viññutaṃ patto satthu yamakapāṭihāriyaṃ disvā pasannamānaso sāsane pabbajitvā cariyānukūlaṃ kammaṭṭhānaṃ gahetvā jhānaṃ nibbattetvā jhānaṃ pādakaṃ katvā vipassanaṃ vaḍḍhetvā arahattaṃ pāpuṇi. Tena vuttaṃ **apadāne** (apa. thera 1.36.30-33) –

“Vipassino bhagavato, lokajetṭhassa tādino;
Ekaṃ mañcaṃ mayā dinnāṃ, pasannena sapāṇinā.

“Hatthiyānaṃ assayānaṃ, dibbayānaṃ samajjhagaṃ;
Tena mañcaka dānena, pattomhi āsavakkhayaṃ.

“Ekanavutito kappe, yaṃ mañcamadadiṃ tadā;
Duggatiṃ nābhijānāmi, mañcadānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Therassa pana gīhasahāyako kātiyāno nāma paribbājako buddhuppādato paṭṭhāya titthiyānaṃ hatalābhasakkāratāya ghāsacchādanamattampi alabhanto ājīvakaṃpakato therāṃ upasaṅkamitvā “tumhe sākiyaputtiyā nāma mahālābhaggayasaggappattā sukhena jīvatha, mayāṃ pana dukkhitā kicchajīvikā, kathaṃ nu kho paṭipajjamānassa diṭṭhadhammikañceva samparāyikañca sukhaṃ sampajjati”ti pucchi. Athassa thero “nippariyāyato sukhaṃ nāma lokuttarasukhameva, tañca tadanurūpaṃ paṭipattiṃ

paṭipajjantassevā”ti attanā tassa adhigatabhāvaṃ pariyāyena vibhāvento “**sukhaṃ sukhattho labhate tadācara**”nti gātham abhāsi.

35. Tattha **sukhanti** nirāmiṣaṃ sukhaṃ idhādhippetam. Tañca phalasaṃpatti ceva nibbānañca. Tathā hi “ayaṃ samādhi paccuppannasukho ceva āyatiñca sukhavipāko” (dī. ni. 3.355; a. ni. 5.27; vibha. 804) “nibbānaṃ paramaṃ sukha”nti (dha. pa. 203-204) ca vuttaṃ. **Sukhattho**ti sukhappayojano, yathāvuttena sukkena atthiko. **Labhateti** pāpuṇāti, atthikassevedaṃ sukhaṃ, na itarassa. Ko pana atthikoti āha “**tadācara**”nti tadattham ācaranto, yāya paṭipattiyā taṃ paṭipattiṃ paṭipajjantoti attho. Na kevalaṃ tadācaraṃ sukhaṃeva labhate, atha kho **kittiñca pappoti** “itipi sīlavā suparisuddhakāyavacīkammanto suparisuddhājīvo jhāyī jhānayutto”tiādinā kittiṃ parammukhā patthaṭayasataṃ pāpuṇāti. **Yasassa vaḍḍhatī**ti sammukhe guṇābhithavasānkhāto parivārasampadāsānkhāto ca yaso assa paribrūhati. Idāni “tadācara”nti sāmaññato vuttamattham sarūpato dassento – “**yo ariyamaṭṭhaṅgikamañjasam ujum, bhāveti maggaṃ amatassa pattiya**”ti āha. Tassattho **yo** puggalo kilesehi ārakattā parisuddhaṭṭhena paṭipajjantānaṃ ariyabhāvakarapaṭṭhena **ariyam**, sammādiṭṭhiādiṭṭhaṅgasamudāyatāya **aṭṭhaṅgikam**, antadvayarahitamajjhimaṭṭhena akūṭilaṭṭhena **añjasam**, kāyavaṅkādiṭṭhena **ujum**, nibbānatthikehi magganīyaṭṭhena kilese mārento gamanaṭṭhena ca “**magga**”nti laddhanāmaṃ dukkhanirodhagāminipaṭipadaṃ **amatassa** asaṅkhatāya dhātuyā **pattiya** adhigamāya **bhāveti** attano santāne uppādeti vaḍḍheti ca, so nipariyāyena “sukhattho tadācara”nti vuccati, tasmā yathāvuttaṃ sukhaṃ labhati. Taṃ sutvā paribbājako pasannamānaso pabbajitvā sammā paṭipajjanto nacirasseva vipassanaṃ vaḍḍhetvā arahattaṃ pāpuṇi. Idameva therassa aññābyākaraṇaṃ ahoṣi.

Sāmaññakānītheragāthāvaṇṇanā niṭṭhitā.

6. Kumāputtattheragāthāvaṇṇanā

Sādhu sutanti āyasmato kumāputtattherassa gāthā. Kā uppati? So kira purimabuddhesu katādhikāro ito ekanavute kappe ajinacammavasano tāpaso hutvā bandhumatīnagare rājuyyāne vasanto vipassiṃ bhagavantaṃ passitvā pasannamānaso pādabbhañjanatelaṃ adāsi. So tena puññakamma devaloke nibbato. Tato paṭṭhāya sugatīsusueva saṃsaranto imasmiṃ buddhuppāde avantiraṭṭhe veḷukaṇṭakanagare gahapatikule nibbato. “Nando”tissa nāmaṃ akaṃsu. Mātā panassa kumā nāma, tena **kumāputtoti** paññāyittha. So āyasmato sārīputtassa santike dhammaṃ sutvā laddhappasādo pabbajitvā katapubbakicco pariyantapabbatapasae samaṇadhammaṃ karonto visesaṃ nibbattetuṃ asakkonto bhagavantaṃ upasaṅkamitvā dhammaṃ sutvā kammaṭṭhānaṃ sodhetvā sappāyaṭṭhāne vasanto vipassanaṃ vaḍḍhetvā arahattaṃ sacchākāsi. Tena vuttaṃ **apadāne** (apa. therā 2.53.24-30) –

“Nagare bandhumatiyā, rājuyyāne vasāmaṃ;
Cammavāsī tadā āsiṃ, kamaṇḍaludharo ahaṃ.

“Addasaṃ vimalaṃ buddhaṃ, sayambhuṃ aparājitaṃ;
Padhānaṃ pahitattaṃ taṃ, jhāyimaṃ jhānarataṃ vasiṃ.

“Sabbakāmasamiddhañca, oghatiṇṇamanāsavaṃ;
Disvā pasannasumano, abbhañjanamadāsahaṃ.

“Ekanavutito kappe, abbhañjanamadāsahaṃ;
Duggatiṃ nābhijānāmi, abbhañjanassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā araññe kāyadaḷhibahule bhikkhū, disvā te ovaḍanto sāsanaṃ niyyānikabhāvaṃ pakāsento “**sādhu sutam sādhu caritaka**”nti gātham abhāsi.

36. Tattha **sādhūti** sundaram. **Sutanti** savanam. Tañca kho vivatṭūpanissitam visesato appicchatādiṭṭasāmyuttam dasakathāvatthusavanam idhādhippetam. **Sādhū caritakanti** tadeva appicchatādicaritam ciñnam, sādhu caritameva hi “caritaka”nti vuttam. Padadvayenāpi bāhusaccam tadanurūpam paṭipattiñca “sundara”nti dasseti. **Sadāti** sabbakāle navakamajjhimatherakāle, sabbesu vā iriyāpathakkhaṇesu. **Aniketavihāroti** kilesānam nivāsanaṭṭhānaṭṭhena pañcakāmaguṇā nīketā nāma, lokiyā vā chaḷārammaṇadhammā. Yathāha – “rūpanimittanīketavisāravīnibandhā kho, gahapati, ‘nīketasārī’ti vuccatī”tiādi (sam. ni. 3.3). Tesam nīketānam pahānatthāya paṭipadā aniketavihāro. **Atthapucchananti** tam ājānitukāmassa kalyāṇamittam upasaṅkamitvā diṭṭhadhammikasamparāyīkaramatthapabhedassa pucchanam, kusalādibhedassa vā atthassa sabhāvadhammassa “kiṃ, bhante, kusalam, kiṃ akusalam, kiṃ sāvajjam, kiṃ anavajja”ntiādinā (ma. ni. 3.296) pucchanam atthapucchanam. **Padakkhiṇakammanti** tam pana pucchitvā padakkhiṇaggāhibhāvena tassa ovāde adhiṭṭhānam sammāpaṭipatti. Idhāpi “sādhū”ti padaṃ ānetvā yojetabbam. **Ētam sāmaññanti** “sādhū suta”ntiādinā vuttam yaṃ sutam, yañca caritam, yo ca aniketavihāro, yañca atthapucchanam, yañca padakkhiṇakammam, etam sāmaññam eso samaṇabhāvo. Yasmā imāya eva paṭipadāya samaṇabhāvo, na aññathā, tasmā “sāmañña”nti nippariyāyato maggaphalassa adhivacanam. Tassa vā pana ayam apanṇakapaṭipadā, tam panetam sāmaññam yādisassa sambhavāti, tam dassetum “**akiñcanassā**”ti vuttam. Apariggāhakassa, khettavatthuhiraññasuvaṇṇadāsīdāsīdipariggahapaṭiggahaṇarāhitassāti attho.

Kumāputtattheragāthāvaṇṇanā niṭṭhitā.

7. Kumāputtasahāyattheragāthāvaṇṇanā

Nānājanapadam yantīti āyasmato kumāputtasahāyattherassa gāthā. Kā uppatti? So kira purimabuddhesu katādhikāro tattha tattha vivatṭūpanissayam kusalam upacinanto ito catunavute kappe siddhatthassa bhagavato kāle kulagehe nibbatitvā viññutam patto araññam pavisitvā bahum rukkhadaṇḍam chinditvā kattarayaṭṭhim katvā saṅghassa adāsī. Aññañca yathāvibhavam puññam katvā devesu nibbatitvā tato paṭṭhāya sugatīsuveva parivattento imasmim buddhuppāde veḷukaṇṭakanagare iddhe kule nibbatti. **Sudantotissa** nāmam ahoṣi. “Vāsulo”ti keci vadanti. So kumāputtassa piyasahāyo hutvā vicaranto “kumāputto pabbajito”ti sutvā “na hi nūna so orako dhammavinayo, yattha kumāputto pabbajito”ti tadanubandhena sayampi pabbajitukāmo hutvā satthu santikam upasaṅkami. Tassa satthā dhammam desesi. So bhīyosomattāya pabbajjāya sañjātachando pabbajitvā kumāputteneva saddhim pariyantapabbate bhāvanānuyutto viharati. Tena ca samayena sambahulā bhikkhū nānājanapadesu janapadacārikam carantāpi gacchantāpi āgacchantāpi tam ṭhānam upagacchanti. Tena tattha kolāhalaṃ hoti. Tam disvā sudantatthero “ime bhikkhū niyyānikasāsane pabbajitvā janapadavitakkam anuvattentā cittasamādhim virādhenti”ti samvegajāto tameva samvegam attano cittadamanassa ankusam karonto “**nānājanapadam yantī**”ti gātham abhāsi.

37. Tattha **nānājanapadanti** visum visum nānāvidham janapadam, kāsīkosalādiānekaraṭṭhanti attho. **Yantīti** gacchanti. **Vicarantāti** “asuko janapado subhikkho sulabhapiṇḍo, asuko khemo arogo”tiādivitakkavasena janapadacārikam carantā. **Asaññatāti** tasseeva janapadavitakkassa appahīnatāya cittena asaṃyatā. **Samādhīna virādhenti** sabbassapi uttarimanussadhammassa mūlabhūtam upacārappanābhedaṃ samādhīna nāma virādhenti. **Ca-saddo** sambhāvane. Desantaracāṇena jhāyitum okāsābhāvena anadhigatam samādhim nādhigacchantā, adhigatañca vasībhāvānāpādanena jīrantā virādhenti nāma. **Kimsu raṭṭhacariyā karissatīti sūti** nipātamattam. “Evambhūtanam raṭṭhacariyā janapadacārikā kiṃ karissati, kiṃ nāma attham sādhesati, niratthakāvā”ti garahanto vadatī. **Tasmāti** yasmā īdisī desantaracariyā bhikkhussa na atthāvahā, api ca kho anattāvahā sampattīnam virādhanato, tasmā. **Vineyya sārāmbhanti** vasanapadesa arativasena uppannam sārāmbham cittasamkilesam tadanurūpena paṭisaṅkhānena vinetvā vūpasametvā. **Jhāyeyyāti** ārammaṇūpanijjhānena lakkhaṇūpanijjhānena cāti duvidhenapi jhānena jhāyeyya. **Apurakkhatoti** micchāvitakkehi taṇhādīhi vā na purakkhatoti tesam vasam anupagacchanto kammaṭṭhānameva manasi

kareyyāti attho. Evaṃ pana vatvā thero tameva saṃvegaṃ aṅkusaṃ katvā vipassanaṃ vaḍḍhetvā arahattaṃ pāpuṇi. Tena vuttaṃ **apadāne** (apa. thera 2.53.36-41) –

“Kānanaṃ vanamoggayha, veḷuṃ chetvānaṃ tadā;
Ālambanaṃ karitvāna, saṅghassa adadiṃ bahuṃ.

“Tena cittappasādena, subbate abhivādiya;
Ālambadaṇḍaṃ datvāna, pakkāmiṃ uttarāmukho.

“Catunnavutito kappe, yaṃ daṇḍamadadiṃ tadā;
Duggatiṃ nābhijānāmi, daṇḍadānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Yaṃ panatthaṃ aṅkusaṃ katvā ayaṃ thero arahattaṃ patto, tamevatthaṃ hadaye ṭhapetvā arahattaṃ pattopi “**nānājanapadaṃ yanti**”ti idameva gāthaṃ abhāsi. Tasmā tadevassa aññābyākaraṇaṃ ahositi.

Kumāputtasahāyattheragāthāvaṇṇanā niṭṭhitā.

8. Gavampatittheragāthāvaṇṇanā

Yo iddhiyā sarabhunti āyasmato gavampatittherassa gāthā. Kā uppatti? So kira purimabuddhesu katādhikāro ito ekatiṃse kappe sikhiṃ bhagavantaṃ passitvā pasannaṃānaso pupphehi pūjaṃ akāsi. So tena puññakamma devaloke uppanno aparāparaṃ puññāni karonto koṇāgamanassa bhagavato cetiye chattaṅca vedikaṅca kāresi. Kassapassa pana bhagavato kāle aññatarasmiṃ kulagehe nibbatta. Tasmīṅca kule bahuṃ gomaṇḍalaṃ ahoṣi. Taṃ gopālakā rakkhanti. Ayaṃ tattha antarantarā yuttappayuttaṃ vicārento vicarati. So ekaṃ khīṇāsavatttheraṃ gāme piṇḍāya caritvā bahigāme devasikaṃ ekasmiṃ padese bhattakiccaṃ karontaṃ disvā “ayyo sūriyātapena kilamissati”ti cintetvā cattāro sirīsadaṇḍe ussāpetvā tesāṃ upari sirīsasākhāyo ṭhapetvā sākhāmaṇḍapaṃ katvā adāsi. “Maṇḍapassa samīpe sirīsaruḅkkaṃ ropesī”ti ca vadanti. Tassa anukampāya devasikaṃ thero tattha nisīdi. So tena puññakamma tato cavitvā cātumahārājikesu nibbatti. Tassa purimakammasaṃsūcakaṃ vimānavāre mahantaṃ sirīsavanaṃ nibbatti vaṇṇagandhasampannehi aññehi pupphehi sabbakāle upasobhayamānaṃ, tena taṃ vimānaṃ “serīsaka”nti paññāyittha. So devaputto ekaṃ buddhantaraṃ devesu ca manussesu ca saṃsaritvā imasmiṃ buddhuppāde yasattherassa catūsu gihisahāyesu **gavampati** nāma hutvā āyasmato yasassa pabbajitabhāvaṃ sutvā attano sahāyehi saddhiṃ bhagavato santikaṃ agamāsi. Sathā tassa dhammaṃ desesi. So desanāvasāne sahāyehi saddhiṃ arahatte patiṭṭhāsi. Tena vuttaṃ **apadāne** (apa. thera 2.53.42-47) –

“Migaluddo pure āsiṃ, vipine vicaraṃ ahaṃ;
Addasaṃ virajaṃ buddhaṃ, sabbadhammāna pāraguṃ.

“Tasmiṃ mahākāruṅike, sabbasattahite rate;
Pasannacitto sumano, nelapupphaṃ apūjayiṃ.

“Ekatiṃse ito kappe, yaṃ pupphamabhipūjayiṃ;
Duggatiṃ nābhijānāmi, buddhapūjāyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā thero vimuttisukhaṃ paṭisaṃvedento sākete viharati añjanavane. Tena ca samayena bhagavā mahatā bhikkhusaṅghena saddhiṃ sāketaṃ gantvā añjanavane vihāsi. Senāsanam nappahosi. Sambahulā bhikkhū vihārasāmantā sarabhuyā nadiyā vālikāpuḷine sayiṃsu. Atha

aḍḍharattasamaye nadiyā udakoghe āgacchante sāmaṇerādayo uccāsaddamahāsaddā ahesuṃ. Bhagavā taṃ ñatvā āyasmantaṃ gavampatiṃ āṇāpesi – “gaccha, gavampati, jaloghaṃ vikkhambhetvā bhikkhūnaṃ phāsuvihāraṃ karohi”ti. Thero “sādhu, bhante”ti iddhibalena nadīsotaṃ vikkhambhi, taṃ dūratova pabbatakūṭaṃ viya aṭṭhāsi. Tato paṭṭhāya therassa ānubhāvo loke pākaṭo ahoṣi. Athekadivasāṃ satthā mahatīyā devaparisāya majjhe nisīditvā dhammaṃ desentaṃ therāṃ disvā lokānukampāya tassa guṇānaṃ vibhāvanatthaṃ taṃ pasamsanto “**yo iddhiyā sarabhu**”nti gāthaṃ abhāsi.

38. Tattha **iddhiyā**ti adhiṭṭhānidhiyā. **Sarabhunti** evaṃnāmikaṃ nadiṃ, yaṃ loke “sarabhu”nti vadanti. **Aṭṭhapesī**ti sanditūṃ adento sotaṃ nivattetvā pabbatakūṭaṃ viya mahantaṃ jalarāsiṃ katvā ṭhapesi. **Asitoti** nasito, taṇhādiṭṭhinissayarahito, bandhanasāṅkhātānaṃ vā sabbasaṃyojanānaṃ samucchinnattā kenacipi bandhanena abaddho, tato eva ejaṇaṃ kilesānaṃ abhāvato **anejo so, gavampati, taṃ sabbasaṅgātigataṃ** tādisaṃ sabbepi rāgadosamohamānadiṭṭhisāṅge atikkamitvā ṭhitattā sabbasaṅgātigataṃ, asekkhamunibhāvato **mahāmuniṃ**, tato eva kāmakkammabhavādibhedassa sakalassapi bhavassa pāraṃ nibbānaṃ gatattā **bhavassa pāraguṃ. Devā namassantī**ti devāpi imassanti, pageva itarā pajāti.

Gāthāpariyosāne mahato janakāyassa dhammābhisamayo ahoṣi. Thero aññaṃ byākaronto “satthāraṃ pūjessāmi”ti imameva gāthaṃ abhāsīti.

Gavampatittheragāthāvaṇṇanā niṭṭhitā.

9. Tissattheragāthāvaṇṇanā

Sattiyā viya omaṭṭhoti āyasmato tissattherassa gāthā. Kā uppati? Ayampi kira purimabuddhesu katādhikāro tattha tattha bhavē vivaṭṭūpanissayaṃ puññaṃ upacinanto tissassa bhagavato bodhiyā mūle purāṇapaṇṇāni nīharitvā sodhesi. So tena puññakamma devamanussesu saṃsaranto imasmiṃ buddhuppāde kapilavatthunagare bhagavato pitucchāputto hutvā nibbatti **tisso** nāma nāmena. So bhagavantaṃ anupabbajitvā upasampanno hutvā araṇṇāyatane viharanto jātiṃ paṭicca mānaṃ karonto kodhūpāyāsabahulo ca ujjhānabahulo ca hutvā vicarati, samaṇadhamme ussukkaṃ na karoti. Atha naṃ satthā ekadivasāṃ divāṭṭhāne vivaṭṭamukhaṃ niddāyantaṃ dibbacakkhunā olokeno sāvattahito ākāseṇa gantvā tassa upari ākāseyeva ṭhatvā obhāsaṃ pharitvā tenobhāseṇa paṭibuddhassa satim uppadetvā ovādaṃ dento “**sattiyā viya omaṭṭho**”ti gāthaṃ abhāsi.

39. Tattha **sattiyā**ti desanāsīsametaṃ, ekatodhārādinā satthenāti attho. **Omaṭṭhoti** pahato. Cattāro hi pahārā omaṭṭho ummaṭṭho maṭṭho vimaṭṭhoti. Tattha upari ṭhatvā adhomukhaṃ dinnapahāro omaṭṭho nāma, heṭṭhā ṭhatvā uddhammukhaṃ dinnapahāro ummaṭṭho nāma, aggaḷasūci viya vinivijjhivā gato maṭṭho nāma, seso sabbopi vimaṭṭho nāma. Imasmiṃ pana ṭhāne omaṭṭho gahito. So hi sabbadāruṇo duruddharaṇasallo duttikiccho antodoso antopubbalohitova hoti, pubbalohitaṃ anikkhamitvā vaṇamukhaṃ pariyanandhitvā tiṭṭhati. Pubbalohitaṃ nīharitukāmehi mañcena saddhiṃ bandhitvā adhosiro kātabbo hoti, maraṇaṃ vā maraṇamattaṃ vā dukkhaṃ pāpuṇanti. **Ḍayhamāneti** agginā jhāyamāne. **Matthaketi** sīse. Idaṃ vuttaṃ hoti – yathā sattiyā omaṭṭho puriso sallubbāhanavaṇatikicchanānaṃ atthāya vīriyaṃ ārabhati tādisaṃ payogaṃ karoti parakkamati, yathā ca ḍayhamāne matthake ādittasīso puriso tassa nibbāpanatthaṃ vīriyaṃ ārabhati tādisaṃ payogaṃ karoti, evamevaṃ, bhikkhu, kāmarāgappahānāya sato appamatto ativiya ussāhajāto hutvā vihareyyāti.

Evaṃ bhagavā tassa therassa kodhūpāyāsavūpasamāya ovādaṃ dento tadekaṭṭhatāya kāmarāgappahānasīseṇa desanaṃ niṭṭhāpesi. Thero imaṃ gāthaṃ sutvā saṃviggahadayo vipassanāya yuttappayutto vihāsi. Tassa ajjhāsayaṃ ñatvā satthā saṃyuttake **tissattherasuttaṃ** (saṃ. ni. 3.84) desesi. So desanāpariyosāne arahatte patiṭṭhāsi. Tena vuttaṃ **apadāne** (apa. thera 2.53.66-73) –

“Devaloke manusse ce, anubhotvā ubho yase;

Avasāne ca nibbānaṃ, sivaṃ patto anuttaraṃ.

“Sambuddhaṃ uddisitvāna, bodhiṃ vā tassa satthuno;
Yo puññaṃ pasavī poso, tassa kiṃ nāma dullabhaṃ.

“Magge phale āgame ca, jhānābhiññāguṇesu ca;
Aññesaṃ adhiko hutvā, nibbāyāmi anāsavo.

“Purehaṃ bodhiyā pattaṃ, chaḍḍetvā haṭṭhamānaso;
Imehi vīsataṅgehi, samaṅgī homi sabbathā.

“Kilesā jhāpitā mayhaṃ...pe... kataṃ buddhassa sāsana’nti.
Arahattaṃ pana patvā thero aññaṃ byākaronto satthāraṃ pūjetuṃ tameva gāthaṃ abhāsi.

Tissattheragāthāvaṇṇanā niṭṭhitā.

10. Vaḍḍhamānattheragāthāvaṇṇanā

Sattiyā viya omaṭṭhoti āyasmato vaḍḍhamānattherassa gāthā. Kā uppatti? Ayampi kira purimabuddhesu katādhikāro ito dvenavute kappe tissassa bhagavato kāle kulagehe nibbattitvā viññutaṃ patto tissaṃ bhagavantaṃ piṇḍāya carantaṃ disvā pasannamānaso suparipakkāni vaṇṇato muttāni ambapahalāni adāsi. So tena puññakamma devaloke nibbatta aparāparaṃ puññakammāni upacinanto imasmiṃ buddhuppāde vesāliyaṃ licchavirājakule nibbatti, **vaḍḍhamānotissa** nāmaṃ ahosi. So vayappatto saddho pasanno dāyako dānarato kārako saṅghupaṭṭhāko hutvā tathārūpe aparādhe satthārā pattanikkujjanakamme kārapite aggim akkanto viya saṅghaṃ khamāpetvā kammaṃ paṭippassambhetvā sañjātasamvego pabbaji, pabbajitvā pana thinamidhābhībhūto vihāsi. Taṃ satthā samvejento “**sattiyā viya omaṭṭho**”ti gāthaṃ abhāsi.

40. Tattha **bhavarāgappahānāyāti** bhavarāgassa rūparāgassa arūparāgassa ca pajahanatthāya. Yadipi ajjhattasamyojanāni appahāya bahiddhasamyojanānaṃ pahānaṃ nāma natthi, nānantarikabhāvato pana uddhambhāgiyasamyojanappahānavacanena orambhāgiyasamyojanappahānampi vuttameva hoti. Yasmā vā samucchinnorambhāgiyasamyojanānampi kesañci ariyānaṃ uddhambhāgiyasamyojanāni duppaheyyāni honti, tasmā suppaheyyato duppaheyyameva dassento bhagavā bhavarāgappahānasīsena sabbassāpi uddhambhāgiyasamyojanassa pahānamāha. Therassa eva vā ajjhāsayasavasevaṃ vuttaṃ. Sesam vuttanayameva.

Vaḍḍhamānattheragāthāvaṇṇanā niṭṭhitā.

Catutthavaggavaṇṇanā niṭṭhitā.

5. Pañcamavaggo

1. Sirivaḍḍhattheragāthāvaṇṇanā

Vivaramanupatanti vijjutāti āyasmato sirivaḍḍhattherassa gāthā. Kā uppatti? Sopi purimabuddhesu katādhikāro tattha tattha vivaṭṭūpanissayaṃ kusalaṃ upacinanto ito ekanavute kappe vipassissa bhagavato kāle kulagehe nibbattitvā viññutaṃ patto vipassim bhagavantaṃ passitvā kiñkaṇipuppehi pūjaṃ katvā tena puññakamma devaloke nibbatta aparāparaṃ puññāni katvā sugatīsuyeva saṃsaranto imasmiṃ buddhuppāde rājagahe vibhavasampannassa brāhmaṇassa gehe

nibbatti, **sirivaḍḍhotissa** nāmaṃ ahoṣi. So vayappatto bimbisārasamāgame satthari saddhamme ca uppannappasādo hetusampannatāya pabbaji. Pabbajitvā ca katapubbakicco vebhārapaṇḍavapabbatānaṃ avidūre aññatarasmim̐ araññāyatane pabbataguhāyaṃ kammaṭṭhānamanuyutto viharatī. Tasmiṃca samaye mahā akālamegho uṭṭhahi. Vijjullatā pabbatavivaraṃ pavisantiyo viya vicaranti. Therassa ghammapariḷāhābhībūtassa sāragabbhehi meghavātehi ghammapariḷāho vūpasamī. Utusappāyalābhena cittaṃ ekaggaṃ ahoṣi. Samāhitacitto vipassanaṃ usukkāpetvā arahattaṃ pāpuṇi. Tena vuttaṃ **apadāne** (apa. thera 1.21.10-14) –

“Kañcanagghiyasaṅkāso, sabbaññū lokanāyako;
Odakaṃ dahamoggayha, sināyi aggapuggalo.

“Paggayha kiṅkaṇim̐ pupphaṃ, vipassissābhiropayim̐;
Udagacitto sumano, dvipadindassa tādino.

“Ekanavutito kappe, yaṃ pupphamabhiropayim̐;
Duggatiṃ nābhijānāmi, buddhapūjāyidaṃ phalaṃ.

“Sattavīsaticappamhi, rājā bhīmaratho ahu;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā aññāpadesena attasannissayaṃ udānaṃ udānento “**vivaramanupatanti vijjutā**”ti gāthaṃ abhāsi.

41. Tattha **vivaranti** antarā vemajjhaṃ. **Anupatantī** anulakkhaṇe patanti pavattanti, vijjotantī attho. Vijjotanameva hi vijjullatānaṃ pavatti nāma. **Anu**-saddayogena cettha upayogavacanaṃ, yathā “rukkhamanuvijjotanti”ti. **Vijjutā**ti sateratā. **Vebhārassa ca paṇḍavassa cāti** vebhārapabbatassa ca paṇḍavapabbatassa ca vivaramanupatantī yojanā. **Nagavivaragato**ti nagavivaraṃ pabbataguhāṃ upagato. **Jhāyatī**ti ārammaṇūpanijjhānena lakkhaṇūpanijjhānena ca jhāyatī, samathavipassanaṃ usukkāpento bhāveti. **Putto appaṭimassa tādino**ti sīlakkhandhādiddhammakāyasampattiyā rūpakāyasampattiyā ca anupamassa upamārahitassa iṭṭhāniṭṭhādīsū tādilakkhaṇasampattiyā tādino buddhassa bhagavato orasaputto. Puttavacaneva cettha therena satthu anujātabhāvadīpanena aññā byākatāti veditabbaṃ.

Sirivaḍḍhattheragāthāvaṇṇanā niṭṭhitā.

2. Khadiravaniyattheragāthāvaṇṇanā

Cāle upacāleti āyasmato khadiravaniyarevatattherassa gāthā. Kā uppati? Ayaṃ kira padumuttarassa bhagavato kāle haṃsavatīnagare titthanāvīkakuḷe nibbattitvā mahāgaṅgāya payāgatitthe titthanāvīkammaṃ karonto ekadivasaṃ sasāvakaṅghaṃ bhagavantaṃ gaṅgātīraṃ upagataṃ disvā pasannamānaso nāvāsaṅghātaṃ yojetvā mahantena pūjāsakkārena paratīraṃ pāpetvā aññataraṃ bhikkhuṃ satthārā āraññakānaṃ aggaṭṭhāne ṭhapiyamānaṃ disvā tadatthaṃ patthanaṃ paṭṭhapetvā bhagavato bhikkhusaṅghassa ca mahādānaṃ pavattesi. Bhagavā ca tassa patthanāya avajjhabhāvaṃ byākāsi. So tato paṭṭhāya tattha tattha vivaṭṭūpanissayaṃ kusalaṃ katvā devamanussesu saṃsaranto imasmim̐ buddhuppāde magadharatthe nālakagāme rūpasāriyā brāhmaṇiyā kucchismim̐ nibbatti. Taṃ vayappattaṃ mātāpitaro gharabandhanena bandhitukāmā jātā. So sārīputtattherassa pabbajitabhāvaṃ sutvā “mayhaṃ jeṭṭhabhātā ayyo upatisso imaṃ vibhavaṃ chaḍḍetvā pabbajito, tena vantaṃ khelapiṇḍaṃ kathāhaṃ pacchā gilissāmi”ti jātasaṃvego pāsaṃ anupagacchanakamigo viya nātāke vañcetvā hetusampattiyā codiyamāno bhikkhūnaṃ santikaṃ gantvā dhammasenāpatino kaniṭṭhabhāvaṃ nivedetvā attano pabbajjāya chandaṃ ārocesi. Bhikkhū taṃ pabbājetvā paripuṇṇavāsativassaṃ

upasampādetvā kammaṭṭhāne niyojesuṃ. So kammaṭṭhānaṃ gahetvā khadiravanaṃ pavisitvā,
 “arahattaṃ patvā bhagavantaṃ dhammasenāpatiṅca passissāmi”’ti ghaṭento vāyamanto ñāṇassa
 paripākagataṭṭā nacirasseva chaḷabhiñño ahoṣi. Tena vuttaṃ **apadāne** (apa. therā 1.1.628-643) –

“Gaṅgā bhāgīrathī nāma, himavantā pabhāvitā;
 Kutitthe nāviko āsiṃ, orime ca tariṃ ahaṃ.

“Padumuttaro nāyako, sambuddho dvipaduttamo;
 Vasīsatasahasseehi, gaṅgātīramupāgato.

“Bahū nāvā samānetvā, vaḍḍhakīhi susaṅkhatā;
 Nāvāya chadanaṃ katvā, paṭimāniṃ narāsabhaṃ.

“Āgantvāna ca sambuddho, ārūhi taṅca nāvakaṃ;
 Vārimajjhe ṭhito satthā, imā gāthā abhāsatha.

“Yo so tāresi sambuddhaṃ, saṅghaṅcāpi anāsavaṃ;
 Tena cittappasādena, devaloke ramissati.

“Nibbattissati te byamaṃ, sukataṃ nāvasaṅṭhitaṃ;
 Ākāse pupphachadanaṃ, dhārayissati sabbaḍā.

“Aṭṭhapaññāsakappamhi, tāraṅko nāma khattiyō;
 Cāturanto vijitāvī, cakkavattī bhavissati.

“Sattapaññāsakappamhi, cammako nāma khattiyō;
 Uggacchantova sūriyo, jotissati mahabbalo.

“Kappasatasahasamhi, okkākakulasambhavo;
 Gotamo nāma gottena, satthā loke bhavissati.

“Tidasā so cavitvāna, manussattaṃ gamissati;
 Revato nāma nāmena, brahmabandhu bhavissati.

“Agārā nikkhamitvāna, sukkamūlena codito;
 Gotamassa bhagavato, sāsane pabbajissati.

“So pacchā pabbajitvāna, yuttayogo vipassako;
 Sabbāsava pariññāya, nibbāyissatināsavo.

“Vīriyaṃ me dhuradhorayaṃ, yogakkhemādhivāhanaṃ;
 Dhāremi antimaṃ dehaṃ, sammāsambuddhasāsane.

“Satasahassee kataṃ kammaṃ, phalaṃ dassesi me idha;
 Sumutto saravegova, kilese jhāpayī mama.

“Tato maṃ vananirataṃ, disvā lokantaḡū muni;
 Vanavāsibhikkhūnaggaṃ, paññapesi mahāmati.

“Kilesā jhāpitā mayhaṃ...pe... kataṃ buddhassa sāsana’nti.

Chaḷabhiñño pana hutvā thero satthāraṃ dhammasenāpatiñca vanditūṃ senāsanāṃ saṃsāmetvā pattacīvaramādāya anupubbena sāvattiṃ patvā jetavanāṃ pavisitvā satthāraṃ dhammasenāpatiñca vanditvā katipāhaṃ jetavane vihāsi. Atha naṃ satthā ariyagaṇamajjhe nisinno āraññakānaṃ bhikkhūnaṃ aggaṭṭhāne ṭhapesi – “etadaggaṃ, bhikkhave, mama sāvakānaṃ bhikkhūnaṃ āraññakānaṃ yadidaṃ revato khadiravaniyo”ti (a. ni. 1.198, 203). So aparabhāge attano jātagāmaṃ gantvā “cālā, upacālā, sīsūpacālā”ti tissannaṃ bhaginīnaṃ putte “cālā, upacālā, sīsūpacālā”ti tayo bhāgineyye ānetvā pabbājetvā kammaṭṭhāne niyojesi. Te kammaṭṭhānaṃ anuyuttā viharanti. Tasmañca samaye therassa kocideva ābādho uppanno. Taṃ sutvā sārīputtatthero revataṃ “gilānapucchanaṃ adhigamapucchanañca karissāmī”ti upagacchi. Revatatthero dhammasenāpatiṃ dūrato va āgacchantaṃ disvā tesāṃ sāmaṇeraṇaṃ satuppādanavasena ovaḍanto “**cāle upacāle**”ti gāthaṃ abhāsi.

42. Tattha **cāle upacāle sīsūpacāle**ti tesāṃ ālapanāṃ. “Cālā, upacālā, sīsūpacālā”ti hi itthilīṅgavasena laddhanāmā te tayo dārakā pabbajitāpi tathā voharīyanti. “Cālī, upacālī, sīsūpacālī”ti tesāṃ nāma”nti ca vadanti. Yadatthaṃ “cālā”tiādīnā āmantanaṃ kataṃ, taṃ dassento “**patissatā nu kho viharathā**”ti vatvā tattha kāraṇamāha “**āgato vo vālaṃ viya vedhī**”ti. **Patissatā**ti patissatikā. **Khoti** avadhāraṇe. **Āgatoti** āgacchi. **Voti** tumhākaṃ. **Vālaṃ viya vedhī**ti vālavedhī viya, ayañhettha saṅkhepattho – tikkhājavananibbedhikapaññatāya vālavedhirūpo satthukappo tumhākaṃ mātulatthero āgato, tasmā samaṇasaññaṃ upaṭṭhapetvā satisampajaññayuttā eva hutvā viharatha, “yathādhigate vihāre appamattā bhavathā”ti.

Taṃ sutvā te sāmaṇerā dhammasenāpatissa paccuggamanādivattaṃ katvā ubhinnaṃ mātulattherānaṃ paṭisanthāraṃ nātidūre samādhimā samāpajjitvā nisīdiṃsu. Dhammasenāpati revatattherena saddhimā paṭisanthāraṃ katvā uṭṭhāyāsanaṃ te sāmaṇere upasaṅkami, te tathākālaparicchedassa katattā there upasaṅkamante eva uṭṭhahitvā vanditvā aṭṭhaṃsu. Thero “katarakataravihārena viharathā”ti pucchitvā tehi “imāya imāyā”ti vutte “dārakepi nāma evaṃ vinento mayhaṃ bhātiko paccapādi vata dhammassa anudhamma”nti therāṃ pasaṃsanto pakkāmi.

Khadiravaniyattheragāthāvaṇṇanā niṭṭhitā.

3. Sumaṅgalattheragāthāvaṇṇanā

Sumuttikoti āyasmato sumaṅgalattherassa gāthā. Kā uppatti? Sopi purimabuddhesu katādhikāro tattha tattha bhava vivaṭṭūpanissayaṃ puññaṃ upacinanto siddhatthassa bhagavato kāle rukkadevatā hutvā nibbatti. So ekadivasāṃ satthāraṃ nhāyitvā ekacīvaraṃ ṭhitaṃ disvā somanassappatto hutvā apphoṭesi. So tena puññaṃ kammena devamanussesu saṃsaranto imasmimā buddhuppāde sāvattiyā avidūre aññatarasmimā gāmake tādīsena kammanissandena daliddakule nibbatti. Tassa **sumaṅgaloti** nāmaṃ ahoṣi. So vayappatto khujjakāsitanāṅgalakuddālaparikkhāro hutvā kasiyā jīvati. So ekadivasāṃ raññā pasenadikosalena bhagavato bhikkhusaṅghassa ca mahādāne pavattiyamāne dānopakaraṇāni gahetvā āgacchantehi manussehi saddhimā dadhighaṭṭhaṃ gahetvā āgato bhikkhūnaṃ sakkārasammānaṃ disvā “ime samaṇā sakyaputtiyā sukhumavattasunivatthā subhojanāni bhūñjitvā nivātesu senāsanesu viharanti, yaṃnūnāhampi pabbajeyya”nti cintetvā, aññataraṃ mahātheraṃ upasaṅkamitvā attano pabbajjādhippāyaṃ nivedesi. So taṃ karuṇāyanto pabbājetvā kammaṭṭhānaṃ ācikkhi. So araññe viharanto ekavihāre nibbinno ukkaṇṭhito hutvā, vibbhamitukāmo nātigāmaṃ gacchanto antarāmagge kacchaṃ bandhitvā khettaṃ kasante kilīṭṭhavatthanivatthe samantato rajokīṇṇasarīre vātāpapa phussante kassake disvā, “mahantaṃ vatime sattā jīvikanimittaṃ dukkhaṃ paccanubhontī”ti saṃvegaṃ paṭilabhi. Nāṇassa paripākaṃ gatattā yathāgahitaṃ kammaṭṭhānaṃ upaṭṭhāsi. So aññataraṃ rukkhamūlaṃ upagantvā vivekaṃ labhitvā yoniso manasikaronto vipassanaṃ vadḍhetvā maggapaṭipāṭiyā arahattaṃ pāpuṇi. Tena vuttaṃ **apadāne** (apa. thera 1.12.11-19) –

“Atthadassī jinavaro, lokajetṭho narāsabho;
Vihārā abhinikkhamma, taḷākaṃ upasaṅkami.

“Nhātvā pitvā ca sambuddho, uttaritvekakīvaro;
Aṭṭhāsi bhagavā tattha, vilokento disodisaṃ.

“Bhavane upaviṭṭhoḥaṃ, addasaṃ lokanāyakaṃ;
Haṭṭho haṭṭhena cittaṇa, apphoṭesiṃ ahaṃ tadā.

“Sataṃsiṃva jotantaṃ, pabhāsantaṃva kañcanaṃ;
Naccagīte payuttoḥaṃ, pañcaṅgatūriyamhi ca.

“Yaṃ yaṃ yonupapajjāmi, devattaṃ atha mānusaṃ;
Sabbe satte abhibhomi, vipulo hoti me yaso.

“Namo te purisājañña, namo te purisuttama;
Attānaṃ tosayitvāna, pare tosesi tvaṃ muni.

“Pariggāhe nisīditvā, hāsaṃ katvāna subbate;
Upaṭṭhahitvā sambuddhaṃ, tusitaṃ upapajjahaṃ.

“Soḷaseto kappasate, dvinavaekacintitā;
Sattaratanasampannā, cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā sampattiṃ attano dukkhavimuttiṃca kittanavasena udānaṃ udānento
“**sumuttiko**”tiādīmāha.

43. Tattha **sumuttikoti** sundarā accantikātāya apunabbhaviṃkā mutti etassāti sumuttiko. Tassa pana vimuttiyā pāsamsiyatāya acchariyatāya ca apphoṭento āha “**sumuttiko**”ti. Puna tattha vimuttiyaṃ attano pasādassa daḷhabhāvaṃ dassento “**sāhu sumuttikomhi**”ti āha. “Sādhu suṭṭhu muttiko vatamhi”ti attho. “Kuto panāyaṃ sumuttikatā”ti? Kāmañcāyaṃ thero sabbasmāpi vaṭṭadukkhatto suvimutto, attano pana tāva upaṭṭhitaṃ ativiya anīṭṭhabhūtaṃ dukkhaṃ dassento “**tīhi khujjakehi**”tiādīmāha. Tattha **khujjakehīti** khujjasabhāvehi, khujjākārehi vā. Nissakkavacanañcetam muttasaddāpekkhāya. Kassako hi akhujjopi samāno tīsu ṭhānesu attānaṃ khujjaṃ katvā dasseti lāyane kasane kuddālakamme ca. Yo hi pana kassako lāyanādīni karoti, tānipi asitādīni kuṭīlakārato khujjakānīti vuttaṃ “**tīhi khujjakehī**”ti.

Idāni tāni sarūpato dassento “**asitāsu mayā, naṅgalāsu mayā, khuddakuddālāsu mayā**”ti āha. Tattha **asitāsu mayāti** lavittehi mayā muttanti attho. Nissakke cetam bhumavacanaṃ. Sesesupi eseve nayo. Apare pana “**asitāsu mayāti** lavittehi karaṇabhūtehi mayā khujjita”nti vadanti. Tesam matena karaṇatthe hetumhi vā bhumavacanaṃ. “**Naṅgalāsū**”ti liṅgavipallāsaṃ katvā vuttaṃ, naṅgalehi kasirehīti attho. Attanā vaḷañjitakuddālāssa sabhāvato vaḷañjanena vā appakatāya vuttaṃ “**khuddakuddālāsū**”ti “**kuṇṭhakuddālāsū**”tipi pāḷi. Vaḷañjaneneva atikhiṇakhaṇittesūti attho. **Idhamevāti** ma-kāro padasandhikaro. **Atha vāpīti vā**-saddo nipātamattaṃ. Gāmake ṭhitattā tāni asitādīni kiñcāpi idheva mama samīpeyeve, tathāpi alameva hotīti attho. Turitavasena cetam āmedītavacanaṃ. **Jhāyāti** phalasaṃpattijjhānavasena diṭṭhadhammasukhavihāratthaṃ dibbavihārādivasena ca jhāya. **Sumaṅgalāti** attānaṃ ālapati. Jhāne pana ādaradassanattaṃ āmedītaṃ kataṃ. **Appamatto viharāti** satipaññāvepullappattiyā sabbatthakameva appamattosi tvaṃ, tasmā idāni sukhaṃ vihara, sumaṅgala. Keci pana “arahattaṃ appatvā eva vipassanāya vīthipaṭipannāya sāsane sañjātābhiratiyā yathānubhūtaṃ gharāvāsadukkhaṃ jigucchanto thero imaṃ gāthaṃ vatvā pacchā vipassanaṃ vaḍḍhetvā arahattaṃ pāpuṇī”ti vadanti. Tesam matena “**jhāya appamatto viharā**”ti padānaṃ attho vipassanāmaggavasenapi yujjati eva.

Sumaṅgalattheragāthāvaṇṇanā niṭṭhitā.

4. Sānuttheragāthāvaṇṇanā

Matam vā amma rodantiti āyasmato sānuttherassa gāthā. Kā uppatti? Sopi purimabuddhesu katādhikāro tattha tattha bhava vivaṭṭūpanissayaṃ puññaṃ upacinanto ito catunavute kappe siddhatthassa bhagavato hatthapādadhovanamukhavikkhālanānaṃ atthāya udakaṃ upanesi. Sathā hi bhojanakāle hatthapāde dhovitukāmo ahosi. So satthu ākāraṃ sallakkhetvā udakaṃ upanesi. Bhagavā hatthapāde dhovitvā bhuñjitvā mukhaṃ vikkhāletukāmo ahosi. So tampi ñatvā mukhodakaṃ upanesi. Sathā mukhaṃ vikkhāletvā mukhadhovanakiccaṃ niṭṭhāpesi. Evaṃ bhagavā anukampaṃ upādāya tena kariyamaṇaṃ veyyāvaccam sādīyi. So tena puññakammena devaloke nibbattivā aparāparaṃ puññaṃ katvā devamanussesu saṃsāranto imasmim buddhuppāde sāvattiyam aññatarassa upāsakassa gehe paṭisandhiṃ gaṇhi. Tasmim gabbhagateyeva pitā pavāsaṃ gato, upāsikā dasamāsaccayena puttaṃ vijāyitvā **sānū**tissa nāmaṃ akāsi. Tasmim anukkamena vaḍḍhante sattavassikaṃyeva naṃ bhikkhūnaṃ santike pabbājesi, “evamayaṃ anantarāyo vaḍḍhitvā accantasukhabhāgī bhavissati”ti. “So sānusāmaṇero”ti paññāto paññavā vattasampanno bahussuto dhammakathiko sattesu mettajjhāsayo hutvā devamanussānaṃ piyo ahosi manāpoti sabbaṃ sānusutte āgatanayena veditabbaṃ.

Tassa atītajātiyaṃ mātā yakkhayoniyam nibbatti. Taṃ yakkhā “sānuttherassa ayaṃ mātā”ti garucittikārabahulā hutvā mānenti. Evaṃ gacchante kāle puthujjanabhāvassa ādīnavam vibhāventam viya ekadivasam sānussa yoniso manasikārābhāvā ayoniso ummujjantassa vibbhamitukāmatācittam uppajji. Taṃ tassa yakkhinimātā ñatvā manussamātuyā ārocesi – “tava putto, sānu, ‘vibbhamissamī’ti cittaṃ uppādesi, tasmā tvam –

“Sānuṃ pabuddham vajjāsi, yakkhānaṃ vacanaṃ idaṃ;
Mākāsi pāpakaṃ kammaṃ, āvi vā yadi vā raho.

“Sace tvam pāpakaṃ kammaṃ, karissasi karosi vā;
Na te dukkhā pamutyatthi, uppaccāpi palāyato”ti. (saṃ. ni. 1.239; dha. pa. aṭṭha. 2.325 sānusāmaṇeravatthu) –

Evaṃ bhaṇāhi”ti. Evañca pana vatvā yakkhinimātā tatthevantaradhāyi. Manussamātā pana taṃ sutvā paridevasokasamāpannā cetodukkhasamappitā ahosi. Atha sānusāmaṇero pubbaṇhasamayaṃ nivāsetvā pattacīvaramādāya mātu santikaṃ upagato mātaraṃ rodamaṇaṃ disvā “amma, kiṃ nissāya rodasi”ti vatvā “taṃ nissāya”ti ca vutto mātu “**matam vā, amma, rodanti, yo vā jīvam na dissati**”ti gātham abhāsi.

44. Tassattho – “**amma**, rodantā nāma ñātakā mittā vā attano ñātakam mittam vā **matam** uddissa **rodanti** paralokam gatattā, **yo vā** ñātakā mitto vā **jīvam** jīvanto desantaram pakkantatāya ca **na dissati**, taṃ vā uddissa rodanti, ubhayampetaṃ mayi na vijjati, evaṃ sante **jīvantam** dharamānaṃ **mam** purato ṭhitam **passanti; kasmā, amma, rodasi?**Maṃ uddissa tava rodanassa kāraṇameva natthi”ti.

Taṃ sutvā tassa mātā “maraṇañhetam, bhikkhave, yo sikkham paccakkhāya hīnāyāvattati”ti (ma. ni. 3.63) suttapadānusārena uppabbajanaṃ ariyassa vinaye maraṇanti dassenti –

“Matam vā putta rodanti, yo vā jīvam na dissati;
Yo ca kāme cajitvāna, punarāgacchate idha.

“Taṃ vāpi putta rodanti, puna jīvam mato hi so;
Kukkuḷā ubbhato tāta, kukkuḷam patitumicchasi”ti. (saṃ. ni. 1.239; dha. pa. aṭṭha. 2.sānusāmaṇeravatthu) –

Gāthādvayaṃ abhāsi.

Tattha **kāme cajjivānā**ti nekkhammajjhāsayaena vatthukāme pahāya, tañca kilesakāmassa tadaṅgappahānavasena veditabbaṃ. Pabbajjā hettha kāmapariccāgo adhippeto. **Punarāgacchate idhāti** idha gehe punadeva āgacchati, hīnāyāvattanaṃ sandhāya vadati. **Taṃ vāpī**ti yo pabbajjivā vibbhamati, taṃ vāpi puggalaṃ mataṃ viyamādisiyo rodanti. Kasmāti ce? **Puna jīvaṃ mato hi** soti vibbhamanato pacchā yo jīvanto, so guṇamaraṇena atthato matoyeva. Idānissa savisesasaṃvegaṃ janetuṃ **“kukkuḷā”**tiādi vuttaṃ. Tassattho – “ahorattaṃ ādittaṃ viya hutvā ḍhanaṭṭhena kukkuḷanirayasadisattā **kukkuḷā** gihibhāvā anukampantiyā mayā **ubbhato** uddhato, **tāta** sānu, **kukkuḷaṃ patituṃ icchasi** patitukāmosī”ti.

Taṃ sutvā sānusāmaṇero saṃvegaḷāto hutvā vipassanaṃ paṭṭhapetvā nacirasseva arahattaṃ pāpuṇi. Tena vuttaṃ **apadāne** (apa. therā 1.21.25-29) –

“Bhuñjantaṃ samaṇaṃ disvā, vipasannamanāvilaṃ;
Ghaṭenodakamādāya, siddhatthassa adāsahaṃ.

“Nimmalo homahaṃ ajja, vimalo khīṇasaṃsayo;
Bhave nibbattaṃānassa, phalaṃ nibbattate subhaṃ.

“Catunnavutito kappe, udakaṃ yamadāsahaṃ;
Duggatiṃ nābhijānāmi, dakadānassidaṃ phalaṃ.

“Ekasaṭṭhimhito kappe, ekova vimalo ahu;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā thero imissā gāthāya vasena “mayhaṃ vipassanārambho arahattappatti ca jātā”ti udānavasena tameva gāthaṃ paccudāhāsi.

Sānuttheragāthāvaṇṇanā niṭṭhitā.

5. Ramaṇīyavihārittheragāthāvaṇṇanā

Yathāpi bhaddo ājaññoti āyasmato ramaṇīyavihārittherassa gāthā. Kā uppatti? Sopi purimabuddhesu katādhikāro tattha tattha puññāni upacinanto ito ekanavute kappe vipassiṃ bhagavantaṃ disvā pasannamānaso pañcapaṭṭhitena vanditvā koraṇḍapupphehi pūjaṃ akāsi. So tena puññakamma devesu nibbattitvā aparāparaṃ puññāni katvā devamanussesu saṃsaranto imasmiṃ buddhuppāde rājagahe aññatarassa seṭṭhissa putto hutvā nibbatta yobbanamadena kāmesu mucchaṃ āpanno viharati. So ekadivasam aññataram pāradārikaṃ rājapurisehi vividhā kammakāraṇā karīyamānaṃ disvā saṃvegaḷāto satthu santike dhammaṃ sutvā pabbaji. Pabbajito ca rāgacaritatāya niccakālaṃ susammaṭṭhaṃ pariveṇaṃ sūpaṭṭhitaṃ pānīyaparibhojanīyaṃ supaññataṃ mañcapīṭhaṃ katvā viharati. Tena so **ramaṇīyavihārī**veva paññāyittha.

So rāgussannatāya ayoniso manasi karitvā sañcetanikaṃ sukkavissaṭṭhiāpattiṃ āpajjitvā, “dhiratthu, maṃ evaṃbhūto saddhādeyyaṃ bhuñjeyya”nti vipaṭṭisārī hutvā “vibbhamissāmī”ti gacchanto antarāmagge rukkhamaṇe nisīdi, tena ca maggena sakaṭesu gacchantesu eko sakaṭayutto goṇo parissamanto visamaṭṭhāne khalitvā pati, taṃ sakaṭikā yugato muñcitvā tiṇodakaṃ datvā parissamaṃ vinodetvā punapi dhure yojetvā agamaṃsu. Thero taṃ disvā – “yathāyaṃ goṇo sakiṃ khalitvāpi uṭṭhāya sakiṃ dhuraṃ vahati, evaṃ mayāpi kilesavasena sakiṃ khalitenāpi vuṭṭhāya samaṇadhammaṃ kātuṃ vaṭṭati”ti yoniso ummujjanto nivattitvā upālittherassa attano pavattiṃ ācikkhitvā tena

vuttavidhinā āpattito vuṭṭhahitvā sīlaṃ pākatikaṃ katvā vipassanaṃ paṭṭhapetvā nacirasseva arahattaṃ pāpuṇi. Tena vuttaṃ **apadāne** (apa. thera 1.21.35-39) –

“Akkantañca padaṃ disvā, cakkālaṅkārabhūsitāṃ;
Padenānupadaṃ yanto, vipassissa mahesino.

“Koraṇḍaṃ pupphitaṃ disvā, samūlaṃ pūjitaṃ mayā;
Haṭṭho haṭṭhena cittaṃ, avandiṃ padamuttamaṃ.

“Ekanavutito kappe, yaṃ pupphamabhipūjayiṃ;
Duggatiṃ nābhijānāmi, buddhapūjāyidaṃ phalaṃ.

“Sattapaññāsakappamhi, eko vītamalo ahuṃ;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā vimuttisukhaṃ anubhavanto attano pubbhāgapaṭipattiyā saddhiṃ ariyadhammādhigamanadīpaniṃ “**yathāpi bhaddo ājañño, khalitvā patitiṭṭhati**”ti gāthaṃ abhāsi.

45. Tattha **khalitvā**ti pakkhalitvā. **Patitiṭṭhati**ti patiṭṭhahati, punadeva yathāṭṭhāne tiṭṭhati. **Evanti** yathā bhaddo usabhājānīyo bhāraṃ vahanto parissamappatto visamaṭṭhānaṃ āgamma ekavāraṃ pakkhalitvā patito na tattakena dhuraṃ chaḍḍeti, thāmajavaparakkamasampannatāya pana khalitvāpi patiṭṭhati, attano sabhāveneva ṭhatvā bhāraṃ vahati, evaṃ kilesaparissamappatto kiriyāparādheṇa khalitvā taṃ khalitaṃ thāmaṃvīriyasampattitāya paṭipākatikaṃ katvā maggasammādiṭṭhiyā **dassanasampannaṃ**, tato eva **sammāsambuddhassa** savanante ariyāya jātiyā jātatāya **sāvakaṃ**, tassa ure vāyāmajanitābhijātītāya orasaṃ puttaṃ bhaddājānīyasadisakiccatāya ājānīyanti ca maṃ dhāretha upadhārethāti attho.

Ramaṇīyavihārittheragāthāvaṇṇanā niṭṭhitā.

6. Samiddhittheragāthāvaṇṇanā

Saddhāyāhaṃ pabbajitoti āyasmato samiddhittherassa gāthā. Kā uppatti? Ayampi purimabuddhesu kattādhikāro tattha tattha puññāni upacinanto ito catunavute kappe siddhatthaṃ bhagavantaṃ passitvā pasannamānaso savanāni pupphāni kaṇṇikabaddhāni gahetvā pūjesi. So tena puññakammaṇa devaloke nibbattitvā aparāparaṃ puññāni katvā sugatīsuyeva parivattento imasmiṃ buddhuppāde rājagahe kulagehe nibbatti. Tassa jātakālate paṭṭhāya taṃ kulaṃ dhanadhaññādīhi vaḍḍhi, attabhāvo cassa abhirūpo dassanīyo guṇavā itī vibhavasamiddhiyā ca guṇasamiddhiyā ca **samiddhī**veva paññāyittha. So bimbisārasamāgame buddhānubhāvaṃ disvā paṭiladdhasaddho pabbajitvā bhāvanāya yuttappayutto viharanto bhagavati tapodārāme viharante ekadivasāṃ evaṃ cintesi – “lābhā vata me satthā arahaṃ sammāsambuddho, svākkhāte cāhaṃ dhammavinaye pabbajito, sabrahmacārī ca me sīlavanto kalyāṇadhammā”ti. Tassevaṃ cintentassa uḷāraṃ pītisomanassaṃ udapādi. Taṃ asahanto māro pāpimā therassa avidūre mahantaṃ bheravasaddamakāsi, pathaviyā undriyanakālo viya ahoṣi. Thero bhagavato tamatthaṃ ārocesi. Bhagavā “māro tuyhaṃ vicakkhukammāya ceteti, gaccha, bhikkhu tattha acintetvā viharāhī”ti āha. Thero tattha gantvā viharanto nacirasseva vipassanaṃ usukkāpetvā arahattaṃ pāpuṇi. Tena vuttaṃ **apadāne** (apa. thera 1.21.30-34) –

“Kaṇikāraṃva jotantaṃ, nisinnaṃ pabbatantare;
Obhāsentaṃ disā sabbā, siddhatthaṃ narasārathiṃ.

“Dhanaṃ advejjhaṃ katvāna, usuṃ sannayahaṃ tadā;

Puppham savaṇṭam chetvāna, buddhassa abhiropayim.

“Catunnavutito kappe, yaṃ pupphamabhiropayim;
Duggatiṃ nābhijānāmi, buddhapūjāyidaṃ phalaṃ.

“Ekapaññāsito kappe, eko āsim jutindharo;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā tattheva viharantassa therassa khīṇāsavabhāvaṃ ajānanto purimanayeneva māro mahantaṃ bheravasaddaṃ akāsi. Taṃ sutvā thero abhīto acchambhī “tādisānaṃ mārānaṃ satampi sahasampi mayhaṃ lomampi na kampetī”ti aññaṃ byākaronto “**saddhāyāhaṃ pabbajito**”ti gāthaṃ abhāsi.

46. Tattha **saddhāyā**ti dhammacchandasaṃuṭṭhānāya kammaphalasaddhāya ceva ratanattayasaddhāya ca. **Ahanti** attānaṃ niddisati. **Pabbajitoti** upagato. **Agārasmāti** gehato gharāvāsato vā. **Anagāriyanti** pabbajjaṃ, sā hi yaṃkiñci kasivāññijjādikkammaṃ ‘agārassa hita’nti agāriyaṃ nāma, tadabhāvato “anagāriyā”ti vuccati. **Sati paññā ca me vuḍḍhāti** saraṇalakkhaṇā sati, pajānanalakkhaṇā paññāti ime dhammā vipassanākkhaṇato paṭṭhāya maggaṇapāṭiyā yāva arahattā me vuḍḍhā vaḍḍhitā, na dāni vaḍḍhetabbā atthi satipaññā vepullappattāti dasseti. **Cittaṅca susamāhitanti** aṭṭhasamāpattivāsena ceva lokuttarasamādhivasena ca cittaṃ me suṭṭhu samāhitaṃ, na dāni tassa samādhātappaṃ atthi, samādhi vepullappattoti dasseti. Tasmā **kāmaṃ karassu rūpānīti** pāpima maṃ uddissa yāni kānīci vippakārāni yathārucciṃ karohi, tehi pana **neva maṃ byādhayissasi** mama sarīrakampanamattampi kātuṃ na sakkhissasi, kuto cittaññathattaṃ? Tasmā tava kiriyā appaṭṭicchitapahenakaṃ viya na kiñci atthaṃ sodheti, kevalaṃ tava cittaviḥātamattaphalāti thero māraṃ tajjesi. Taṃ sutvā māro “jānāti maṃ samaṇo”ti tatthevantaradhāyi.

Samiddhittheragāthāvaṇṇanā niṭṭhitā.

7. Ujjayattheragāthāvaṇṇanā

Namo te buddha vīratthūti āyasmato ujjayattherassa gāthā. Kā uppatti? Ayampi purimabuddhesu katādhikāro tattha tattha bhava puññāni karonto ito dvānavute kappe tissaṃ bhagavantaṃ passitvā pasannamānaso kaṇikārapupphehi pūjaṃ akāsi. So tena puññakamma devaloke nibbattitvā aparāparaṃ puññāni katvā devamanussesu saṃsaranto imasmiṃ buddhuppāde rājagahe aññatarassa sottiyaabrāhmaṇassa putto hutvā nibbatti, **ujjayotissa** nāmaṃ ahoṣi. So vayappatto tiṇṇaṃ vedānaṃ pāragū hutvā tattha sāraṃ apassanto upanissayasampattiyā codiyamāno veḷuvanaṃ gantvā satthu santike dhammaṃ sutvā paṭiladdhasaddho pabbajitvā cariyānukūlaṃ kammaṭṭhānaṃ gahetvā araññe viharanto vipassanaṃ vaḍḍhetvā nacirasseva arahattaṃ pāpuṇi. Tena vuttaṃ **apadāne** (apa. thera 1.21.1-4) –

“Kaṇikāraṃ pupphitaṃ disvā, ocinitvānaṃ tadā;
Tissassa abhiropesiṃ, oghatiṇṇassa tādino.

“Dvenavute ito kappe, yaṃ pupphamabhiropayim;
Duggatiṃ nābhijānāmi, buddhapūjāyidaṃ phalaṃ.

“Pañcatimse ito kappe, aruṇapāṇīti vissuto;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā satthu santikaṃ gantvā vanditvā ekamantaṃ nisīditvā bhagavato

thomanākārena aññaṃ byākaronto “**namo te buddha vīratthū**”ti gāthaṃ abhāsi.

47. Tattha **namoti** pañamakittanaṃ. **Teti** pañamakiriyāya sampadānakittanaṃ, tuyhanti attho. **Buddha vīrāti** ca bhagavato ālapanam. Bhagavā hi yathā abhiññeyyādibhedassa atthassa abhiññeyyādibhedena sayambhūñāna anavasesato buddhattā “buddho”ti vuccati. Evaṃ pañcannampi mārānaṃ abhippamaddanavasena padahantena mahatā vīriyena samannāgatattā “vīro”ti vuccati. **Atthūti** hotu, tassa “namo”ti iminā sambandho. **Vippamuttosi sabbadhīti** sabbehi kilesehi sabbasmiñca saṅkhāragate vippamutto viṣamutto asi bhavasi, na tayā kiñci avippamuttaṃ nāma atthi, yatohaṃ **tuyhāpadāne viharaṃ, viharāmi anāsavoti** tuyhaṃ tava apadāne ovāde gatamagge paṭipatticariyāya viharaṃ yathāsatti yathābalaṃ paṭipajjanto kāmāsavādīnaṃ catunnampi āsavānaṃ supphānattā anāsavo viharāmi, tādisassa namo te buddha-vīratthūti.

Ujjayattheragāthāvaṇṇanā niṭṭhitā.

8. Sañjayattheragāthāvaṇṇanā

Yato ahanti āyasmato sañjayattherassa gāthā. Kā uppatti? Sopi purimabuddhesu katādhikāro tattha tattha vivaṭṭūpanissayaṃ puññaṃ upacinanto vipassissa bhagavato kāle mahati pūge saṃkittivasena vatthum saṅgharivā ratanattayaṃ uddissa puññaṃ karonto sayam daliddo hutvā nesam gaṇādīnaṃ puññakiriyāya byāvaṭṭo ahoṣi. Kālena kālam bhagavantaṃ upasaṅkamitvā vanditvā pasannamānaso bhikkhūnañca taṃ taṃ veyyāvaccam akāsi. So tena puññakammena devaloke nibbatta aparāparaṃ puññāni katvā sugatīsuyeva saṃsaranto imasmim buddhuppāde rājagahe vibhavasampannassa brāhmaṇassa putto hutvā nibbatti **sañjayo** nāma nāmena, so vayappatto brahmāyupokkharasātiādike abhiññāte brāhmaṇe sāsane abhippasanne disvā sañjātappasādo satthāraṃ upasaṅkami. Tassa satthā dhammaṃ desesi. So dhammaṃ sutvā sotāpanno ahoṣi. Aparabhāge pabbaji. Pabbajanto ca khuraggeyeva chaḷabhiñño ahoṣi. Tena vuttaṃ **apadāne** (apa. thera 1.10.51-55) –

“Vipassissa bhagavato, mahāpūgagaṇo ahu;
Veyyāvaccakaro āsiṃ, sabbakiccesu vāvaṭṭo.

“Deyyadhammo ca me natthi, sugatassa mahesino;
Avandiṃ satthuno pāde, vippasannena cetasā.

“Ekanavutito kappe, veyyāvaccam akāsaham;
Duggatiṃ nābhijānāmi, veyyāvaccassidaṃ phalaṃ.

“Ito ca aṭṭhame kappe, rājā āsiṃ sucintito;
Sattaratanasampanno, cakkavattī mahabbalo.

“Kilesā jhāpitā mayham...pe... katam buddhassa sāsana”nti.
Chaḷabhiñño pana hutvā aññaṃ byākaronto “**yato aham pabbajito**”ti gāthaṃ abhāsi.

48. Tattha **yato aham pabbajitoti** yato pabhuti yato paṭṭhāya aham pabbajito. Pabbajitakālato paṭṭhāya **nābhijānāmi saṅkappam, anariyam dosasaṃhitanti** rāgādidosasaṃhitam tato eva anariyam nihīnaṃ, ariyehi vā anaraṇiyatāya anariyehi araṇiyatāya ca anariyam pāpakam ārammaṇe abhūtaguṇādisaṅkappanato “saṅkappo”ti laddhanāmaṃ kāmavitakkādīmichāvitakkaṃ uppāditam nābhijānāmīti, “khuraggeyeva mayā arahattaṃ patta”nti aññaṃ byākāsi.

Sañjayattheragāthāvaṇṇanā niṭṭhitā.

9. Rāmaṇeyyakattheragāthāvaṇṇanā

Cihacihābhinaditēti āyasmato rāmaṇeyyakattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto sikhissa bhagavato kāle kulagehe nibbattitvā viññutaṃ patto bhagavantaṃ disvā pasannamānaso pupphehi pūjaṃ akāsi. So tena puññakammena devaloke nibbato aparāparaṃ puññāni katvā sugatīsu eva parivattento imasmiṃ buddhuppāde sāvattiyāṃ ibbhakule nibbattitvā vayappatto jetavanapaṭiggahaṇe sañjātappasādo pabbajitvā cariyānukūlaṃ kammaṭṭhānaṃ gahetvā araṇṇe viharati. Tassa attano sampattiyā pabbajitasāruppāya ca paṭipattiyā pāsādikabhāvato **rāmaṇeyyakotveva** samaññā ahoṣi. Athekadivasaṃ māro therāṃ bhiṃsāpetukāmo bheravasaddaṃ akāsi. Taṃ sutvā thero thirapakatitāya tena asantasanto “māro aya”nti ñatvā tattha anādaraṃ dassento “**cihacihābhinadite**”ti gāthaṃ abhāsi.

49. Tattha **cihacihābhinaditēti** cihacihāti abhiṅgaṃ pavattasaddatāya “cihacihā”ti laddhanāmānaṃ vaṭṭakānaṃ abhinādanimittaṃ, viravahetūti attho. **Sippikābhirutehi** cāti sippikā vuccanti devakā paranāmakā gelaññena chātakisadārakākārā sākhāmiḡā. “Mahākalandakā”ti keci, sippikānaṃ abhirutehi mahāviraṇehi, hetumhi cetāṃ karaṇavacanaṃ, taṃ hetūti attho. **Na me taṃ phandati cittanti** mama cittaṃ na phandati na cavati. Idaṃ vuttaṃ hoti – imasmiṃ araṇṇe viravahetu sippikābhirutahetu viya, pāpima, tava vissarakaraṇahetu mama cittaṃ kammaṭṭhānato na paripatatīti. Tattha kāraṇamāha “**ekattaniratañhi me**”ti. **Hi**-saddo hetu attho, yasmā mama cittaṃ gaṇasaṅgaṇikaṃ pahāya ekatte ekībhave, bahiddhā vā vikkhepaṃ pahāya ekatte ekaggatāya, ekatte ekasabhāve vā nibbāne nirataṃ abhirataṃ, tasmā kammaṭṭhānato na phandati na cavatīti, imaṃ kira gāthaṃ vadanto eva thero vipassanaṃ vaḍḍhetvā arahattaṃ pāpuṇi. Tena vuttaṃ **apadāne** (apa. thera 1.21.5-9) –

“Suvaṇṇavaṇṇo bhagavā, sataraṃsī patāpavā;
Caṅkamaṇaṃ samārūḷho, mettacitto sikhīsabho.

“Pasannacitto sumano, vanditvā ñāṇamuttamaṃ;
Minelapupphaṃ paggayha, buddhassa abhiropayim.

“Ekatiṃse ito kappe, yaṃ pupphamabhipūjayim;
Duggatiṃ nābhijānāmi, buddhapūjāyidaṃ phalaṃ.

“Ekūnatimsakappamhi, sumeghaghanaṇāmako;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana”nti.
Ayameva ca therassa aññābyākaraṇagāthā ahoṣi.

Rāmaṇeyyakattheragāthāvaṇṇanā niṭṭhitā.

10. Vimalattheragāthāvaṇṇanā

Dharaṇī ca siṅcati vāti āyasmato vimalattherassa gāthā. Kā uppatti? Sopi purimabuddhesu katādhikāro tattha tattha bhava vivaṭṭūpanissayaṃ kusalaṃ upacinanto vipassissa bhagavato kāle saṅkhadhamanakule nibbattitvā viññutaṃ patto tasmim sippe nipphattiṃ gato ekadivasaṃ vipassim bhagavantaṃ passitvā pasannamānaso saṅkhadhamanena pūjaṃ katvā tato paṭṭhāya kālena kālaṃ satthu upaṭṭhānaṃ akāsi. So tena puññakammena devaloke nibbattitvā aparāparaṃ puññāni katvā devamanussesu saṃsaranto kassapassa bhagavato kāle “anāgate me vimalo visuddho kāyo hotū”ti bodhirukkhaṃ gandhodakehi nhāpesi, cetiyaṅgaṇabodhiyaṅgaṇesu āsanāni dhovāpesi, bhikkhūnampi kiliṭṭhe samaṇaparikkhāre dhovāpesi.

So tato cavitvā devesu ca manussesu ca parivattento imasmiṃ buddhuppāde rājagahe ibbhakule nibbatti. Tassa mātukucchiyaṃ vasantassa nikkhamantassa ca kāyo pittasemhādīhi asaṃkiliṭṭho

padumapalāse udakabindu viya alaggo pacchimabhavikabodhisattassa viya suvisuddho ahoṣi, tenassa **vimalot**veva nāmaṃ akāṃsu. So vayappatto rājagahappavesane buddhānubhāvaṃ disvā paṭiladdhasaddho pabbajitvā kammaṭṭhānaṃ gahetvā kosalaraṭṭhe pabbataguhāyaṃ viharati. Athekadivasam cātuddīpikamahāmegho sakalaṃ cakkavāḷagabbhaṃ pattharivā pāvassi. Vivaṭṭaṭṭhāyimihi buddhānaṃ cakkavattīnañca dharamānakāle eva kira evaṃ vassati. Ghammapariḷāhavūpasamato utusappāyalābhena therassa cittaṃ samāhitaṃ ahoṣi ekaggaṃ. So samāhitacitto tāvadeva vipassanaṃ ussukkāpetvā maggapaṭipāṭiyā arahattaṃ pāpuṇi. Tena vuttaṃ **apadāne** (apa. therā 1.10.56-60) –

“Vipassissa bhagavato, ahoṣiṃ saṅkhadhammako;
Niccupaṭṭhānāyuttomhi, sugatassa mahesino.

“Upaṭṭhānaphalaṃ passa, lokanāthassa tādino;
Saṭṭhi tūriyasahassāni, parivārenti maṃ sadā.

“Ekanavutito kappe, upaṭṭhahiṃ mahāsiṃ;
Duggatiṃ nābhijānāmi, upaṭṭhānassidaṃ phalaṃ.

“Catuvīse ito kappe, mahānigghosanāmakā;
Soḷasāsimsu rājāno, cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā katakiccatāya tuṭṭhamānaso udānaṃ udānento “**dharaṇī ca siṅcati vāti māluto**”ti gāthaṃ abhāsi.

50. Tattha **dharaṇī**ti pathavī, sā hi sakalaṃ dharādharmaṃ dhāretīti “dharaṇī”ti vuccati. **Siṅcatī**ti samantato nabhaṃ pūretvā abhippavassato mahāmeghassa vuṭṭhidhārāhi siṅcati. **Vāti mālutoti** udakaphusitasammissatāya sītalo vāto vāyati. **Vijjutā carati nabheti** tattha tattha gajjatā gaḷagaḷāyatā mahāmeghato niccharantiyo sateratā ākāse ito cito ca vicaranti. **Upasamanti vitakkāti** utusappāyasiddhena samathavipassanādhigamena pubbabhāge tadanāgādivasena vūpasantā hutvā kāmavitakkādayo sabbepe nava mahāvitakkā ariyamaggādhigamena upasamanti. Anavasesato samucchijjantīti. Vattamānasamīpatāya ariyamaggakkhaṇaṃ vattamānaṃ katvā vadati. Atītatthe vā etaṃ paccuppannavacanaṃ. **Cittaṃ susamāhitaṃ mamāti** tato eva lokuttarasamādhinā mama cittaṃ suṭṭhu samāhitaṃ, na dāni tassa samādhāne kiñci kātappaṃ atthīti thero aññaṃ byākāsi.

Vimalattheragāthāvaṇṇanā niṭṭhitā.

Pañcamavaggavaṇṇanā niṭṭhitā.

6. Chaṭṭhavaggo

1. Godhikādicatuttheragāthāvaṇṇanā

Vassati devotiādikā catasso – godhiko, subāhu, valliyo, uttiyoti imesaṃ catunnaṃ therānaṃ gāthā. Kā uppatti? Imepi purimabuddhesu katādhikārā tattha tattha bhava puññāni upacinantā ito catunavute kappe siddhatthassa bhagavato kāle kulagehe nibbattitvā viññutaṃ patvā aññaṃamaññaṃ sahāyā hutvā vicariṃsu. Tesu eko siddhatthaṃ bhagavantaṃ piṇḍāya carantaṃ disvā kaṭacchubhikkhaṃ adāsi. Duttiyo pasannacitto hutvā pañcapaṭiṭṭhitena vanditvā añjaliṃ paggaṇhi. Tatiyo pasannacitto ekena pupphahatthena bhagavantaṃ pūjesi. Catuttho sumanapupphehi pūjamakāsi. Evaṃ te sathari cittaṃ pasādetvā pasutena tena puññakamma devaloke nibbattitvā puna aparāparaṃ puññāni katvā

devamanussesu saṃsaranto kassapassa bhagavato kāle kulagehe nibbattitvā sahāyakā hutvā sāsane pabbajitvā samaṇadhammaṃ katvā amhākaṃ bhagavato kāle pāvāyaṃ catunnaṃ mallarājānaṃ puttā hutvā nibbattiṃsu. Tesam **godhiko, subāhu, valliyo, uttiyoti** nāmāni akaṃsu. Aññaṃaññaṃ piyasahāyā ahesuṃ. Te kenacideva karaṇīyena kapilavatthuṃ agamaṃsu. Tasmiṃca samaye sathā kapilavatthuṃ gantvā nigrodhārāme vasanto yamakapāṭihāriyaṃ dassetvā suddhodanappamukhe sakyarājāno damesi. Tadā tepi cattāro mallarājaputtā pāṭihāriyaṃ disvā laddhappasādā pabbajitvā vipassanākammaṃ karontā nacirasseva saha paṭisambhidāhi arahattaṃ pāpuṇiṃsu. Tena vuttaṃ **apadāne** (apa. thera 1.11.1-23) –

“Suvaṇṇavaṇṇaṃ sambuddhaṃ, āhutiṇaṃ paṭiggahaṃ;
Pavarā abhinikkhantaṃ, vanā nibbanamāgataṃ.

“Kaṭacchubhikkhaṃ pādāsiṃ, siddhatthassa mahesino;
Paññāya upasantaṃ, mahāvīrassa tādino.

“Padenānupadāyantaṃ, nibbāpente mahājanaṃ;
Uḷārā vitti me jātā, buddhe ādiccabandhune.

“Catunnavutito kappe, yaṃ dānamadadiṃ tadā;
Duggatiṃ nābhijānāmi, bhikkhādānassidaṃ phalaṃ.

“Sattāsītimhito kappe, mahāreṇusanāmakā;
Sattaratanasampannā, sattete cakkavattino.

“Kilesā jhāpitā mayhaṃ...pe... kataṃ buddhassa sāsana’’nti.
Godhiko thero.

“Suvaṇṇavaṇṇaṃ sambuddhaṃ, nisabhājāniyaṃ yathā;
Tidhāpabhinnaṃ mātaṅgaṃ, kuṅjaraṃva mahesinaṃ.

“Obhāsentaṃ disā sabbā, uḷurājaṃva pūritaṃ;
Rathiyaṃ paṭipajjantaṃ, lokajetthaṃ apassahaṃ.

“Ñāṇe cittaṃ pasādetvā, paggahetvāna añjaliṃ;
Pasannacitto sumano, siddhatthamabhivādayiṃ.

“Catunnavutito kappe, yaṃ kammamakariṃ tadā;
Duggatiṃ nābhijānāmi, ñāṇasaññāyidaṃ phalaṃ.

“Tesattatimhito kappe, soḷasāsuṃ naruttamā;
Sattaratanasampannā, cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana’’nti.
Subāhutthero.

“Tivarāyaṃ nivāsīhaṃ, ahosiṃ mālika tadā;
Addasaṃ virajaṃ buddhaṃ, siddhatthaṃ lokapūjitaṃ.

“Pasannacitto sumano, pupphahatthamadāsahaṃ;
Yattha yatthupapajjāmi, tassa kammaṃ vāhasā.

“Anubhomi phalaṃ iṭṭhaṃ, pubbe sukataṃattano;
Parikkhitto sumallehi, pupphadānassidaṃ phalaṃ.

“Catunnavutito kappe, yaṃ pupphamabhiropayaṃ;
Duggatiṃ nābhijānāmi, pupphapūjāyidaṃ phalaṃ.

“Catunnavutupādāya, ṭhapetvā vattamānakaṃ;
Pañcarājasatā tattha, najjasamasanāmakā.

“Kilesā jhāpitā mayhaṃ...pe... kataṃ buddhassa sāsana’nti.
Valliyo thero.

“Siddhatthassa bhagavato, jātipupphamadāsahaṃ;
Pādesu satta pupphāni, hāsenokiritāni me.

“Tena kammenahaṃ ajja, abhibhomi narāmare;
Dhāremi antimahaṃ dehaṃ, sammāsambuddhasāsane.

“Catunnavutito kappe, yaṃ pupphamabhiropayaṃ;
Duggatiṃ nābhijānāmi, pupphapūjāyidaṃ phalaṃ.

“Samantagandhanāmāsum, terasa cakkavattino;
Ito pañcamake kappe, cāturantā janādhipā.

“Kilesā jhāpitā mayhaṃ...pe... kataṃ buddhassa sāsana’nti. (apa. thera 1.11.1-23);
Uttiyo thero.

Arahattaṃ pana patvā ime cattāropi therā loke pākaṭā paññātā rājarājamahāmattehi sakkatā garukatā hutvā araññe saheva viharanti. Athekadā rājā bimbisāro te cattāro there rājagahaṃ upagate upasaṅkamtivā vanditvā temāsaṃ vassāvāsattāya nimantetvā tesam pāṭiyekkaṃ kuṭikāyo kāretvā satisammosena na chādesi. Therā acchannāsu kuṭikāsu viharanti. Vassakāle devo na vassati. Rājā “kim nu kho kāraṇaṃ devo na vassati’nti cinto, taṃ kāraṇaṃ ñatvā, tā kuṭikāyo chādāpetvā, mattikākammaṃ cittakammañca kārapetvā, kuṭikāmaṃ karonto mahato bhikkhusaṅghassa dānaṃ adāsi. Therā rañño anukampāya kuṭikāyo pavisitvā mettāsamāpattiyo samāpajjimsu. Athuttarapācīnadisato mahāmegho uṭṭhahitvā therānaṃ samāpattito vuṭṭhānakkhaṇeyeva vassitaṃ ārabhi. Tesu godhikatthero samāpattito vuṭṭhāya saha meghagajjitena –

51. “Vassati devo yathā sugītaṃ, channā me kuṭikā sukhā nivātā;
Cittaṃ susamāhitañca mayhaṃ, atha ce patthayasi pavassa devā’nti. –

Imaṃ gāthaṃ abhāsi.

Tattha **vassatīti** siñcati vuṭṭhidhāraṃ pavecchati. **Devoti** megho. **Yathā sugītaṃ** sundaragītaṃ viya gajjantoti adhippāyo. Megho hi vassanakāle satapaṭalasahassapaṭalo uṭṭhahitvā thanayanto vijjutā nicchārentova sobhati, na kevalo. Tasmā siniddhamadhuragambhīranigghoso vassati devoti dasseti. Tena saddato anupapīlitaṃ āha “**channā me kuṭikā sukhā nivātā**’nti. Yathā na devo vassati, evaṃ tiṇādīhi chādītā ayaṃ me kuṭikā, tena vuṭṭhivassena anupapīlitaṃ āha. Paribhogasukhassa utusappāyautusukhassa ca sabbhāvato sukhā. Phusitaggaḷapihitavātapānatāhi vātaparissayarahitā. Ubhayenapi āvāsasappāyavasena anupapīlitaṃ āha. **Cittaṃ susamāhitañca mayhanti** cittañca mama suṭṭhu samāhitaṃ anuttarasamādhinā nibbānārammaṇe suṭṭhu appitaṃ, etena abbhantaraparissayābhāvato appossukkataṃ dasseti. **Atha ce patthayasīti** atha idāni patthayasi ce, yadi

icchasi. **Pavassāti** siñca udakaṃ pagghara vutt̥hidhāraṃ paveccha. **Devāti** meghaṃ ālapati.

Godhikattheragāthāvaṇṇanā niṭṭhitā.

2. Subāhuttheragāthāvaṇṇanā

52. Itarehi vuttagāthāsu tatiyapade eva viseso. Tattha subāhunā vuttagāthāyaṃ **cittaṃ susamāhitañca kāyeti** mama cittaṃ karajakāye kāyagatāsati bhāvanāvasena suṭṭhu samāhitaṃ sammadeva appitaṃ. Ayañhi thero kāyagatāsati bhāvanāvasena paṭiladdhājhānaṃ pādakaṃ katvā vipassanaṃ vaḍḍhetvā arahattaṃ pāpuṇi. Taṃ sandhāyāha “cittaṃ susamāhitañca kāye”ti.

Subāhuttheragāthāvaṇṇanā niṭṭhitā.

3. Valliyattheragāthāvaṇṇanā

53. Valliyattheragāthāyaṃ **tassaṃ viharāmi appamattoti** tassaṃ kuṭikāyaṃ appamādapaṭipattiyā matthakaṃ pāpitattā appamatto ariyavihārūpasamhitena dibbavihārādīsaṃhitena ca iriyāpathavihārena viharāmi, attabhāvaṃ pavattemīti vuttaṃ hoti.

Valliyattheragāthāvaṇṇanā niṭṭhitā

4. Uttiyattheragāthāvaṇṇanā

54. Uttiyattherena vuttagāthāyaṃ **adutiyoti** asahāyo, kilesasaṅgaṇikāya gaṇasaṅgaṇikāya ca virahitoti attho.

Uttiyattheragāthāvaṇṇanā niṭṭhitā.

Catunnaṃ therānaṃ gāthāvaṇṇanā niṭṭhitā.

5. Añjanavaniyattheragāthāvaṇṇanā

Āsandiṃ kuṭikaṃ katvāti āyasmato añjanavaniyattherassa gāthā. Kā uppatti? So kira padumuttarassa bhagavato kāle sudassano nāma mālākāro hutvā sumanapupphehi bhagavantaṃ pūjetvā aññampi tattha tattha bahuṃ puññaṃ katvā devamanussesu saṃsaranto kassapassa bhagavato sāsane pabbajitvā samaṇadhammaṃ akāsi. Atha imasmiṃ buddhuppāde vesāliyaṃ vajjirājakule nibbattitvā tassa vayappattakāle vajjiraṭṭhe avuṭṭhibhayaṃ byādhībhayaṃ amanussabhayanti tīṇi bhayāni uppajjimsu. Taṃ sabbaṃ ratanasuttavaṇṇanāyaṃ (khu. pā. aṭṭha. ratanasuttavaṇṇanā; su. ni. aṭṭha. 1.ratanasuttavaṇṇanā) vuttanayena veditabbaṃ. Bhagavati pana vesāliṃ pavitṭhe bhayesu ca vūpasantesu satthu dhammadesanāya sambahulānaṃ devamanussānaṃ dhammābhisamaye ca jāte ayaṃ rājakumāro buddhānubhāvaṃ disvā paṭiladdhasaddho pabbaji. Yathā cāyaṃ evaṃ anantaraṃ vuccamānā cattāropi janā. Tepi hi imassa sahāyabhūtā licchavirājakumārā evaṃ imināva nīhārena pabbajimsu. Kassapasambuddhakālepi sahāyā hutvā iminā saheva pabbajitvā samaṇadhammaṃ akaṃsu, padumuttarassapi bhagavato pādāmūle kusalabījaropanādiṃ akaṃsūti. Tatthāyaṃ katapubbakicco sākete añjanavane susānaṭṭhāne vasanto upakaṭṭhāya vassūpanāyikāya manussehi chaḍḍitaṃ jinṇakaṃ āsandiṃ labhitvā taṃ catūsu pāsānesu ṭhapetvā upari tiriyañca tiṇādīhi chādetvā dvāraṃ yojetvā vassaṃ upagato. Paṭhamamāseyeva ghaṭento vāyamanto arahattaṃ pāpuṇi. Tena vuttaṃ **apadāne** (apa. thera 1.11.24-28)

“Sudassanoti nāmena, mālākāro ahaṃ tadā;

Addasaṃ virajaṃ buddhaṃ, lokajetṭhaṃ narāsabhaṃ.

“Jātipupphaṃ gahetvāna, pūjayiṃ padumuttaraṃ;
Visuddhacakkhu sumano, dibbacakkhuṃ samajjhagaṃ.

“Etissā pupphapūjāya, cittassa paṇidhīhi ca;
Kappānaṃ satasahassaṃ, duggatiṃ nupapajjahaṃ.

“Soḷasāsimsu rājāno, devuttarasanāmakā;
Chattimsamhi ito kappe, cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā vimuttisukhaṃ paṭisaṃvedento samāpattito vuṭṭhāya yathāladdhaṃ sampattiṃ paccavekkhitvā pītivegena udānento “**āsandiṃ kuṭikaṃ katvā**”ti gāthaṃ abhāsi.

55. Tattha **āsandiṃ kuṭikaṃ katvā**ti āsandi nāma dīghapādaṃ caturassapīṭhaṃ, āyataṃ caturassampi atthiyeva, yattha nisīditumeva sakkā, na nipajjituṃ taṃ āsandiṃ kuṭikaṃ katvā vāsattāya heṭṭhā vuttanayena kuṭikaṃ katvā yathā tattha nisinnassa utuparissayābhāvena sukkena samaṇadhammaṃ kātuṃ sakkā, evaṃ kuṭikaṃ katvā. Etena paramukkamaṃsagataṃ senāsane attano appicchatāṃ santuṭṭhiṅca dasseti. Vuttampi cetāṃ dhammasenāpatinā –

“Pallaṅkena nisinnassa, jaṇṇukenābhivassati;
Alaṃ phāsuvihārāya, pahitattassa bhikkhuno’nti. (theragā. 985; mi. pa. 6.1.1);

Apare “āsandikuṭika’nti pāṭhaṃ vatvā “āsandippamaṇaṃ kuṭikaṃ katvā”ti atthaṃ vadanti. Aññe pana “āsananisajjādigate manusse uddissa mañcakassa upari katakuṭikā āsandi nāma, taṃ āsandiṃ kuṭikaṃ katvā”ti atthaṃ vadanti. **Oggayhāti** ogāhetvā anupavisitvā. **Añjanaṃ vananti** evaṃnāmaṃ vanāṃ, añjanavaṇṇapupphabhāvato hi añjanā vuccanti valliyo, tabbahulatāya taṃ vanāṃ “añjanavana’nti nāmaṃ labhi. Apare pana “añjanā nāma mahāgacchā”ti vadanti, taṃ añjanavanaṃ oggayha āsandikaṃ kuṭikaṃ katvā **tisso vijjā anuppattā, kataṃ buddhassa sāsana**nti viharatā mayāti vacanaseseneva yojanā. Idameva ca therassa aññābyākaraṇaṃ ahoṣīti.

Añjanavaniyattheragāthāvaṇṇanā niṭṭhitā.

6. Kuṭivihārittheragāthāvaṇṇanā

Ko kuṭikāyanti āyasmato kuṭivihārittherassa gāthā. Kā uppatti? So kira padumuttarassa bhagavato ākāseṇa gacchantassa “udakadānaṃ dassāmī”ti sītaṃ udakaṃ gahetvā pītisomanassajāto uddhammukho hutvā ukkhipi. Satthā tassa ajjhāsayaṃ ṇatvā pasādasamvaḍḍhanatthaṃ ākāse ṭhitova sampaṭicchi. So tena anappakaṃ pītisomanassaṃ paṭisaṃvedesi. Sesam añjanavaniyattherassa vatthumhi vuttasadisameva. Ayaṃ pana viṣeso – ayaṃ kira vuttanayena pabbajitvā katapubbakicco vipassanaṃ anuyuñjanto sāyaṃ khettsamīpena gacchanto deve phusāyante khettapālakassa puññaṃ tiṇakuṭiṃ disvā pavisitvā tattha tiṇasanthārake nisīdi. Nisinnamattova utusappāyaṃ labhitvā vipassanaṃ ussukkāpetvā arahattaṃ pāpuṇi. Tena vuttaṃ **apadāne** (apa. thera 1.11.29-35) –

“Suvanṇavaṇṇaṃ sambuddhaṃ, gacchantāṃ anilañjase;
Ghatāsanaṃva jalitaṃ, ādittaṃva hutāsanaṃ.

“Pāṇinā udakaṃ gayha, ākāse ukkhipiṃ ahaṃ;
Sampaṭicchi mahāvīro, buddho kāruṇiko isi.

“Antalikkhe ðhito satthā, padumuttaranāmako;
Mama saṅkappamaññāya, imā gāthā abhāsatha.

“Iminā dakadānena, pītiuppādanena ca;
Kappasatasahassampi, duggatiṃ nupapajjati.

“Tena kammaena dvipadinda, lokajeṭṭha narāsabha;
Pattomhi acalaṃ ðhānaṃ, hitvā jayaparājayaṃ.

“Sahassarājanāmena, tayo te cakkavattino;
Pañcasaṭṭhikappasate, cāturantā janādhipā.

“Kilesā jhāpitā mayhaṃ...pe... kataṃ buddhassa sāsana”’nti.

Arahattaṃ pana patvā there tatta nisinne khettaṭṭhako āgantvā “ko kuṭikāya”’nti āha. Taṃ sutvā
thero “bhikkhu kuṭikāya”’ntiādimāha. Tayidaṃ khettaṭṭhassa therassa ca vacanaṃ ekajjhaṃ katvā –

56. “Ko kuṭikāyaṃ bhikkhu kuṭikāyaṃ, vītarāgo susamāhitacitto;
Evaṃ jānāhi āvuso, amoghā te kuṭikā katā”’ti. –

Tathārūpena saṅgītiṃ āropitaṃ.

Tattha **ko kuṭikāyanti**, “imissaṃ kuṭikāyaṃ ko nisinno”’ti khettaṭṭhassa pucchāvacaṇaṃ. Tassa
bhikkhu kuṭikāyanti therassa paṭivacaṇadānaṃ. Atha naṃ attano anuttaradakkhiṇeyyabhāvato taṃ
kuṭiparibhogaṃ anumodāpetvā uḷāraṃ tameva puññaṃ patiṭṭhāpetuṃ “**vītarāgo**”’tiādi vuttaṃ.
Tassattho – eko bhinnakilesa **bhikkhu** te **kuṭikāyaṃ** nisinno, tato eva so aggamaḡgena sabbaso
samucchinnarāgatāya **vītarāgo** anuttarasamādhinā nibbānaṃ ārammaṇaṃ katvā suṭṭhu samāhitacittatāya
susamāhitacitto, imañca atthaṃ, **āvuso** khettaṭṭhapaḷa, yathāhaṃ vadāmi, **evaṃ jānāhi** saddaha
adhimuccassu. **Amoghā te kuṭikā katā** tayā katā kuṭikā amoghā avañjhā saphalā saudrayā, yasmā
arahatā khīṇāsavena paribhuttā. Sace tvaṃ anumodasi, taṃ te bhavissati dīgharattaṃ hitāya sukhāyāti.

Taṃ sutvā khettaṭṭhapaḷo “lābhā vata me, suladdhaṃ vata me, yassa me kuṭikāyaṃ ediso ayyo
pavisitvā nisīdati”’ti pasannacitto anumodanto aṭṭhāsi. Imaṃ pana tesam kathāsallāpaṃ bhagavā dībbāya
sotadhātuyā sutvā anumodanañcassa ñatvā tambhāviniṃ sampattiṃ vibhāvento khettaṭṭhapaḷaṃ imāhi
gāthāhi ajjhabhāsi –

“Vihāsi kuṭiyaṃ bhikkhu, santacitto anāsavo;
Tena kammavipākena, devindo tvaṃ bhavissasi.

“Chattiṃsakkhattuṃ devindo, devarajjaṃ karissasi;
Catuttiṃsakkhattuṃ cakkavattī, rājā raṭṭhe bhavissasi;

Ratanakuṭi nāma paccekabuddho, vītarāgo bhavissasī”’ti.

Kuṭikāyaṃ laddhavisēsattā pana therassa tato pabhuti **kuṭivihārī**veva samaññā udapādi. Ayameva
ca therassa aññābyākaraṇagāthāpi ahoṣīti.

Kuṭivihārītheragāthāvaṇṇanā niṭṭhitā.

7. Dutiyakuṭivihārītheragāthāvaṇṇanā

Ayamāhu purāṇiyāti āyasmato kuṭivihārittherassa gāthā. Kā uppatti? So kira padumuttarassa bhagavato pasannamānaso pariḷāhakāle naḷavilīvehi viracitaṃ bījanim adāsi. Taṃ satthā anumodanagāthāya sampahaṃsesi. Sesam yadettha vattabbaṃ, taṃ añjanavaniyattheravatthumhi vuttasadisameva. Ayam pana viseso – ayam kira vuttanayena pabbajitvā aññatarāya purāṇakuṭikāya viharanto samaṇadhammaṃ acintevā, “ayam kuṭikā jinṇā, aññaṃ kuṭikaṃ kātuṃ vaṭṭati” ti navakammavasena cittaṃ uppādesi. Tassa atthakāmā devatā samvegajananatthaṃ imaṃ uttānobhāsaṃ gambhīratthaṃ “**ayamāhu**” ti gāthamāha.

57. Tattha **ayanti** āsannapaccakkhavacanaṃ. **Āhūti** ahoṣīti attho. Gāthāsukhatthañhi dīghaṃ katvā vuttaṃ. **Purāṇiyāti** purātanī addhagatā. **Aññaṃ patthayase navaṃ kuṭinti** imissā kuṭiyā purāṇabhāvena jinṇatāya ito aññaṃ idāni nibbattaniyatāya navaṃ kuṭim patthayase patthesi āsīsasi. Sabbena sabbaṃ pana **āsaṃ kuṭiyā virājaya** purāṇiyaṃ viya navāyampi kuṭiyaṃ āsaṃ taṇhaṃ apekkhaṃ virājehi, sabbaso tattha virattacitto hohi. Kasmā? Yasmā **dukkhā bhikkhu puna navā** nāma **kuṭi** bhikkhu puna idāni nibbattiyamānā dukkhāvahattā dukkhā, tasmā aññaṃ navaṃ dukkhaṃ anuppādentō yathānibbattāyaṃ purāṇiyaṃyeva kuṭiyaṃ thatvā attanā katabbaṃ karohīti. Ayañhettha adhippāyo – tvaṃ, bhikkhu, “ayam purāṇī tiṇakuṭikā jinṇā” ti aññaṃ navaṃ tiṇakuṭikaṃ kātuṃ icchasi, na samaṇadhammaṃ, evaṃ icchanto pana bhāvanāya ananuyuñjanena punabbhavābhiniṇibbattiyā anativattanato āyatim attabhāvakuṭimpi patthento kātuṃ icchantoyeva nāma hoti. Sā pana navā tiṇakuṭi viya karaṇadukkheṇa tato bhiyyopi jarāmaraṇasokaparidevādidukkhasaṃsaṭṭhatāya dukkhā, tasmā tiṇakuṭiyaṃ viya attabhāvakuṭiyaṃ āsaṃ apekkhaṃ virājaya sabbaso tattha virattacitto hohi, evaṃ te vaṭṭadukkhaṃ na bhavissatīti. Devatāya ca vacanaṃ sutvā thero samvegajāto vipassanaṃ paṭṭhapetvā ghaṭento vāyamanto nacirasseva arahatte patiṭṭhāsi. Tena vuttaṃ **apadāne** (apa. thera 1.11.36-46) –

“Padumuttarabuddhassa, lokajetṭhassa tādino;
Tiṇatthare nisinnassa, upasantassa tādino.

“Naḷamālaṃ gahetvāna, bandhitvā bījanim ahaṃ;
Buddhassa upanāmesim, dvipadindassa tādino.

“Paṭiggahetvā sabbaññū, bījanim lokanāyako;
Mama saṅkappamaññāya, imaṃ gāthaṃ abhāsatha.

“Yathā me kāyo nibbāti, pariḷāho na vijjati;
Tattheva tividhaggīhi, cittaṃ tava vimuccatu.

“Sabbe devā samāgacchuṃ, ye keci vananissitā;
Sossāma buddhavacanaṃ, hāsayaṇtañca dāyakaṃ.

“Nisinno bhagavā tattha, devasaṅghapurakkhato;
Dāyakaṃ sampahaṃsento, imā gāthā abhāsatha.

“Iminā bījanidānena, cittassa paṇidhīhi ca;
Subbato nāma nāmena, cakkavattī bhavissati.

“Tena kammāvasesena, sukkamūlena codito;
Māluto nāma nāmena, cakkavattī bhavissati.

“Iminā bījanidānena, sammānavipulena ca;
Kappasatasahassampi, duggatiṃ nupapajjati.

“Tiṃsakappasahassamhi, subbatā aṭṭhatiṃsa te;

Ekūnatimsasahassee, aṭṭha mālutanāmakā.

“Kilesā jhāpitā mayhaṃ...pe... kataṃ buddhassa sāsana”nti.

Arahatte pana paṭiṭṭhito “ayaṃ me arahattappattiyā ankusabhūtā”ti tameva gāthaṃ paccudāhāsi. Sāyeva ca therassa aññābyākaraṇagāthā ahoṣi. Kuṭiovādena laddhavisessattā cassa **kuṭivihārī**veva samaññā ahoṣīti.

Dutiyakuṭivihārittheragāthāvaṇṇanā niṭṭhitā.

8. Ramaṇīyakuṭikattheragāthāvaṇṇanā

Ramaṇīyā me kuṭikāti āyasmato ramaṇīyakuṭikattherassa gāthā. Kā uppatti? Sopi kira padumuttarassa bhagavato kāle kusalaḥḥaropanāṃ katvā devamanussesu saṃsaranto ito aṭṭhārasakappasatamatthake atthadassissa bhagavato kāle kulagehe nibbattitvā viññutaṃ patto buddhārahaṃ āsanaṃ bhagavato adāsi. Pupphehi ca bhagavantaṃ pūjetvā pañcapaṭiṭṭhitena vanditvā padakkhiṇaṃ katvā pakkāmi. Sesā añjanavaniyattherassa vatthumhi vuttasadisameva. Ayaṃ pana viseso – ayaṃ kira vuttanayena pabbajitvā katapubbakicco vajjiraṭṭhe aññatarasmiṃ gāmakāvāse kuṭikāyaṃ viharati, sā hoti kuṭikā abhirūpā dassanīyā pāsādikā suparikammakatabhittibhūmikā ārāmapokkharāṇirāmaṇeyyādisampannā muttājālasadisavālikākiṇṇabhūmibhāgā therassa ca vattasampannatāya susammatthaṅgaṇatādinā bhīyosomattāya ramaṇīyatarā hutvā tiṭṭhati. So tatha viharanto vipassanaṃ paṭṭhapetvā nacirasseva arahatte paṭiṭṭhāsi. Tena vuttaṃ **apadāne** (apa. thera 1.11.47-52) –

“Kānaṃ vanamoggayha, appasaddaṃ nirākulāṃ;
Sīhāsaṇaṃ mayā dinnāṃ, atthadassissa tādino.

“Mālāhatthaṃ gahetvāna, katvā ca naṃ padakkhiṇaṃ;
Sattāraṃ payirupāsivā, pakkāmiṃ uttarāmukho.

“Tena kamma dvīpadinda, lokajettha narāsabha;
Sannibbāpemi attānaṃ, bhavā sabbe samūhatā.

“Aṭṭhārasakappasate, yaṃ dānamadadiṃ tadā;
Duggatiṃ nābhijānāmi, sīhāsanassidaṃ phalaṃ.

“Ito sattakappasate, sannibbāpakakhattiyo;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā there tatha viharante kuṭikāya ramaṇīyabhāvato vihārapekkhakā manussā tato tato āgantvā kuṭiṃ passanti. Athekadivasaṃ katipayā dhuttajātikā itthiyo tatha gatā kuṭikāya ramaṇīyabhāvaṃ disvā, “ettha vasanto ayaṃ samaṇo siyā amhehi ākaḍḍhanīyahadayo”ti adhippāyena – “ramaṇīyaṃ vo, bhante, vasanaṭṭhānaṃ. Mayampi ramaṇīyarūpā paṭhamayobbane ṭhitā”ti vatvā itthikuttādini dassetuṃ ārabhiṃsu. Thero attano vītarāgabhāvaṃ pakāsento “**ramaṇīyā me kuṭikā, saddhādeyyā manoramā**”ti gāthaṃ abhāsi.

58. Tatha **ramaṇīyā me kuṭikā**ti “ramaṇīyā te, bhante, kuṭikā”ti yaṃ tumhehi vuttaṃ, taṃ saccaṃ. Ayaṃ mama vasanaḥḥarā ramaṇīyā manuñnarūpā, sā ca kho **saddhādeyyā**, “evarūpāya manāpaṃ katvā pabbajitānaṃ dinnāya idaṃ nāma phalaṃ hotī”ti kammaphalāni saddahitvā saddhāya dhammacchandaṇa dātabbattā saddhādeyyā, na dhanena nibbattitā. Sayaṇca tathādinnāni saddhādeyyāni

passantānaṃ paribhuñjantānañca mano rametīti **manoramā**. Saddhādeyyattā eva hi manoramā, saddhādīhi deyyadhammaṃ sakkaccaṃ abhisankharitvā denti, saddhādeyyaṃca paribhuñjantā sappurisā dāyakassa avisaṃvādanatthampi payogāsayasampannā honti, na tumhehi cintitākārena payogāsaya vipannāti adhippāyo. **Na me attho kumārīhī**ti yasmā sabbaso kāmehi vinivattitamānaso ahaṃ, tasmā na me attho kumārīhi. Kappiyakāra kammavasenapi hi mādisānaṃ itthīhi payojanaṃ nāma natthi, pageva rāgavasena, tasmā na me attho kumārīhīti. Kumārīggahaṇaṃcettha upalakkhaṇaṃ daṭṭhabbaṃ. Mādisassa nāma santike evaṃ paṭipajjāhīti ayuttakārīnīhi yāva aparaddhañca tumhehi samānājjhāsayaṇaṃ purato ayaṃ kiriyā sobheyyāti dassento āha “**yesaṃ attho tahiṃ gacchatha nāriyo**”ti. Tattha **yesanti** kāmesu avītarāgānaṃ. **Atthoti** payojanaṃ. **Tahinti** tattha tesamā santikaṃ. **Nāriyoti** ālapanamā. Tamā sutvā itthiyo maṅkubhūtā pattakkhandhā āgatamaggeneva gatā. Ettha ca “na me attho kumārīhī”ti kāmehi anattikabhāvavacaneneva therena arahattaṃ byākatanti daṭṭhabbaṃ.

Ramaṇīyakuṭikattheragāthāvaṇṇanā niṭṭhitā.

9. Kosalavīhārittheragāthāvaṇṇanā

Saddhāyāhaṃ pabbajitoti āyasmato kosalavīhārittherassa gāthā. Kā uppatti? Ayampi kira padumuttarassa bhagavato kāle kusalabījāṃ ropetvā taṃ taṃ puññaṃ akāsi. Sesamā añjanavaniyattheravatthusadisameva. Ayaṃ pana viseso – ayaṃ kira vuttanayena pabbajitvā katapubbakicco kosalaratṭhe aññatarasmiṃ gāme ekaṃ upāsakakulaṃ nissāya araññe viharati, taṃ so upāsako rukkhamaṇḍale vasantaṃ disvā kuṭikaṃ kāretvā adāsi. Thero kuṭikāyaṃ viharanto āvāsasappāyena samādhānaṃ labhitvā vipassanaṃ ussukkāpetvā nacirasseva arahattaṃ pāpuṇi. Tena vuttaṃ **apadāne** (apa. therā 1.11.53-61) –

“Himavantassāvidūre, vasāmi paṇṇasanthare;
Ghāsesu gedhamāpanno, seyyasīlo cahaṃ tadā.

“Khaṇantālukalambāni, biḷālitakkalāni ca;
Kolaṃ bhallātaṃ billaṃ, āhatvā paṭiyāditāṃ.

“Padumuttaro lokavidū, āhutīnaṃ paṭiggaho;
Mama saṅkappamaññāya, āgacchi mama santikaṃ.

“Upāgataṃ mahānāgaṃ, devadevaṃ narāsabhaṃ;
Biḷāliṃ paggahevāna, pattamhi okiriṃ ahaṃ.

“Paribhuñji mahāvīro, tosayanto mamaṃ tadā;
Paribhuñjitvāna sabbaññū, imaṃ gāthaṃ abhāsatha.

“Sakaṃ cittaṃ pasādetvā, biḷāliṃ me adā tuvaṃ;
Kappānaṃ satahassaṃ, duggatiṃ nupapajjasi.

“Carimaṃ vattate mayhaṃ, bhavā sabbe samūhatā;
Dhāremi antimaṃ dehaṃ, sammāsambuddhasāsane.

“Catupaññāsito kappe, sumekhaliya savhayo;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā vimuttisukhappaṭisaṃvedanena uppannapītivegena udānento “**saddhāyāhaṃ pabbajito**”ti gāthaṃ abhāsi.

59. Tattha **saddhāyā**ti bhagavato vesāliṃ upagamane ānubhāvaṃ disvā, “ekantaniyyānikam idaṃ sāsanaṃ, tasmā addhā imāya paṭipattiyā jarāmaraṇato muccissāmī”ti uppannasaddhāvasena **pabbajito** pabbajjaṃ upagato. **Araññe me kuṭikā katāti** tassā pabbajjāya anurūpavasena araññe vasato me kuṭikā katā, pabbajjānurūpaṃ araññako hutvā vūpakaṭṭho viharāmīti dasseti. Tenāha “**appamatto ca ātāpī, sampajāno patissato**”ti. Araññavāsasaddhena kāyavivekena jāgariyaṃ anuyuñjanto tattha satiyā avippavāsena **appamatto**, āraddhavīriyatāya **ātāpī**, pubbhāgiyasatisampajaññapāripūriyā vipassanaṃ vaḍḍhetvā arahattādhigamena paññāsativepullappattiyā accantameva **sampajāno patissato** viharāmīti attho. Appamattabhāvādikittane cassa idameva aññābyākaraṇaṃ ahosi kosalaratṭhe ciranivāsibhāvena pana **kosalavihārī**ti samaññā jātāti.

Kosalavihārittheragāthāvaṇṇanā niṭṭhitā.

10. Sīvalittheragāthāvaṇṇanā

Te me ijjhimsu saṅkappāti āyasmato sīvalittherassa gāthā. Kā uppatti? Ayampi padumuttarassa bhagavato kāle heṭṭhā vuttanayena vihāraṃ gantvā parisapariyante ṭhito dhammaṃ suṇanto sathhāraṃ ekaṃ bhikkhuṃ lābhīnaṃ aggaṭṭhāne ṭhapentaṃ disvā “mayāpi anāgate evarūpena bhavituṃ vaṭṭatī”ti dasabalaṃ nimantetvā sattāhaṃ satthu bhikkhusaṅghassa ca mahādānaṃ datvā “bhagavā ahaṃ iminā adhikārakammaena aññaṃ sampattiṃ na patthemī, anāgate pana ekabuddhassa sāsane ahampi tumhehi so etadagge ṭhapitabhikkhu viya lābhīnaṃ aggo bhaveyya”nti patthanaṃ akāsi. Sathhā anantarāyaṃ disvā – “ayaṃ te patthanaṃ anāgate gotamabuddhassa santike samijjhissatī”ti byākaritvā pakkāmi. Sopi kulaputto yāvajīvaṃ kusalaṃ katvā devamanussesu saṃsāranto vipassībuddhakāle bandhumatīnagarato avidūre ekasmiṃ gāmake paṭisandhiṃ gaṇhi. Tasmīṃ samaye bandhumatīnagaravāsīno raññā saddhiṃ sākacchitvā dasabalassa dānaṃ denti. Te ekadivasaṃ sabbeva ekato hutvā dānaṃ dentā “kiṃ nu kho amhākaṃ dānamukhe natthī”ti (a. ni. aṭṭha. 1.1.207) madhuñca guḷadadhiñca na addasaṃsu. Te “yato kutoci āharissāmā”ti janapadato nagarapavisanaṃ magge purisaṃ ṭhapesuṃ. Tadā esa kulaputto attano gāmato guḷadadhivāraṃ gahetvā, “kiñcīdeva āharissāmī”ti nagaraṃ gacchanto, “mukhaṃ dhovitvā dhotatthapādo pavisissāmī”ti phāsukaṭṭhānaṃ olokento naṅgalasīsamattaṃ nimmakkhikaṃ daṇḍakamadhuṃ disvā “puññaena me idaṃ uppanna”nti gahetvā nagaraṃ pāvīsi. Nāgarehi ṭhapitapuriso taṃ disvā, “bho purisa, kassimaṃ āharasi”ti pucchi. “Na kassaci, sāmi, vikkiṇituṃ pana me idaṃ ābhata”nti. “Tena hi, bho, idaṃ kahāpaṇaṃ gahetvā etaṃ madhuñca guḷadadhiñca dehi”ti. So cintesi – “idaṃ na bahumūlaṃ, ayañca ekappahāreṇeva bahuṃ deti, vīmaṃsītuṃ vaṭṭatī”ti. Tato naṃ “nāhaṃ ekena kahāpaṇena demī”ti āha. “Yadi evaṃ dve gahetvā dehi”ti. “Dvīhipi na demī”ti. Etenupāyena vaḍḍhetvā sahaṃsaṃ pāpuṇi.

So cintesi – “atīvaḍḍhituṃ na vaṭṭatī, hotu tāva iminā kattabbakiccaṃ pucchissāmī”ti. Atha naṃ āha – “idaṃ na bahuṃ agghanakaṃ, tvañca bahuṃ desi, kena kammaena idaṃ gaṇhāsī”ti. “Idha, bho, nagaravāsīno raññā saddhiṃ paṭivirujjhītvā vipassīdasabalassa dānaṃ dentā idaṃ dvayaṃ dānamukhe apassantā pariyesanti, sace idaṃ dvayaṃ na labhissanti, nāgarānaṃ parājayo bhavissati, tasmā sahaṃsaṃ katvā gaṇhāmī”ti. “Kiṃ panetaṃ nāgarānameva vaṭṭatī, aññesaṃ dātuṃ na vaṭṭatī”ti. “Yassa kassaci dātuṃ avāritameta”nti. “Atthi pana koci nāgarānaṃ dāne ekadivasaṃ sahaṃsaṃ dātā”ti? “Natthi, sammā”ti. “Imesaṃ pana dvīnaṃ sahaṃsaṃ agghanakabhāvaṃ jānāsī”ti? “Āma, jānāmī”ti. “Tena hi gaccha, nāgarānaṃ ācikkha ‘eko puriso imāni dve mūlena na deti sahattheneva dātukāmo, tumhe imesaṃ dvīnaṃ kāraṇā nibbitakkā hothā”ti, tvaṃ pana me imasmiṃ dānamukhe jeṭṭhakabhāvassa kāyasakkhī hohī”ti. So paribbayatthaṃ gahitamāsakena pañcakaṭṭukaṃ gahetvā cuṇṇaṃ katvā dadhito kañjiyaṃ gahetvā tattha madhupaṭalaṃ pīletvā pañcakaṭṭukacuṇṇena yojetvā ekasmiṃ paduminipatte pakkhipitvā taṃ saṃvidahitvā ādāya dasabalassa avidūratṭhāne nisīdi mahājanena āhariyamānassa sakkārassa avidūre attano pattavāraṃ olokayamāno, so okāsaṃ ṇatvā satthu santikaṃ gantvā bhagavā ayaṃ uppannaduggatapaṇṇākāro, imaṃ me anukampaṃ paṭicca paṭiggaṇhathāti. Sathhā tassa anukampaṃ paṭicca catumahārājattiyena selamayapattena taṃ paṭiggahetvā yathā aṭṭhasaṭṭhiyā bhikkhusatasahaṃsassa diyyamānaṃ na khīyati, evaṃ adhiṭṭhāsī. So kulaputto niṭṭhitabhattakiccaṃ

bhagavantam abhivādetvā ekamantaṃ t̥hito āha – “diṭṭho me, bhagavā, ajja bandhumatīnagaravāsikehi tumhākaṃ sakkāro āhariyamāno, ahampi imassa kammassa nissandena nibbattanibbattabhava lābhaggayasaggappatto bhavēyya”nti (a. ni. aṭṭha. 1.1.207). Satthā, “evaṃ hotu, kulaputtā”ti vatvā tassa ca nagaravāsīnaṃca bhattānumodanaṃ katvā pakkāmi.

Sopi kulaputto yāvajīvaṃ kusalaṃ katvā devamanussesu saṃsaranto imasmiṃ buddhuppāde suppvāsāya rājadhītāya kucchimhi paṭisandhiṃ gaṇhi. Paṭisandhiggahaṇato paṭṭhāya sāyaṃ pātaṃca paṇṇākārasatāni sakaṭeṇādāya suppvāsāya upanīyanti. Atha naṃ puñṇavīmaṃsanatthaṃ hatthēna bījapacchiṃ phusāpenti. Ekekabījato salākasatampi salākasahassampi niggacchati. Ekekakarīsakhette paṇṇāsampi saṭṭhipi sakaṭappamāṇāni uppajjanti. Koṭṭhe pūraṇakālepi koṭṭhadvāraṃ hatthēna phusāpenti. Rājadhītāya puñṇēna gaṇhantānaṃ gahitagahitaṭṭhānaṃ puna pūراتi. Paripuṇṇabhattabhājanatopi “rājadhītāya puñṇā”nti vatvā yassa kassaci dentānaṃ yāva na ukkaḍḍhanti, na tāva bhattaṃ khīyati, dārake kucchigateyeva sattavassāni atikkamiṃsu.

Gabbhe pana paripakke sattāhaṃ mahādukkhaṃ anubhosi. Sā sāmikaṃ āmantetvā, “pure maraṇā jīvamānāva dānaṃ dassāmī”ti satthu santikaṃ pesesi – “gaccha, imaṃ pavattiṃ satthu ārocetvā satthāraṃ nimantehi, yaṃca satthā vadeti, taṃ sādhukaṃ upalakkhetvā āgantvā mayhaṃ kathehī”ti. So gantvā tassā sāsanaṃ bhagavato ārocesi. Satthā, “sukhinī hotu suppvāsā kolyadhītā arogā, arogaṃ puttaṃ vijāyatū”ti (udā. 18) āha. Rājā taṃ sutvā bhagavantam abhivādetvā attano gāmābhimukho pāyāsi. Tassa pure āgamanāyeva suppvāsāya kucchito dhamakaraṇā udakaṃ viya gabbho nikkhami, parivāretvā nisinnajano assumukhova hasitum āraddho tuṭṭhapahaṭṭho mahājano rañño sāsanaṃ ārocetum agamāsi.

Rājā tesam āgamaṃ disvā, “dasabalena kathitakathā nipphannā bhavissati mañṇē”ti cintesi. So āgantvā satthu sāsanaṃ rājadhītāya ārocesi. Rājadhītā tayā nimantitaṃ jīvitabhattameva maṅgalabhattaṃ bhavissati, gaccha sattāhaṃ dasabalaṃ nimantehīti. Rājā tathā akāsi. Sattāhaṃ buddhappamukhassa saṅghassa mahādānaṃ pavattayīṃsu. Dārako sabbesaṃ ṇātīnaṃ santattaṃ cittaṃ nibbāpento jātoti **sivalidārakot**vevassa nāmaṃ akaṃsu. So sattavassāni gabbhe vasitattā jātakālato paṭṭhāya sabbakammakkhamo ahoṣi. Dhammasenāpati sārīputto sattame divase tena saddhiṃ kathāsallāpaṃ akāsi. Satthāpi dhammapade gāthaṃ abhāsi –

“Yomaṃ palipathaṃ duggaṃ, saṃsāraṃ mohamaccagā;
Tiṇṇo pāraṅgato jhāyī, anejo akathaṃkathī;
Anupādāya nibbuto, tamaṃ brūmi brāhmaṇa”nti. (dha. pa. 414);

Atha naṃ thero evamāha – “kiṃ pana tayā evarūpaṃ dukkharāsiṃ anubhavitvā pabbajitum na vaṭṭatī”ti? “Labhamāno pabbajeyyaṃ, bhante”ti. Suppvāsā naṃ dārakaṃ therena saddhiṃ kathentaṃ disvā “kiṃ nu kho me putto dhammasenāpatinā saddhiṃ katheti”ti theram upasaṅkamitvā pucchi – “mayhaṃ putto tumhehi saddhiṃ kiṃ katheti, bhante”ti? “Attanā anubhūtaṃ gabbhavāsadukkhāṃ kathetvā, ‘tumhehi anuñṇāto pabbajissāmī’ti vadatī”ti. “Sādhu, bhante, pabbājetha na”nti. Thero taṃ vihāraṃ netvā tacapaṇcakakammaṭṭhānaṃ datvā pabbājento “sīvali, na tuyhaṃ añṇēna ovādena kammaṃ atthi, tayā satta vassāni anubhūtaḍḍukkameva paccavekkhāhī”ti. “Bhante, pabbājanameva tumhākaṃ bhāro, yaṃ pana mayā kātuṃ sakkā, tamaṃ jānissāmī”ti. So pana paṭhamakesavaṭṭiyā ohāraṇakkhaṇeyeva sotāpattiphale patiṭṭhāsi, dutiyāya ohāraṇakkhaṇe sakadāgāmiphale, tatiyāya anāgāmiphale sabbesaṃyeva pana kesānaṃ oropanaṃca arahattasacchikiriyā ca apacchā apurimā ahoṣi. Tassa pabbajitadivasato paṭṭhāya bhikkhusaṅghassa cattāro paccayā yāvaticchakaṃ uppajjanti. Evaṃ ettha vatthu samuṭṭhitaṃ.

Aparabhāge satthā sāvattiṃ agamāsi. Thero satthāraṃ abhivādetvā, “bhante, mayhaṃ puñṇaṃ vīmaṃsissāmi, paṅca me bhikkhusatāni dethā”ti āha. “Gaṇha sīvalī”ti. So paṅcasate bhikkhū gahetvā himavantābhimukhaṃ gacchanto aṭṭavimaggaṃ gacchati, tassa paṭhamam diṭṭhanigrodhe adhivatthā

devatā sattadivasāni dānaṃ adāsi. Iti so –

“Nigrodhaṃ paṭhamaṃ passi, dutiyaṃ paṇḍavapabbataṃ;
Tatiyaṃ aciravatiyaṃ, catutthaṃ varasāgaram.

“Pañcamaṃ himavantaṃ so, chaṭṭhaṃ chaddantupāgami;
Sattamaṃ gandhamādanaṃ, aṭṭhamaṃ atha revata’nti.

Sabbaṭṭhānesu satta satta divasāneva dānaṃ adāsu. Gandhamādanapabbate pana nāgadattadevarājā nāma sattasu divasesu ekadivase khīrapiṇḍapātaṃ adāsi, ekadivase sappipiṇḍapātaṃ. Bhikkhusaṅgho āha – “imassa devarañño neva dhenuyo dūyamānā paññāyanti, na dadhinimmathanāṃ, kuto te devarāja idaṃ uppajjati”ti. “Bhante kassapadasabalassa kāle khīrasalākabhaddadānassetāṃ phala’nti devarājā āha. Aparabhāge satthā khadiravaniyarevatassa paccuggamaṃ aṭṭhuppattiṃ katvā therāṃ attano sāsane lābhagayasaggappattānaṃ aggaṭṭhāne ṭhapesi.

Evam lābhagayasaggappattassa pana imassa therassa arahattappattiṃ ekacce ācariyā evaṃ vadanti – “heṭṭhā vuttanayena dhammasenāpatinā ovāde dinne yaṃ mayā kātuṃ sakkā, tamaḥ jānissāmīti pabbajitvā vipassanākammatṭhānaṃ gahetvā taṃ divasaṃyeva aññataraṃ vivittaṃ kuṭikaṃ disvā taṃ pavisitvā mātukucchismiṃ satta vassāni attanā anubhūtaṃ dukkhaṃ anussarivā tadanusārena atītānāgate tassa avekkhantassa ādittā viya tayo bhavā upaṭṭhahimsu. Nāṇassa paripākaṃ gatattā vipassanāvīthiṃ otari, tāvadeva maggappaṭipāṭiyā sabbe pi āsave khepento arahattaṃ pāpuṇī”ti. Ubhayathāpi therassa arahattappattiyeva pakāsītā. Thero pana pabhinnapaṭisambhido chaḷabhiñño ahoṣi. Tena vuttaṃ **apadāne** (apa. therā 1.12.31-39) –

“Varuṇo nāma nāmena, devarājā ahaṃ tadā;
Upaṭṭhahesiṃ sambuddhaṃ, sayoggabalavāhana.

“Nibbute lokanāthamhi, atthadassīnaruttame;
Tūriyaṃ sabbamādāya, agamaṃ bodhimuttamaṃ.

“Vāditeṇa ca naccena, sammatālasamāhito;
Sammukhā viya sambuddhaṃ, upaṭṭhiṃ bodhimuttamaṃ.

“Upaṭṭhahitvā taṃ bodhiṃ, dharaṇīruhapādapaṃ;
Pallaṅkaṃ ābhujitvāna, tattha kālaṅkato ahaṃ.

“Sakakammābhiraddhohaṃ, pasanno bodhimuttame;
Tena cittappasādena, nimmānaṃ upapajjahaṃ.

“Saṭṭhitūriyasahassāni, parivārenti maṃ sadā;
Manussesu ca devesu, vattamānaṃ bhavābhava.

“Tividhaggī nibbutā mayhaṃ, bhavā sabbe samūhatā;
Dhāremi antimaṃ dehaṃ, sammāsambuddhasāsane.

“Subāhū nāma nāmena, catuttiṃsāsu khattiyā;
Sattaratanasampannā, pañcakappasate ito.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā vimuttisukhapaṭisamvedanena pītivegena udānento “**te me ijjhimsu saṅkappā**”ti gāthaṃ abhāsi.

60. Tattha te me **ijjhimsu saṅkappā, yadattho pāvisiṃ kuṭiṃ, vijjāvimuttiṃ pacesanti** ye pubbe mayā kāmasaṅkappādīnaṃ samucchadakarā nekkhammasaṅkappādayo abhipatthitāyeva “kadā nu khvāhaṃ tadāyatanaṃ upasampajja viharissāmi, yadariyā etarahi upasampajja viharanti”ti, vimuttādhippāyasaññitā vimuttiṃ uddissa saṅkappā manorathā abhiṅhaso appamattā yadattho yaṃpayojano yesaṃ nipphādanatthaṃ kuṭiṃ suññāgāraṃ vipassituṃ pāvisiṃ tisso vijjā phalavimuttiṃca pacesanto, gavesanto te me ijjhimsu te sabbeva idāni mayhaṃ ijjhimsu samijjhimsu, nipphannakusalasaṅkappo paripuṇṇamanoratho jātoti attho. Tesāṃ samiddhabhāvaṃ dassetuṃ “**mānānusayamujjaha**”nti vuttaṃ. Yasmā mānānusayamujjahaṃ pajahiṃ samucchindiṃ, tasmā te me saṅkappā ijjhimsūti yojanā. Mānānusaye hi pahīne appahīno nāma anusayo natthi, arahattaṃca adhigatameva hotīti mānānusayappahānaṃ yathāvuttasaṅkappasamiddhiyā kāraṇaṃ katvā vuttaṃ.

Sīvalittheragāthāvaṇṇanā niṭṭhitā.

Chaṭṭhavaggavaṇṇanā niṭṭhitā.

7. Sattamavaggo

1. Vappattheragāthāvaṇṇanā

Passati passoti āyasmato vappattherassa gāthā. Kā uppatti? So kira padumuttarassa bhagavato kāle haṃsavatīnagare kulagehe nibbattivā viññutaṃ patto “asuko ca asuko ca thero satthu paṭhamaṃ dhammapaṭiggāhakā ahesu”nti thomanāṃ sutvā bhagavantaṃ upasaṅkamitvā patthanaṃ paṭṭhapesi – “ahampi bhagavā anāgate tādisassa sammāsambuddhassa paṭhamaṃ dhammapaṭiggāhakānaṃ aññataro bhaveyya”nti, satthu santike saraṇagamanaṃca pavedesi. So yāvajīvaṃ puññāni katvā tato cuto devamanussesu ye va saṃsaranto imasmiṃ buddhuppāde kapilavattusmiṃ vāseṭṭhassa nāma brāhmaṇassa putto hutvā nibbatti, **vappotissa** nāmaṃ ahosi. So asitena isinā “siddhatthakumāro sabbaññū bhavissati”ti byākato koṇḍaññappamukhehi brāhmaṇaputtehi saddhiṃ gharāvāsaṃ pahāya tāpasapabbajjaṃ pabbajitvā “tasmiṃ sabbaññutaṃ patte tassa santike dhammaṃ sutvā amataṃ pāpuṇissāmi”ti uruvelāyaṃ viharantaṃ mahāsattaṃ chabbassāni padhānaṃ padahantaṃ upaṭṭhahitvā oḷārikāhāraparibhogena nibbijjitvā isipatanaṃ gato. Abhisambujjhivā sathhārā sattasattāhāni vītināmetvā isipatanaṃ gantvā dhammacakke pavattite pāṭipadadivase sotāpattiphale patiṭṭhito pañcamiyaṃ pakkhassa aññāsikoṇḍaññādīhi saddhiṃ arahattaṃ pāpuṇi. Tena vuttaṃ **apadāne** (apa. thera 1.12.20-30)

“Ubhinnaṃ devarājūnaṃ, saṅgāmo samupaṭṭhito;
Ahoṣi samupabyūḷho, mahāghoso avattatha.

“Padumuttaro lokavidū, āhutaṃ paṭiggaho;
Antalikkhe ṭhito satthā, saṃvejesi mahājanaṃ.

“Sabbe devā attamaṇā, nikkhattakavacāvudhā;
Sambuddhaṃ abhivādetvā, ekaggāsiṃsu tāvade.

“Mayhaṃ saṅkappamaññāya, vācāsabhimudīrayi;
Anukampako lokavidū, nibbāpesi mahājanaṃ.

“Paduṭṭhacitto manujo, ekapāṇaṃ viheṭṭhayaṃ;
Tena cittappadosena, apāyaṃ upapajjati.

“Saṅgāmasīse nāgova, bahū pāṇe viheṭṭhayaṃ;
Nibbāpetha sakaṃ cittaṃ, mā haññittho punappunaṃ.

“Dvinnampi yakkharājūnaṃ, senā sā vimhitā ahu;
Saraṇaṅca upāgacchum, lokajetṭhaṃ sutādinam.

“Saññāpetvāna janataṃ, padamuddhari cakkhumā;
Pekkhamaṇova devehi, pakkāmi uttarāmukho.

“Paṭhamam saraṇam gacchim, dvipadindassa tādino;
Kappānam satasahassam, duggatiṃ nupapajjaham.

“Mahādundubhināmā ca, soḷasāsum rathesabhā;
Tiṃsakappasahassamhi, rājāno cakkavattino.

“Kilesā jhāpitā mayham...pe... kataṃ buddhassa sāsana’nti.

Arahattaṃ pana patvā attanā paṭiladdhasampattiṃ paccavekkhaṇamukhena satthu guṇamahantataṃ paccavekkhitvā “Idisaṃ nāma satthāraṃ bāhulikādivādena samudācarimha. Aho puthujanabhāvo nāma andhakarāṇo acakkhukarāṇo ariyabhāvoyeva cakkhukarāṇo”ti dassento “**passati passo**”ti gātham abhāsi.

61. Tattha **passati passoti** passati sammādiṭṭhiyā dhamme aviparītaṃ jānāti bujjhatīti passo, dassanasampanno ariyo, so **passantaṃ** aviparītadassāvīṃ “ayaṃ aviparītadassāvī”ti passati paññācakkhunā dhammādhammaṃ yathāsabhāvato jānāti. Na kevalam passantameva, atha kho **apassantaṅca** passati, yo paññācakkhuvirahito dhamme yathāsabhāvato na passati, tampi apassantaṃ puthujjanam “andho vatāyam bhavam acakkhuko”ti attano paññācakkhunā passati. **Apassanto apassantaṃ, passantaṅca na passatīti** apassanto paññācakkhuraḥito andhabālo tādisaṃ andhabālam ayaṃ dhammādhammaṃ yathāsabhāvato na passatīti yathā apassantaṃ na passati na jānāti, evam attano paññācakkhunā dhammādhammaṃ yathāsabhāvato passantaṅca paṇḍitaṃ “ayaṃ evaṃvidho”ti na passati na jānāti, tasmā ahampi pubbe dassanarahito sakalam ñeyyam hatthāmalakaṃ viya passantaṃ bhagavantaṃ apassantampi pūraṇādiṃ yathāsabhāvato na passim, idāni pana buddhānubhāvena sampanno ubhayepi yathāsabhāvato passāmīti sevitabbāsevitabbesu attano aviparītapaṭipattiṃ dasseti.

Vappattheragāthāvaṇṇanā niṭṭhitā.

2. Vajjiputtattheragāthāvaṇṇanā

Ekakā mayaṃ araṇṇeti āyasmato vajjiputtattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭupanissayaṃ puññaṃ upacinanto ito ekanavute kappe vipassissa bhagavato kāle kulagehe nibbattitvā viññutaṃ patto ekadivasaṃ vipassim bhagavantaṃ disvā pasannamānaso nāgapupphakesarehi pūjam akāsi. So tena puññakammena devamanussesu saṃsaranto imasmim buddhuppāde amaccakule nibbatti, **vajjiputtotissa** nāmaṃ ahosi. So bhagavato vesāligamane buddhānubhāvaṃ disvā paṭiladdhasaddho pabbajitvā katapubbakicco kammaṭṭhānaṃ gahetvā vesāliyā avidūre aññatarasmim vanasaṅḍe viharati. Tena ca samayena vesāliyaṃ ussavo ahosi. Tattha tattha naccagītavāditaṃ pavattati, mahājano haṭṭhatuṭṭho ussavasampattiṃ paccanubhoti, taṃ sutvā so bhikkhu ayoniso ummujjanto vivekaṃ vajjamāno kammaṭṭhānaṃ vissajjetvā attano anabhiratiṃ pakāsento –

“Ekakā mayaṃ araṇṇe viharāma, apaviddhamva vanasmim dārukaṃ;
Etādisikāya rattiyā, ko su nāma amhehi pāpiyo”ti. – gāthamāha;

Taṃ sutvā vanasaṅḍe adhivatthā devatā taṃ bhikkhum anukampamānā “yadipi, tvam bhikkhu, araṇṇāvāsaṃ hīlento vadasi, vivekakāmā pana viddasuno taṃ bahu maññantiyevā”ti imamatthaṃ dassenti –

“Ekako tvaṃ araṇṇe viharasi, apaviddhaṃva vanasmiṃ dārukaṃ;
Tassa te bahukā pihayanti, nerayikā viya saggagāmina”nti. –

Gāthaṃ vatvā, “kathaṇhi nāma tvaṃ, bhikkhu, niyyānike sammāsambuddhassa sāsane pabbajitvā
aniyyānikaṃ vitakkaṃ vitakkessasi”ti santajjentī saṃvejesi. Evaṃ so bhikkhu tāya devatāya saṃvejito
kasābhīhato viya bhadro assājānīyo vipassanāvīthiṃ otarivā nacirasseva vipassanaṃ ussukkāpetvā
arahattaṃ pāpuṇi. Tena vuttaṃ **apadāne** (apa. thera 1.11.62-66) –

“Suvanṇavaṇṇaṃ sambuddhaṃ, sataraṃsiṃva bhāṇumaṃ;
Obhāsentaṃ disā sabbā, uḷurājaṃva pūritaṃ.

“Purakkhataṃ sāvakehi, sāgareheva medaniṃ;
Nāgaṃ paggayha reṇūhi, vipassissābhiropayim.

“Ekanavutito kappe, yaṃ reṇumabhiropayim;
Duggatiṃ nābhijānāmi, buddhapūjāyidaṃ phalaṃ.

“Paṇṇatālīsito kappe, reṇu nāmāsi khattiyo;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā “ayaṃ me arahattappattiyā aṅkuso jāto”ti attano devatāya ca vuttanayaṃ
saṃkaḍḍhitvā –

62. “Ekakā mayaṃ araṇṇe viharāma, apaviddhaṃva vanasmiṃ dārukaṃ;
Tassa me bahukā pihayanti, nerayikā viya saggagāmina”nti. –

Gāthaṃ abhāsi.

Tassattho – anapekkhabhāvena vane chaḍḍitadārukkhaṇḍaṃ viya yadipi **mayam ekakā** ekākino
asahāyā imasmiṃ **araṇṇe viharāma**, evaṃ viharato pana **tassa me bahukā pihayanti** maṃ bahū
atthakāmarūpā kulaputtā abhipatthenti, “aho vatassa mayampi vajjiputtatthero viya gharabandhanaṃ
pahāya araṇṇe vihareyyāmā”ti. Yathā kiṃ? **Nerayikā viya saggagāminaṃ**, yathā nāma nerayikā attano
pāpakammaena nīraye nibbattasattā saggagāmīnaṃ saggūpagāmīnaṃ pihayanti – “aho vata mayampi
nīrayadukkhaṃ pahāya saggasukhaṃ paccanubhaveyyāmā”ti evaṃsampadamidanti attho. Ettha ca
attani garubahuvacanappayogassa icchitabbattā “ekakā mayaṃ viharāmā”ti puna tassa atthassa ekattaṃ
sandhāya “tassa me”ti ekavacanappayogo kato. “Tassa me”, “saggagāmina”nti ca ubhayampi
‘pihayanti’ti padaṃ apekkhitvā upayogathe sampadānaniddeso daṭṭhabbo. Taṃ abhipatthenti ca tādise
araṇṇāvāsādiguṇe abhipatthentā nāma hontīti katvā vuttaṃ. **Tassa meti** vā tassa mama santike guṇeti
adhippāyo.

Vajjiputtattheragāthāvaṇṇanā niṭṭhitā.

3. Pakkhattheragāthāvaṇṇanā

Cutā patantīti āyasmato pakkhattherassa gāthā. Kā uppatti? Sopi purimabuddhesu katādhikāro
tattha tattha bhava puññāni karonto ito ekanavute kappe yakkhasenāpati hutvā vipassim bhagavantaṃ
disvā pasannamānaso dibbavatthena pūjaṃ akāsi. So tena puññakammaena devamanussesu saṃsaranto
imasmiṃ buddhuppāde sakkesu devadahanigame sākiyarājakule nibbatti, “sammodakumāro”tissa
nāmaṃ ahoṣi. Athassa daharakāle vātarogena pādā na vaḥimsu. So katipayam kālam pīṭhasappī viya
vicari. Tenassa **pakkhoti** samaññā jātā. Pacchā arogakālepi tatheva naṃ sañjānanti, so bhagavato

ñāṭisamāgame pāṭihāriyaṃ disvā paṭiladdhasaddho pabbajitvā katapubbakicco kammaṭṭhānaṃ gahetvā araṇṇe viharati. Athekadivasam gāmaṃ piṇḍāya pavisitum gacchanto antarāmagge aññatarasmiṃ rukkhamūle nisīdi. Tasmañca samaye aññataro kulalo maṃsapesiṃ ādāya ākāseṇa gacchati, taṃ bahū kulalā anupatitvā pātesum. Pātitaṃ maṃsapesiṃ eko kulalo aggahesi. Taṃ añño acchinditvā gaṇhi, taṃ disvā thero “yathāyaṃ maṃsapesi, evaṃ kāmā nāma bahusādhāraṇā bahudukkhā bahupāyāsā”ti – kāmesu ādīnavaṃ nekkhamme ca ānisaṃsaṃ paccavekkhitvā vipassanaṃ paṭṭhapetvā “anicca”ntiādinā manasikaronto piṇḍāya caritvā katabhattakicco divāṭṭhāne nisīditvā vipassanaṃ vaḍḍhetvā arahattaṃ pāpuṇi. Tena vuttaṃ **apadāne** (apa. thera 1.12.1-10) –

“Vipassī nāma bhagavā, lokajetṭho narāsabho;
Aṭṭhasaṭṭhisahasseehi, pāvisi bandhumaṃ tadā.

“Nagarā abhinikkhamma, agamaṃ dīpacetiyaṃ;
Addasaṃ virajaṃ buddhaṃ, āhutaṃ paṭiggahaṃ.

“Cullāsītisahasāni, yakkhā mayhaṃ upantike;
Upaṭṭhahanti sakkaccaṃ, indaṃva tidasā gaṇā.

“Bhavanā abhinikkhamma, dussaṃ paggayhahaṃ tadā;
Sirasā abhivādesiṃ, tañcādāsīṃ mahesino.

“Aho buddho aho dhammo, aho no satthu sampadā;
Buddhassa ānubhāvena, vasudhāyaṃ pakampatha.

“Taṇca acchariyaṃ disvā, abbhutaṃ lomahaṃsanam;
Buddhe cittaṃ pasādemī, dvīpadindamhi tādine.

“Sohaṃ cittaṃ pasādetvā, dussaṃ datvāna satthuno;
Saraṇaṇca upāgacchiṃ, sāmacco saparijano.

“Ekanavutito kappe, yaṃ kammamakariṃ tadā;
Duggatiṃ nābhijānāmi, buddhapūjāyidaṃ phalaṃ.

“Ito pannarase kappe, soḷasāsūṃ suvāhanā;
Sattaratanasampanno, cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā yadeva saṃvegavatthuṃ aṅkusaṃ katvā vipassanaṃ vaḍḍhetvā aññā adhigatā, tassa saṃkittanamukhena aññaṃ byākaronto “**cutā patantī**”ti gāthaṃ abhāsi.

63. Tattha **cutā**ti bhaṭṭhā. **Patantī**ti anupatanti. **Patitā**ti cavanavasena bhūmiyaṃ patitā, ākāse vā sampatanavasena patitā. **Giddhā**ti gedhaṃ āpannā. **Punarāgatā**ti punadeva upagatā. **Ca**-saddo sabbattha yojetabbo. Idaṃ vuttaṃ hoti – patanti anupatanti ca idha kulalā, itarassa mukhato cutā ca maṃsapesi, cutā pana sā bhūmiyaṃ patitā ca, giddhā gedhaṃ āpannā sabbeva kulalā punarāgatā. Yathā cime kulalā, evaṃ saṃsāre paribbhamantā sattā ye kusaladhammato cutā, te patanti nirayādīsu, evaṃ patitā ca, sampattibhave ṭhitā tattha kāmasukhānuyogavasena kāmabhava rūpārūpabhavesu ca bhavanikantivasena giddhā ca punarāgatā bhavato aparimuttatā tena tena bhavagāminā kammaṇa taṃ taṃ bhavasaññitaṃ dukkhaṃ āgatā eva, evambhūtā ime sattā. Mayā pana **kataṃ kiccaṃ** pariññādibhedam soḷasavidhampi kiccaṃ kataṃ, na dāni taṃ kātabbam atthi. **Rataṃ rammaṃ** ramitabbam ariyehi sabbasaṅkhatavinissaṭam nibbānaṃ rataṃ abhirataṃ rammaṃ. Tena ca **sukhenanvāgataṃ sukhaṃ** phalasaṃpattisukhena anuāgataṃ upagataṃ accantasukhaṃ nibbānaṃ,

sukhena vā sukhāpaṭipadābhūtena vipassanāsukhena maggasukhena ca anvāgataṃ phalasukhaṃ nibbānasukhañcāti attho vedītabbo.

Pakkhattheragāthāvaṇṇanā niṭṭhitā.

4. Vimalakoṇḍaññattheragāthāvaṇṇanā

Dumavhayāya uppannoti vimalakoṇḍaññattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭupānissayaṃ puññaṃ upacinanto ito ekanavute kappe vipassissa bhagavato kāle vibhavasampanne kule nibbattivā viññutaṃ patto ekadivasaṃ vipassiṃ bhagavantaṃ mahatiyā parisāya parivutaṃ dhammaṃ desentaṃ disvā pasannamānaso catūhi suvaṇṇapupphehi pūjesi. Bhagavā tassa pasādasamvaḍḍhanatthaṃ tathārūpaṃ iddhābhisaṅkhāraṃ abhisaṅkhāresi, yathā suvaṇṇābhā sakalaṃ taṃ padesaṃ ottharati. Taṃ disvā bhiyyosomattāya pasannamānaso hutvā bhagavantaṃ vanditvā taṃ nimittaṃ gahetvā attano gehaṃ gantvā buddhārammaṇaṃ pītiṃ avijahanto kenaci rogena kālaṃ katvā tusitesu upapanno aparāparaṃ puññaṃ katvā devamanussesu saṃsaranto imasmiṃ buddhuppāde rājānaṃ bimbisāraṃ paṭicca ambapāliyaṃ kucchimhi paṭisandhiṃ gaṇhi. Rājā hi bimbisāro taruṇakāle ambapāliyaṃ rūpasampattiṃ sutvā sañjātābhilāso katipayamanussaparivāro aññātakavesena vesāliṃ gantvā ekarattiṃ tāya saṃvāsaṃ kappesi. Tadā ayaṃ tassā kucchimhi paṭisandhiṃ aggahesi. Sā ca gabbhassa paṭiṭṭhitabhāvaṃ tassa ārocesi. Rājāpi attānaṃ jānāpetvā dātabbayuttakaṃ datvā pakkāmi. Sā gabbhassa paripākamanvāya puttaṃ vijāyi, “vimalo” tissa nāmaṃ ahoṣi, pacchā **vimalakoṇḍaññoti** paññāyittha. So vayappatto bhagavato vesāligamane buddhānubhāvaṃ disvā pasannamānaso pabbajitvā katapubbakicco vipassanaṃ paṭṭhapetvā nacirasseva arahattaṃ pāpuṇi. Tena vuttaṃ **apadāne** (apa. thera 1.12.40-48) –

“Vipassī nāma bhagavā, lokajetṭho narāsabho;
Nisīno janakāyassa, desesi amataṃ padaṃ.

“Tassāhaṃ dhammaṃ sutvāna, dvīpadinnassa tādino;
Soṇṇapuppāni cattāri, buddhassa abhiropayim.

“Suvaṇṇacchadanaṃ āsi, yāvataṃ parisā tadā;
Buddhābhā ca suvaṇṇābhā, āloko vipulo ahu.

“Udaggacitto sumano, vedajāto katañjalī;
Vittisañjanano tesam, diṭṭhadhammasukhāvaho.

“Āyācitvāna sambuddhaṃ, vanditvāna ca subbatam;
Pāmojjaṃ janayitvāna, sakaṃ bhavanupāgamim.

“Bhavane upaviṭṭhoṃ, buddhaseṭṭhaṃ anussarim;
Tena cittappasādena, tusitaṃ upapajjaṃ.

“Ekanavutito kappe, yaṃ pupphamabhiropayim;
Duggatiṃ nābhijānāmi, buddhapūjāyidaṃ phalaṃ.

“Soḷasāsimsu rājāno, nemisammataṇāmakā;
Tetālīse ito kappe, cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana”nti.
Arahattaṃ pana patvā aññāpadesena aññaṃ byākāranto “**dumavhayāyā**”ti gāthaṃ abhāsi.

64. Tattha **dumavhayāyāti** dumena ambena avhātabbāya, ambapāliyāti attho. Ādhāre cetam bhumavacanam. **Uppannoti** tassā kucchiyaṃ uppanno uppajjamāno ca. **Jāto paṇḍaraketunāti** dhavalavatthadhajattā “paṇḍaraketū”ti paññātena bimbisāraraññā hetubhūtena jāto, tam paṭicca nibbattoti attho. **Uppannoti** vā paṭhamābhinnibbattidassanam. Tato hi **jāto**ti abhijātidassanam. Vijāyanakālato paṭṭhāya hi loke jātavohāro. Ettha ca “dumavhayāya uppanno”ti iminā attukkamaṣanabhāvaṃ apaneti, anekapatiputtānampi visesādhigamasambhavañca dīpeti. “Jāto paṇḍaraketunā”ti iminā viññātapitikadassanena paravambhanaṃ apaneti. **Ketuhāti** mānappahāyī. Māno hi uṇṇatilakkhaṇattā ketu viyāti ketu. Tathā hi so “ketukamyatāpaccupaṭṭhāno”ti vuccati. **Ketunāyevāti** paññāya eva. Paññā hi anavajjadhammesu accuggataṭṭhena mārasenappamaddanena pubbaṅgamatṭhena ca ariyānaṃ dhajā nāma. Tenāha “dhammo hi isinaṃ dhajo”ti (saṃ. ni. 2.241; a. ni. 4.48; jā. 2.21.494). **Mahāketuṃ padhaṃsayīti** mahāvisayatāya mahantā, seyyamānājātimānādibhedato bahavo ca mānappakārā, itare ca kilesadhammā samussitaṭṭhena ketu etassāti mahāketu māro pāpimā. Tam balavidhamanavisayātikkanavasena abhibhavi nibbisevanaṃ akāsīti. “Mahāketuṃ padhaṃsayī”ti attānaṃ paraṃ viya dassento aññāpadesena arahattaṃ byākāsi.

Vimalakoṇḍaññattheragāthāvaṇṇanā niṭṭhitā.

5. Ukkhepakatavacchattheragāthāvaṇṇanā

Ukkhepakatavacchassāti āyasmato ukkhepakatavacchattherassa gāthā. Kā uppatti? Sopi kira purimabuddhesu katādhikāro tattha tattha bhava vivaṭṭūpanissayaṃ puññaṃ upacinanto ito catunavute kappe siddhatthassa bhagavato kāle kulagehe nibbattitvā viññutaṃ patto satthāraṃ uddissa mālaṃ karontassa pūgassa ekatthambhaṃ alabhantassa thambhaṃ datvā sahāyakiccaṃ akāsi. So tena puññakammena devaloke nibbattitvā aparāparaṃ puññāni katvā devamanussesu saṃsaranto imasmiṃ buddhuppāde sāvattiyaṃ aññatarassa brāhmaṇassa putto hutvā nibbatti, **vacchotissa** gottato āgatanāmaṃ. So satthu santike dhammaṃ sutvā paṭiladdhasaddho pabbajitvā kosalaratṭhe gāmakāvāse vasanto āgatāgatānaṃ bhikkhūnaṃ santike dhammaṃ pariyāpuṇāti. “Ayaṃ vinayo idaṃ suttantaṃ ayaṃ abhidhammo”ti pana paricchedaṃ na jānāti. Athekadivasaṃ āyasmantaṃ dhammasenāpatiṃ pucchitvā yathāparicchedaṃ sabbaṃ sallakkhesi. Dhammasaṅgītiyā pubbepi piṭakādisamaññā pariyaṭṭisaddhamme vavatthitā eva, yato bhikkhūnaṃ vinayadharādivohāro. So tepiṭakaṃ buddhavacanaṃ uggaṇhanto paripucchanto tattha vutte rūpārūpadhamme sallakkhetvā vipassanaṃ paṭṭhapetvā sammasanto nacirasseva arahattaṃ pāpuṇi. Tena vuttaṃ **apadāne** (apa. thera 1.2.13-26) –

“Siddhatthassa bhagavato, mahāpūgagaṇo ahu;
Saraṇaṃ gatā ca te buddhaṃ, saddahanti tathāgataṃ.

“Sabbe saṅgama mantetvā, mālaṃ kubbanti satthuno;
Ekatthambhaṃ alabhantā, vicinanti brahāvane.

“Teḥaṃ araññe disvāna, upagamma gaṇaṃ tadā;
Añjaliṃ paggaḥetvāna, paṭipucchiṃ gaṇaṃ ahaṃ.

“Te me puṭṭhā viyākaṃsu, sīlavanto upāsakā;
Mālaṃ mayāṃ kattukāmā, ekatthambho na labbhati.

“Ekatthambhaṃ mamaṃ detha, ahaṃ dassāmi satthuno;
Āharissāmaḥaṃ thambhaṃ, appossukkā bhavantu te.

“Te me thambhaṃ pavecchiṃsu, pasannā tuṭṭhamānasā;
Tato paṭinivattitvā, agamaṃsu sakaṃ gharaṃ.

“Aciraṃ gate pūgagaṇe, thambhaṃ ahāsahaṃ tadā;
Haṭṭho haṭṭhena cittena, paṭṭhamaṃ ussapesahaṃ.

“Tena cittappasādena, vimānaṃ upapajjahaṃ;
Ubbiddhaṃ bhavanaṃ mayhaṃ, sattabhūmaṃ samuggataṃ.

“Vajjamānāsu bherīsu, paricāremaḥ sadā;
Pañcapaññāsakappamhi, rājā āsiṃ yasodharo.

“Tatthāpi bhavanaṃ mayhaṃ, sattabhūmaṃ samuggataṃ;
Kūṭāgārarūpetam, ekatthambhaṃ manoramaṃ.

“Ekavīsatikappamhi, udeno nāma khattiyo;
Tatrāpi bhavanaṃ mayhaṃ, sattabhūmaṃ samuggataṃ.

“Yaṃ yaṃ yonupapajjāmi, devattaṃ atha mānusaṃ;
Anubhomī sukhaṃ sabbaṃ, ekatthambhassidaṃ phalaṃ.

“Catunnavutito kappe, yaṃ thambhamadadaṃ tadā;
Duggatiṃ nābhijānāmi, ekatthambhassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā katakiccattā akilāsubhāve ṭhito attano santikaṃ upagatānaṃ
gahaṭṭhapabbajitānaṃ anukampaṃ upādāya teṭṭhakaṃ buddhavacanaṃ vīmaṃsitvā dhammaṃ desesi.
Desento ca ekadivasaṃ attānaṃ paraṃ viya katvā dassento –

65. “Ukkhepakatavacchassa, saṅkalitaṃ bahūhi vassehi;
Taṃ bhāsati gahaṭṭhānaṃ, sunisinno uḷārapāmojjo’nti. – gāthaṃ abhāsi;

Tattha **ukkhepakatavacchassā**ti kataukkhepavacchassa, bhikkhuno santike viṣuṃ viṣuṃ
uggahitaṃ vinayapadesaṃ suttapadesaṃ abhidhammapadesaṅca yathāparicchedaṃ
vinayasuttābhidhammānaṃyeva upari khipitvā sajjhāyanavasena tattha tattheva pakkhipitvā
ṭṭhitavacchenāti attho karaṇatthe hi idaṃ sāmivacanaṃ. **Saṅkalitaṃ bahūhi vassehī**ti bahukehi
saṃvaccharehi sampiṇḍanavasena hadaye ṭṭhapitaṃ. “Saṅkhalita’ntipi pāṭho, saṅkhalitaṃ viya kataṃ
ekābaddhavasena vācuggataṃ kataṃ. Yaṃ buddhavacanaṃ vacanaseso. **Tanti** taṃ pariyattidhammaṃ
bhāsati katheti. **Gahaṭṭhānanti** tesam yebhuyyatāya vuttaṃ. **Sunisinnoti** tasmiṃ dhamme sammā
niccalo nisinno, lābhasakkārādiṃ apaccāsīsanto kevalaṃ vimuttāyatanaṃsīseyeva ṭṭhatvā kathetīti attho.
Tenāha “**uḷārapāmojjo**’nti phalasaṃpattisukhavasena dhammadesanāvaseneva ca
uppannaḷārapāmojjoti. Vuttañhetam –

“Yathā yathāvuso bhikkhu, yathāsutaṃ yathāpariyattaṃ dhammaṃ vitthārena paresaṃ
deseti tathā tathā so tasmiṃ dhamme labhati atthavedaṃ, labhati dhammavedaṃ, labhati
dhammūpasamhitam pāmojja’ntiādi (dī. ni. 3.355).

Ukkhepakatavacchattheragāthāvaṇṇanā niṭṭhitā.

6. Meghiyattheragāthāvaṇṇanā

Anusāsi mahāvīroti āyasmato meghiyattherassa gāthā. Kā uppatti? Ayampi purimabuddhesu
katādhikāro tattha tattha bhava kusalabījāni ropento ito ekanavute kappe vipassissa bhagavato kāle
kulagehe nibbattitvā viññutaṃ pāpuṇi. Tasmiṅca samaye vipassī bhagavā buddhakicca

pariyosānamāgama āyusaṅkhāraṃ ossajji. Tena pathavīkampādīsū uppannesu mahājano bhītatasito aho. Atha naṃ vessavaṇo mahārājā tamatthaṃ vibhāvetvā samassāsesi. Taṃ sutvā mahājano saṃvegappatto aho. Tatthāyaṃ kulaputto buddhānubhāvaṃ sutvā satthari sañjātagāravabahuṃ māno ulāraṃ pītisomanassaṃ paṭisaṃvedesi. So tena puññakamma devamanussesu saṃsaranto imasmiṃ buddhuppāde kapilavattusmiṃ sākiyārājakule nibbatti, tassa **meghiyoti** nāmaṃ aho. So vayappatto satthu santike pabbajitvā bhagavantaṃ upaṭṭhahanto bhagavati jālikāyaṃ viharante kimikālāya nadiyā tīre ramaṇīyaṃ ambavanaṃ disvā tattha viharitukāmo dve vāre bhagavatā vāretvā tatiyavāraṃ vissajjito tattha gantvā micchāvitakkamakkhikāhi khajjamāno cittasamādhim alabhivā satthu santikaṃ gantvā tamatthaṃ ārocesi. Athassa bhagavā “aparipakkāya, meghiya, cetovimuttīyā pañca dhammā paripākāya saṃvattantī” tiādina (udā. 31) ovādaṃ adāsi. So tasmīṃ ovāde ṭhatvā vipassanaṃ vaḍḍhetvā arahattaṃ pāpuṇi. Tena vuttaṃ **apadāne** (apa. therā 1.12.57-65) –

“Yadā vipassī lokaggo, āyusaṅkhāraṃ ossajji;
Pathavī sampakampittha, medanī jalamekhalā.

“Otataṃ vitataṃ mayhaṃ, suvicittavaṭṭamsakaṃ;
Bhavanampi pakampittha, buddhassa āyusaṅkhaye.

“Tāso mayhaṃ samuppanno, bhavane sampakampite;
Uppādo nu kimatthāya, āloko vipulo ahu.

“Vessavaṇo idhāgama, nibbāpesi mahājanaṃ;
Pāṇabhūte bhayaṃ natthi, ekaggā hotha saṃvutā.

“Aho buddho aho dhammo, aho no satthu sampadā;
Yasmīṃ uppajjamānamhi, pathavī sampakampati.

“Buddhānubhāvaṃ kittetvā, kappam saggamhi modahaṃ;
Avasesesu kappesu, kusalaṃ caritaṃ mayā.

“Ekanavutito kappe, yaṃ saññamalabhim tadā;
Duggatiṃ nābhijānāmi, buddhasaññāyidaṃ phalaṃ.

“Ito cuddasakappamhi, rājā āsiṃ patāpavā;
Samito nāma nāmena, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā satthu sammukhā ovādaṃ labhitvā “mayā arahattaṃ adhigata”nti aññaṃ byākaronto –

66. “Anusāsi mahāvīro, sabbadhammāna pāragū;
Tassāhaṃ dhammaṃ sutvāna, vihāsiṃ santike sato;
Tisso vijjā anuppattā, kataṃ buddhassa sāsana”nti. – gāthaṃ abhāsi;

Tattha **anusāsīti** “aparipakkāya, meghiya, cetovimuttīyā pañca dhammā paripākāya saṃvattantī” tiādina ovādi anusitṭhim adāsi. **Mahāvīro** mahāvikkanto, vīriyapāramipāripūriyā caturaṅgasamannāgatavīriyādhiṭṭhānena anaññasādhāraṇacatubbidhasammappadhānasampattiyā ca mahāvīriyoti attho. **Sabbadhammāna pāragūti** sabbesañca ñeyyadhammānaṃ pāraṃ pariyantaṃ ñāṇagamanena gato adhigatoti sabbadhammāna pāragū, sabbaññūti attho. Sabbesaṃ vā saṅkhatadhammānaṃ pārabhūtaṃ nibbānaṃ sayambhūñāṇena gato adhigatoti sabbadhammāna pāragū. **Tassāhaṃ dhammaṃ sutvānāti** tassa buddhassa bhagavato sāmukkaṃsikaṃ taṃ catusaccadhammaṃ

suñitvā. **Vihāsiṃ santiketi** ambavane micchāvitakkehi upadduto cālikā vihāraṃ gantvā satthu samīpeyeva vihāsiṃ. **Satoti** satimā, samathavipassanābhāvanāya appamattoti attho. **Ahanti** idaṃ yathā “anusāsī”ti ettha “ma”nti evaṃ “vijjā anuppattā, kataṃ buddhassa sāsana”nti ettha “mayā”ti pariṇāmetabbaṃ. “**Kataṃ buddhassa sāsana**”nti ca iminā yathāvuttaṃ vijjāyānupattimeva satthu ovādapaṭikaraṇabhāvadassanena pariyāyantarena pakāseti. Sīlakkhandhādiparipūraṇameva hi satthu sāsana-kāritā.

Meghiyattheragāthāvaṇṇanā niṭṭhitā.

7. Ekadhammasavanīyattheragāthāvaṇṇanā

Kilesā jhāpitā mayhanti āyasmato ekadhammasavanīyattherassa gāthā. Kā uppatti? So kira padumuttarassa bhagavato kāle rukkhadavatā hutvā nibbato katipaye bhikkhū maggamūlḥe mahārañṇe vicarante disvā anukampamāno attano bhavanato otarivā te samassāsetvā bhojetvā yathādhippetaṭṭhānaṃ pāpesi. So tena puññakammena devamanussesu saṃsaranto kassape bhagavati loke uppajjitvā katabuddhacce parinibbute tasmim kāle bārāṇasirājā kikī nāma ahoṣi. Tasmim kālaṅkate tassa puthuvindarājā nāma putto āsi. Tassa putto susāmo nāma. Tassa putto kikībrahmadatto nāma hutvā rajjaṃ kārento sāsane antarahite dhammassavanaṃ alabhanto, “yo dhammaṃ deseti, tassa sahaṣsaṃ dammi”ti ghoṣāpetvā ekampi dhammakathikaṃ alabhanto, “mayhaṃ pitupitāmahādīnaṃ kāle dhammo saṃvattati, dhammakathikā sulabhā ahesuṃ. Idāni pana catuppādikagāthāmatampi kathento dullabho. Yāva dhammasaññā na vinassati, tāvadeva pabbajissāmi”ti rajjaṃ pahāya himavantaṃ uddissa gacchantaṃ sakko devarājā āgantvā, “aniccā vata saṅkhārā”ti gāthāya dhammaṃ kathetvā nivattesi. So nivattitvā bahuṃ puññaṃ katvā devamanussesu saṃsaranto imasmim buddhuppāde setabyanagare seṭṭhikule nibbattitvā vayappatto bhagavati setabyanagare siṃsapāvane viharante satthāraṃ upasaṅkamitvā vanditvā ekamantaṃ nisīdi. Tassa satthā ajjhāsayaṃ oloketvā, “aniccā vata saṅkhārā”ti imāya gāthāya dhammaṃ desesi. Tassa tattha katādhikāratāya so anicca-saññāya pākāṭataṃ hutvā upaṭṭhitāya paṭiladdhasaṃvego pabbajitvā dhammasammasanaṃ paṭṭhapetvā dukkhasaññaṃ anattasaññaṃ manasikaronto vipassanaṃ ussukkāpetvā arahattaṃ pāpuṇi. Tena vuttaṃ **apadāne** (apa. therā 1.12.66-71) –

“Padumuttarabuddhassa, sāvakā vanacārino;
Vippanaṭṭhā brahārañṇe, andhāva anusuyyare.

“Anussaritvā sambuddhaṃ, padumuttaranāyakaṃ;
Tassa te munino puttā, vippanaṭṭhā mahāvane.

“Bhavanā oruhitvāna, agamiṃ bhikkhusantikaṃ;
Tesaṃ maggañca ācikkhiṃ, bhojanañca adāsahaṃ.

“Tena kamma dvīpadinda, lokajetṭha narāsabha;
Jātiyā sattavassohaṃ, arahattapaṇḍitaṃ.

“Sacakkhū nāma nāmena, dvādasa cakkavattino;
Sattaratanasampannā, pañcakappasate ito.

“Kilesā jhāpitā mayhaṃ...pe... kataṃ buddhassa sāsana”nti.

Tassa ekeneva dhammassavanaṃ nipphanna-kiccattā **ekadhammasavanīyotveva** samaññā ahoṣi. So arahā hutvā aññaṃ byākaronto –

67. “Kilesā jhāpitā mayhaṃ, bhavā sabbe samūhatā;
Vikkhīṇo jāti-saṃsāro, natthi dāni punabbhavo”ti. – gāthaṃ abhāsi;

Tattha **kilesā**ti yasmim̄ santāne uppannā, taṃ kilesenti vibādheti upatāpenti vāti kilesā, rāgādayo. **Jhāpitā**ti indagginā viya rukkhagacchādayo ariyamaggañāgginā samūlaṃ daḍḍhā. **Mayhanti** mayā, mama santāne vā. **Bhavā sabbe samūhatā**ti kāmakkammabhavādayo sabbe bhavā samugghāṭitā kilesānaṃ jhāpitattā. Sati hi kilesavaṭṭe kammavaṭṭena bhavitabbaṃ. Kammabhavānaṃ samūhatattā eva ca upapattibhavāpi samūhatā eva anuppattidhammatāya āpāditattā. **Vikkhīṇo jātisaṃsāro**ti jātiādiko –

“Khandhānañca paṭipāṭi, dhātuāyatanāna ca;
Abbocchinnāṃ vattamānā, saṃsāroti pavuccatī”ti. –

Vuttalakkhaṇo saṃsāro visesato khīṇo, tasmā **natthi dāni punabbhavo**. Yasmā āyatim̄ punabbhavo natthi, tasmā vikkhīṇo jātisaṃsāro. Tasmā ca punabbhavo natthi, yasmā bhavā sabbe samūhatāti āvattetvā vattabbaṃ. Atha vā vikkhīṇo jātisaṃsāro, tato eva natthi dāni punabbhavoti yojetabbaṃ.

Ekadhammasavanīyattheragāthāvaṇṇanā niṭṭhitā.

8. Ekudāniyattheragāthāvaṇṇanā

Adhicetaso appamajjatoti āyasmato ekudāniyattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭūpanissayaṃ puññaṃ upacinanto atthadassissa bhagavato kāle yakkhasenāpati hutvā nibbato satthari parinibbute, “alābhā vata me, dulladdhaṃ vata me, yohaṃ satthudharamānakāle dānādipuññaṃ kātum nālattha”nti paridevasokamāpanno ahosi. Atha naṃ sāgaro nāma satthu sāvako sokaṃ vinodetvā satthu thūpapūjāyaṃ niyojesi. So pañca vassāni thūpaṃ pūjetvā tato cuto tena puññaena devamanussesu eva saṃsaranto kassapassa bhagavato kāle kulagehe nibbattivā viññutaṃ patto kālena kālaṃ satthu santikaṃ upasaṅkami. Tasmiṃca samaye sathā “**adhicetaso**”ti gāthāya sāvake abhiṇhaṃ ovadi. So taṃ sutvā saddhājāto pabbaji. Pabbajitvā ca pana tameva gāthaṃ punappunaṃ parivatteti. So tattha vīsativassasahassāni samaṇadhammaṃ karonto ñāṇassa aparipakkattā visesaṃ nibbattetu nāsakkhi. Tato pana cuto devaloke nibbattivā aparāparaṃ sugatīsuyeva saṃsaranto imasmim̄ buddhuppāde sāvattiyayaṃ vibhavasampannassa brāhmaṇassa putto hutvā nibbato viññutaṃ patvā jetavanapaṭiggahaṇasamaye buddhānubhāvaṃ disvā paṭiladdhasaddho pabbajitvā katapubbakicco araṇṇe viharanto satthu santikaṃ agamāsi. Tasmiṃca samaye sathā āyasmantaṃ sārīputtaṃ attano avidūre adhiccittamanuyuttaṃ disvā “**adhicetaso**”ti imaṃ udānaṃ udānesi. Taṃ sutvā ayaṃ cirakālaṃ bhāvanāya araṇṇe viharantopi kālena kālaṃ tameva gāthaṃ udāneti, tenassa **ekudāniyoti** samañña udapādi. So athekadivasaṃ cittekaggataṃ labhitvā vipassanaṃ vaḍḍhetvā arahattaṃ pāpuṇi. Tena vuttaṃ **apadāne** (apa. thera 1.12.72-81) –

“Atthadassimhi sugate, nibbute samanantarā;
Yakkhayoniṃ upapajjim̄, yasaṃ patto cahaṃ tadā.

“Dulladdhaṃ vata me āsi, duppabhātaṃ duruṭṭhitaṃ;
Yaṃ me bhoge vijjamāne, parinibbāyi cakkhumā.

“Mama saṅkappamaññāya, sāgaro nāma sāvako;
Mamuddharitukāmo so, āgacchi mama santikaṃ.

“Kiṃ nu socasi mā bhāyi, cara dhammaṃ sumedhasa;
Anupadinnā buddhena, sabbesaṃ bījasampadā.

“Yo ce pūreyya sambuddhaṃ, tiṭṭhantaṃ lokanāyakaṃ;
Dhātuṃ sāsapamattampi, nibbutassāpi pūjaye.

“Same cittappasādamhi, samaṃ puññaṃ mahaggataṃ;

Tasmā thūpaṃ karitvāna, pūjehi jinadhātuyo.

“Sāgarassa vaco sutvā, buddhathūpaṃ akāsahaṃ;
Pañcavasse paricariṃ, munino thūpamuttamaṃ.

“Tena kammaena dvipadinda, lokajettha narāsabha;
Sampattiṃ anubhotvāna, arahattamaṃpūṇiṃ.

“Bhūripañña ca cattāro, sattakappasate ito;
Sattaratanasampannā, cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā vimuttisukhena viharanto ekadivasaṃ āyasmatā dhammabhaṇḍāgārikena paṭibhānaṃ vīmaṃsitum, “āvuso, mayhaṃ dhammaṃ bhaṇāhi”ti ajjhittḥo cirakālaparicitattā –

68. “Adhicetaso appamajjato, munino monapathesu sikkhato;
Sokā na bhavanti tādino, upasantassa sadā satīmato”ti. (udā. 37) –

Imameva gāthaṃ abhāsi.

Tattha **adhicetasoti** adhicittavato, sabbacittānaṃ adhikena arahattaphalacittena samannāgatassāti attho. **Appamajjatoti** nappamajjato, appamādena anavajjadhammesu sātaccakiriyāya samannāgatassāti vuttaṃ hoti. **Muninoti** “yo munāti ubho loke, muni tena pavuccati”ti (dha. pa. 269; mahāni. 149; cūḷani. mettagūmānavapucchānidessa 21) evaṃ ubhayalokamunanena vā, monaṃ vuccati ñāṇaṃ, tena arahattaphalapaññaśāṅkhātena monena samannāgatatāya vā khīṇāsavo muni nāma, tassa munino. **Monapathesu sikkhatoti** arahattañāṇasaṅkhātassa monassa pathesu upāyamaḅḅesu sattatiṃsabodhipakkhiyadhammesu, tīsu vā sikkhāsu sikkhato. Idañca pubbabhāgapaṭipadaṃ gahetvā vuttaṃ. Pariniṭṭhitasikkho hi arahā, tasmā evaṃ sikkhato, imāya sikkhāya munibhāvaṃ pattassa muninoti evamettha attho daṭṭhabbo. Yasmā cetadevaṃ tasmā heṭṭhimamaggaphalacittānaṃ vasena adhicetaso, catusaccasambodhipaṭipattiyāṃ appamādavasena appamajjato, aggamaḅḅaṇḍāṇasaṃannāgamena muninoti evametesāṃ padānaṃ attho yujjatiyeva. Atha vā “appamajjato sikkhato” padhānahetū akkhātāti daṭṭhabbā. Tasmā appamajjanahetu sikkhanahetu ca adhicetasoti attho.

Sokā na bhavanti tādinoti tādisassa khīṇāsavamunino abbhantare iṭṭhaviyogādivatthukā sokā cittasantāpā na honti. Atha vā tādilakkaṇappattassa asekkhamunino sokā na bhavanti. **Upasantassāti** rāgādīnaṃ accantūpasamena upasantassa. **Sadā satīmatoti** sativepullappattiyā niccakālaṃ satiyā avirahitassa.

Ettha ca “adhicetaso”ti iminā adhicittasikkhā, “appamajjato”ti iminā adhisīlasikkhā, “munino monapathesu sikkhato”ti etehi adhipaññaśāṅkhā. “Munino”ti vā etena adhipaññaśāṅkhā, “monapathesu sikkhato”ti etena tāsaṃ lokuttarasikkhānaṃ pubbabhāgapaṭipadā, “sokā na bhavanti”tiādīhi sikkhāpāripūriyā ānisaṃsā pakāsītāti veditabbaṃ ayameva ca therassa aññābyākaraṇagāthā ahoṣi.

Ekudāniyattheragāthāvaṇṇanā niṭṭhitā.

9. Channattheragāthāvaṇṇanā

Sutvāna dhammaṃ mahato mahārasanti āyasmato channattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭūpanissayaṃ puññaṃ upacinanto siddhatthassa bhagavato kāle kulagehe nibbattitvā viññutaṃ patto ekadivasaṃ siddhatthaṃ bhagavantaṃ aññataraṃ

rukhamūlaṃ upagacchantam disvā pasannacitto mudusamphassaṃ paṇṇasantharam santharivā adāsi. Pupphehi ca samantato okiritvā pūjam akāsi. So tena puññakamma devaloke nibbattivā punapi aparāparam puññāni katvā sugatīsuyeva saṃsaranto amhākaṃ bhagavato kāle suddhodanamahārājassa gehe dāsiyā kucchimhi nibbatti, **channotissa** nāmaṃ ahosi, bodhisattena saha jāto. So satthu ñāṭisamāgame paṭiladdhasaddho pabbajivā bhagavati pemena, “amhākaṃ buddho, amhākaṃ dhammo” ti mamattam uppādetvā sineham chinditum asakkonto samaṇadhammam akatvā satthari parinibbute satthārā āṇattavidhinā katena brahmadāṇḍena santajjito saṃvegappatto hutvā sineham chinditvā vipassanto nacireneva arahattam pāpuṇi. Tena vuttam **apadāne** (apa. thera 1.10.45-50) –

“Siddhatthassa bhagavato, adāsiṃ paṇṇasantharam;
Samantā upahāraṇca, kusumam okiriṃ aham.

“Pāsādevam guṇam rammaṃ, anubhomi mahārahaṃ;
Mahagghāni ca pupphāni, sayanebhisavanti me.

“Sayaneham tuvaṭṭāmi, vicitte pupphasanthate;
Pupphavuṭṭhi ca sayane, abhivassati tāvade.

“Catunnavutito kappe, adāsiṃ paṇṇasantharam;
Duggatiṃ nābhijānāmi, santharassa idaṃ phalam.

“Tiṇasantharakā nāma, sattete cakkavattino;
Ito te pañcame kappe, uppajjimsu janādhipā.

“Kilesā jhāpitā mayham...pe... kataṃ buddhassa sāsana”nti.
Arahattam pana patvā vimuttisukhasantappito pīṭivegavissatṭham udānam udānento –

69. “Sutvāna dhammam mahato mahārasam,
Sabbaññutaññāṇavarena desitam;
Maggam papajjim amatassa pattiyā,
So yogakkhemassa pathassa kovido”ti. – gātham abhāsi;

Tattha **sutvānā**ti suṇitvā, sotena gahetvā ohitasoto sotadvārānusāreṇa upadhāretvā. **Dhammanti** catusaccadhammam. **Mahatoti** bhagavato. Bhagavā hi mahantehi uḷāratamehi sīlādiguṇehi samannāgatattā, sadevakena lokena visesato mahanīyatāya ca “mahā”ti vuccati, yā tassa **mahāsamaṇoti** samaññā jātā. Nissakkavacanañcetam “mahato dhammam sutvānā”ti. **Mahārasanti** vimuttirasassa dāyakattā uḷārarasam. **Sabbaññutaññāṇavarena desitanti** sabbam jānātīti sabbaññū, tassa bhāvo sabbaññūtā. Ñānameva varam, ñāṇesu vā varanti ñāṇavaram, sabbaññūtā ñāṇavaram etassāti sabbaññutaññāṇavaro, bhagavā. Tena sabbaññutaññāṇasaṅkhātaaggañāṇena vā karaṇabhūtena desitam kathitam dhammam sutvānāti yojanā. Yam panettha vattabam, tam paramatthadīpaniyam itivuttakavaṇṇanāyam vuttanayena veditabam. **Magganti** aṭṭhaṅgikam ariyamaggam. **Papajjinti** paṭipajjim. **Amatassa pattiyā**ti nibbānassa adhigamāya upāyabhūtam paṭipajjinti yojanā. **Soti** so bhagavā. **Yogakkhemassa pathassa kovido**ti catūhi yogehi anupaddutassa nibbānassa yo patho, tassa kovido tattha sukusalo. Ayañhettha attho – bhagavato catusaccadesanam sutvā amatādhigamūpāyamaggam aham paṭipajjim paṭipajjanamaggam mayā kataṃ, so eva pana bhagavā sabbathā yogakkhemassa pathassa kovido, parasantāne vā paramanesu kusalo, yassa saṃvidhānamāgama ahampi maggam paṭipajjinti. Ayameva ca therassa aññābyākaraṇagāthā ahoṣīti.

Channattheragāthāvaṇṇanā niṭṭhitā.

10. Puṇṇattheragāthāvaṇṇanā

Sīlamevāti āyasmato puṇṇattherassa gāthā. Kā uppatti? Sopi purimabuddhesu katādhikāro tattha tattha bhava vivaṭṭūpanissayaṃ kusalaṃ upacinanto ito ekanavute kappe buddhasuñṇe loke brāhmaṇakule nibbattivā vayappatto brāhmaṇasippesu nipphattiṃ gantvā kāmesu ādīnavāṃ disvā gharāvāsaṃ pahāya tāpasapabbajjaṃ pabbajitvā himavantappadese paṇṇakuṭiṃ katvā vāsaṃ kappesi. Tassa vasanaṭṭhānassa avidūre ekasmiṃ pabbhāre paccekabuddho ābādhiko hutvā parinibbāyi, tassa parinibbānasamaye mahā āloko ahosi. Taṃ disvā so, “kathaṃ nu kho ayaṃ āloko uppanno” ti vīmaṃsanavasena ito cito ca āhiṇḍanto pabbhāre paccekasambuddhaṃ parinibbutaṃ disvā gandhadārūni saṃkaḍḍhitvā sarīraṃ jhāpetvā gandhodakena upasiñci. Tattheko devaputto antalikkhe ṭhatvā evamāha – “sādhu, sādhu, sappurisa, bahumṃ tayā puññaṃ pasavantena pūritaṃ sugatisaṃvattaniyaṃ kammaṃ tena tvaṃ sugatīsuyeva uppajjissasi, ‘puṇṇo’ ti ca te nāmaṃ bhavissatī” ti. So tena puññaṃkammaṃ devamanussesu saṃsaranto imasmiṃ buddhuppāde sunāparantajanapade supparakapaṭṭane gahapatikule nibbatti, **puṇṇotissa** nāmaṃ ahosi. So vayappatto vāṇijjavasena mahatā satthena saddhiṃ sāvattiṃ gato. Tena ca samayena bhagavā sāvattiyaṃ viharati. Atha so sāvattihi vāsīhi upāsakehi saddhiṃ vihāraṃ gato satthu santike dhammaṃ sutvā paṭiladdhasaddho pabbajitvā vattapaṭivattehi ācariyupajjhāye ārādhento vihāsi. So ekadivasāṃ satthāraṃ upasaṅkamtivā, “sādhu maṃ, bhante bhagavā, saṃkhittena ovādena ovadatu, yamaṃ sutvā sunāparantajanapade vihareyya” nti āha. Tassa bhagavā, “santi kho, puṇṇa, cakkhuviññeyyā rūpā” tiādinā (ma. ni. 3.395; saṃ. ni. 4.88) ovādaṃ datvā sīhanādaṃ nadāpetvā vissajjesi. So bhagavantaṃ vanditvā sunāparantajanapadaṃ gantvā supparakapaṭṭane viharanto samathavipassanaṃ ussukkāpetvā tisso vijjā sacchākāsi. Tena vuttaṃ **apadāne** (apa. therā 1.41.29-44) –

“Pabbhārakūṭaṃ nissāya, sayambhū aparājito;
Ābādhiko ca so buddho, vasati pabbatantare.

“Mama assamasāmantā, panādo āsi tāvade;
Buddhe nibbāyamānamhi, āloko udapajjatha.

“Yāvataṃ vanasaṇḍasmiṃ, acchakokataracchakā;
Vāḷā ca kesarī sabbe, abhigajjimsu tāvade.

“Uppātaṃ tamaṃ disvā, pabbhāraṃ agamāsahaṃ;
Tatthaddasāsiṃ sambuddhaṃ, nibbutaṃ aparājitaṃ.

“Suphullaṃ sālārājaṃva, sataramsiṃva uggataṃ;
Vītaccikaṃva aṅgāraṃ, nibbutaṃ aparājitaṃ.

“Tiṇaṃ katṭhañca pūretvā, citakaṃ tatthakāsahaṃ;
Citakaṃ sukataṃ katvā, sarīraṃ jhāpayiṃ ahaṃ.

“Sarīraṃ jhāpayitvāna, gandhatoyaṃ samokiriṃ;
Antalikkhe ṭhito yakkho, nāmaṃaggahi tāvade.

“Yaṃ pūritaṃ tayā kiccaṃ, sayambhussa mahesino;
Puṇṇako nāma nāmena, sadā hohi tuvaṃ mune.

“Tamhā kāyā cavitvāna, devalokaṃ agacchahaṃ;
Tattha dibbamayo gandho, antalikkhā pavassati.

“Tatrāpi nāmadheyyaṃ me, puṇṇakoti ahū tadā;
Devabhūto manusso vā, saṅkappaṃ pūrayāmaṃ.

“Idaṃ pacchimakam mayhaṃ, carimo vattate bhavo;
Idhāpi puṇṇako nāma, nāmadheyyaṃ pakāsati.

“Tosayitvāna sambuddhaṃ, gotamaṃ sakyapuṅgavaṃ;
Sabbāsava pariññāya, viharāmi anāsavo.

“Ekanavutito kappe, yaṃ kammamakariṃ tadā;
Duggatiṃ nābhijānāmi, tanukiccassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā thero bahū manusse sāsane abhippasādesi. Yato pañcasatamattā purisā upāsakattaṃ pañcasatamattā ca itthiyo upāsikābhāvaṃ paṭivedesuṃ. So tattha rattacandanena candanamālaṃ nāma gandhakuṭiṃ kārāpetvā, “satthā pañcahi bhikkhusatehi saddhiṃ mālaṃ paṭicchātū”ti bhagavantaṃ pupphadūtena nimantesi. Bhagavā ca iddhānubhāvena tattakehi bhikkhūhi saddhiṃ tattha gantvā candanamālaṃ paṭiggahetvā aruṇe anuṭṭhiteyeva paccāgamāsi. Thero aparabhāge parinibbānasamaye aññaṃ byākaronto –

70. “Sīlameva idha aggamaṃ, paññavā pana uttamo;
Manussesu ca devesu, sīlapaññānato jaya”nti. – gāthaṃ abhāsi;

Tattha **sīlanti** sīlanatṭhena sīlaṃ, paṭiṭṭhānatṭhena samādhānatṭhena cāti attho. Sīlañhi sabbaguṇānaṃ paṭiṭṭhā, tenāha – “sīle paṭiṭṭhāya naro sapañño”ti (saṃ. ni. 1.23; peṭako. 22; visuddhi. 1.1). Samādahati ca taṃ kāyavācāavippakiṇṇaṃ karotīti attho. Tayidaṃ sīlameva **aggamaṃ** sabbaguṇānaṃ mūlabhāvato pamukhabhāvato ca. Yathāha – “tasmātiha, tvaṃ bhikkhu, ādimeva visodhehi kusalesu dhammesu. Ko cādi kusalānaṃ dhammānaṃ sīlañca suvisuddha”nti (saṃ. ni. 5.369), “pātimokkhanti mukhametaṃ pamukhameta”nti (mahāva. 135) ca ādi. **Idhāti** nipātamattaṃ. **Paññavāti** ñāṇasampanno. So **uttamo** seṭṭho pavaroti puggalādhiṭṭhānāya gāthāya paññāyayeva seṭṭhabhāvaṃ dasseti. Paññuttarā hi kusalā dhammā. Idāni taṃ sīlapaññānaṃ aggaseṭṭhabhāvaṃ kārānato dasseti “**manussesu ca devesu, sīlapaññānato jaya**”nti ca. Sīlapaññānathetu paṭipakkhajayo kāmakilesajayo hotīti attho.

Puṇṇattheragāthāvaṇṇanā niṭṭhitā.

Sattamavaggavaṇṇanā niṭṭhitā.

8. Aṭṭhamavaggo

1. Vacchapālattheragāthāvaṇṇanā

Susukhumanipuṇatthadassināti āyasmato vacchapālattherassa gāthā. Kā uppatti? Ayampi purimabuddhesu katādhikāro tattha tattha bhava puññāni ācinanto devamanussesu saṃsaranto ito ekanavute kappe brāhmaṇakule nibbattivā brāhmaṇasippesu nipphattiṃ gantvā aggim paricaranto ekadivasam mahatiyā kaṃsapātiyā pāyāsam ādāya dakkhiṇeyyaṃ pariyesanto vipassim bhagavantaṃ ākāse caṅkamantaṃ disvā acchariyabbhutacittajāto bhagavantaṃ abhivādetvā dātukāmataṃ dassesi. Paṭiggahesi bhagavā anukampaṃ upādāya. So tena puññakammena devamanussesu saṃsaranto imasmiṃ buddhuppāde rājagahe vibhavasampannassa brāhmaṇassa putto hutvā nibbatti, **vacchapālotissa** nāmaṃ ahoṣi. So bimbisārasamāgame uruvelakassapattherena iddhipaṭiṭṭhāriyaṃ dassetvā satthu paramanipaccakāre kate taṃ disvā paṭiladdhasaddho pabbajitvā sattāhapabbajito eva vipassanaṃ vaḍḍhetvā chaḷabhiñño ahoṣi. Tena vuttaṃ **apadāne** (apa. thera 1.13.26-34) –

“Suvaṇṇavaṇṇo sambuddho, bāttiṃsavaraḷakkhaṇo;
Pavanā abhinikkhanto, bhikkhusaṅghapurakkhato.

“Mahaccā kaṃsapātiyā, vaḍḍhetvā pāyasam aham;
Āhutiṃ yiṭṭhukāmo so, upanesiṃ baliṃ aham.

“Bhagavā tamhi samaye, lokajetṭho narāsabho;
Caṅkamaṃ susamārūḷho, ambare anilāyane.

“Tañca acchariyaṃ disvā, abbhutaṃ lomahaṃsanam;
Ṭhapayitvā kaṃsapātiṃ, vipassiṃ abhivādayiṃ.

“Tuvaṃ devosi sabbaññū, sadeve sahamānuse;
Anukampaṃ upādāya, paṭiggaṇha mahāmuni.

“Paṭiggahesi bhagavā, sabbaññū lokanāyako;
Mama saṅkappamaññāya, satthā loke mahāmuni.

“Ekanavutito kappe, yaṃ dānamadadiṃ tadā;
Duggatiṃ nābhijānāmi, pāyāsassa idaṃ phalaṃ.

“Ekatālīsito kappe, buddho nāmāsi khattiyo;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana’nti.
Arahattaṃ pana patvā sukheveva attanā nibbānassa adhigatabhāvaṃ vibhāvento –

71. “Susukhumanipuṇatthadassinā, matikusalena nivātavuttinā;
Saṃsevitavuddhasīlinā, nibbānaṃ na hi tena dullabha’nti. –

Imaṃ gāthaṃ abhāsi.

Tattha **susukhumanipuṇatthadassinā**ti ativiya duddasaṭṭhena sukhume, saṅhaṭṭhena nipuṇe saccapaṭiccasamuppādādiatthe aniccatādiṃ oropetvā passatīti susukhumanipuṇatthadassī, tena. **Matikusalenā**ti matiya paññāya kusalena chekena, “evaṃ pavattamānassa paññā vaḍḍhati, evaṃ na vaḍḍhatī”ti dhammavicayasambojjhaṅgapaññāya uppādane kusalena. **Nivātavuttinā**ti sabrahmacārīsu nivātanīcavattanasīlena, vuḍḍhesu navesu ca yathānurūpapaṭipattinā. **Saṃsevitavuddhasīlinā**ti saṃseviṭaṃ āciṇṇaṃ vuddhasīlaṃ saṃsevitavuddhasīlaṃ, taṃ yassa atthi, tena saṃsevitavuddhasīlinā. Atha vā saṃsevitā upāsītā vuddhasīlino etenāti **saṃsevitavuddhasīli**, tena. **Hīti**saddo hetuattho. Yasmā yo nivātavutti saṃsevitavuddhasīlī matikusalo susukhumanipuṇatthadassī ca, tasmā nibbānaṃ na tassa dullabhanti attho. Nivātavuttitāya hi saṃsevitavuddhasīlitāya ca paṇḍitā taṃ ovaditabbaṃ anusāsitabbaṃ maññanti, tesaṅca ovāde ṭhito sayama matikusalatāya susukhumanipuṇatthadassitāya ca vipassanāya kammaṃ karonto nacirasseva nibbānaṃ adhigacchatīti, ayameva ca therassa aññābyākaraṇagāthā ahoṣīti.

Vacchapālattheragāthāvaṇṇanā niṭṭhitā.

2. Ātumattheragāthāvaṇṇanā

Yathā kaḷīro susu vaḍḍhitaggoti āyasmato ātumattherassa gāthā. Kā uppatti? Sopi purimabuddhesu katādhikāro tattha tattha bhava vivaṭṭūpanissayaṃ puññaṃ ācinanto ito ekanavute kappe kulagehe nibbattitvā viññutaṃ patto vipassiṃ bhagavantaṃ antaravīthiyaṃ gacchantaṃ disvā pasannamānaso gandhodakena gandhacuṇṇena ca pūjaṃ akāsi. So tena puññakamma devaloke nibbatta aparāparaṃ sugatīsuveva saṃsaranto kassapassa bhagavato sāsane pabbajitvā

samaṇadhammaṃ akāsi, ñāṇassa pana aparipakkattā visesaṃ nibbattetuṃ nāsakkhi. Atha imasmiṃ buddhuppāde sāvattiyāṃ seṭṭhiputto hutvā nibbatti, **ātumotissa** nāmaṃ ahoṣi. Tassa vayappattassa mātā “puttassa me bhariyaṃ ānessāmā”ti ñātakehi sammantesi. So taṃ upadhāretvā hetusampattiyā codiyamāno “kiṃ mayhaṃ gharāvāsena, idāneva pabbajissāmī”ti bhikkhūnaṃ santikaṃ gantvā pabbaji. Pabbajitampi naṃ mātā uppabbājetukāmā nānāyehi palobheti. So tassā avasaraṃ adatvā attano ajjhāsayāṃ pakāsentō –

72. “Yathā kaḷīro susu vaḍḍhitaggo, dunnikkhāmo hoti pasākhajāto;
Evaṃ ahaṃ bhariyāyānītāya, anumañña maṃ pabbajitōmhi dānī”ti. –

Gāthāṃ abhāsi.

Tattha **kaḷīro**ti aṅkuro, idha pana vaṃsaṅkuro adhippeto. **Susūti** taruṇo. **Vaḍḍhitaggo**ti pavaḍḍhitasākho. **Susuvaḍḍhitaggo**ti vā suṭṭhu vaḍḍhitasākho sañjātapattasākho. **Dunnikkhamoti** veḷugumbato nikkhāmetuṃ nīharituṃ asakkuṇeyyo. **Pasākhajāto**ti jātapasākho, sākhanampi pabbe pabbe uppannaanusākho. **Evaṃ ahaṃ bhariyāyānītāyā**ti yathā vaṃso vaḍḍhitaggo vaṃsantaresu saṃsaṭṭha sākhasākho veḷugumbato dunnīharaṇīyo hoti, evaṃ ahampi bhariyāya mayhaṃ ānītāya puttadhītādivasena vaḍḍhitaggo āsattivasena gharāvāsato dunnīharaṇīyo bhavyeayaṃ. Yathā pana vaṃsakaḷīro asañjātasākhābandho veḷugumbato sunīharaṇīyova hoti, evaṃ ahampi asañjātaputtadārādibandho sunīharaṇīyo homi, tasmā anānītāya eva bhariyāya **anumañña maṃ** attanāva maṃ anujānāpetvā. **Pabbajitōmhi dānī**ti, “idāni pana pabbajito amhi, sādhu suṭṭhū”ti attano nekkhammābhiratiṃ pakāsesi, atha vā “anumañña maṃ pabbajitōmhi dānī”ti mātu katheti. Ayañhettha attho – yadipi tāya pubbe nānumataṃ, idāni pana pabbajito amhi, tasmā anumañña anujānāhi maṃ samaṇabhāveyeva ṭhātuṃ, nāhaṃ tayā nivattaniyoti. Evaṃ pana kathento yathāṭhitova vipassanaṃ vaḍḍhetvā maggapaṭipāṭiyā kilese khepetvā chaḷabhiñño ahoṣi. Tena vuttaṃ **apadāne** (apa. thera 1.13.35-40) –

“Nisajja pāsādavare, vipassim addasaṃ jināṃ;
Kakudhaṃ vilasantaṃva, sabbaññuṃ tamanāsakaṃ.

“Pāsādassāvidūre ca, gacchati lokanāyako;
Pabhā niddhāvate tassa, yathā ca sataraṃsino.

“Gandhodaḷaṅca paggayha, buddhaseṭṭhaṃ samokiriṃ;
Tena cittappasādena, tattha kālaṅkato ahaṃ.

“Ekanavutito kappe, yaṃ gandhodakamākirim;
Duggatiṃ nābhijānāmi, buddhapūjāyidaṃ phalaṃ.

“Ekatiṃse ito kappe, sugandho nāma khattiyo;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana”nti.

Chaḷabhiñño pana hutvā mātaraṃ āpucchitvā tassā pekkhantiyāyeva ākāseṇa pakkāmi. So arahattappattiyā uttarikālampi antarantarā tameva gāthāṃ paccudāhāsi.

Tattha “pabbajitōmhi”ti imināpadesena ayampi therassa aññābyākaraṇagāthā ahoṣi attano santāne rāgādimalassa pabbajitabhāvadīpanato. Tenāha bhagavā – “pabbājayamattano malaṃ, tasmā ‘pabbajito’ti vuccatī”ti (dha. pa. 388).

Ātumattheragāthāvaṇṇanā niṭṭhitā.

3. Māṇavattheragāthāvaṇṇanā

Jiṇṇaṅca disvā dukhitaṅca byādhitanti āyasmato māṇavattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭūpanissayaṃ kusalaṃ upacinanto ito ekanavute kappe brāhmaṇakule nibbattitvā lakkhaṇadharo hutvā vipassissa bhagavato abhijātiyā lakkhaṇāni pariggahetvā pubbanimittāni sāvetvā, “ekamsena ayaṃ buddho bhavissatī”ti byākaritvā nānāyehi thometvā abhivādetvā padakkhiṇaṃ katvā pakkāmi. So tena puññakammena sugatīsuyeva saṃsaranto imasmiṃ buddhuppāde sāvattiyaṃ brāhmaṇamahāsālassa gehe nibbattitvā yāva sattavassāni, tāva antoghareyeva vaḍḍhitvā sattame saṃvacchare upanayanatthaṃ uyyānaṃ nīto antarāmagge jiṇṇāturamate disvā tesam adiṭṭhapubbattā te parijane pucchitvā jarārogamaṇasabhāvaṃ sutvā sañjātasamvego tato anivattanto vihāraṃ gantvā satthu santike dhammaṃ sutvā mātāpitaro anujānāpetvā pabbajitvā vipassanaṃ paṭṭhapetvā nacirasseva arahattaṃ pāpuṇi. Tena vuttaṃ **apadāne** (apa. thera 1.13.41-64) –

“Jāyamāne vipassimhi, nimittaṃ byākarim̐ ahaṃ;
Nibbāpayiṅca janataṃ, buddho loke bhavissati.

“Yasmiṅca jāyamānasmiṃ, dasasahassi kampati;
So dāni bhagavā satthā, dhammaṃ deseti cakkhumā.

“Yasmiṅca jāyamānasmiṃ, āloko vipulo ahu;
So dāni bhagavā satthā, dhammaṃ deseti cakkhumā.

“Yasmiṅca jāyamānasmiṃ, saritāyo na sandayum̐;
So dāni bhagavā satthā, dhammaṃ deseti cakkhumā.

“Yasmiṅca jāyamānasmiṃ, avīcaggi na pajjali;
So dāni bhagavā satthā, dhammaṃ deseti cakkhumā.

“Yasmiṅca jāyamānasmiṃ, pakkhisāṅgho na sañcari;
So dāni bhagavā satthā, dhammaṃ deseti cakkhumā.

“Yasmiṅca jāyamānasmiṃ, vātakkhandho na vāyati;
So dāni bhagavā satthā, dhammaṃ deseti cakkhumā.

“Yasmiṅca jāyamānasmiṃ, sabbaratanāni jotayum̐;
So dāni bhagavā satthā, dhammaṃ deseti cakkhumā.

“Yasmiṅca jāyamānasmiṃ, sattāsum̐ padavikkamā;
So dāni bhagavā satthā, dhammaṃ deseti cakkhumā.

“Jātamatto ca sambuddho, disā sabbā vilokayi;
Vācāsabhimudīresi, esā buddhāna dhammatā.

“Saṃvejayitvā janataṃ, thavitvā lokanāyakaṃ;
Sambuddhaṃ abhivādetvā, pakkāmiṃ pācināmukho.

“Ekanavutito kappe, yaṃ buddhamabhithomayim̐;
Duggatiṃ nābhijānāmi, thomanāya idaṃ phalaṃ.

“Ito navutikappamhi, sammukhāthavikavhayo;
Sattaratanasampanno, cakkavattī mahabbalo.

“Pathavīdubhi nāma, ekūnanavutimhito;
Sattaratanasampanno, cakkavattī mahabbalo.

“Aṭṭhāsītīmhito kappe, obhāso nāma khattiyo;
Sattaratanasampanno, cakkavattī mahabbalo.

“Sattāsītīmhito kappe, saritacchedanavhayo;
Sattaratanasampanno, cakkavattī mahabbalo.

“Agginibbāpano nāma, kappānaṃ chaḷasītiyā;
Sattaratanasampanno, cakkavattī mahabbalo.

“Gatipacchedano nāma, kappānaṃ pañcasītiyā;
Sattaratanasampanno, cakkavattī mahabbalo.

“Rājā vātasamo nāma, kappānaṃ cullasītiyā;
Sattaratanasampanno, cakkavattī mahabbalo.

“Ratanapajjalo nāma, kappānaṃ teasītiyā;
Sattaratanasampanno, cakkavattī mahabbalo.

“Padavikkamano nāma, kappānaṃ dveasītiyā;
Sattaratanasampanno, cakkavattī mahabbalo.

“Rājā vilokano nāma, kappānaṃ ekasītiyā;
Sattaratanasampanno, cakkavattī mahabbalo.

“Girasāroti nāmena, kappesītīmhi khattiyo;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana’nti.

Adhigatārahatto pana bhikkhūhi, “kena, tvaṃ āvuso, saṃvegena atidaharova samāno pabbajito”ti
pucchito attano pabbajjānimittakittanāpadesena aññaṃ byākaronto –

73. “Jiṇṇaṅca disvā dukhitaṅca byādhitam, mataṅca disvā gatamāyusaṅkhayaṃ;
Tato ahaṃ nikkhamitūna pabbajim, pahāya kāmāni manoramāni”ti. –

Gāthaṃ abhāsi.

Tattha **jiṇṇanti** jarāya abhibhūtaṃ, khaṇḍiccapāliccavalittacatādīhi samaṅgībhūtaṃ. **Dukhitanti** dukkhappattaṃ. **Byādhitanti** gilānaṃ. Ettha ca “byādhitā”nti vuttepi dukkhappattabhāvo siddho, “dukhita”nti vacanaṃ tassa bāḷhagilānabhāvaparidīpanatthaṃ. **Matanti** kālaṅkataṃ, yasmā kālaṅkato āyuno khayam vayam bhedaṃ gato nāma hoti, tasmā vuttaṃ “**gatamāyusaṅkhaya**”nti. Tasmā jiṇṇabyādhitānaṃ diṭṭhattā, “ime jarādayo nāma na imesaṃyeva, atha kho sabbasādhāraṇā, tasmā ahampi jarādike anativatto”ti saṃviggaṭṭā. **Nikkhamitūnāti** nikkhamitvā, ayameva vā pāṭho. Pabbajjādhippāyena gharato niggantvā. **Pabbajinti** satthu sāsane pabbajam upagato. **Pahāya kāmāni manoramāni**ti iṭṭhakantādibhāvato avītarāgānaṃ mano ramentīti manorame vatthukāme pajahitvā, tappaṭṭibaddhassa chandarāgassa ariyamaggena samucchindanena nirapekkhabhāvena chaḍḍetvāti attho.

Kāmānaṃ pahānakittanamukhena cetaṃ therassa aññābyākaraṇaṃ ahosi. Māṇavakāle pabbajitattā imassa therassa **māṇavot**veva samañña jātāti.

Māṇavattheragāthāvaṇṇanā niṭṭhitā.

4. **Suyāmanattheragāthāvaṇṇanā**

Kāmacchando ca byāpādoti āyasmato suyāmanattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto ito ekanavute kappe vipassissa bhagavato kāle dhaññavatīnagare brāhmaṇakule nibbattivā vayappatto brāhmaṇasippesu nipphattiṃ patvā brāhmaṇamante vāceti. Tena ca samayena vipassī bhagavā mahatā bhikkhusaṅghena saddhiṃ dhaññavatīnagaraṃ piṇḍāya pavitṭho hoti. Taṃ disvā brāhmaṇo pasannacitto attano gehaṃ netvā āsanaṃ paññāpetvā tassūpari pupphasanthāraṃ santharivā adāsi, satthari tattha nisinne paṇītena āhārena santappesi, bhuttāviṇca pupphagandhena pūjesi. Satthā anumodanaṃ vatvā pakkāmi. So tena puññakamma devaloke nibbattivā aparāparaṃ puññāni katvā devamanussesu saṃsaranto imasmiṃ buddhuppāde vesāliyaṃ aññatarassa brāhmaṇassa putto hutvā nibbatti, **suyāmanot**issa nāmaṃ ahosi. So vayappatto tiṇṇaṃ vedānaṃ pāragū paramanissamayutto hutvā gehavāsīnaṃ kāmūpabhogaṃ jigucchitvā jhānaninno bhagavato vesāligamane paṭiladdhasaddho pabbajitvā khurageyeva arahattaṃ pāpuṇi. Tena vuttaṃ **apadāne** (apa. therā 1.13.65-74) –

“Nagare dhaññavatiyā, ahoṣiṃ brāhmaṇo tadā;
Lakkhaṇe itihāse ca, sanighaṇḍusakeṭubhe.

“Padako veyyākaraṇo, nimittakovido ahaṃ;
Mante ca sisse vācesim, tiṇṇaṃ vedāna pāragū.

“Pañca uppalahatthāni, piṭṭhiyaṃ ṭhapitāni me;
Āhutiṃ yiṭṭhukāmohaṃ, pitumātusamāgame.

“Tadā vipassī bhagavā, bhikkhusaṅghapurakkhato;
Obhāsento disā sabbā, āgacchati narāsabho.

“Āsanaṃ paññāpetvāna, nimantetvā mahāmuniṃ;
Santharivāna taṃ pupphaṃ, abhinesim sakaṃ gharaṃ.

“Yaṃ me atthi sake gehe, āmisam paccupatṭhitaṃ;
Tāhaṃ buddhassa pādāsīm, pasanno sehi pāṇibhi.

“Bhuttāviṃ kālamaññāya pupphahatthamadāsahaṃ;
Anumoditvāna sabbaññū, pakkāmi uttarāmukho.

“Ekanavutito kappe, yaṃ pupphamadadiṃ tadā;
Duggatiṃ nābhijānāmi, pupphadānassidaṃ phalaṃ.

“Anantaraṃ ito kappe, rājāhuṃ varadassano;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana’nti.
Arahattaṃ pana patvā nīvaraṇappahānakittanamukhena aññaṃ byākaronto –

74. “Kāmacchando ca byāpādo, thinamiddhañca bhikkhuno;
Uddhaccam vicikicchā ca, sabbasova na vijjati”ti. – gātham abhāsi;

Tattha **kāmacchandoti** kāmesu chando, kāmo ca so chando cātipi kāmacchando, kāmarāgo. Idha pana sabbopi rāgo kāmacchando aggamaggavajjhassāpi adhippetattā, tenāha “**sabbasova na vijjati**”ti. Sabbepi hi tebhūmakadhammā kāmanīyatthena kāmā, tattha pavatto rāgo kāmacchando, tenāha bhagavā – “āruppe kāmacchandanivaraṇam paṭicca thinamiddhanivaraṇam uddhaccanivaraṇam avijjānivaraṇam uppajjati”ti (paṭṭhā. 3.8.8) byāpajjati cittaṃ pūtibhāvaṃ gacchati etenāti **byāpādo**, “anattam me acari”tiādinayappavatto (dha. sa. 1066; vibha. 909) āghāto. Thinaṃ cittassa akalyatā anussāhasaṃhananam, middham kāyassa akalyatā asattivighāto, tadubhayampi thinañca middhañca **thinamiddham**, kiccāhārapaṭipakkhānam ekatāya ekam katvā vuttaṃ. Uddhatabhāvo **uddhaccam**, yena dhammena cittaṃ uddhatam hoti avūpasantam, so cetaso vikkhepo uddhaccam. Uddhaccaggahaṇeneva cettha kiccāhārapaṭipakkhānam samānatāya kukkucampi gahitamevāti daṭṭhabbam. Tam pacchānutāpalakkaṇam. Yo hi katākatakusalākusalūpanissayo vippaṭisāro, tam kukkucam. **Vicikicchāti**, “evaṃ nu kho na nu kho”ti saṃsayam āpajjati, dhammasabhāvaṃ vā vicinanto kicchati kilamati etāyāti vicikicchā, buddhādivatthuko saṃsayo. **Sabbasoti** anavasesato. **Na vijjati**ti natthi, maggena samucchinnattā na upalabbhati. Idañca padadvayaṃ paccekam yojetabbam ayañhettha yojanā – yassa bhikkhuno tena tena ariyamaggena samucchinnattā kāmacchando ca byāpādo ca thinamiddhañca uddhaccakukkuccañca vicikicchā ca sabbasova na vijjati, tassa na kiñci karaṇīyam, katassa vā paticayoti aññāpadesena aññam byākaroti. Pañcasu hi nīvaraṇesu maggena samucchinnesu tadekatṭhatāya sabbepi kilesā samucchinnāyeva honti. Tenāha – “sabbete bhagavanto pañca nīvaraṇe pahāya cetaso upakkilese”ti (dī. ni. 2.146).

Suyāmanattheragāthāvaṇṇanā niṭṭhitā.

5. Susāradattheragāthāvaṇṇanā

Sādhu suvihitāna dassananti āyasmato susāradattherassa gāthā. Kā uppatti? So kira padumuttarassa bhagavato kāle brāhmaṇakule nibbattivā vijjāpadesu nipphattiṃ gantvā kāmesu ādīnavam disvā gharāvāsam pahāya tāpasapabbajjam pabbajitvā himavantappadese araññāyatane assamaṃ kāretvā vihāsi. Atha nam anuggaṇhanto padumuttaro bhagavā bhikkhācārelāyaṃ upasaṅkami. So dūratova disvā pasannamānaso paccuggantvā pattaṃ gahetvā madhurāni phalāni pakkhipitvā adāsi. Bhagavā tam paṭiggahetvā anumodanam katvā pakkāmi. So tena puññakammena devamanussesu saṃsaranto imasmim buddhuppāde dhammasenāpatino ñātibrahmaṇakule nibbattivā mandapaññattā **susāradoti** gahitanāmo aparabhāge dhammasenāpatissa santike dhammam sutvā paṭiladdhasaddho pabbajitvā vipassanam vaḍḍhetvā arahattam pāpuṇi. Tena vuttaṃ **apadāne** (apa. thera 1.13.75-83) –

“Ajjhāyako mantadharo, tiṇṇam vedāna pārāgū;
Himavantassāvidūre, vasāmi assame aham.

“Agghitthañca me atthi, puṇḍarīkaphalāni ca;
Puṭake nikkhipitvāna, dumagge laggitam mayā.

“Padumuttaro lokavidū, āhutīnam paṭiggaho;
Mamuddharitukāmo so, bhikkhanto mamupāgami.

“Pasannacitto sumano, phalam buddhassadāsaham;
Vittisañjanano mayham, diṭṭhadhammasukhāvaho.

“Suvaṇṇavaṇṇo sambuddho, āhutīnam paṭiggaho;

Antalikkhe ðhito satthā, imaṃ gāthaṃ abhāsatha.

“Iminā phaladānena, cetanāpaṇidhīhi ca;
Kappānaṃ satahassaṃ, duggatiṃ nupapajjasi.

“Teneva sukkamūlena, anubhotvāna sampadā;
Pattomhi acalaṃ ðhānaṃ, hitvā jayaparājayaṃ.

“Ito sattasate kappe, rājā āsiṃ sumaṅgalo;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana”nti.
Arahattaṃ pana patvā sappurisūpanissayānisamsakittanāpadesena aññaṃ byākaronto –

75. “Sādhu suvihitāna dassanaṃ, kaṅkhā chijjati buddhi vaḍḍhati;
Bālampi karonti paṇḍitaṃ, tasmā sādhu satam samāgamo”ti. –

Gāthaṃ abhāsi.

Tattha **sādhū**ti sundaraṃ, bhaddakanti attho. **Suvihitāna dassananti** suvihitānaṃ dassanaṃ. Gāthāsukhatthaṃ anusvāralopo kato. Sīlādiguṇehi susaṃvihitattabhāvānaṃ parānuddayāya suṭṭhu vihitadhammadesanānaṃ ariyānaṃ dassanaṃ sādūti yojanā. “Dassana”nti nidassanamattaṃ daṭṭhabbaṃ savanādīnampi bahukārattā. Vuttañhetam bhagavatā –

“Ye te bhikkhū sīlasampannā samādhisampannā paññāsampannā vimuttisampannā vimuttiñānadassanasampannā ovādakā viññāpakā sandassakā samādapakā samuttejakā sampahaṃsakā alaṃsamakkhātāro saddhammassa, dassanampāham, bhikkhave, tesam bhikkhūnaṃ bahūpakāraṃ vadāmi, savanaṃ...pe... upasaṅkamaṃ...pe... payirupāsanaṃ...pe... anussaraṃ...pe... anupabbajjampāham, bhikkhave, tesam bhikkhūnaṃ bahūpakāraṃ vadāmi”ti (itivu. 104).

Dassanamūlakattā vā itaresaṃ dassanamevettha vuttaṃ, **kaṅkhā chijjati**tiādi tattha kāraṇavacanaṃ. Tādīsānañhi kalyāṇamittānaṃ dassane sati viññujātiko atthakāmo kulaputto te upasaṅkamati payirupāsati “kiṃ, bhante, kusalaṃ, kiṃ akusala”ntiādinā (ma. ni. 3.296) pañhaṃ pucchati. Te cassa anekavihitesu kaṅkhāṭṭhānīyesu kaṅkhaṃ paṭivinodenti, tena vuttaṃ “kaṅkhā chijjati”ti. Yasmā ca te dhammadesanāya tesam kaṅkhaṃ paṭivinodetvā pubbabhāge kamma pathasammādiṭṭhiṃ vipassanāsammādiṭṭhiṃca uppādentī, tasmā tesam **buddhi vaḍḍhati**. Yadā pana te vipassanaṃ vaḍḍhetvā saccāni paṭivijjhanti, tadā soḷasavatthukā aṭṭhavatthukā ca vicikicchā chijjati samucchijjati, nipariyāyena paññā buddhi vaḍḍhati. Bālyasamatikkamanato te paṇḍitā honti. So tehi buddhiṃ vaḍḍheti, **bālampi karonti paṇḍitanti**. **Tasmā**tiādi nigamaṃ, yasmā sādūnaṃ dassanaṃ vuttanayena kaṅkhā chijjati buddhi vaḍḍhati, te bālaṃ paṇḍitaṃ karonti, tasmā tena kāraṇena **sādhu** sundaraṃ **satam** sappurisānaṃ ariyānaṃ **samāgamo**, tehi samodhānaṃ sammā vaḍḍhananti attho.

Susāradattheragāthāvaṇṇanā niṭṭhitā.

6. Piyañjahattheragāthāvaṇṇanā

Uppatantesu nipateti āyasmato piyañjahattherassa gāthā. Kā uppatti? Sopi purimabuddhesu katādhikāro tattha tattha bhava vivaṭṭūpanissayaṃ puññaṃ upacinanto ito ekanavute kappe vipassissa bhagavato kāle himavante rukkhadevatā hutvā pabbatantare vasanto devatāsamāgamesu

appānubhāvatāya parisapariyante t̥hatvā dhammaṃ sutvā satthari paṭiladdhasaddho ekadivasam suvisuddham ramaṇīyam gaṅgāyam pulinappadesam disvā satthu guṇe anussari – “itopi suvisuddhā satthu guṇā anantā aparimeyyā cā”ti, evaṃ so satthu guṇe ārabba cittaṃ pasādetvā tena puññakamma devamanussesu saṃsaranto imasmim buddhuppāde vesāliyam licchavirājakule nibbattitvā vayappatto yuddhasoṇḍo aparājitasaṅgāmo amittānaṃ piyahānikaraṇena **piyañjahoti** paññāyittha. So satthu vesāligamane paṭiladdhasaddho pabbajitvā araṇṇe vasamāno vipassanaṃ vaḍḍhetvā arahattaṃ pāpuṇi. Tena vuttaṃ **apadāne** (apa. therā 1.13.84-90) –

“Pabbate himavantamhi, vasāmi pabbatantare;
Pulinaṃ sobhanaṃ disvā, buddhaseṭṭhaṃ anussariṃ.

“Ñāṇe upanidhā natthi, saṅkhāraṃ natthi satthuno;
Sabbadhammaṃ abhiññāya, ñāṇena adhimuccati.

“Namo te purisājañña, namo te purisuttama;
Ñāṇena te samo natthi, yāvata ñāṇamuttamaṃ.

“Ñāṇe cittaṃ pasādetvā, kappam saggaṃhi modahaṃ;
Avasesesu kappesu, kusalam caritaṃ mayā.

“Ekanavutito kappe, yaṃ saññamalabhiṃ tadā;
Duggatiṃ nābhijānāmi, ñāṇasaññāyidaṃ phalaṃ.

“Ito sattatikappamhi, eko pulinapupphiyo;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā “andhaputhujjanānaṃ paṭipattito vidhurā ariyānaṃ paṭipattī”ti imassa atthassa dassanavasena aññaṃ byākaraṇto –

76. “Uppatantesu nipate, nipatantesu uppate;
Vase avasamānesu, ramamānesu no rame”ti. – gāthaṃ abhāsi;

Tattha **uppatantesūti** uṇṇamantesu, sattesu mānuddhaccathambhasārambhādīhi attukkaṃsanena anupasantesu. **Nipateti** nameyya, tesaññeva pāpadhammānaṃ parivajjanena nivātavutti bhaveyya. **Nipatantesūti** oṇṇamantesu, hīnādhimuttikatāya kosajjena ca guṇato nihīyamānesu. **Uppateti** uṇṇameyya, pañītādhimuttikatāya vīriyārambhena ca guṇato ussukkeyya. Atha vā **uppatantesūti** utṭhahantesu, kilesesu pariyuṭṭhānavasena sīsaṃ ukkhipantesu. **Nipateti** paṭisaṅkhānabalena yathā te na uppajjanti, tathā anurūpapaccavekkhaṇāya nipateyya, vikkhambheyya ceva samucchindeyya ca. **Nipatantesūti** paripatantesu, ayonisomanasikāresu vīriyapayogamandatāya vā yathāraddhesu samathavipassanādhammesu hāya mānesu. **Uppateti** yonisomanasikārena vīriyārambhasampadāya ca te upaṭṭhāpeyya uppādeyya vaḍḍheyya ca. **Vase avasamānesūti** sattesu maggabrahmacariyavāsaṃ ariyavāsaṃ avasantesu sayam taṃ vāsaṃ vaseyyāti, ariyesu vā kilesavāsaṃ dutiyakavāsaṃ avasantesu yena vāsena te avasamānā nāma hontī, sayam tathā vase. **Ramamānesu no rameti** sattesu kāmaguṇaratiyā kilesaratiyā ramantesu sayam tathā no rame naṃ rameyya, ariyesu vā nirāmisāya jhānādiratiyā ramamānesu sayampi tathā rame, tato aññāthā pana kadāci pi no rame nābhiraṃmeyya vāti attho.

Piyañjahattheragāthāvaṇṇanā niṭṭhitā.

7. Hatthārohaputtattheragāthāvaṇṇanā

Idaṃ pure cittaṃacāri cārikanti āyasmato hatthārohaputtattherassa gāthā. Kā uppatti? So kira purimabuddhesu katādhikāro tattha tattha bhava vivaṭṭūpanissayaṃ puññaṃ upacinanto vipassissa bhagavato kāle kulagehe nibbattitvā viññutaṃ patto ekadivasam satthāraṃ bhikkhusaṅghaparivutaṃ vihārato nikkhantaṃ disvā pasannacitto pupphehi pūjaṃ katvā pañcapaṭiṭṭhitena vanditvā padakkhiṇaṃ katvā pakkāmi. So tena puññakammena devamanussesu saṃsaranto imasmiṃ buddhuppāde sāvattiyam hatthārohakule nibbattitvā viññutaṃ patto hatthisippe nipphattiṃ agamāsi. So ekadivasam hatthiṃ sikkhāpento nadītūraṃ gantvā hetusampattiyā codiyamāno “kiṃ mayhaṃ iminā hatthidamanena, attānaṃ damanameva vara”nti cintetvā bhagavantaṃ upasankamitvā dhammaṃ sutvā paṭiladdhasaddho pabbajitvāva cariyānukūlaṃ kammaṭṭhānaṃ gahetvā vipassanāya kammaṃ karonto ciraparicayena kammaṭṭhānato bahiddhā vidhāvantaṃ cittaṃ cheko hatthācariyo viya aṅkusena caṇḍamattavaravāraṇaṃ paṭisaṅkhānaaṅkusena niggaṇhanto “**idaṃ pure cittaṃacāri cārika**”nti gāthaṃ abhāsi.

77. Tattha **idanti** vuccamānassa cittassa attapaccakkhatāya vuttaṃ. **Pureti** niggaḥakālato pubbe. **Acāri**ti vicari, anavaṭṭhitatāya nānārammaṇesu paribbhāmi. **Cārikanti** yathākāmacariyaṃ. Tenāha “**yenicchakaṃ yatthakāmaṃ yathāsukha**”nti. **Tanti** taṃ cittaṃ. **Ajjāti** etarahi. **Niggaḥessāmīti** niggaṇhissāmi, nibbisevanam karissāmi. **Yonisoti** upāyena. Yathā kiṃ? **Hatthippabhinnam viya aṅkusaggaho**. Idaṃ vuttaṃ hoti – idaṃ mama cittaṃ nāma ito pubbe rūpādīsu ārammaṇesu yena yena ramitum icchati, tassa tassa vasena yenicchakaṃ, yattha yattha cassa kāmo, tassa tassa vasena yatthakāmaṃ, yathā yathā vicarantassa sukhaṃ hoti, tatheva caraṇato yathāsukhaṃ dīgharattaṃ cārikaṃ acari, taṃ ajjapāhaṃ bhinnamadammatahatthiṃ hatthācariyasaṅkhāto cheko aṅkusaggaho aṅkusena viya yonisomanasikārena niggaḥessāmi, nāssa vītikkamitum dassāmīti. Evaṃ vadanto eva ca thero vipassanaṃ vaḍḍhetvā arahattaṃ sacchākāsi. Tena vuttaṃ **apadāne** (apa. thera 1.13.91-96) –

“Suvaṇṇavaṇṇo sambuddho, vipassī dakkhiṇāraho;
Purakkhato sāvakehi, āramā abhinikkhami.

“Disvānaḥam buddhasetṭhaṃ, sabbaññum tamanāsakaṃ;
Pasannacitto sumano, gaṇṭhipupphaṃ apūjayiṃ.

“Tena cittappasādena, dvipadindassa tādino;
Haṭṭho haṭṭhena cittena, puna vandim tathāgataṃ.

“Ekanavutito kappe, yaṃ pupphamabhiropayim;
Duggatiṃ nābhijānāmi, buddhapūjāyidaṃ phalaṃ.

“Ekatālīsito kappe, caraṇo nāma khattiyo;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana”nti.
Ayameva ca therassa aññābyākaraṇagāthā ahoṣīti.

Hatthārohaputtattheragāthāvaṇṇanā niṭṭhitā.

8. Meṇḍasirattheragāthāvaṇṇanā

Anekajātisaṃsāranti āyasmato meṇḍasirattherassa gāthā. Kā uppatti? Sopi kira purimabuddhesu katādhikāro tattha tattha bhava vivaṭṭūpanissayāni puññāni karonto ito ekanavute kappe brāhmaṇakule nibbattitvā vayappatto kāme pahāya isipabbajjaṃ pabbajitvā mahatā isigaṇena saddhiṃ himavante vasanto satthāraṃ disvā pasannamānaso isigaṇena padumāni āharāpetvā satthu pupphapūjaṃ katvā sāvake appamādapatiṭṭhiyaṃ ovaditvā kālam katvā devaloke nibbato aparāparaṃ saṃsaranto imasmiṃ buddhuppāde sākete gahapatikule nibbatti, tassa meṇḍasirikkhasātāya **meṇḍasirotveva** samaññā ahoṣi.

So bhagavati sākete añjanavane viharante satthāraṃ upasānkamitvā paṭiladdhasaddho pabbajitvā samathavipassanāsu kammaṃ karonto chaḷabhiñño ahoṣi. Teva vuttaṃ **apadāne** (apa. thera 1.13.97-105) –

“Himavantassāvidūre, gotamo nāma pabbato;
Nānārukkhehi sañchanno, mahābhūtagaṇālayo.

“Vemajjhamhi ca tassāsi, assamo abhinimmitto;
Purakkhato sasissehi, vasāmi assame ahaṃ.

“Āyantu me sissagaṇā, padumaṃ āharantu me;
Buddhapūjaṃ karissāmi, dvīpadindassa tādino.

“Evanti te paṭissutvā, padumaṃ āharimṣu me;
Tathā nimittaṃ katvāhaṃ, buddhassa abhiropayim.

“Sisse tadā samānetvā, sādhuṃ anusāsahaṃ;
Mā kho tumhe pamajjittha, appamādo sukhāvaho.

“Evaṃ samanūsāsivā, te sisse vacanakkhame;
Appamādaguṇe yutto, tadā kālaṅkato ahaṃ.

“Ekanavutito kappe, yaṃ pupphamabhiropayim;
Duggatiṃ nābhijānāmi, buddhapūjāyidaṃ phalaṃ.

“Ekapaññāsakappamhi, rājā āsim jaluttamo;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana’nti.
So attano pubbenivāsaṃ anussaranto –

78. “Anekajātisaṃsāraṃ, sandhāvissaṃ anibbisaṃ;
Tassa me dukkhajātassa, dukkhakkhandho aparaddho’’ti. – gāthaṃ abhāsi;

Tattha **anekajātisaṃsāranti** anekajātisatasahasasānkhyāya idaṃ saṃsāravattaṃ, addhuno adhippetattā accantasāyogekavacanaṃ. **Sandhāvissanti** saṃsarim, aparāparaṃ cavanuppajjanavasena paribbhamim. **Anibbissanti** tassa nivattakaññaṃ avindanto alabhanto. **Tassa meti** evaṃ saṃsarantassa me. **Dukkhajātassāti** jātiādivasena uppannadukkhassa, tissannaṃ vā dukkhatānaṃ vasena dukkhasabhāvassa. **Dukkhakkhandhoti** kammakilesavipākavaṭṭappakāro dukkharāsi. **Aparaddhoti** arahattamaggappattito paṭṭhāya paribbhaṭṭho cuto na abhinibbattissati. “Aparatṭho’’ti vā pāṭho, apagatasamiddhito samucchinnakāraṇattā apagatoti attho. Idameva ca therassa aññābyākaraṇaṃ ahoṣi.

Meṇḍasirattheragāthāvaṇṇanā niṭṭhitā.

9. Rakkhitattheragāthāvaṇṇanā

Sabbo rāgo pahīno meti āyasmato rakkhitattherassa gāthā. Kā uppatti? Ayaṃ kira padumuttarassa bhagavato kāle kulagehe nibbattitvā viññutaṃ patto ekadivasaṃ satthu dhammadesanaṃ sutvā pasannamānaso desanāññaṃ ārabha thomaṃ akāsi. Satthā tassa cittappasādaṃ oloketvā “ayaṃ ito satahasakappamatthake gotamassa nāma sammāsambuddhassa rakkhito nāma sāvako bhavissati’’ti byākāsi. So taṃ sutvā bhiyyosomattāya pasannamānaso aparāparaṃ puññāni katvā devamanussesu

saṃsaranto imasmiṃ buddhuppāde devadahanigame sākiyarājakule nibbatti, **rakkhitotissa** nāmaṃ ahoṣi. So ye sākiyakoliyarājūhi bhagavato parivāratthāya dinnā pañcasatarājakumārā pabbajitā, tesam aññataro. Te pana rājakumārā na saṃvegena pabbajitattā ukkaṇṭhābhībhitā yadā satthārā kuṇāladahatiraṃ netvā **kuṇārajātakadesanāya** (jā. 2.21.kuṇārajātaka) itthīnaṃ dosavibhāvanena kāmesu ādīnaṃ pakāsetvā kammaṭṭhāne niyojitā, tadā ayampi kammaṭṭhānaṃ anuyūñjanto vipassanaṃ vaḍḍhetvā arahattaṃ pāpuṇi. Tena vuttaṃ **apadāne** (apa. thera 1.14.1-9) –

“Padumuttaro nāma jino, lokajeṭṭho narāsabho;
Mahato janakāyassa, deseti amataṃ padaṃ.

“Tassāhaṃ vacanaṃ sutvā, vācāsabhimudīritaṃ;
Añjaliṃ paggahevāna, ekaggo āsahaṃ tadā.

“Yathā samuddo udadhīnamaggo, nerū nagānaṃ pavaro siluccayo;
Tattheva ye cittavasena vattare, na buddhaññassa kalam upenti te.

“Dhammavidhiṃ ṭhapetvāna, buddho kāruṇiko isi;
Bhikkhusaṅghe nisīditvā, imā gāthā abhāsatha.

“Yo so ñānaṃ pakittesi, buddhamhi lokanāyake;
Kappānaṃ satasahassaṃ, duggatiṃ na gamissati.

“Kilese jhāpayitvāna, ekaggo susamāhito;
Sobhito nāma nāmena, hessati satthu sāvako.

“Paññāse kappasahassee, sattevāsum yasuggatā;
Sattaratanasampannā, cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana’nti.
Arahattaṃ pana patvā attano pahīnakilese paccavekkhanto **“sabbo rāgo”**ti gāthaṃ abhāsi.

79. Tattha **“sabbo rāgo”**ti kāmarāgādippabhedo sabbopi rāgo. **Pahīnoti** ariyamaggabhāvanāya samucchadappahānavasena pahīno. **Sabbo dosoti** āghātavatthukādibhāvena anekabhedabhinno sabbopi byāpādo. **Samūhatoti** maggena samugghāṭito. **Sabbo me vigato mohoti** “dukkhe aññāna”ntiadinā (dha. sa. 1067; vibha. 909) vatthubhedena atṭhabhedo, saṃkilesavatthuvibhāgena anekavibhāgo sabbopi moho maggena viddhamṣitattā mayhaṃ vigato. **Sitibhūtosmi nibbutoti** evaṃ mūlakilesappahānena tadekaṭṭhatāya saṃkilesānaṃ sammadeva paṭippassaddhattā anavasesakilesadarathapariñābhāvato sītibhāvaṃ patto, tato eva sabbaso kilesaparinibbānena parinibbuto ahaṃ asmi bhavāmīti aññaṃ byākāsi.

Rakkhitattheragāthāvaṇṇanā niṭṭhitā.

10. Uggattheragāthāvaṇṇanā

Yaṃ mayā pakataṃ kammanti āyasmato uggattherassa gāthā. Kā uppatti? Ayampi purimabuddhesu katādhikāro tattha tattha bhava puññāni karonto ito ekatiṃse kappe sikhissa bhagavato kāle kulagehe nibbattitvā viññutaṃ patto ekadivasam sikhim bhagavantaṃ passitvā pasannamānaso ketakapupphehi pūjaṃ akāsi. So tena puññakamma devaloke nibbattitvā aparāparaṃ sugatīsuyeva saṃsaranto imasmiṃ buddhuppāde kosalaratṭhe ugganigame seṭṭhiputto hutvā nibbatti, **uggotvevassa** nāmaṃ ahoṣi. So viññutaṃ patto bhagavati tasmim nigame bhaddārāme viharante vihāraṃ gantvā satthu santike dhammaṃ sutvā paṭiladdhasaddho pabbajitvā vipassanāya kammaṃ karonto nacirasessa

arahattaṃ pāpuṇi. Tena vuttaṃ **apadāne** (apa. thera 1.14.10-16) –

“Vinatānadiyā tīre, pilakkhu phalīto ahu;
Tāhaṃ rukkhāṃ gavesanto, addasaṃ lokanāyakaṃ.

“Ketakaṃ pupphitaṃ disvā, vaṇṭe chetvānaṃ tadā;
Buddhassa abhiropesiṃ, sikhino lokabandhuno.

“Yena ñāṇena pattosi, accutaṃ amataṃ padaṃ;
Taṃ ñāṇaṃ abhipūjemi, buddhaseṭṭha mahāmuni.

“Ñāṇaṃhi pūjaṃ katvāna, pilakkhumaddasaṃ ahaṃ;
Paṭiladdhomhi taṃ paññaṃ, ñāṇapūjāyidaṃ phalaṃ.

“Ekatiṃse ito kappe, yaṃ pupphamabhiropayim;
Duggatiṃ nābhijānāmi, ñāṇapūjāyidaṃ phalaṃ.

“Ito terasakappamhi, dvādasāsuṃ phaluggatā;
Sattaratanasampannā, cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana’’nti.

Arahattaṃ pana patvā attano vaṭṭupacchedadīpanena aññaṃ byākaronto –

80. “Yaṃ mayā pakataṃ kammaṃ, appaṃ vā yadī vā bahuṃ;
Sabbametaṃ parikkhīṇaṃ, natthi dāni punabbhavo’’ti. – gāthaṃ abhāsi;

Tattha **yaṃ mayā pakataṃ kammaṃ** yaṃ kammaṃ tīhi kammadvārehi, chahi uppattidvārehi, aṭṭhahi asaṃvaradvārehi, aṭṭhahi ca saṃvaradvārehi pāpādivasena dānādivasena cāti anekehi pakārehi anādimati saṃsāre yaṃ mayā kataṃ upacitaṃ abhinibbattaṃ vipākakammaṃ. **Appaṃ vā yadī vā bahunti** tañca vatthucetanāpayogakilesādīnaṃ dubbalabhāvena appaṃ vā, tesāṃ balavabhāvena abhiṇhapavattiyā ca bahuṃ vā. **Sabbametaṃ parikkhīṇanti** sabbameva cetāṃ kammaṃ kammakkhayakarassa aggamaggassa adhigatattā parikkhayaṃ gataṃ, kilesavaṭṭappahānena hi kammavaṭṭaṃ pahīnameva hoti vipākavaṭṭassa anuppādanato. Tenāha “**natthi dāni punabbhavo**’’ti. Āyatim punabbhavābhiniṇṇanti mayhaṃ natthīti attho. “Sabbampeta’’ntipi pāṭho, sabbampi etanti padavibhāgo.

Uggattheragāthāvaṇṇanā niṭṭhitā.

Aṭṭhamavaggavaṇṇanā niṭṭhitā.

9. Navamavaggo

1. Samitiguttattheragāthāvaṇṇanā

Yaṃ mayā pakataṃ pāpanti āyasmato samitiguttattherassa gāthā. Kā uppatti? Sopi purimabuddhesu katādhikāro tattha tattha bhava puññāni upacinanto vipassissa bhagavato kāle kulagehe nibbattitvā viññutaṃ patto bhagavantaṃ passitvā pasannacitto jātisumanapupphehi pūjaṃ akāsi. So tena puññakammaṃ yaṃ yaṃ bhava nibbatti, tattha tattha kularūparivārasampadāya aññe satte abhibhavitvā aṭṭhāsi. Ekasmiṃ pana attabhāve aññataraṃ paccekabuddhaṃ piṇḍāya carantaṃ disvā

“ayaṃ muṇḍako kuṭṭhī maññe, tenāyaṃ paṭicchādetvā vicarati” ti niṭṭhubhitvā pakkāmi. So tena kammena bahuṃ kālaṃ niraye paccitvā kassapassa bhagavato kāle manussaloke nibbato paribbājakapabbajjaṃ upagato ekaṃ sīlācārasampannaṃ upāsakaṃ disvā dosantaro hutvā, “kuṭṭharogī bhaveyyāsī” ti akkosi, nhānatitthe ca manussehi ṭhapitāni nhānacunṇāni dūsesi. So tena kammena puna niraye nibbattitvā bahūni vassāni dukkhaṃ anubhavitvā imasmim buddhuppāde sāvattiyā aññatarassa brāhmaṇassa putto hutvā nibbatti, **samitiguttotissa** nāmaṃ ahosi. So vayappatto satthu dhammadesanaṃ sutvā paṭiladdhasaddho pabbajitvā suvisuddhasīlo hutvā viharati. Tassa purimakammanissandena kuṭṭharogo uppajji, tena tassa sarīrāvayavā yebhuyyena chinnabhinnā hutvā paggharanti. So gilānasālāyaṃ vasati. Athekadivasaṃ dhammasenāpati gilānapucchaṃ gantvā tattha tattha gilāne bhikkhū pucchanto taṃ bhikkhuṃ disvā “āvuso, yāvataṃ khandhappavatti nāma, sabbaṃ dukkhameva vedanā. Khandhesu pana asantesuyeva natthi dukkha” nti vedanānupassanākammaṭṭhānaṃ kathetvā agamāsi. So therassa ovāde ṭhatvā vipassanaṃ vaḍḍhetvā chaḷabhiññā sacchākāsi. Tena vuttaṃ **apadāne** (apa. therā 1.12.82-90) –

“Jāyantassa vipassissa, āloko vipulo ahu;
Pathavī ca pakampittha, sasāgarā sapabbatā.

“Nemittā ca viyākaṃsu, buddho loke bhavissati;
Aggo ca sabbasattānaṃ, janataṃ uddharissati.

“Nemittānaṃ suṇitvāna, jātipūjamakāsahaṃ;
Edisā pūjanā natthi, yādisā jātipūjanā.

“Saṅkharitvāna kusalaṃ, sakaṃ cittaṃ pasādayim;
Jātipūjaṃ karitvāna, tattha kālaṅkato ahaṃ.

“Yaṃ yaṃ yonupapajjāmi, devattaṃ atha mānusaṃ;
Sabbe satte abhibhomi, jātipūjāyidaṃ phalaṃ.

“Dhātiyo maṃ upaṭṭhenti, mama cittavasānugā;
Na tā sakkonti kopetuṃ, jātipūjāyidaṃ phalaṃ.

“Ekanavutito kappe, yaṃ pūjamakarim tadā;
Duggatiṃ nābhijānāmi, jātipūjāyidaṃ phalaṃ.

“Supāricariyā nāma, catuttiṃsa janādhipā;
Ito tatiyakappamhi, cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana” nti.

Chaḷabhiñño pana hutvā pahīnakilesapaccavekkhaṇena etarahi anubhuyyāmānarogavasena purimajāṭīsu attanā kataṃ pāpakammaṃ anussaritvā tassa idāni sabbaso pahīnabhāvaṃ vibhāvento –

81. “Yaṃ mayā pakataṃ pāpaṃ, pubbe aññāsu jāṭīsu;
Idheva taṃ vedanīyaṃ, vatthu aññaṃ na vijjatī” ti. – gāthaṃ abhāsi;

Tattha **pāpanti** akusalaṃ kammaṃ. Tañhi lāmakatṭhena pāpanti vuccati. **Pubbeti** purā. **Aññāsu jāṭīsūti** ito aññāsu jāṭīsu, aññesu attabhāvesu. Ayañhettha attho – yadipi mayā imasmim attabhāve na tādisaṃ pāpaṃ kataṃ atthi, idāni pana tassa sambhavoyeva natthi. Yaṃ pana ito aññāsu jāṭīsu kataṃ atthi, **idheva taṃ vedanīyaṃ**, tañhi idheva imasmimyeva attabhāve vedayitabbaṃ anubhavitabbaṃ phalaṃ, kasmā? **Vatthu aññaṃ na vijjatīti** tassa kammaṃ vipaccanokāso añño khandhappabandho

natthi, ime pana khandhā sabbaso upādānānaṃ pahīnattā anupādāno viya jātavedo carimakacittanīrodhena appaṭṭisandhikā nirujjhantīti aññaṃ byākāsi.

Samitiguttattheragāthāvaṇṇanā niṭṭhitā.

2. Kassapattheragāthāvaṇṇanā

Yena yena subhikkhānīti āyasmato kassapattherassa gāthā. Kā uppatti? Ayaṃ kira padumuttarassa bhagavato kāle brāhmaṇakule nibbattitvā tīsu vedesu aññesu ca brāhmaṇasippesu nipphattiṃ gato, so ekadivasam bhagavantam disvā pasannamānaso sumanapupphehi pūjam akāsi. Karonto ca satthu samantato upari ca pupphamuṭṭhiyo khipi. Buddhānubhāvena pupphāni pupphāsanākārena sattāhaṃ aṭṭhaṃsu. So taṃ acchariyam disvā bhīyosomattāya pasannamānaso ahosi. Aparāparam puññāni karonto kappasatasahassam sugatīsuyeva samsaranto imasmim buddhuppāde sāvatthiyam aññatarassa udiccabrāhmaṇassa putto hutvā nibbatti, **kassapotissa** nāmam ahosi. Tassa daharakāleyeva pitā kālamakāsi. Mātā taṃ paṭijaggati. So ekadivasam jetavanam gato bhagavato dhammadesanam sutvā hetusampannatāya tasmimyeva āsane sotāpanno hutvā mātu santikam gantvā anujānāpetvā pabbajito satthari vuṭṭhavassee pavāretvā janapadacārikam pakkante sayampi satthārā saddhim gantukāmo āpucchitum mātu santikam agamāsi. Mātā vissajjentī ovādavasena –

82. “Yena yena subhikkhāni, sivāni abhayāni ca;
Tena puttaka gacchassu, mā sokāpahato bhavā”ti. – gātham abhāsi;

Tattha **yena yenāti** yattha yattha. Bhummatthe hi etaṃ karaṇavacanam, yasmim yasmim disābhāgeti attho. **Subhikkhānīti** sulabhapiṇḍāni, raṭṭhānīti adhippāyo. **Sivānīti** khemāni arogāni. **Abhayānīti** corabhayādīhi nibbhayāni, rogaḍubbhikkhabhayāni pana “subhikkhāni, sivāni”ti padadvayeneva gahitāni. **Tenāti** tattha, tasmim tasmim disābhāgeti attho. **Puttakāti** anukampantī taṃ ālapati. **Māti** paṭisedhatthe nipāto **sokāpahatoti** vuttaguṇarahitāni raṭṭhāni gantvā dubbhikkhabhayādījanitena sokena upahato mā **bhava** māhosīti attho. Taṃ sutvā thero, “mama mātā mayham sokarahitaṭṭhānagamanaṃ āsīsati, handa mayam sabbaso accantameva sokarahitam ṭhānam pattum yutta”nti ussāhajāto vipassanam paṭṭhapetvā nacirasseeva arahattam pāpuṇi. Tena vuttam **apadāne** (apa. therā 1.13.1-9) –

“Ajjhāyako mantadharo, tiṇṇam vedāna pāragū;
Abbhokāse ṭhito santo, addasam lokanāyakam.

“Sīham yathā vanacaram, byaggharājamva nittasam;
Tidhāpabhinnamātāngam, kuñjaramva mahesinam.

“Sereyakam gahetvāna, ākāse ukkhipim aham;
Buddhassa ānubhāvena, parivārenti sabbaso.

“Adhiṭṭhahi mahāvīro, sabbaññū lokanāyako;
Samantā pupphacchadanā, okiriṃsu narāsabham.

“Tato sā pupphakañcukā, antovaṇṭā bahimukhā;
Sattāham chadanam katvā, tato antaradhāyatha.

“Tañca acchariyam disvā, abbhutam lomahaṃsanam;
Buddhe cittam pasādesim, sugate lokanāyake.

“Tena cittappasādena, sukkamūlena codīto;

Kappānaṃ satasahassaṃ, duggatiṃ nupapajjahaṃ.

“Pannarasasahassamhi, kappānaṃ pañcavīsati;
Vītamalāsanāmā ca, cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana”’nti.

Arahattaṃ pana patvā “idameva mātu vacanaṃ arahattappattiyā aṅkusaṃ jāta”’nti tameva gāthaṃ paccudāhāsi.

Kassapatheragāthāvaṇṇanā niṭṭhitā.

3. Sīhattheragāthāvaṇṇanā

Sīhappamatto viharāti āyasmato sīhattherassa gāthā. Kā uppatti? So kira purimabuddhesu katādhikāro ito aṭṭhārasakappasatamatthake atthadassissa bhagavato kāle candabhāgāya nadiyā tīre kinnarayoniyam nibbattivā pupphabhakkho pupphanivasano hutvā viharanto ākāsenā gacchantaṃ atthadassiṃ bhagavantaṃ disvā pasannacitto pūjetukāmo añjaliṃ paggayha aṭṭhāsi. Bhagavā tassa ajjhāsayaṃ ñatvā ākāsatō oruyha aññatarasmiṃ rukkhamūle pallaṅkena nisīdi. Kinnaro candanasāraṃ ghaṃsitvā candanagandhena pupphehi ca pūjam katvā vanditvā padakkhiṇaṃ katvā pakkāmi. So tena puññakamma devamanussesu saṃsaranto imasmiṃ buddhuppāde mallarājakule nibbatti, tassa **sīhoti** nāmaṃ ahoṣi. So bhagavantaṃ disvā pasannamānaso vanditvā ekamantaṃ nisīdi. Satthā tassa ajjhāsayaṃ oloketvā dhammaṃ kathesi. So dhammaṃ sutvā paṭiladdhasaddho pabbajitvā kammatṭhānaṃ gahetvā araṇṇe viharati. Tassa cittaṃ nānārammaṇe vidhāvati, ekaggaṃ na hoti, sakatthaṃ nipphādetuṃ na sakkoti. Satthā taṃ disvā ākāse ṭhatvā –

83. “Sīhappamatto vihara, rattindivamatandito;
Bhāvehi kusalaṃ dhammaṃ, jaha sīghaṃ samussaya”’nti. –

Gāthāya ovadi. So gāthāvasāne vipassanaṃ vaḍḍhetvā arahattaṃ pāpuṇi. Tena vuttaṃ **apadāne** (apa. therā 1.14.17-25) –

“Candabhāgānadītīre, ahoṣiṃ kinnaro tadā;
Pupphabhakkho cahaṃ āsiṃ, pupphanivasano tathā.

“Atthadassī tu bhagavā, lokajetṭho narāsabho;
Vipinaggena niyyāsi, haṃsarājāva ambare.

“Namo te purisājañña, cittaṃ te suvisodhitam;
Pasannamukhavaṇṇosi, vippasannamukhindriyo.

“Orohitvāna ākāsa, bhūripañño sumedhaso;
Saṅghāṭiṃ pattharivāna, pallaṅkena upāvisi.

“Vilīnaṃ candanādāya, agamāsiṃ jinantikam;
Pasannacitto sumano, buddhassa abhiropayim.

“Abhivādetvāna sambuddham, lokajetṭham narāsabham;
Pāmojjaṃ janayitvāna, pakkāmiṃ uttarāmukho.

“Aṭṭhārase kappasate, candanaṃ yaṃ apūjayim;
Duggatiṃ nābhijānāmi, buddhapūjāyidaṃ phalaṃ.

“Catuddase kappasate, ito āsiṃsu te tayo;
Rohaṇī nāma nāmena, cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana’nti.

Yā pana bhagavatā ovādasena vuttā “sīhappamatto”ti gāthā, tattha **sīhāti** tassa therassa ālapanam. **Appamatto viharāti** satiyā avippavāsena pamādavirahito sabbiriyāpathesu satisampajaññayutto hutvā viharāhi. Idāni taṃ appamādavihāraṃ saha phalena saṅkhepato dassetuṃ “**rattindiva**”ntiādi vuttaṃ. Tassattho – rattibhāgaṃ divasabhāgaṃca “caṅkamaṇa nisajjāya āvaraṇīyehi dhammehi cittaṃ parisodhetī”ti (saṃ. nī. 4.239; a. nī. 3.16; vibha. 519) vuttanayena catusammappadhānavasena atandito akusīto āraddhavīriyo kusalaṃ samathavipassanādhammaṇca lokuttaradhammaṇca bhāvehi uppādehi vaḍḍhehi ca, evaṃ bhāvetvā ca **jaha sīghaṃ samussayanti** tava samussayaṃ attabhāvaṃ paṭhamaṃ tava tappaṭibaddhachandarāgappahānena sīghaṃ nacirasseva pajaha, evaṃbhūto ca pacchā carimakacittanīrodhena anavasesato ca pajahissatīti. Arahattaṃ pana patvā thero aññaṃ byākaronto tameva gāthaṃ paccudāhāsīti.

Sīhattheragāthāvaṇṇanā niṭṭhitā.

4. Nītattheragāthāvaṇṇanā

Sabbarattim supitvānāti āyasmato nītattherassa gāthā. Kā uppatti? Ayaṃ kira padumuttarassa bhagavato kāle sunando nāma brāhmaṇo hutvā anekasate brāhmaṇe mante vācento vājapeyyaṃ nāma yaññaṃ yaḍi, bhagavā taṃ brāhmaṇaṃ anukampanto yaññaṭṭhānaṃ gantvā ākāse caṅkamaṇi. Brāhmaṇo satthāraṃ disvā pasannamānaso sissehi pupphāni āharāpetvā ākāse khipitvā pūjaṃ akāsi. Buddhānubhāvena taṃ thānaṃ sakalaṇca nagaraṃ pupphapaṭavītānikaṃ viya chāditaṃ ahoṣi. Mahājano satthari ulāraṃ pītisomanassaṃ paṭisaṃvedesi. Sunandabrāhmaṇo tena kusalamūlena devamanussesu saṃsaranto imasmiṃ buddhuppāde sāvattiyaṃ aññatarassa brāhmaṇassa putto hutvā nibbatti, **nītotissa** nāmaṃ ahoṣi. So viññutaṃ patto “ime samaṇā sakyaputtiyā sukhasīlā sukhasamācārā subhojanāni bhujjītvā nivātesu senāsanesu viharanti, imesu pabbajitvā sukkena viharituṃ sakkā”ti sukhābhilāsāya pabbajitvāva satthu santike kammaṭṭhānaṃ gahetvā katipāhameva manasikarivā taṃ chaḍḍetvā yāvadatthaṃ udarāvadehakaṃ bhujjītvā divasabhāgaṃ saṅgaṇikārāmo tiracchānakathāya vītīnāmeti, rattibhāgepi thinamiddhābhībhūto sabbarattim supatī. Satthā tassa hetuparipākaṃ oloketvā ovādaṃ dento –

84. “Sabbarattim supitvāna, divā saṅgaṇike rato;
Kudāssu nāma dummedho, dukkhassantaṃ karissatī”ti. – gāthaṃ abhāsi;

Tattha **sabbarattinti** sakalaṃ rattim. **Supitvānāti** niddāyitvā, “rattiyā paṭhamaṃ yāmaṃ caṅkamaṇa nisajjāya āvaraṇīyehi dhammehi cittaṃ parisodhetī”tiādinā vuttaṃ jāgariyaṃ ananuyujjītvā kevalaṃ rattiyā tīsupi yāmesu niddaṃ okkamitvāti attho. **Divāti** divasaṃ, sakalaṃ divasabhāgantī attho. **Saṅgaṇiketī** tiracchānakathikehi kāyadaḷhibahulapuggalehi sannisajjā saṅgaṇiko, tasmim **rato** abhirato tattha avigatacchando “saṅgaṇike rato”ti vutto “saṅgaṇikārato”tipi pāḷi. **Kudāssu nāmāti** kudā nāma. **Assūti** nipātamaṃ, kasmim nāma kāleti attho. **Dummedhoti** nippaṇṇo. **Dukkhassāti** vaṭṭadukkhassa. **Antanti** pariyoṣānaṃ. Accantameva anuppādaṃ kadā nāma karissati, edisassa dukkhassantakaraṇaṃ natthīti attho. “Dummedha dukkhassantaṃ karissasī”tipi pāḷi.

Evaṃ pana satthārā gāthāya kathitāya thero saṃvegajāto vipassanaṃ paṭṭhapetvā nacirasseva arahattaṃ pāpuṇi. Tena vuttaṃ **apadāne** (apa. thera 1.14.26-33) –

“Sunando nāma nāmena, brāhmaṇo mantapāragū;
Ajjhāyako yācayogo, vājapeyyaṃ ayājayī.

“Padumuttaro lokavidū, aggo kāruṇiko isi;
Janataṃ anukampanto, ambare caṅkamī tadā.

“Caṅkamtivāna sambuddho, sabbaññū lokanāyako;
Mettāya aphari satte, appamāṇe nirūpadhi.

“Vaṇṭe chetvāna pupphāni, brāhmaṇo mantapāragū;
Sabbe sisse samānetvā, ākāse ukkhipāpayi.

“Yāvatā nagaraṃ āsi, pupphānaṃ chadanaṃ tadā;
Buddhassa ānubhāvena, sattāhaṃ na vigacchatha.

“Teneva sukkamūlena, anubhotvāna sampadā;
Sabbāsava pariññāya, tiṇṇo loke visattikaṃ.

“Ekārāse kappasate, pañcatimsāsu khattiyā;
Ambaraṃsasanāmā te, cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana’nti.
Arahattaṃ pana patvā thero aññaṃ byākaronto tameva gāthaṃ paccudāhāsi.

Nītattheragāthāvaṇṇanā niṭṭhitā.

5. Sunāgattheragāthāvaṇṇanā

Cittanimitassa kovidoti āyasmato sunāgattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭūpanissayaṃ kusalaṃ upacinanto ito ekattiṃse kappe sikhissa bhagavato kāle brāhmaṇakule nibbattitvā vayappatto tiṇṇaṃ vedānaṃ pāragū hutvā araññāyatane assame vasanto tīṇi brāhmaṇasahassāni mante vācesi. Athekadivasam tassa sathhāraṃ disvā lakkhaṇāni upadhāretvā lakkhaṇamante parivattentassa, “īdisehi lakkhaṇehi samannāgato anantajino anantaññaṇo buddho bhavissatī”ti buddhaññaṇaṃ ārabha uḷāro pasādo uppajji. So tena cittappasādena devaloke nibbatta aparāparaṃ devamanussesu saṃsaranto imasmim buddhuppāde nālakagāme aññatarassa brāhmaṇassa putto hutvā nibbatti, **sunāgotissa** nāmaṃ ahosi. So dhammasenāpatissa gihisahāyo therassa santikaṃ gantvā dhammaṃ sutvā dassanabhūmiyaṃ patiṭṭhito pabbajitvā vipassanaṃ paṭṭhapetvā arahattaṃ pāpuṇi. Tena vuttaṃ **apadāne** (apa. therā 1.14.34-40) –

“Himavantassāvidūre, vasabho nāma pabbato;
Tasmim pabbatapādami, assamo āsi māpito.

“Tīṇi sissasahassāni, vācesim brāhmaṇo tadā;
Saṃharitvāna te sisse, ekamantaṃ upāvisim.

“Ekamantaṃ nisīditvā, brāhmaṇo mantapāragū;
Buddhavedaṃ gavesanto, ñāṇe cittaṃ pasādayim.

“Tattha cittaṃ pasādetvā, nisīdim paṇṇasanthare;
Pallaṅkaṃ ābhujitvāna, tattha kālaṅkato ahaṃ.

“Ekattiṃse ito kappe, yaṃ saññamalabhim tadā;
Duggatiṃ nābhijānāmi, ñāṇasaññāyidaṃ phalaṃ.

“Sattavīsati kappamhi, rājā siridharo ahu;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana”nti.
Arahattaṃ pana patvā bhikkhūnaṃ dhammadesanāpadesena aññaṃ byākaronto –

85. “Cittanimittassa kovidō, pavivekarasaṃ vijāniya;
Jhāyaṃ nipako patissato, adhigaccheyya sukhaṃ nirāmisā”nti. –

Gāthaṃ abhāsi.

Tattha **cittanimittassa kovidoti** bhāvanācittassa nimittaggahaṇe kusalo, “imasmim̃ samaye cittaṃ paggahetabbaṃ, imasmim̃ sampahaṃsitabbaṃ, imasmim̃ ajjhupekkhitabba”nti evaṃ paggahaṇādiyogyassa cittanimittassa gahaṇe cheko. **Pavivekarasaṃ vijāniyāti** kāyavivekasaṃvaḍḍhitassa cittavivekassa rasaṃ sañjānitvā, vivekasukhaṃ anubhavitvāti attho. “Pavivekarasaṃ pitvā”ti (dha. pa. 205) hi vuttaṃ. **Jhāyanti** paṭhamaṃ ārammaṇūpanijjhānena pacchā lakkhaṇūpanijjhānena ca jhāyanto. **Nipakoti** kammaṭṭhānapariharaṇe kusalo. **Patissatoti** upaṭṭhitassati. **Adhigaccheyya sukhaṃ nirāmisanti** evaṃ samathanimittādikosallena labbhe cittavivekasukhe patiṭṭhāya sato sampajāno hutvā vipassanājhāneneva jhāyanto kāmāmisavaṭṭāmisehi asammissatāya nirāmisāṃ nibbānasukhaṃ phalasukhaṇca adhigaccheyya samupagaccheyyāti attho.

Sunāgattheragāthāvaṇṇanā niṭṭhitā.

6. Nāgitattheragāthāvaṇṇanā

Ito bahiddhā puthuaññāvādinanti āyasmato nāgitattherassa gāthā. Kā uppatti? Ayaṃ kira padumuttarassa bhagavato kāle nārado nāma brāhmaṇo hutvā ekadivasāṃ mālake nisinnō bhagavantaṃ bhikkhusaṅghena purakkhataṃ gacchantaṃ disvā pasannamānaso tīhi gāthāhi abhiṭṭhavi. So tena puññakamma devaloke nibbattitvā aparāparaṃ puññāni katvā devamanussesu saṃsaranto imasmim̃ buddhuppāde kapilavatthunagare sakyarājakule nibbatti, **nāgitotissa** nāmaṃ ahoṣi. So bhagavati kapilavatthusmim̃ viharante **madhupiṇḍikasuttaṃ** (ma. ni. 1.199 ādayo) sutvā paṭiladdhasaddho pabbajitvā vipassanaṃ vaḍḍhetvā arahattaṃ pāpuṇi. Tena vuttaṃ **apadāne** (apa. therā 1.14.47-54) –

“Visālamāle āsīno, addasaṃ lokanāyakaṃ;
Khīṇāsavaṃ balappattaṃ, bhikkhusaṅghapurakkhataṃ.

“Satasahassā tevijjā, chaḷabhiññā mahiddhikā;
Parivārenti sambuddhaṃ, ko disvā nappasīdati.

“Ñāṇe upanidhā yassa, na vijjati sadevake;
Anantaññaṃ sambuddhaṃ, ko disvā nappasīdati.

“Dhammakāyaṇca dīpentaṃ, kevalaṃ ratanākaraṃ;
Vikappetaṃ na sakkonti, ko disvā nappasīdati.

“Imāhi tīhi gāthāhi, nāradovhayavacchalo;
Padumuttaraṃ thavitvāna, sambuddhaṃ aparājitaṃ.

“Tena cittappasādena, buddhasanthavanena ca;
Kappānaṃ satasahassaṃ, duggatiṃ nupapajjahaṃ.

“Ito tiṃsakappasate, sumitto nāma khattiyo;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā satthu avitathadesanataṃ dhammassa ca niyyānikataṃ nissāya
sañjātapītisomanasso pītivegappavissatṭhaṃ udānaṃ udānento –

86. “Ito bahiddhā puthuaññāvādinaṃ, maggo na nibbānagamo yathā ayaṃ;
Itissu saṅghaṃ bhagavānusāsati, satthā sayamaṃ paṇitaleva dassaya’nti. –

Gāthaṃ abhāsi.

Tattha **ito bahiddhā**ti imasmā buddhasāsanā bāhirake samaye, tenāha “**puthuaññāvādina**’nti, nānātitthiyānanti attho. **Maggo na nibbānagamo yathā ayaṃ** ariyo aṭṭhaṅgiko maggo ekaṃsena nibbānaṃ gacchatīti nibbānagamo, nibbānagāmī, evaṃ nibbānagamo maggo titthiyasamaye natthi asammāsambuddhappaveditattā aññatitthiyavādassa. Tenāha bhagavā –

“Idheva, bhikkhave, samaṇo, idha dutiyo samaṇo, idha tatiyo samaṇo, idha catuttho samaṇo, suññā parappavādā samaṇebhi aññehī’ti (dī. ni. 2.214; ma. ni. 1.139; a. ni. 4.241).

Itti evaṃ. **Assūti** nipātamattaṃ. **Saṅghanti** bhikkhusaṅghaṃ, ukkaṭṭhaniddeso yaṃ yathā “satthā devamanussāna’nti. **Saṅghanti** vā samūhaṃ, veneyyaṇanti adhippāyo. **Bhagavāti** bhāgyavantatādīhi kāraṇehi bhagavā, ayamettha saṅkhepo. Vitthāro pana paramatthadīpaniyaṃ itivuttakavaṇṇanāyaṃ vuttanayena veditabbo. **Satthāti** diṭṭhadhammikasaṃparāyikaparamatthehi yathārahaṃ anusāsati satthā. **Sayanti** sayameva. Ayañhettha attho – “sīlādikkhandhattayasaṅgaho sammādiṭṭhiādīnaṃ aṭṭhannaṃ aṅgānaṃ vasena aṭṭhaṅgiko nibbānagāmī ariyamaggo yathā mama sāsane atthi, evaṃ bāhirakasamaye maggo nāma natthī’ti sīhanādaṃ nadanto amhākaṃ satthā bhagavā sayameva sayambhūñānena ñātaṃ, sayameva vā mahākaruṇāsaṅcodito hutvā attano desanāvīlāsasampattiyaṃ hatthatale āmalakaṃ viya dassento bhikkhusaṅghaṃ veneyyaṇantaṃ anusāsati ovadatīti.

Nāgitattheragāthāvaṇṇanā niṭṭhitā.

7. Paviṭṭhattheragāthāvaṇṇanā

Khandhā diṭṭhā yathābhūtaṃ āyasmato paviṭṭhattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭūpanissayaṃ puññaṃ karonto atthadassissa bhagavato kāle kesavo nāma tāpaso hutvā ekadivasaṃ satthāraṃ upasaṅkamtivā dhammaṃ sutvā pasannamānaso abhivādetvā añjaliṃ paggayha padakkhiṇaṃ katvā pakkāmi. So tena puññaakamma devaloke nibbattivā aparāparaṃ puññāni katvā devamanussesu saṃsaranto imasmiṃ buddhuppāde magadharatthe brāhmaṇakule uppajjitvā anukkamena viññutaṃ patto nekkhammaninnajjhāsayatāya paribbājapabbajjaṃ pabbajitvā tattha sikkhitabbaṃ sikkhitvā vicaranto upatissakolitānaṃ buddhasāsane pabbajitabhāvaṃ sutvā “tepi nāma mahāpaññaṃ tattha pabbajitā, tadeva maññe seyyo’nti satthu santikaṃ gantvā dhammaṃ sutvā paṭiladdhasaddho pabbaji. Tassa satthā vipassanaṃ ācikkhi. So vipassanaṃ ārabhitvā nacirasseva arahattaṃ sacchākāsi. Tena vuttaṃ **apadāne** (apa. thera 1.14.55-59) –

“Nārado iti me nāmaṃ, kesavo iti maṃ vidū;
Kusalākusalaṃ esaṃ, agamaṃ buddhasantikaṃ.

“Mettacitto kāruṇiko, atthadassī mahāmuni;
Assāsayanto satte so, dhammaṃ deseti cakkhumā.

“Sakaṃ cittaṃ pasādetvā, sire katvāna añjalim;
Sattāhāraṃ abhivādetvā, pakkāmiṃ pācināmukho.

“Sattarase kappasate, rājā āsi mahīpati;
Amittatāpano nāma, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana”nti.
Arahattaṃ pana patvā aññaṃ byākaronto –

87. “Khandhā diṭṭhā yathābhūtaṃ, bhavā sabbe padālītā;
Vikkhīṇo jātisaṃsāro, natthi dāni punabbhavo”ti. – gāthaṃ abhāsi;

Tattha **khandhā**ti pañcupādānakkhandhā, te hi vipassanupalakkhaṇato sāmāññalakkhaṇato ca ñātapaṇiññādīhi pariḷānāvasena vipassitabbā. **Diṭṭhā yathābhūtaṃ**ti vipassanāpaññāsahitāya maggapaññāya “idaṃ dukkha”ntiadinā aviparītato diṭṭhā. **Bhavā sabbe padālītā**ti kāmabhavādayo sabbe kammabhavā upapattibhavā ca maggaññāsatthena bhinnā viddhamsitā. Kilesapadālaneneva hi kammopapattibhavā padālītā nāma honti. Tenāha “**vikkhīṇo jātisaṃsāro, natthi dāni punabbhavo**”ti. Tassattho heṭṭhā vuttoyeva.

Paviṭṭhattheragāthāvaṇṇanā niṭṭhitā.

8. Ajjunattheragāthāvaṇṇanā

Asakkhiṃ vata attānanti āyasmato ajjunattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭupanissayaṃ kusalaṃ upacinanto vipassissa bhagavato kāle sīhayoniyam nibbatta ekadivasam araṇṇe aññatarasmim rukkhamūle nisinnam sathāraṃ disvā “ayaṃ kho imasmim kāle sabbasetṭho purisasīho”ti pasannamānaso supupphitasālasākham bhañjivā sathāraṃ pūjesi. So tena puññakammena devamanussesu saṃsaranto imasmim buddhuppāde sāvathhiyam seṭṭhikule nibbatti. **Ajjunotissa** nāmaṃ ahoṣi. So viññutaṃ patto nigaṇṭhehi kataparicayo hutvā “evāhaṃ amataṃ adhiḡamissāmī”ti vivaṭṭajjhāsayaṭāya daharakāleyeva nigaṇṭhesu pabbajivā tattha sāraṃ alabhanto satthu yamakapāṭihāriyam disvā paṭiladdhasaddho sāsane pabbajivā vipassanaṃ ārabhitvā nacirasseva arahā ahoṣi. Tena vuttaṃ **apadāne** (apa. therā 1.14.60-65) –

“Migarājā tadā āsim, abhijāto sukesarī;
Giriduggaṃ gavesanto, addasaṃ lokanāyakaṃ.

“Ayaṃ nu kho mahāvīro, nibbāpeti mahājanaṃ;
Yaṃnūnāhaṃ upāseyyaṃ, devadevaṃ narāsabhaṃ.

“Sākhaṃ sālassa bhañjivā, sakosaṃ pupphamāharim;
Upagantvāna sambuddhaṃ, adāsim pupphamuttamaṃ.

“Ekanavutito kappe, yaṃ pupphamabhiropayim;
Duggatiṃ nābhijānāmi, pupphadānassidaṃ phalaṃ.

“Ito ca navame kappe, virocanasanāmakā;
Tayo āsiṃsu rājāno, cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana”nti.
Arahattaṃ pana patvā anuttarasukhādhigamasambhūtena pītivegena udānaṃ udānento –

88. “Asakkhiṃ vata attānaṃ, uddhātuṃ udakā thalaṃ;
Vuyhamāno mahogheva, saccāni paṭivijjhaha”nti. – gātham abhāsi;

Tattha **asakkhinti** sakkosiṃ. **Vatāti** vimhaye nipāto. Ativimhayanīyañhetam yadidaṃ saccapaṭivedho. Tenāha –

“Tam kiṃmaññatha, bhikkhave, katamaṃ nu kho dukkarataraṃ vā durabhisambhavataraṃ vā, yaṃ sattadhā bhinnassa vālassa koṭiyā koṭiṃ paṭivijjheyyā”tiādi (saṃ. ni. 5.1115)?

Attānanti niyakajjhataṃ sandhāya vadati. Yo hi paro na hoti so attāti. **Uddhātunti** uddharitum, “uddhaṭa”ntipi pāṭho. **Udakāti** saṃsāramahoghasaṅkhātā udakā. **Thalanti** nibbānathalaṃ. **Vuyhamāno mahoghevāti** mahañṇave vuyhamāno viya. Idaṃ vuttaṃ hoti – yathā nāma gambhīravitthate appaṭiṭṭhe mahati udakoghe vegasā vuyhamāno puriso kenaci atthakāmena upanītaṃ phiyārittasampannaṃ daḷhanāvaṃ labhitvā sukheveva tato attānaṃ uddharitum sakkuṇeyya pāraṃ pāpuṇeyya, evamevāhaṃ saṃsāramahoghe kilesābhisaṅkhāravegena vuyhamāno satthārā upanītaṃ samathavipassanupetaṃ ariyamaggaṇāvaṃ labhitvā tato attānaṃ uddharitum nibbānathalaṃ pattum aho asakkhinti. Yathā pana asakkhi, taṃ dassetuṃ “**saccāni paṭivijjhaha**”nti āha. Yasmā ahaṃ dukkhādīni cattāri ariyasaccāni pariññāpahānasacchikiriyābhāvanāpaṭivedhena paṭivijjhiṃ ariyamaggaññena aññasiṃ, tasmā asakkhiṃ vata attānaṃ uddhātuṃ udakā thalanti yojanā.

Ajjunattheragāthāvañṇanā niṭṭhitā.

9. (Paṭhama) devasabhattheragāthāvañṇanā

Uttiṇṇā paṅkapalipāti āyasmato devasabhattherassa gāthā. Kā uppatti? Sopi purimabuddhesu katādhikāro tattha tattha bhava vivaṭṭupaniissayaṃ puññaṃ upacinanto sikhissa bhagavato kāle pārāvatayoniyam nibbato ekadivasam satthāraṃ disvā pasannamānaso piyālaphalam upanesi. Satthā tassa pasādasamvaḍḍhanattham taṃ paribhuñji. So tena ativiya pasannacitto hutvā kālena kālam upasaṅkamitvā vanditvā cittaṃ pasādeti. So tena puññakammena devaloke nibbato aparāparaṃ puññāni katvā devamanussesu saṃsaranto imasmim buddhuppāde aññatarassa maṅḍalikañño putto hutvā nibbato taruṇakāleyeva rajje paṭiṭṭhito rajjasukhamanubhavanto vuddho satthāraṃ upasaṅkami, tassa satthā dhammaṃ desesi. So dhammaṃ sutvā paṭiladdhasaddho samvegaḷāto rajjam pahāya pabbajitvā vipassanāya kammaṃ karonto nacirasseva arahattaṃ pāpuṇi. Tena vuttaṃ **apadāne** (apa. therā 1.14.66-72) –

“Pārāvato tadā āsiṃ, paraṃ anuparodhako;
Pabbhāre seyyam kappemi, avidūre sikhisatthuno.

“Sāyam pātañca passāmi, buddham lokagganāyakaṃ;
Deyyadhammo ca me natthi, dvipadindassa tādino.

“Piyālaphalamādāya, agamaṃ buddhasantikaṃ;
Paṭiggahesi bhagavā, lokajetṭho narāsabho.

“Tato paraṃ upādāya, paricāriṃ vināyakaṃ;
Tena cittappasādena, tattha kālaṅkato aham.

“Ekattimse ito kappe, yaṃ phalam adadiṃ aham;
Duggatiṃ nābhijānāmi, phaladānassidaṃ phalam.

“Ito pannarase kappe, tayo āsum piyālino;

Sattaratanasampannā, cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā pahīnakilesapaccavekkhaṇavasena uppannasomanasso udānaṃ udānento –

89. “Uttiṇṇā paṅkapalipā, pātālā parivajjitā;
Mutto oghā ca ganthā ca, sabbe mānā visaṃhatā”ti. – gātham abhāsi;

Tattha **uttiṇṇā**ti uttaritā atikkantā. **Paṅkapalipā**ti paṅkā ca palipā ca. Paṅko vuccati pakatikaddamo. “Palipo”ti gambhīraputhulo mahākaddamo. Idha pana paṅko viyāti paṅko, kāmarāgo asucibhāvāpādanena cittassa makkhanato. Palipo viyāti palipo, puttadārādivisayo bahalo chandarāgo vuttanayena sammakkhanato duruttaraṇato ca. Te mayā anāgāmimaggena sabbaso atikkantāti āha “uttiṇṇā paṅkapalipā”ti. **Pātālā**ti pātāyālanti pātālā, mahāsamudde ninnatarapadesā. Keci pana nāgabhavanam “pātāla”nti vadanti. Idha pana agāhaduravaggāhaduruttaraṇaṭṭhena pātālā viyāti pātālā, diṭṭhiyo. Te ca mayā paṭhamamaggādhigameneva sabbathā vajjitā samucchinnāti āha “**pātālā parivajjitā**”ti **mutto oghā ca ganthā cāti** kāmoghādioghato abhijjhākāyaganthādiganthato ca tena tena maggena mutto parimutto, puna anabhikiraṇaaganthanasena atikkantoti attho. **Sabbe mānā visaṃhatā**ti navavidhāpi mānā aggamaggādhigamena visesato saṅghātaṃ vināsaṃ āpādītā samucchinnā “mānavidhā hatā”ti keci paṭhanti, mānakoṭṭhāsāti attho. “Mānavisā”ti apare, tesam pana mānavisassa dukkhassa phalato mānavisāti attho daṭṭhabbo.

(Paṭhama) devasabhattheragāthāvaṇṇanā niṭṭhitā.

10. Sāmidattatheragāthāvaṇṇanā

Pañcakkhandhā pariññātāti āyasmato sāmidattatherassa gāthā. Kā uppatti? Ayampi purimabuddhesu katādhikāro atthadassissa bhagavato kāle kulagehe nibbattitvā viññutaṃ patto sathari parinibbute tassa thūpe pupphehi chattānichattam katvā pūjaṃ akāsi. So tena puññakammena devaloke nibbattitvā aparāparaṃ puññāni katvā devamanussesu saṃsaranto imasmiṃ buddhuppāde rājagahe aññatarassa brāhmaṇassa putto hutvā nibbatti, **sāmidattotissa** nāmaṃ ahosi. So anukkamena viññutaṃ patto buddhānubhāvaṃ sutvā upāsakehi saddhiṃ vihāraṃ gato sathāraṃ dhammaṃ desentaṃ disvā pasannamānaso ekamantaṃ nisīdi. Sathā tassa ajjhāsayam oloketvā tathā dhammaṃ desesi, yathā saddham paṭilabhi saṃsāre ca saṃvegamaṃ. So paṭiladdhasaddho saṃvegajāto pabbajitvā nāṇassa aparipakkattā katipayakālam alasabahulī vihāsi. Puna sathārā dhammadesanāya samuttejito vipassanāya kammaṭṭhānaṃ gahetvā tattha yuttappayutto viharanto nacireneva arahattaṃ pāpuṇi. Tena vuttaṃ **apadāne** (apa. therā 1.15.1-4) –

“Parinibbute bhagavati, atthadassīnaruttame;
Chattānichattam kāretvā, thūpamhi abhiropayim.

“Kālena kālamāgantvā, namassim lokanāyakam;
Pupphacchadanam katvāna, chattamhi abhiropayim.

“Sattarase kappasate, devarajjamakārayim;
Manussattam na gacchāmi, thūpapūjāyidaṃ phalam.

“Kilesā jhāpitā mayhaṃ, bhavā sabbe samūhatā;
Nāgo va bandhanaṃ chetvā, viharāmi anāsavo.

“Svāgataṃ vata me āsi, buddhaseṭṭhassa santike;
Tisso vijjā anuppattā, kataṃ buddhassa sāsana”nti.

So aparabhāge bhikkhūhi “kiṃ tayā, āvuso, uttarimanussadhammo adhigato”ti puṭṭho sāsanaṃ niyyānikabhāvaṃ attano ca dhammānudhammapaṭipattiṃ tesam pavedento aññābyākaraṇavasena –

90. “Pañcakkhandhā pariññātā, tiṭṭhanti chinnamūlakā;
Vikkhīṇo jātisamsāro, natthi dāni punabbhavo”ti. – gātham abhāsi;

Tattha **pañcakkhandhā pariññātā**ti mayā ime pañcupādānakkhandhā “idaṃ dukkham, ettakaṃ dukkham, na tato bhiyyo”ti tīhi pariññāhi paricchinditvā ñātā viditā paṭividdhā. **Tiṭṭhanti chinnamūlakā**ti tathā pariññātattāyeva mūlabhūtaṃ samudayassa sabbaso pahīnattā te idāni yāva carimakacittanirodho tiṭṭhanti chinnamūlakā, carimakacittanirodhena pana appaṭisandhikāva nirujjhanti. Tenāha – “vikkhīṇo jātisamsāro, natthi dāni punabbhavo”ti. Tassattho heṭṭhā vuttoyeva.

Sāmidattatheragāthāvaṇṇanā niṭṭhitā.

Navamavaggavaṇṇanā niṭṭhitā.

10. Dasamavaggo

1. Paripuṇṇakatheragāthāvaṇṇanā

Na tathā matam satarasanti āyasmato paripuṇṇakatherassa gāthā. Kā uppatti? Ayampi purimabuddhesu katādhikāro dhammadassissa bhagavato kāle kulagehe nibbattitvā viññutaṃ patto satthari parinibbute satthu cetiye pupphādīhi uḷāraṃ pūjaṃ akāsi. So tena puññakammena devesu nibbattitvā aparāparaṃ puññāni katvā sugatīsuveva saṃsaranto imasmiṃ buddhuppāde kapilavatthusmiṃ sakyaṃ sakyaṃ nibbattitvā viññutaṃ patto paripuṇṇavibhavatāya **paripuṇṇakoti** paññāyittha. So vibhavasampannatāya sabbakālaṃ satarasaṃ nāma āhāraṃ paribhuñjanto satthu missakāhāraparibhogaṃ sutvā “tāva sukhumālopi bhagavā nibbānasukhaṃ apekkhitvā yathā tathā yāpeti, kasmā mayam āhāragiddhā hutvā āhārasuddhikā bhavissāma, nibbānasukhameva pana amhehi pariyesitabba”nti saṃsāre jātasamvego gharāvāsaṃ pahāya satthu santike pabbajitvā bhagavatā kāyagatāsaticammaṭṭhāne niyojito tattha patiṭṭhāya paṭiladdhājānaṃ pādakaṃ katvā vipassanāya kammaṃ karonto vipassanaṃ vaḍḍhetvā arahattaṃ pāpuṇi. Tena vuttaṃ **apadāne** (apa. therā 1.15.5-9) –

“Nibbute lokanāthamhi, dhammadassīnarāsabhe;
Āropesiṃ dhajattambham, buddhaseṭṭhassa cetiye.

“Nisseṇiṃ māpayitvāna, thūpaseṭṭham samāruhiṃ;
Jātipupphaṃ gahetvāna, thūpamhi abhiropayim.

“Aho buddho aho dhammo, aho no satthu sampadā;
Duggatiṃ nābhijānāmi, thūpapūjāyidaṃ phalaṃ.

“Catunnavutito kappe, thūpasīkhasanāmakā;
Soḷasāsimsu rājāno, cakkavattī mahabbalā.

“Kilesā jhāpitā mayham...pe... kataṃ buddhassa sāsana”nti.

Arahattaṃ pana patvā dhamme gāravabahumānena pītivegavissaṭṭham udānaṃ udānento “**na tathā matam satarasa**”nti gātham abhāsi.

91. Tattha **na tathā matam satarasaṃ, sudhannaṃ yaṃ mayajja paribhuttanti tathā**ti tena pakārena. **Matanti** abhimataṃ. **Satarasanti** satarasabhojanaṃ “satarasabhojanaṃ nāma satapākasappiādīhi abhisankhataṃ bhोजना”nti vadanti. Atha vā anekattho satarasaddo “sataso

sahassaso’’tiādīsu viya. Tasmā yaṃ bhojanaṃ anekasūpaṃ anekabyañjanaṃ, taṃ anekarasatāya ‘‘satarasa’’nti vuccati, nānārasabhojananti attho. Sudhā eva annaṃ sudhābhojanaṃ devānaṃ āhāro. **Yaṃ mayajja paribhuttanti** yaṃ mayā ajja anubhuttaṃ. ‘‘Yaṃ mayā paribhutta’’nti ca idaṃ ‘‘satarasaṃ sudhanna’’nti etthāpi yojetabbaṃ. Idaṃ vuttaṃ hoti – yaṃ mayā ajja etarahi nirodhasamāpattisamāpajjanavasena phalasaṃpattisamāpajjanavasena ca accantameva santaṃ paṇītaṃ nibbānasukhaṃ paribhuññiyamānaṃ, taṃ yathā mataṃ abhimataṃ sambhāvitam tathā rājakāle mayā paribhuttaṃ satarasabhojanaṃ devattabhāve paribhuttaṃ sudhannañca na mataṃ nābhimataṃ. Kasmā? Idāhi ariyanisevitaṃ nirāmiṣaṃ kilesānaṃ avatthubhūtaṃ, taṃ pana puthujjanasevitaṃ sāmisaṃ kilesānaṃ vatthubhūtaṃ, taṃ imassa saṅkhampī kalampī kalabhāgampī na upetīti. Idāni ‘‘yaṃ mayajja paribhutta’’nti vuttadhammaṃ desento **aparimitadassinā gotamena, buddhena sudesito dhammo’’**ti āha. Tassattho – aparimitaṃ aparicchinnaṃ uppādavayābhāvato santaṃ asaṅkhatadhātuṃ sayambhūññāna passī, aparimitassa anantāparimeyyassa ñeeyyassa dassāvīti tena **aparimitadassinā** gotamagottena sammāsambuddhena ‘‘khayaṃ virāgaṃ amataṃ paṇīta’’nti (khu. pā. 6.4; su. ni. 227) ca ‘‘madanimmadano pipāsavinayo’’ (a. ni. 4.34; itivu. 90) ‘‘sabbasaṅkhārasamatho’’ti (a. ni. 5.140; 10.6) ca ādinā suṭṭhu **desito dhammo**, nibbānaṃ mayā ajja paribhuttanti yojanā.

Paripuṇṇakattheragāthāvaṇṇanā niṭṭhitā.

2. Vijayattheragāthāvaṇṇanā

Yassāsavā parikkhīṇāti āyasmato vijayattherassa gāthā. Kā uppatti? Ayampi purimabuddhesu katādhikāro piyadassissa bhagavato kāle vibhavasampanne kule nibbattivā viññūtaṃ patto satthari parinibbute tassa thūpassa ratanakhacitaṃ vedikaṃ kāretvā tattha ulāraṃ vedikāmaḥaṃ kāresi. So tena puññakammaṃ anekasate attabhāve maṇiobhāsenā vicari. Evaṃ devamanussesu saṃsaranto imasmiṃ buddhuppāde sāvattiyāṃ brāhmaṇakule nibbatti, **vijayotissa** nāmaṃ ahosi. So vayappatto brāhmaṇavijjāsu nipphattiṃ gato tāpasapabbajjaṃ pabbajitvā araṇṇāyatane jhānalābhī hutvā viharanto buddhuppādaṃ sutvā uppānappasādo satthu santikaṃ upasaṅkamitvā satthāraṃ vanditvā ekamantaṃ nisīdi. Tassa satthā dhammaṃ desesi. So dhammaṃ sutvā pabbajitvā vipassanaṃ paṭṭhapetvā nacirasseva arahattaṃ pāpuṇi. Tena vuttaṃ **apadāne** (apa. thera 1.15.10-14) –

‘‘Nibbute lokanāthamhi, piyadassīnaruttame;
Pasannacitto sumano, muttāvedimakāsahaṃ.

‘‘Maṇīhi parivāretvā, akāsiṃ vedimuttamaṃ;
Vedikāya maḥaṃ katvā, tattha kālaṅkato ahaṃ.

‘‘Yaṃ yaṃ yonupapajjāmi, devattaṃ atha mānusaṃ;
Maṇī dhārenti ākāse, puññakammassidaṃ phalaṃ.

‘‘Soḷasito kappasate, maṇipabhāsanāmakā;
Chattimsāsimsu rājāno, cakkavattī mahabbalā.

‘‘Kilesā jhāpitā mayhaṃ...pe... kataṃ buddhassa sāsana’’nti.
Arahattaṃ pana patvā aññaṃ byākaronto ‘‘**yassāsavā parikkhīṇā**’’ti gāthaṃ abhāsi.

92. Tattha **yassāsavā parikkhīṇāti** yassa uttamapuggalassa kāmāsavādayo cattāro āsavā sabbaso khīṇā ariyamaggena khepitā. **Āhāre ca anissitoti** yo ca āhāre taṇhādīṭṭhinissayehi anissito agadhito anajjhāpanno, nidassanamattaṃ, āhārasīsenettha cattāropi paccayā gahitāti datṭhabbaṃ. Paccayapariyāyo vā idha āhāra-saddo vedītabbo. ‘‘**Suññato animitto cā**’’ti ettha appaṇihitavimokkhopi gahitoyeva, tīṇipi cetāni nibbānasseva nāmāni. Nibbānañhi rāgādīnaṃ abhāvena suññaṃ, tehi vimuttañcāti suññatavimokkho, tathā rāgādīnimittābhāvena saṅkhāranimittābhāvena ca animittaṃ, tehi vimuttañcāti

animittavimokkho, rāgādipaṇidhīnaṃ abhāvena appaṇihitaṃ, tehi vimuttañcāti appaṇihito vimokkhoti vuccati. Phalasaṃpattivasena taṃ ārammaṇaṃ katvā viharantassa ayampi tividho **vimokkho yassa gocaro, ākāseva sakuntānaṃ, padaṃ tassa durannayanti** yathā ākāse gacchantānaṃ sakuṇānaṃ “imasmiṃ ṭhāne pādehi akkamitvā gatā, idaṃ ṭhānaṃ urena paharivā gatā, idaṃ sīsena, idaṃ pakkhehī”ti na sakkā ñātuṃ, evameva evarūpassa bhikkhuno “nirayapadādīsu iminā nāma padena gato”ti ñāpetuṅca na sakkāti.

Vijayattheragāthāvaṇṇanā niṭṭhitā.

3. Erakattheragāthāvaṇṇanā

Dukkhā kāmā erakāti āyasmato erakattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto siddhatthassa bhagavato kāle kulagehe nibbattitvā viññutaṃ patto ekadivasam sathāraṃ disvā pasannamānaso satthu kiñci dātabbayuttakaṃ alabhanto “handāhaṃ kāyasāraṃ puññaṃ karissāmi”ti satthu gamanamaggaṃ sodhetvā samaṃ akāsi. Sathā tena tathākataṃ maggaṃ paṭipajji. So tattha bhagavantaṃ disvā pasannamānaso vanditvā añjaliṃ paggayha pasannacitto yāva dassanupacārasamatikkamā buddhārammaṇaṃ pītiṃ avijahanto aṭṭhāsi. So tena puññakammena devaloke nibbatta aparāparaṃ puññāni katvā sugatīsuyeva saṃsaranto imasmiṃ buddhuppāde sāvattiyaṃ sambhāvanīyassa kuṭumbiyassa putto hutvā nibbatti, **erakotissa** nāmaṃ ahoṣi abhirūpo dassanīyo pāsādiko itikattabbatāsu paramena veyyattiyena samannāgato. Tassa mātāpitāro kulena rūpena ācārena vayena kosallena ca anucchavikaṃ dārikaṃ ānetvā vivāhakammaṃ akāmsu. So tāya saddhiṃ saṃvāsena gehe vasanto pacchimabhavikattā kenacideva saṃvegavatthunā saṃsāre saṃviggamānaso satthu santikaṃ gantvā dhammaṃ sutvā paṭiladdhasaddho pabbaji, tassa sathā kammaṭṭhānaṃ adāsi. So kammaṭṭhānaṃ gahetvā katipayadivasātikkamena ukkaṇṭhābhībhūto vihāsi. Atha sathā tassa cittappavattiṃ ñatvā ovādavasena “**dukkhā kāmā erakā**”ti gāthaṃ abhāsi. So taṃ sutvā “ayuttaṃ mayā kataṃ, yo haṃ evarūpassa satthu santike kammaṭṭhānaṃ gahetvā taṃ vissajjento micchāvitakkabahulo vihāsi”nti saṃvegajāto vipassanāya yuttappayutto nacirasseva arahattaṃ pāpuṇi. Tena vuttaṃ **apadāne** (apa. thera 1.15.32-36) –

“Uttarivāna nadikaṃ, vanaṃ gacchati cakkhumā;
Tamaddasāsiṃ sambuddhaṃ, siddhatthaṃ varalakkhaṇaṃ.

“Kudālapīṭakamādāya, samaṃ katvāna taṃ pathaṃ;
Sathāraṃ abhivādetvā, sakaṃ cittaṃ pasādayiṃ.

“Catunnavutito kappe, yaṃ kammamakariṃ tadā;
Duggatiṃ nābhijānāmi, maggadānassidaṃ phalaṃ.

“Sattapaññāsakappamhi, eko āsiṃ janādhipo;
Nāmena suppubuddhoti, nāyako so narissaro.

“Kilesā jhāpitā mayhaṃ...pe... kataṃ buddhassa sāsana”nti.
Arahā pana hutvā aññaṃ byākaronto –

93. “Dukkhā kāmā eraka, na sukhā kāmā eraka;
Yo kāme kāmayaṭi, dukkhaṃ so kāmayaṭi eraka;
Yo kāme na kāmayaṭi, dukkhaṃ so na kāmayaṭi erakā”ti. –

Tameva bhagavatā vuttaḡāthaṃ paccudāhāsi.

Tattha **dukkhā kāmāti** ime vatthukāmakilesakāmā dukkhavatthutāya

vipariṇāmadukkhasaṃsāradukkhasabhāvato ca, dukkhā dukkhamā dukkhanibbattikā. Vuttañhetam – “appassādā kāmā bahudukkhā bahupāyāsā, ādīnavo ettha bhīyyo”tiādi (pāci. 417; ma. ni. 1.234). **Erakāti** paṭhamam tāva bhagavā tam ālapati, pacchā pana thero attānam nāmena kathesi. **Na sukhā kāmāti** kāmā nāmete jānantassa sukhā na honti, ajānantassa pana sukhato upaṭṭhahanti. Yathāha – “yo sukham dukkhato adda, dukkhamaddakkhi sallato”tiādi (saṃ. ni. 4.253; itivu. 53; theragā. 986). **Yo kāme kāmāyati, dukkham so kāmāyatīti** yo satto kilesakāmena vatthukāme kāmāyati, tassa tam kāmanam sampati sapaṭṭhāyā, āyatim apāyadukkhahetutāya ca vaṭṭadukkhahetutāya ca dukkham. Vatthukāmā pana dukkhassa vatthubhūtā. Iti so dukkhasabhāvam dukkhanimittam dukkhavatthuñca kāmāyatīti vutto. Itaram paṭipakkhavasena tamevattham nāpetum vuttam, tasmā tassattho vuttavipariyāyena vedītabbo.

Erakattheragāthāvaṇṇanā niṭṭhitā.

4. Mettajittheragāthāvaṇṇanā

Namo hi tassa bhagavatoti āyasmato mettajittherassa gāthā. Kā uppatti? So kira anomadassissa bhagavato kāle kulagehe nibbattivā viññutam patto sāsane abhippasanno hutvā bodhirukkhassa iṭṭhakāhi vedikam cinitvā sudhāparikkammaṃ kāresi. Sathā tassa anumodanam akāsi. So tena puññakammena devaloke nibbattivā aparāparam puññāni katvā devamanussesu saṃsaranto imasmiṃ buddhuppāde magadharatthe aññatarassa brāhmaṇassa putto hutvā nibbatti, **mettajit**tissa nāmam aho. So vayappatto kāmesu ādīnavam disvā tāpasapabbajjam pabbajitvā araññe viharanto buddhuppādam sutvā pubbahetunā codiyamāno satthu santikam gantvā pavattinivattiyō ārabba pañham pucchivā sathārā pañhe vissajjite paṭiladdhasaddho pabbajitvā vipassanam paṭṭhapetvā arahattam pāpuṇi. Tena vuttam **apadāne** (apa. thera 1.15.26-31) –

“Anomadassīmunino, bodhivedimakāsaham;
Sudhāya piṇḍam datvāna, paṇikammaṃ akāsaham.

“Disvā tam sukataṃ kammaṃ, anomadassī naruttamo;
Bhikkhusaṅghe ṭhito sathā, imā gāthā abhāsatha.

“Iminā sudhakammena, cetanāpaṇidhīhi ca;
Sampattim anubhotvāna, dukkhassantam karissati.

“Pasannamukhavaṇṇomhi, ekaggo susamāhito;
Dhāremi antimaṃ deham, sammāsambuddhasāsane.

“Ito kappasate āsim, paripuṇṇe anūnake;
Rājā sabbaghano nāma, cakkavattī mahabbalo.

“Kilesā jhāpitā mayham...pe... kataṃ buddhassa sāsana”nti.
Arahattam pana patvā sathāram thomento –

94. “Namo hi tassa bhagavato, sakyaputtassa sirīmato;
Tenāyam aggappattena, aggadhammo sudesito”ti. – gātham abhāsi;

Tattha **namoti** namakkāro. **Hīti** nipātamattam. **Tassāti** yo so bhagavā samattim sapāramiyo pūretvā sabbakilese bhañjitvā anuttaram sammāsambodhim abhisambuddho, sakyarājassa puttoti **sakyaputto**. Anaññasādhāraṇāya puññasampattiyā ca sambhāvito uttamāya rūpakāyasiriyā dhammakāyasiriyā ca samannāgatattā **sirīmā**, tassa bhagavato sakyaputtassa sirīmato namo atthu, tam namāmīti attho. **Tenāti** tena bhagavatā. **Ayanti** tassa dhammassa attano paccakkhatāya vadati. **Aggappattenāti** aggam

sabbaññutaṃ, sabbehi vā guṇehi aggabhāvaṃ seṭṭhabhāvaṃ pattena. **Aggadhammoti** aggo uttamo navavidhalokuttaro dhammo suṭṭhu aviparītaṃ **desito** paveditoti.

Mettajittheragāthāvaṇṇanā niṭṭhitā.

5. Cakkhupālattheragāthāvaṇṇanā

Andhohaṃ hatanettosmīti āyasmato cakkhupālattherassa gāthā. Kā uppatti? Sopi purimabuddhesu katādhikāro tattha tattha bhava puññāni karonto siddhatthassa bhagavato kāle kulagehe nibbattivā viññutaṃ patto bhagavati parinibbute thūpamahe kayiramāne umāpupphaṃ gahetvā thūpaṃ pūjesi. So tena puññakammena devaloke nibbattivā aparāparaṃ puññāni katvā devamanussesu saṃsaranto imasmiṃ buddhuppāde sāvattiyā mahāsuvannaṃ nāma kuṭumbikassa putto hutvā nibbatti, tassa **pāloti** nāmamakāṃsu. Mātā tassa ādhāvītvā paridhāvītvā vicaraṇakāle aññaṃ puttaṃ labhi. Tassa mātāpitaro **cūlapāloti** nāmaṃ katvā itaraṃ **mahāpāloti** vohariṃsu. Atha te vayappatte gharabandhanena bandhiṃsu. Tasmīṃ samaye satthā sāvattiyā viharati jetavane. Tattha mahāpālo jetavanaṃ gacchantehi upāsakehi saddhiṃ vihāraṃ gantvā satthu santike dhammaṃ sutvā paṭiladdhasaddho kuṭumbabhāraṃ kaniṭṭhabhātikasēva bhāraṃ katvā sayāṃ pabbajitvā laddhūpasampado ācariyupajjhāyānaṃ santike pañcavassāni vasitvā vuṭṭhavasso pavāretvā satthu santike kammaṭṭhānaṃ gahetvā saṭṭhimatte sahāyabhikkhū labhitvā tehi saddhiṃ bhāvanānukūlaṃ vasanaṭṭhānaṃ pariyesanto aññataraṃ paccantagāmaṃ nissāya gāmaṃ vāsikehi upāsakehi kāretvā dinnāya araṇṇāyatane paṇṇasālāya vasanto samaṇadhammaṃ karoti. Tassa akkhirogo uppanno. Vejjo bhesajjaṃ sampādetvā adāsi. So vejjena vuttavidhānaṃ na paṭipajji. Tenassa rogo vaḍḍhi. So “akkhirogavūpasamanato kilesarogavūpasamanameva mayhaṃ vara”nti akkhirogaṃ ajjupekkhitvā vipassanāyaveva yuttappayutto ahosi. Tassa bhāvanaṃ ussukkāpentassa apubbaṃ acarimaṃ akkhīni ceva kilesā ca bhijjiṃsu. So sukkhavipassako arahā ahosi. Tena vuttaṃ **apadāne** (apa. therā 1.15.21-25)

“Nibbute lokamahite, āhutiṇaṃ paṭiggahe;
Siddhatthamhi bhagavati, mahāthūpamaho ahu.

“Mahe pavattamānamhi, siddhatthassa mahesino;
Umāpupphaṃ gahetvāna, thūpamhi abhiropayim.

“Catunnavutito kappe, yaṃ pupphamabhiropayim;
Duggatiṃ nābhijānāmi, thūpapūjāyidaṃ phalaṃ.

“Ito ca navame kappe, somadevasanāmakā;
Pañcāsītisu rājāno, cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana”nti.

Atha there akkhirogena vihāre ohīne gāmaṃ piṇḍāya gate bhikkhū disvā upāsakā “kasmā thero nāgato”ti pucchitvā tamattaṃ sutvā sokābhībhūtā piṇḍapātaṃ upanetvā, “bhante, kiñci mā cintayittha, idāni mayameva piṇḍapātaṃ ānetvā upaṭṭhahissāmā”ti tathā karonti. Bhikkhū therassa ovāde ṭhatvā nacirasēva arahattaṃ patvā vuṭṭhavassā pavāretvā, “satthāraṃ vanditūṃ sāvattim gamissāma, bhante”ti āhaṃsu. Thero, “ahaṃ dubbalo acakkhuko, maggo ca saupaddavo, mayā saddhiṃ gacchantānaṃ tumhākaṃ parissayo bhavissati, tumhe paṭhamaṃ gacchatha, gantvā satthāraṃ mahāthere ca mama vandanāya vandatha, cūlapālassa mama pavattim kathetvā kañci purisaṃ peseyyāthā”ti āha. Te punapi yācitvā gamaṇaṃ alabhantā “sādhū”ti paṭissuṇitvā senāsanaṃ saṃsāmetvā upāsake āpucchitvā anukkamena jetavanaṃ gantvā satthāraṃ mahāthere ca tassa vandanāya vanditvā dutiyadvise sāvattiyā piṇḍāya caritvā cūlapālassa taṃ pavattim vatvā tena “ayaṃ, bhante, mayhaṃ bhāgineyyo pālito nāma, imaṃ pesissāmī”ti vutte, “maggo saparissayo, na sakkā ekena gahaṭṭhena

gantum, tasmā pabbājetabbo’’ti tam pabbājetvā pesesum. So anukkamena therassa santikam gantvā attānam tassa orocetvā tam gahetvā āgacchanto antarāmagge aññatarassa gāmassa sāmanta araññatthāne ekissā kaṭṭhahāriyā gāyantiyā saddam sutvā paṭibaddhacitto hutvā yaṭṭhikoṭim vissajjetvā ‘‘tiṭṭhatha, bhante, muhuttam yāvāham āgacchāmi’’ti vatvā tassā santikam gantvā tattha silavipattim pāpuṇi. Thero idānimeva itthiyā gītasaddo suto, sāmaṇero ca cirāyati, nūna silavipattim patto bhavissati’’ti cintesi. Sopi āgantvā ‘‘gacchāma, bhante’’ti āha. Thero ‘‘kiṃ pāpo jātosī’’ti pucchi. Sāmaṇero tuṅhī hutvā puna pucchitopi na kathesi. Thero ‘‘tādisena pāpena mayham yaṭṭhigahaṇakiccam natthi, gaccha tva’’nti vatvā puna tena ‘‘bahuparissayo maggo, tumhe ca andhā, katham gamissathā’’ti vutte ‘‘bāla idheva me nipajjitvā marantassāpi aparāparaṃ parivattentassāpi tādisena gamanam nāma natthī’’ti imamattham dassento –

95. ‘‘Andhoham hatanettosmi, kantāraddhānapakkhando;
Sayamānopi gacchissam, na sahāyena pāpenā’’ti. – gātham abhāsitha;

Tattha **andhoti** cakkhuvikalo. **Hatanettoti** vinaṭṭhacakkhuko, tena ‘‘payogavipattivasenāham upahatanettatāya andho, na jaccandhabhāvenā’’ti yathāvuttam andhabhāvaṃ viseseti. Atha vā ‘‘andho’’ti idam ‘‘andhe jiṇṇe mātāpitaro poseti’’tiādīsu (ma. ni. 2.288) viya maṃsacakkhuvekalladīpanam, ‘‘sabbepime paribbājakā andhā acakkhukā’’ (udā. 54) ‘‘andho ekacakkhu dvicakkhū’’tiādīsu (a. ni. 3.29) viya na paññācakkhuvekalladīpananti dassetum ‘‘**hatanettosmi**’’ti vuttam, tena mukhyameva andhabhāvaṃ dasseti. **Kantāraddhānapakkhandoti** kantāre vivane dīghamaggaṃ anupaviṭṭho, na jātikantārādīghanam saṃsāraddhānaṃ paṭipannoti adhippāyo. Tādisaṅhi kantāraddhānaṃ ayaṃ thero samatikkamitvā ṭhito, **sayamānopī**ti sayantopi, pādesu avahantesu urena jaṇṇukāhi ca bhūmiyaṃ saṃsaranto parivattentopi gaccheyyam. **Na sahāyena pāpenā**ti tādisena pāpapuggalena sahāyabhūtena saddhim na gacchissanti yojanā. Tam sutvā itaro saṃvegajāto ‘‘bhāriyaṃ vata mayā sāhasikammaṃ kata’’nti bāhā paggayha kandanto vanasaṇḍam pakkhando ca ahosi. Atha therassa silatejena paṇḍukambalasilāsanam uṇhākāram dassesi. Tena sakko tam kāraṇam ṇatvā therassa santikam gantvā sāvattigānipurisaṃ viya attānam ṇāpetvā yaṭṭhikoṭim gaṇhanto maggaṃ saṅkhipitvā tadaheva sāyanhe sāvattiyaṃ theram netvā tattha jetavane cūlapālitena kāritāya paṇṇasālāya phalake nisīdāpetvā tassa sahāyavaṇṇena therassa āgatabhāvaṃ jānāpetvā pakkāmi; cūlapālitopi tam yāvajīvaṃ sakkaccaṃ upaṭṭhāsīti.

Cakkhupālattheragāthāvaṇṇanā niṭṭhitā.

6. Khaṇḍasumanattheragāthāvaṇṇanā

Ekapupphaṃ cajitvānāti āyasmato khaṇḍasumanattherassa gāthā. Kā uppatti? So kira padumuttarassa bhagavato kāle kulagehe nibbattitvā viññutaṃ patto satthari parinibbute tassa thūpassa samantato candanavedikāya parikkhipitvā mahantaṃ pūjaṃ akāsi. So tena puññakamma devamanussesu ulāraṃ sampattim anubhavanto kassapassa bhagavato kāle kuṭumbikakule nibbato satthari parinibbute kanakathūpaṃ uddissa raññā pupphapūjāya kayiramānāya pupphāni alabhanto ekaṃ khaṇḍasumanapupphaṃ disvā mahatā mūlena tam kiṇitvā gaṇhanto cetiye pūjaṃ karonto ulāraṃ pītisomanassaṃ uppādesi. So tena puññakamma devaloke nibbattitvā asīti vassakoṭiyo saggasukhaṃ anubhavitvā imasmim buddhuppāde pāvāyaṃ mallarājakule nibbatti. Tassa jātakāle gehe khaṇḍasakkharā sumanapupphāni ca uppannāni ahesum. Tenassa **khaṇḍasumanoti** nāmamakamsu. So viññutaṃ patto bhagavati pāvāyaṃ cundassa ambavane viharante upasaṅkamitvā dhammaṃ sutvā paṭiladdhasaddho pabbajitvā vipassanāya kammaṃ karonto nacirasseva chaḷabhiñño ahosi. Tena vuttam **apadāne** (apa. therā 1.15.15-20) –

‘‘Padumuttaro nāma jino, lokajetṭho narāsabho;
Jalivā aggikkhandhova, sambuddho parinibbuto.

“Nibbute ca mahāvīre, thūpo vitthāriko ahu;
Dūratova upaṭṭhenti, dhātugehavaruttame.

“Pasannacitto, sumano, akaṃ candanavedikaṃ;
Dissati thūpakhandho ca, thūpānucchaviko tadā.

“Bhave nibbattamānamhi, devatte atha mānuse;
Omattaṃ me na passāmi, pubbakammassidaṃ phalaṃ.

“Pañcadasakappasate, ito aṭṭha janā ahuṃ;
Sabbe samattanāmā te cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā attano purimajātiṃ anussaranto tattha attano sumanapupphapariccāgassa saggasampattinimittakaṃ nibbānūpanissayatañca disvā udānavasena tamatthaṃ pakāsento –

96. “Ekapupphaṃ cajitvāna, asīti vassakoṭiyo;
Saggesu paricāretvā, sesakenamhi nibbuto’nti. – gāthaṃ abhāsi;

Tattha **ekapupphanti** ekaṃ kusumaṃ, taṃ pana idha sumanapupphaṃ adhippettaṃ. **Cajitvānāti** satthu thūpapūjākaraṇavasena pariccajitvā pariccāgahetu. **Asīti vassakoṭiyoti** manussagaṇanāya vassānaṃ asīti koṭiyo, accantasamyoge cetāṃ upayogavacanaṃ, idañca chasu kāmasaggesu dutiye aparāparuppattivaseṇa vuttanti veditabbaṃ. Tasmā **saggesūti** tāvatimsasankhāte saggaloke, punappunaṃ uppajjanavasena hettha bahuvacanaṃ. **Paricāretvāti** rūpādīsu ārammaṇesu indriyāni paricāretvā sukhaṃ anubhavitvā, devaccharāhi vā attānaṃ paricāretvā upaṭṭhāpetvā. **Sesakenamhi nibbutoti** pupphapūjāya vasena pavattakusalacetanāsu bhavasampatti dāyakakammato sesena yaṃ tattha vivaṭṭūpanissayabhūtaṃ, taṃ sandhāya vadati. Bahū hi tattha pubbāparavasena pavattā cetanā. **Sesakenāti** vā tasseva kammaṃ vipākāvaseseṇa aparikkhīṇeyeva tasmiṃ kammavipāke nibbuto amhi, kilesaparibhānena parinibbutosmi. Etena yasmiṃ attabhāve ṭhatvā attanā arahattaṃ sacchikataṃ, sopi carimattabhāvo tassa kammavipākoti dasseti. Yādisaṃ sandhāya aññatthāpi “tasseva kammaṃ vipākāvaseseṇā’nti (pārā. 228; saṃ. ni. 1.131) vuttaṃ.

Khaṇḍasumanattheragāthāvaṇṇanā niṭṭhitā.

7. Tissattheragāthāvaṇṇanā

Hitvā satapalaṃ kaṃsanti āyasmato tissattherassa gāthā. Kā uppatti? Ayampi purimabuddhesu katādhikāro vipassissa bhagavato kāle yānakārukule nibbattitvā viññutaṃ patto ekadivasaṃ bhagavantaṃ disvā pasannamānaso candanakhaṇḍena phalakaṃ katvā bhagavato upanāmesi, tañca bhagavā paribhuñji. So tena puññakammaṇa devaloke nibbattitvā aparāparaṃ puññāni katvā devamanussesu saṃsaranto imasmiṃ buddhuppāde roruvanagare rājakule nibbatti. So vayappatto pitari kālaṅkate rajje patiṭṭhito bimbisārarañño adiṭṭhasahāyo hutvā tassa maṇimuttāvattahādīni paṇṇākārāni pesesi. Tassa rājā bimbisāro puññavantataṃ sutvā paṭipābhatāṃ pesento cittapaṭe buddhacaritaṃ suvaṇṇapaṭṭe ca paṭiccasamuppādaṃ likhāpetvā pesesi. So taṃ disvā purimabuddhesu katādhikāratāya pacchimabhavikatāya ca cittapaṭe dassentaṃ buddhacaritaṃ suvaṇṇapaṭṭake likhitaṃ paṭiccasamuppādakkamañca oloketvā pavattinivattiyo sallakkhetvā sāsanaṃ hadaye ṭhapetvā sañjātasamvego “diṭṭho mayā bhagavato veso, sāsanaṃ ca ekapadesena ñāto, bahudukkhā kāmā bahupāyāsā, kiṃ dāni mayhaṃ gharāvaseṇā’nti rajjaṃ pahāya kesamassaṃ ohāretvā kāsāyāni vatthāni acchādento bhagavantaṃ uddissa pabbajitvā mattikāpattaṃ gahetvā rājā pukkusāti viya mahājanassa paridevantaṃseva nagarato nikkhamitvā anukkamaṇa rājagahaṃ gantvā tattha sappasoṇḍikapabbhāre viharantaṃ bhagavantaṃ upasaṅkamtivā vanditvā ekamantaṃ nisīdi. Satthā dhammaṃ desesi. So

dhammadesanaṃ sutvā vipassanāya kammaṭṭhānaṃ gahetvā yuttappayutto viharanto vipassanaṃ ussukkāpetvā arahattaṃ pāpuṇi. Tena vuttaṃ **apadāne** (apa. thera 1.15.37-42) –

“Yānakāro pure āsiṃ, dārukamme susikkhito;
Candanaṃ phalakaṃ katvā, adāsiṃ lokabandhuno.

“Pabhāsati idaṃ byamaṃ, suvaṇṇassa sunimmitaṃ;
Hatthiyānaṃ assayānaṃ, dibbayānaṃ upaṭṭhitaṃ.

“Pāsādā sivikā ceva, nibbattanti yadicchakaṃ;
Akkhubbhaṃ ratanaṃ mayhaṃ, phalakassa idaṃ phalaṃ.

“Ekanavutito kappe, phalakaṃ yamaṃ dadim;
Duggati nābhijānāmi, phalakassa idaṃ phalaṃ.

“Sattapaññāsakappamhi, caturo nimmitāvhayā;
Sattaratanasampannā, cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana’nti.
Arahattaṃ pana patvā udānavasena attano paṭipattiṃ kathento –

97. “Hitvā satapalaṃ kamsaṃ, sovaṇṇaṃ satarājikaṃ;
Aggaḥiṃ mattikāpattaṃ, idaṃ dutiyābhisecana’nti. – gāthaṃ abhāsi;

Tattha **hitvā**ti pariccajivā. **Satapalanti** satam palāni yassa, taṃ satapalaparimāṇaṃ. **Kamsanti** thālaṃ. **Sovaṇṇanti** suvaṇṇamayam. **Satarājikanti** bhittivicittatāya ca anekarūparājicittatāya ca anakalekhāyuttaṃ. **Aggaḥiṃ mattikāpattanti** evarūpe mahārahe bhājane pubbe bhuñjitvā buddhānaṃ ovādaṃ karonto “idānāhaṃ taṃ chaḍḍetvā mattikāmayapattaṃ aggaḥesiṃ, aho, sādhu, mayā kataṃ ariyavataṃ anuṭṭhita’nti bhājanakittanāpadesena rajjapariccāgaṃ pabbajjūpagamanañca anumodanto vadati. Tenāha “**idaṃ dutiyābhisecana**’nti. Paṭhamaṃ rajjābhisecanaṃ upādāya idaṃ pabbajjūpagamaṃ mama dutiyaṃ abhisecanaṃ. Tañhi rāgādīhi saṃkiliṭṭhaṃ sāsāṅkaṃ saparisāṅkaṃ kammaṃ anattasañhitaṃ dukkhapaṭibaddhaṃ nihīnaṃ, idaṃ pana taṃvipariyāyato uttamaṃ paṇṭanti adhippāyo.

Tissattheragāthāvaṇṇanā niṭṭhita.

8. Abhayattheragāthāvaṇṇanā

Rūpaṃ disvā sati muṭṭhāti āyasmato abhayattherassa gāthā. Kā uppatti? Sopi purimabuddhesu katādhikāro tattha tattha bhave vivaṭṭūpanissayaṃ puññaṃ upacinanto sumedhassa bhagavato kāle kulagehe nibbattitvā viññutaṃ patto ekadivasaṃ sumedhaṃ bhagavantaṃ disvā pasannacitto saḷalappupphehi pūjamakāsi. So tena puññakamma devesu nibbattitvā aparāparaṃ puññāni katvā sugatīsuyeva saṃsaranto imasmiṃ buddhuppāde sāvattiyaṃ brāhmaṇakule nibbattitvā **abhayoti** laddhanāmo viññutaṃ patto hetusampattiyaṃ codiyamāno ekadivasaṃ vihāraṃ gato satthu dhammadesanaṃ sutvā paṭiladdhasaddho pabbajitvā katapubbakicco vipassanāya kammaṃ karonto viharati. Athassa ekadivasaṃ gāmaṃ piṇḍāya pavitṭhassa alankatapaṭiyattaṃ mātugāmaṃ disvā ayonisomanasikāravasena tassa rūpaṃ ārabha chandarāgo uppajji, so vihāraṃ pavisitvā “satiṃ vissajjitvā oloketassa rūpārammaṇe mayhaṃ kilesa uppanno, ayuttaṃ mayā kata’nti attano cittaṃ niggaṇhanto tāvadeva vipassanaṃ vaḍḍhetvā arahattaṃ pāpuṇi. Tena vuttaṃ **apadāne** (apa. thera 1.15.43-47) –

“Sumedho nāma nāmena, sayambhū aparājito;
Vivekamanubrūhanto, ajjhogahi mahāvanaṃ.

“Saḷalaṃ pupphitaṃ disvā, ganthitvāna vaṭṭasakaṃ;
Buddhassa abhiropesiṃ, sammukhā lokanāyakaṃ.

“Timsakappasahassamhi, yaṃ pupphamabhiropayiṃ;
Duggatiṃ nābhijānāmi, buddhapūjāyidaṃ phalaṃ.

“Ūnavīse kappasate, soḷasāsuṃ sunimmitā;
Sattaratanasampannā, cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā attano kilesuppattinidassanena “kilese anuvattentassa vaṭṭadukkhatō nattheva sīsukkipanaṃ. Ahaṃ pana te nānuvatti’nti dassento –

98. “Rūpaṃ disvā sati muṭṭhā, piyaṃ nimittaṃ manasikaroto;
Sārattacitto vedeti, tañca ajjhosa tiṭṭhati;

Tassa vaḍḍhanti āsavā, bhavamūlopagāmino’nti. – gāthaṃ abhāsi;

Tattha **rūpanti** rajjanīyaṃ rūpāyatanam, taṃ panettha itthirūpaṃ adhippetam. **Disvāti** cakkhunā disvā, cakkhudvārānusārena nimittānubyañjanasallakkaṇavasena taṃ gahetvā, tassa tathāgahaṇahetūti attho. **Sati muṭṭhāti** asubhasabhāve kāye “asubha”ntveva pavattanasati naṭṭhā. Yathā pana rūpaṃ disvā sati naṭṭhā, taṃ dassento āha “**piyaṃ nimittaṃ manasikaroto**”nti. Yathāupaṭṭhitaṃ ārammaṇam “subham sukha”ntiādinā piyanimittaṃ katvā ayonisomanasikārena manasikaroto sati muṭṭhāti yojanā. Tathā bhūtova **sārattacitto vedetīti** suṭṭhu rattacitto hutvā taṃ rūpārammaṇam anubhavati abhinandati, abhinandanto pana **tañca ajjhosa tiṭṭhati** ajjhosāya taṃ ārammaṇam gilitvā pariniṭṭhapetvā vattati ceva, evambhūtaṃ ca **tassa vaḍḍhanti āsavā bhavamūlopagāminoti** bhavassa saṃsārasa mūlabhāvaṃ kāraṇabhāvaṃ upagamanasabhāvaṃ kāmāsavādayo cattāropi āsavā tassa puggalassa uparūpari vaḍḍhantiyeva, na hāyanti. Mayhaṃ pana paṭisaṅkhāne ṭhatvā vipassanaṃ vaḍḍhetvā saccāni paṭivijjhantassa maggapaṭipāṭiyā te cattāropi āsavā anavasesato pahīnā parikkhīṇāti adhippāyo.

Abhayattheragāthāvaṇṇanā niṭṭhitā.

9. Uttiyattheragāthāvaṇṇanā

Saddam sutvā sati muṭṭhāti āyasmato uttiyattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭūpanissayaṃ puññaṃ upacinanto sumedhassa bhagavato kāle kulagehe nibbattitvā viññutaṃ patto ekadivasam satthāraṃ disvā pasannacitto gonakādiatthataṃ sauttaracchadaṃ buddhārahaṃ pallaṅkaṃ gandhakuṭiyaṃ paññāpetvā adāsi. So tena puññakammena devamanussesu saṃsaranto imasmiṃ buddhuppāde kapilavatthusmiṃ sakyarājakule nibbatti, tassa **uttiyoti** nāmaṃ ahoṣi. So vayappatto satthu nāṭisamāgame buddhānubhāvaṃ disvā paṭiladdhasaddho pabbajitvā samaṇadhammaṃ karonto ekadivasam nāmaṃ piṇḍāya pavitṭho antarāmagge mātuḡāmassa gītasaddam sutvā ayonisomanasikāravasena tattha chandarāge uppanne paṭisaṅkhānabalena taṃ vikkhambhetvā vihāraṃ pavisitvā sañjātasamvego divaṭṭhāne nisīditvā tāvadeva vipassanaṃ vaḍḍhetvā arahattaṃ pāpuṇi. Tena vuttaṃ **apadāne** (apa. thera 1.15.48-52) –

“Sumedhassa bhagavato, lokajetṭhassa tādino;
Pallaṅko hi mayā dinno, sauttarasapacchado.

“Sattaratanasampanno, pallaṅko āsi so tadā;
Mama saṅkappamaññāya, nibbattati sadā mama.

“Tīṃsakappasahassamhi, pallaṅkamadadiṃ tadā;
Duggatiṃ nābhijānāmi, pallaṅkassa idaṃ phalaṃ.

“Vīsakappasahassamhi, suvaṇṇābhā tayo janā;
Sattaratanasampannā, cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā attano kilesuppattinidassanena “kilese ajigucchantassa natthi vaṭṭadukkhatto sīsukkhipanaṃ, ahaṃ pana te jigucchimevā”ti dassento –

99. “Saddaṃ sutvā sati muṭṭhā, piyaṃ nimittaṃ manasikaroto;
Sārattacitto vedeti, taṅca ajjhosa tiṭṭhati;

Tassa vaḍḍhanti āsavā, saṃsāra upagāmino”ti. – gāthaṃ abhāsi;

Tattha **saddanti** rajjanīyaṃ saddārammaṇaṃ, **saṃsāraupagāminoti** –

“Khandhānaṅca paṭipāṭi, dhātuāyatanāna ca;
Abbochinnaṃ vattamānā, saṃsāroti pavuccatī”ti. –

Evam vuttasaṃsāra vaṭṭakāraṇaṃ hutvā upagamentīti saṃsāraupagāmino, “saṃsārūpagāmino”ti vā pāṭho. Sesam anantaragāthāya vuttanayameva.

Uttiyattheragāthāvaṇṇanā niṭṭhitā.

10. (Dutiya) devasabhattheragāthāvaṇṇanā

Sammappadhānasampannoti āyasmato devasabhattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭūpanissayaṃ kusalaṃ upacinanto sikhissa bhagavato kāle kulagehe nibbattitvā viññutaṃ patto ekadivasaṃ sikhim bhagavantaṃ disvā pasannamānaso bandhujīvakapupphehi pūjaṃ akāsi. So tena puññakammena devamanussesu saṃsaranto imasmiṃ buddhuppāde kapilavatthusmiṃ sakyarājakule nibbatti, tassa **devasabhoti** nāmaṃ ahoṣi. So vayappatto cumbaṭakalahavūpasamanatthaṃ sathari āgate buddhānubhāvaṃ disvā pasannamānaso saraṇesu paṭiṭṭhito puna nigrodhārāme sathari viharante sathāraṃ upasaṅkamitvā paṭiladdhasaddho pabbajitvā katapubbakicco vipassanāya kammaṃ karonto nacirasseva arahattaṃ pāpuṇi. Tena vuttaṃ **apadāne** (apa. therā 1.16.1-6) –

“Candaṃva vimalaṃ suddhaṃ, vippasannamanāvilaṃ;
Nandībhavaparikkhīṇaṃ, tiṇṇaṃ loke visattikaṃ.

“Nibbāpayantaṃ janataṃ, tiṇṇaṃ tārayataṃ vamaṃ;
Muniṃ vanamhi jhāyantaṃ, ekaggaṃ susamāhitaṃ.

“Bandhujīvakapupphāni, lagetvā suttakenahaṃ;
Buddhassa abhiropayaṃ, sikhino lokabandhuno.

“Ekatiṃse ito kappe, yaṃ kammamakarim tadā;

Duggatiṃ nābhijānāmi, buddhapūjāyidaṃ phalaṃ.

“Ito sattamake kappe, manujindo mahāyaso;
Samantacakkhunāmāsi, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana’’nti.
Arahattaṃ pana patvā attanā adhigataṃ vimuttisukhaṃ nissāya uppannapītisomanasso udānavasena

100. “Sammappadhānasampanno, satipaṭṭhānagocaro;
Vimuttikusumasañchanno, parinibbissatyanāsavo’’ti. – gāthaṃ abhāsi;

Tattha **sammappadhānasampanno**ti sampannacatubbidhasammappadhāno, tehi kattabbakiccaṃ sampādetvā ṭhitoti attho. **Satipaṭṭhānagocaroti** kāyānupassanādayo satipaṭṭhānā gocaro pavattiṭṭhānaṃ etassāti satipaṭṭhānagocaro, catūsu satipaṭṭhānesu patiṭṭhitacittoti attho. Guṇasobhena paramasugandhā vimuttiyeva kusumāni, tehi sabbaso sammadeva sañchanno vibhūsito alaṅkatoti **vimuttikusumasañchanno. Parinibbissatyanāsavoti** evaṃ sammā paṭipajjanto bhikkhu nacirasseva anāsavo hutvā parinibbissati saupādisesāya anupādisesāya ca nibbānadhātuyāti attho. Idameva ca therassa aññāyākaraṇaṃ ahosi.

(Dutiya) devasabhattheragāthāvaṇṇanā niṭṭhitā.

Dasamavaggavaṇṇanā niṭṭhitā.

11. Ekādasamavaggo

1. Belaṭṭhānikattheragāthāvaṇṇanā

Hitvā gihittaṃ anavositattotiādikā āyasmato belaṭṭhānikattherassa gāthā. Kā uppatti? Ayampi purimabuddhesu katādhikāro ito ekatiṃse kappe vessabhussa bhagavato kāle brāhmaṇakule nibbattitvā vayappatto brāhmaṇasippesu nipphattiṃ gantvā gharāvāsaṃ pahāya isipabbajjaṃ pabbajitvā isihi parivuto vicaranto ekadivasaṃ vessabhuṃ bhagavantaṃ disvā pītisomanassajāto satthu ñāṇasampattiṃ nissāya pasannamānaso ñāṇaṃ uddissa pupphehi pūjaṃ akāsi. So tena puññakammena devamanussesu saṃsaranto imasmiṃ buddhuppāde sāvattiyāṃ brāhmaṇakule nibbattitvā **belaṭṭhānikoti** laddhanāmo viññutaṃ patto satthu dhammadesanaṃ sutvā paṭiladdhasaddho pabbajitvā kammaṭṭhānaṃ gahetvā kosalaratṭhe araññe viharanto alaso kāyadaḥhibahulo pharusavāco ahosi, samaṇadhamme cittaṃ na uppādesi. Atha naṃ bhagavā ñāṇaparipākaṃ oloketvā –

101. “Hitvā gihittaṃ anavositatto, mukhanaṅgalī odariko kusīto;
Mahāvarāhova nivāpapuṭṭho, punappunaṃ gabbhamupeti mando’’ti. –

Imāya obhāsagāthāya saṃvejesi. So satthāraṃ purato nisinnaṃ viya disvā tañca gāthaṃ sutvā saṃvegajāto ñāṇassa paripākaṃ gatattā vipassanaṃ paṭṭhapetvā nacirasseva arahattaṃ pāpuṇi. Tena vuttaṃ **apadāne** (apa. therā 1.14.41-46) –

“Kaṇikāraṃva jotantaṃ, nisinnaṃ pabbatantare;
Obhāsentaṃ disā sabbā, osadhiṃ viya tārakaṃ.

“Tayo māṇavakā āsuṃ, sake sippe susikkhitā;
Khāribhāraṃ gahetvāna, anventi mama pacchato.

“Puṭake satta pupphāni, nikkhittāni tapassinā;
Gahetvā tāni ñāṇamhi, vessabhussābhiropayim.

“Ekatiṃse ito kappe, yaṃ pupphamabhiropayim;
Duggatiṃ nābhijānāmi, ñāṇapūjāyidaṃ phalaṃ.

“Ekūnatimśakappamhi, vipulābhasanāmako;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā satthu ovādaṃ paṭipūjento byatirekamukhena ca aññaṃ byākaronto tameva gāthaṃ paccudāhāsi.

Tattha **hitvā gihittanti** gahaṭṭhabhāvaṃ pariccajivā pabbajitvāti attho. **Anavositattoti** anurūpaṃ avositatto, yadatthaṃ sāsane pabbajantassa anurūpapariññādīnaṃ atīritattā apariyositabhāvo akatakaraṇiyoti attho. Atha vā **anavositattoti** anuavositasabhāvo, visuddhīnaṃ maggānañca anupaṭipāṭiyā vasitabbavāsassa akatāvī, dasasu ariyavāsesu avusitavāti attho. Mukhasaṅkhātaṃ naṅgalaṃ imassa atthīti **mukhanaṅgalī**. Naṅgalena viya pathaviṃ paresu pharusavācappayogena attānaṃ khanantoti attho. **Odarikoti** udare pasuto udaraposanatapparo. **Kusītoti** alaso, bhāvanāṃ ananuyuñjanto. Evaṃbhūtassa nipphattiṃ dassento āha “**mahāvarāhova nivāpapuṭṭho, punappunaṃ gabbhamupeti mando**”ti. Tassattho heṭṭhā vuttoyeva. Ettha ca yathā pabbajitvā anavositādisabhāvatāya punappunaṃ gabbhamupeti mando, na evaṃ mādiso paṇḍito. Tabbiparītasabhāvatāya pana sammāpaṭipattiyā matthakaṃ pāpitattā parinibbāyatīti byatirekamukhena aññaṃ byākāsīti daṭṭhabbanti.

Belatṭhānikattheragāthāvaṇṇanā niṭṭhitā.

2. Setucchattheragāthāvaṇṇanā

Mānena vañcitāseti āyasmato setucchattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭūpanissayaṃ puññaṃ upacinanto tissassa sammāsambuddhassa kāle kulagehe nibbattivā viññutaṃ patto ekadivasaṃ tissaṃ bhagavantaṃ disvā pasannamānaso sumadhuraṃ panasaphalaṃ abhisankhataṃ nāḷikerasāḷavaṃ adāsi. So tena puññakammena devaloke nibbattivā aparāparaṃ devamanussesu saṃsaranto imasmim buddhuppāde aññatarassa maṅḍalikaṇṇo putto hutvā nibbatti, **setucchotissa** nāmaṃ ahoṣi. So pitari mate rajje paṭiṭṭhito ussāhasattīnaṃ abhāvena rājakiccāni virādhento rajjaṃ parahatthagataṃ katvā dukkhappattiyā saṃvegajāto janapadacārikaṃ carantaṃ bhagavantaṃ disvā upasaṅkamitvā dhammaṃ sutvā paṭiladdhasaddho pabbajitvā parikkammaṃ karonto tadaheva arahattaṃ pāpuṇi. Tena vuttaṃ **apadāne** (apa. thera 1.17.13-17) –

“Tissassa kho bhagavato, pubbe phalamadāsahaṃ;
Nāḷikerañca pādāsīm, khajjakaṃ abhisammatam.

“Buddhassa tamahaṃ datvā, tissassa tu mahesino;
Modāmaṃ kāmakāmī, upapajjim yamicchakaṃ.

“Dvenavute ito kappe, yaṃ dānamadadiṃ tadā;
Duggatiṃ nābhijānāmi, phaladānassidaṃ phalaṃ.

“Itō terasakappamhi, rājā indasamo ahu;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana’nti.
Arahattaṃ pana patvā kilese garahanto –

102. “Mānena vañcitāse, saṅkhāresu saṅkilissamānāse;
Lābhālābhena mathitā, samādhim nādhigacchantī’nti. – gāthaṃ abhāsi;

Tattha **mānena vañcitāseti** “seyyohamasmi”tiādinayappavattena mānena attukkaṃsanaparavambhanādivasena kusalabhaṇḍacchedanena vipaladdhā. **Saṅkhāresu saṅkilissamānāseti** ajjhattikabāhiresu cakkhādīsū ceva rūpādīsū ca saṅkhatadhammesu saṅkilissamānā, “etaṃ mama, eso hamasmi, eso me attā”ti taṇṇimittam taṇhāgāhādivasena saṅkilesam āpajjamānā. **Lābhālābhena mathitāti** pattacīvarādīnañceva vatthādīnañca lābhena tesamyeva ca alābhena taṇṇimittam uppannehi anunayapaṭighehi mathitā madditā abhibhūtā. Nidassanamattañcetam avasiṭṭhalokadhammānampettha saṅgaho daṭṭhabbo. **Samādhim nādhigacchantīti** te evarūpā puggalā samādhim samathavipassanāvasena cittekaggataṃ kadācipi na vindanti na paṭilabhanti na pāpuṇanti samādhisaṃvattanikānaṃ dhammānaṃ abhāvato, itaresaṅca bhāvato. Idhāpi yathā mānādīhi abhibhūtā aviddasuno samādhim nādhigacchanti, na evaṃ viddasuno. Te pana mādisā tehi anabhibhūtā samādhim adhigacchantevāti byatirekamukhena aññābyākaraṇanti veditabbam.

Setucchattheragāthāvaṇṇanā niṭṭhitā.

3. Bandhurattheragāthāvaṇṇanā

Nāhaṃ etena atthikoti āyasmato bandhurattherassa gāthā. Kā uppatti? Ayampi purimabuddhesu katādhikāro siddhatthassa bhagavato kāle aññatarassa rañño antepure gopako hutvā ekadivasam bhagavantaṃ sapaṇisaṃ rājaṅgaṇena gacchantaṃ disvā pasannacitto kaṇaverapupphāni gahetvā sasaṅghaṃ lokanāyakaṃ pūjesi. So tena puññakammena devaloke nibbattivā aparāparaṃ sugatīsuyeva saṃsaranto imasmiṃ buddhuppāde sīlavatīnagare seṭṭhiputto hutvā nibbatti, **bandhuro**tissa nāmaṃ ahoṣi. So viññutaṃ patto kenacideva karaṇīyena sāvattiyam gato upāsakehi saddhim vihāraṃ gato satthu dhammadesanaṃ sutvā paṭiladdhasaddho pabbajitvā ñāṇassa paripākattā vipassanaṃ paṭṭhapetvā nacirasseva arahattaṃ pāpuṇi. Tena vuttaṃ **apadāne** (apa. thera 1.17.7-12) –

“Siddhattho nāma bhagavā, lokajetṭho narāsabho;
Purakkhato sāvakehi, nagaraṃ paṭipajjatha.

“Rañño antepure āsiṃ, gopako abhisammato;
Pāsāde upaviṭṭhoṃ, addasaṃ lokanāyakaṃ.

“Kaṇaveraṃ gahetvāna, bhikkhusaṅghe samokiriṃ;
Buddhassa viṣuṃ katvāna, tato bhīyo samokiriṃ.

“Catunnavutito kappe, yaṃ pupphamabhipūjayiṃ;
Duggatiṃ nābhijānāmi, buddhapūjāyidaṃ phalaṃ.

“Sattāsītimhito kappe, caturāsuṃ mahiddhikā;
Sattaratanasampannā, cakkavattī mahabbalā.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā kataññubhāve ṭhatvā attano upakārassa rañño paccupakāraṃ kātuṃ sīlavatīnagaraṃ gantvā rañño dhammaṃ desento saccāni pakāsesi. Rājā saccapariyosāne sotāpanno hutvā attano nagare sudassanaṃ nāma mahantaṃ vihāraṃ kāretvā therassa niyyātesī. Mahālābhasakkāro ahoṣi. Thero vihāraṃ sabbañca lābhasakkāraṃ saṅghassa niyyātetvā sayam purimaniyāmeneva piṇḍāya

caritvā yāpento katipāhaṃ tattha vasitvā sāvattiṃ gantukāmo ahoṣi. Bhikkhū, “bhante, tumhe idheva vasatha, sace paccayehi vekallaṃ, mayaṃ taṃ paripūressāma”ti āhaṃsu. Thero, “na mayhaṃ, āvuso, uḷārehi paccayehi attho atthi, itarītarehi paccayehi yāpemi, dhammarasenevami titto”ti dassento

103. “Nāhaṃ etena atthiko, sukhito dhammarasena tappito;
Pitvā rasaggamuttamaṃ, na ca kāhāmi visena santhava”nti. –

Gāthaṃ abhāsi.

Tattha **nāhaṃ etena atthikoti** yena maṃ tumhe tappetukāma “paripūressāma”ti vadatha, etena āmisalābhena paccayāmisarasena nāhaṃ atthiko, mayhaṃ etena attho natthi, santuṭṭhi paramaṃ sukhanti itarītareheva paccayehi yāpemi attho. Idāni tena anathikabhāve padhānakāraṇaṃ dassento āha “**sukhito dhammarasena tappito**”ti. Sattatiṃsabodhipakkhiyadhammarasena ceva navavidhalokuttaradhammarasena ca tappito pīṇito sukhito uttamaṃ sukhena suhitoti attho. **Pitvā rasaggamuttamaṃ** sabbarasesu aggaṃ seṭṭhaṃ tatoyeva uttamaṃ yathāvuttaṃ dhammarasaṃ pivitvā ṭhito, tenāha – “sabbarasaṃ dhammaraso jināti”ti (dha. pa. 354). **Na ca kāhāmi visena santhavanti** evarūpaṃ rasuttamaṃ dhammarasaṃ pivitvā ṭhito visena visasadisena visarasena santhavaṃ saṃsaggaṃ na karissāmi, tathākaraṇassa kāraṇaṃ natthīti attho.

Bandhurattheragāthāvaṇṇanā niṭṭhitā.

4. Khitakattheragāthāvaṇṇanā

Lahuko vata me kāyoti āyasmato khitakattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto padumuttarassa bhagavato kāle yakkhasenāpati hutvā nibbatta ekadivasaṃ yakkhasamāgame nisinno sathhāraṃ aññatarasmiṃ rukkhamaṃle nisinnaṃ disvā upasaṅkamitvā sathhāraṃ vanditvā ekamantaṃ nisīdi. Tassa sathhā dhammaṃ desesi. So dhammaṃ sutvā uḷāraṃ pītisomanassaṃ pavedento appoṭento uṭṭhahitvā sathhāraṃ vanditvā padakkhiṇaṃ katvā pakkāmi. So tena puññakammaṃ devamanussesu saṃsaranto imasmiṃ buddhuppāde sāvattiyaṃ brāhmaṇakule nibbatti, **khita**koṭissa nāmaṃ ahoṣi. So viññutaṃ patto mahāmogallānattherassa mahiddhikabhāvaṃ sutvā “iddhimā bhavissāmi”ti pubbaḥetunā codiyamāno pabbajitvā bhagavato santike kammaṭṭhānaṃ gahetvā samathavipassanāsu kammaṃ karonto nacirasseva chaḷabhiñño ahoṣi. Tena vuttaṃ **apadāne** (apa. thera 1.17.1-6) –

“Padumo nāma nāmena, dvipadindo narāsabho;
Pavanaṃ abhinikkhamma, dhammaṃ deseti cakkhumā.

“Yakkhānaṃ samayo āsi, avidūre mahesino;
Yena kiccena sampattā, ajjhāpekkhiṃsu tāvade.

“Buddhassa giramaññāya, amatassa ca desanaṃ;
Pasannacitto sumano, appoṭetvā upaṭṭhahim.

“Suciṇṇassa phalaṃ passa, upaṭṭhānassa satthuno;
Tiṃsakappasahassesu, duggatiṃ nupapajjaham.

“Ūnatiṃse kappasate, samalaṅkatanāmaṃ;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā savisesaṃ iddhīsu vasābhāvena anekavihitaṃ iddhividhaṃ paccanubhonto iddhipāṭihāriyena anusāsanīpāṭihāriyena ca sattānaṃ anuggahaṃ karonto viharati. So bhikkhūhi, “kathaṃ tvaṃ, āvuso, iddhī vaḷaṅjesī”’ti puṭṭho tamatthaṃ ācikkhanto –

104. “Lahuko vata me kāyo, phuṭṭho ca pītisukhena vipulena;
Tūlamiva eritaṃ mālutena, pilavatīva me kāyo”’ti. –

Gāthaṃ abhāsi. “Udānavasenā”’tipi vadantiyeva.

Tattha **lahuko vata me kāyoti** nīvaraṇādivikkhambhana cuddasavidhena cittaparidamanena caturiddhipādakabhāvanāya suṭṭhu ciṅṅavasābhāvena ca me rūpakāyo sallahuko vata, yena dandhaṃ mahābhūtapaccayampi nāma imaṃ karajakāyaṃ cittavasena pariṇāmemīti adhippāyo. **Phuṭṭho ca pītisukhena vipulena**ti sabbatthakameva pharantena mahatā uḷārena pītisahitena sukkena phuṭṭho ca me kāyoti yojanā. Idañca yathā kāyo lahuko ahosi, taṃ dassanattaṃ vuttaṃ. Sukhasaññokkamanena hi saddhiṃyeva lahusaññokkamaṇaṃ hoti. Sukhassa pharaṇācetta taṃsamuṭṭhānarūpavasena daṭṭhabbaṃ kathaṃ pana catutthajjhānasamaṅgino pītisukhapharaṇaṃ, samatikkanta pītisukhañhi tanti ce? Saccametaṃ, idaṃ pana na catutthajjhānalakkhaṇavasena vuttaṃ, atha kho pubbabhāgavasena. “Pītisukhenā”’ti pana pītisahitasadisena sukkena, upekkhā hi idha santasabhāvatāya ñānavisesayogato ca sukhanti adhippettaṃ. Tathā hi vuttaṃ “sukhasaññañca lahusaññañca okkamati”’ti (paṭi. ma. 1.101). Pādakajjhānārammaṇena rūpakāyārammaṇena vā iddhicittena saha jātāṃ sukhasaññañca lahusaññañca okkamati pavasati phusati sampāpuṇātīti ayampi tattha attho. Tathā cāha aṭṭhakathāyaṃ (paṭi. ma. aṭṭha. 2.3.12) – “sukhasañña nāma upekkhāsampayuttā sañña. Upekkhā hi santaṃ sukhanti vuttaṃ sāyeva sañña nīvaraṇehi ceva vitakkādipaccanīkehi ca vimuttatā lahusaññaṭīpi vedītabbā. Taṃ okkantassa panassa karajakāyopi tūlapicu viya sallahuko hoti. So evaṃ vātakkhattatūlapicuno viya sallahukena dissamānena kāyena brahmalokaṃ gacchati”’ti. Tenāha “**tūlamiva eritaṃ mālutena, pilavatīva me kāyo**”’ti. Tassattho – yadāhaṃ brahmalokaṃ aññaṃ vā iddhiyā gantukāmo homi, tadā mālutena vāyunā eritaṃ cittaṃ tūlapicu viya ākāsaṃ laṅghantoyeva me kāyo hotīti.

Khitakattheragāthāvaṇṇanā niṭṭhitā.

5. Malitavambhattheragāthāvaṇṇanā

Ukkaṅṭhitoti āyasmato malitavambhattherassa gāthā. Kā uppatti? Ayaṃ kira padumuttarassa bhagavato kāle himavantato avidūre aññatarasmiṃ jātassare sakuṇo hutvā nibbatti, padumuttaro bhagavā taṃ anuggaṇhanto tattha gantvā jātassaratiṃ caṅkamati. Sakuṇo bhagavantaṃ disvā pasannamānaso sare kumudāni gahetvā bhagavantaṃ pūjesi. So tena puññaṅkamma devamanussesu saṃsaranto imasmiṃ buddhuppāde kurukacchanagare aññatarassa brāhmaṇassa putto hutvā nibbatti, **malitavambhotissa** nāmaṃ ahosi. So viññutaṃ patto pacchābhūmahātheraṃ upasaṅkamitvā tassa santike dhammaṃ sutvā paṭiladdhasaddho pabbajitvā vipassanāya kammaṃ karonto viharati. Tassa ca ayaṃ sabhāvo, yattha bhojanasappāyo dullabho, itare sulabhā, tato na pakkamati. Yattha pana bhojanasappāyo sulabho, itare dullabhā, tattha na vasati pakkamateva. Evaṃ viharanto ca hetusampannatāya mahāpurisajātikatāya ca nacirasseva vipassanaṃ vadḍhetvā arahattaṃ pāpuṇi. Tena vuttaṃ **apadāne** (apa. therā 1.16.51-57) –

“Himavantassāvidūre, mahājātassaro ahu;
Padumuppalasañchanno, puṇḍarīkasamotthaṭo.

“Kukuttho nāma nāmena, tatthāsiṃ sakuṇo tadā;
Sīlavā buddhisampanno, puññaṅpuññesu kovido.

“Padumuttaro lokavidū, āhutaṇaṃ paṭiggaho;

Jātassarassāvidūre, sañcarittha mahāmuni.

“Jalajaṃ kumudaṃ chetvā, upanesiṃ mahesino;
Mama saṅkappamaññāya, paṭiggahi mahāmuni.

“Tañca dānaṃ daditvāna, sukkamūlena codito;
Kappānaṃ satasahassaṃ, duggatiṃ nupapajjaham.

“Soḷaseto kappasate, āsuṃ varuṇanāmakā;
Aṭṭha ete janādhipā, cakkavattī mahabbalā.

“Kilesā jhāpitā mayham...pe... kataṃ buddhassa sāsana’nti.
Arahattaṃ pana patvā attano paṭipattiṃ paccavekkhitvā udānento –

105. “Ukkaṅṭhitopi na vase, ramamānopi pakkame;
Na tvevānatthasaṃhitam, vase vāsam vicakkhaṇo’nti. – gātham abhāsi;

Tattha **ukkaṅṭhitopi na vaseti** yasmiṃ āvāse vasantassa me bhojanasappāyālābhena adhikusalesu dhammesu ukkaṅṭhā anabhirati uppajjati, tattha ukkaṅṭhitopi vasāmiyeva itarasappāyalābhena na pakkame na pakkamāmi. **Na vaseti** ettha na-kārenapi pakkametipadaṃ sambandhitabbaṃ. **Ramamānopi pakkameti** yasmiṃ pana āvāse vasantassa me paccayavekallābhāvena natthi ukkaṅṭhā, aññadatthu abhiramāmi, evaṃ abhiramamānopi avasesasappāyālābhena tato pakkame, na vaseyyam. Evaṃ paṭipajjantovāham nacirasseva sakattham paccupādinti. Ayañcettha attapaṭipattipaccavekkhaṇāyaṃ yojanā. Parassa ovādadāne pana vaseyya na pakkameyyāti vidhānavasena yojetabbaṃ. **Na tvevānatthasaṃhitam, vase vāsam vicakkhaṇoti** yasmiṃ āvāse paccayā sulabhā, samaṇadhammo na pāripūriṃ gacchati, yasmiñca āvāse paccayā dullabhā, samaṇadhammopi pāripūriṃ na gacchati, evarūpo āvāso idha anattasaṃhito nāma avaḍḍhisahitoti katvā. Evarūpaṃ vāsam vicakkhaṇo viññujātiko sakattham paripūretukāmo natveva vaseyya. Yattha pana pañcaṅgasamannāgato āvāso labbhati, sattapi sappāyā labbhanti, tattheva vaseyyāti attho.

Malitavambhattheragāthāvaṇṇanā niṭṭhitā.

6. Suhemantattheragāthāvaṇṇanā

Sataliṅgassa atthassāti āyasmato suhemantattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭupanissayaṃ puññaṃ upacinanto ito dvānavute kappe tissassa bhagavato kāle vanacaro hutvā vane vasati, taṃ anuggahituṃ bhagavā araññaṃ pavisitvā tassa āsanne ṭhāne aññatarasmiṃ rukkhamūle nisīdi. So bhagavantaṃ disvā pasannacitto sugandhāni punnāgapupphāni ocinitvā bhagavantaṃ pūjesi. So tena puññakammena devaloke nibbattitvā aparāparaṃ puññāni katvā devamanussesu saṃsaranto imasmiṃ buddhuppāde pāriyantadesse vibhavasampannassa brāhmaṇassa putto hutvā nibbatti, **suhemantotissa** nāmaṃ ahoṣi. So viññutaṃ patto saṅkassanagare migadāye viharantaṃ bhagavantaṃ upasaṅkamtivā dhammaṃ sutvā paṭiladdhasaddho pabbajitvā teṭṭako hutvā vipassanaṃ paṭṭhapetvā nacirasseva chaḷabhiñño paṭisambhidāpatto ahoṣi. Tena vuttaṃ **apadāne** (apa. therā 1.16.46-50) –

“Kānaṃ vanamogayha, vasāmi luddako aham;
Punnāgaṃ pupphitaṃ disvā, buddhaseṭṭham anussariṃ.

“Taṃ puppham ocinitvāna, sugandham gandhitam subham;
Thūpaṃ karitvā puline, buddhassa abhiropayim.

“Dvenavute ito kappe, yaṃ pupphamabhipūjayiṃ;
Duggatiṃ nābhijānāmi, buddhapūjāyidaṃ phalaṃ.

“Ekamhi navute kappe, eko āsiṃ tamonudo;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā evaṃ cintesi – “mayā kho yaṃ sāvakena pattabbaṃ, taṃ anuppattaṃ, yaṃnūnāhaṃ idāni bhikkhūnaṃ anuggahaṃ kareyya”nti. Evaṃ cintetvā pabhinnapaṭisambhidatāya akilāsutāya ca attano santikaṃ upagate bhikkhū yathārahaṃ ovadanto anusāsanto kaṅkhaṃ chindanto dhammaṃ kathento kammaṭṭhānaṃ niggumbaṃ nijjaṭaṃ katvā ācikkhanto viharati. Athekadivasam attano santikaṃ upagatānaṃ bhikkhūnaṃ viññūnaṅca puggalānaṃ visesaṃ ācikkhanto –

106. “Sataliṅgassa atthassa, satalakkhaṇadhārino;
Ekaṅgadassī dummedho, satadassī ca paṇḍito”ti. – gāthaṃ abhāsi;

Tattha **sataliṅgassāti** līnamatthaṃ gamentīti līṅgāni, atthesu saddassa pavattinimittāni, tāni pana sataṃ anekāni līṅgāni etassāti sataliṅgo. Anekatto hi idha satasaddo, “sataṃ sahassa”ntiādīsu viya na saṅkhyāvisesattho tassa sataliṅgassa. **Atthassāti** ñeyyassa, ñeyyañhi ñāṇena araṇīyato “attho”ti vuccati. So ca ekopi anekaliṅgo, yathā “sakko purindado maghavā”ti, “paññā vijjā medhā ñāṇa”nti ca. Yena līṅgena pavattinimittena tāvatimsādhipatimhi indasaddo pavatto, na tena tattha sakkādisaddā pavattā, atha kho aññena. Tathā yena sammādiṭṭhimhi paññāsaddo pavatto, na tena vijjādisaddā. Tena vuttaṃ “sataliṅgassa atthassā”ti.

Satalakkhaṇadhārinoti anekalakkhaṇavato. Lakkhīyati etenāti lakkhaṇaṃ, paccayabhāvino atthassa attano phalaṃ paṭicca paccayabhāvo, tena hi so ayaṃ imassa kāraṇanti lakkhīyati. So ca ekasseva atthassa anekappabhedo upalabbhati, tenāha “satalakkhaṇadhārino”ti. Atha vā lakkhīyantīti lakkhaṇāni, tassa tassa atthassa saṅkhatatādayo pakāravisesā te pana atthato avatthāvisesā veditabbā. Te ca pana tesam aniccatādisāmaññalakkhaṇaṃ līṅgenti ñāpentīti “līṅgāni”ti ca vuccanti. Tassime ākāra, yasmā ekassāpi atthassa aneke upalabbhanti. Tena vuttaṃ “sataliṅgassa atthassa, satalakkhaṇadhārino”ti. Tenāha āyasmā dhammasenāpati – “sabbe dhammā sabbākārena buddhassa bhagavato ñāṇamukhe āpāthaṃ āgacchantī”ti (mahāni. 156; cūḷani. mogharājamāṇavapucchānidessa 85; paṭi. ma. 3.5).

Ekaṅgadassī dummedhoti evaṃ anekaliṅge anekalakkhaṇe atthe yo tattha ekaṅgadassī aputhupaññatāya ekaliṅgamattaṃ ekalakkhaṇamattaṅca disvā attanā diṭṭhameva “idameva sacca”nti abhinivissa “moghamañña”nti itaraṃ paṭikkhipati, hatthidassanakaandho viya ekaṅgagāhī **dummedho** duppañño tattha vijjamānānaṃyeva pakāravisesānaṃ ajānanato micchā abhinivisanato ca. **Satadassī ca paṇḍitoti** paṇḍito pana tattha vijjamāne anekepi pakāre attano paññācakkhunā sabbaso passati. Yo vā tattha labbhamāne aneke paññācakkhunā attanāpi passati, aññesampi dasseti pakāseti, so **paṇḍito** vicakkhaṇo atthesu kusalo nāmāti. Evaṃ thero ukkaṃsagataṃ attano paṭisambhidāsampattim bhikkhūnaṃ vibhāvesi.

Suhemantattheragāthāvaṇṇanā niṭṭhitā.

7. Dhammasavattheragāthāvaṇṇanā

Pabbajim tulayitvānāti āyasmato dhammasavattherassa gāthā. Kā uppatti? Ayaṃ kira padumuttarassa bhagavato kāle suvaccho nāma brāhmaṇo hutvā tiṇṇaṃ vedānaṃ pāragū gharāvāse dosaṃ disvā tāpasapabbajjaṃ pabbajitvā araṇīyātane pabbatantare assamaṃ kāretvā bahūhi tāpasehi saddhim vasi. Athassa kusalabījaṃ ropetukāmo padumuttaro bhagavā assamasamīpe ākāse ṭhatvā

iddhipāṭihāriyaṃ dassesi. So taṃ disvā pasannamānaso pūjetukāmo nāgapupphāni ocināpesi. Sattā, “alam imassa tāpasassa ettakaṃ kusalābija”nti pakkāmi. So pupphāni gahetvā satthu gamanamaggaṃ okiritvā cittaṃ pasādentō añjalim paggayha aṭṭhāsi. So tena puññakammena devaloke nibbattitvā aparāparaṃ sugatīsuyeva saṃsaranto imasmim buddhuppāde magadharatṭhe brāhmaṇakule nibbattitvā **dhammasavoti** laddhanāmo viññutaṃ patto hetusampattiyā codiyamāno gharāvāse ādīnavam pabbajjāya ānisamsaṅca disvā dakkhiṇāgirisim viharantaṃ bhagavantaṃ upasaṅkamtivā dhammaṃ sutvā paṭiladdhasaddho pabbajitvā vipassanāya kammaṃ karonto nacirasseva arahattaṃ pāpuṇi. Tena vuttaṃ **apadāne** (apa. therā 1.16.39-45) –

“Suvaccho nāma nāmena, brāhmaṇo mantapāragū;
Purakkhato sasissehi, vasate pabbatantare.

“Padumuttaro nāma jino, āhutaṇaṃ paṭiggaho;
Mamuddharitukāmo so, āgacchi mama santikaṃ.

“Vehāsamhi caṅkamati, dhūpāyati jalate tathā;
Hāsaṃ mamaṃ viditvāna, pakkāmi pācināmukho.

“Taṅca acchariyaṃ disvā, abbhutaṃ lomahaṃsanaṃ;
Nāgapupphaṃ gahetvāna, gatamaggaṃhi okiriṃ.

“Satasahassito kappe, yaṃ pupphaṃ okiriṃ ahaṃ;
Tena cittappasādena, duggatiṃ nupapajjahaṃ.

“Ekatimse kappasate, rājā āsi mahāraho;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana”nti.
Arahattaṃ pana patvā attano paṭipattiṃ paccavekkhitvā somanassappatto udānavasena –

107. “Pabbajim tulayitvāna, agārasmānagāriyaṃ;
Tisso vijjā anuppattā, kataṃ buddhassa sāsana”nti. – gāthaṃ abhāsi;

Tattha **pabbajim tulayitvānāti** “sambādho gharāvāso rajāpatho”tiādīnā (dī. ni. 1.191; ma. ni. 2.10; saṃ. ni. 2.154) gharāvāse, “appasādā kāmā bahudukkhā bahupāyāsā”tiādīnā (pāci. 417; ma. ni. 1.177) kāmesu ādīnavam tappaṭipakkhato nekkhamme ca ānisamsaṃ tulabhūtāya paññāya vicāretvā vīmaṃsitvāti attho. Sesam heṭṭhā vuttanayameva. Idameva ca therassa aññābyākaraṇaṃ ahoṣīti.

Dhammasavattheragāthāvaṇṇanā niṭṭhitā.

8. Dhammasavapituttheragāthāvaṇṇanā

Sa vīsavassasatikoti āyasmato dhammasavapituttherassa gāthā. Kā uppatti? Ayampi purimabuddhesu katādhikāro buddhasuññe loke kulagehe nibbattitvā viññutaṃ patto bhūtagaṇe nāma pabbate viharantaṃ paccekasambuddhaṃ disvā pasannamānaso tiṇasūlapupphehi pūjaṃ akāsi. So tena puññakammena devaloke nibbattitvā aparāparaṃ sugatīsuyeva saṃsaranto imasmim buddhuppāde magadharatṭhe brāhmaṇakule nibbattitvā viññutaṃ patto dārapariggahaṃ katvā dhammasavaṃ nāma puttaṃ labhitvā tasmim pabbajite sayampi vīsavassasatiko hutvā, “mama putto tāva taruṇo pabbaji, atha kasmā nāhaṃ pabbajissāmī”ti sañjātasamvego satthu santikaṃ gantvā dhammaṃ sutvā pabbajitvā vipassanaṃ paṭṭhapetvā nacirasseva arahattaṃ sacchākāsi. Tena vuttaṃ **apadāne** (apa. therā 1.16.35-38)

“Himavantassāvidūre, bhūtagaṇo nāma pabbato;
Vasateko jino tattha, sayambhū lokanissaṭo.

“Tiṇasūlaṃ gahetvāna, buddhassa abhiropayim;
Ekūnasatasahassaṃ, kappam na vinipātiko.

“Ito ekādase kappe, ekosim dharaṇīruho;
Sattaratanasampanno, cakkavattī mahabbalo.

“Kilesā jhāpitā mayham...pe... kataṃ buddhassa sāsana’’nti.
Arahattaṃ pana patvā attano paṭipattiṃ paccavekkhitvā sañjātasomanasso udānento –

108. “Sa vīsavassasatiko, pabbajim anagāriyam;
Tisso vijjā anuppattā, kataṃ buddhassa sāsana’’nti. – gātham abhāsi;

Tattha **sa vīsavassasatikoti** so vīsamvassasatiko, so aham jātiyā vīsādhikavassasatiko samāno.
Pabbajinti pabbajam upagacchim. Sesam vuttanayameva. Idameva ca imassa therassa aññābyākaraṇam ahoṣi.

Dhammasavapituttheragāthāvaṇṇanā niṭṭhitā.

9. Saṅgharakkhitattheragāthāvaṇṇanā

Na nūnāyam paramahitānukampinoti āyasmato saṅgharakkhitattherassa gāthā. Kā uppatti? Sopi purimabuddhesu katādhikāro tattha tattha bhava puññāni upacinanto ito catunavute kappe kulagehe nibbattivā viññutaṃ patto ekadivasam pabbatapāde vasante satta paccekasambudde disvā pasannamānaso kadambapupphāni gahetvā pūjesi. So tena puññakammena devaloke nibbattivā aparāparam puññāni katvā sugatīsuyeva saṃsaranto imasmim buddhuppāde sāvattiyam ibbhakule nibbatti, tassa **saṅgharakkhitoti** nāmam ahoṣi. So viññutaṃ patto paṭiladdhasaddho pabbajivā kammaṭṭhānam gahetvā aññataram bhikkhum saḥāyam katvā araṇṇe viharati. Therassa vasanaṭṭhānato avidūre vanagumbe ekā migī vijāyivā taruṇam chāpam rakkhantī chātajjhattāpi puttāsinehena dūre gocarāya na gacchati, āsanne ca tiṇodakassa alābhena kilamati. Tam disvā thero, “aho vatāyam loko taṇhābandhanabaddho mahādukkham anubhavati, na tam chinditum sakkoti’’ti saṃvegajāto tameva aṅkusaṃ katvā vipassanaṃ vaḍḍhetvā arahattaṃ pāpuṇi. Tena vuttam **apadāne** (apa. thera 1.16.30-34) –

“Himavantassāvidūre, kukkuṭo nāma pabbato;
Tamhi pabbatapādamhi, satta buddhā vasanti te.

“Kadambam pupphitam disvā, dīparājamva uggatam;
Ubho hatthehi paggayha, satta buddhe samokirim.

“Catunnavutito kappe, yam pupphamabhiropayim;
Duggatiṃ nābhijānāmi, buddhapūjāyidaṃ phalam.

“Dvenavute ito kappe, sattāsum pupphanāmakā;
Sattaratanasampannā, cakkavattī mahabbalā.

“Kilesā jhāpitā mayham...pe... kataṃ buddhassa sāsana’’nti.
Arahattaṃ pana patvā attano dutiyakam bhikkhum micchāvitakkabahulam viharantaṃ ñatvā tameva migim upamaṃ karitvā tam ovadanto –

109. “Na nūnāyaṃ paramahitānukampino, rahogato anuvigaṇeti sāsanaṃ;
Tathāhayaṃ viharati pākatindriyo, migī yathā taruṇajātikā vane”ti. –

Gāthaṃ abhāsi.

Tattha **na nūnāyanti na**-iti paṭisedhe nipāto. **Nūnāti** parivitaṅke. Nūna ayanti padacchedo. **Paramahitānukampinoti** paramaṃ ativiya, paramena vā anuttarena hitena satte anukampanasīlassa bhagavato. **Rahogatoti** rahasi gato, suññāgāragato kāyavivekayuttoti attho. **Anuvigaṇetīti** ettha “na nūnā”ti padadvayaṃ ānetvā sambandhitabbaṃ “nānuvigaṇeti nūnā”ti, na cintesi maññe, “nānuyuñjati”ti takkemīti attho. **Sāsanaṃ** paṭipattisāsanaṃ, catusaccakammaṭṭhānabhāvananti adhippāyo. **Tathā hīti** teneva kāraṇena, satthu sāsanaṃ ananuyuñjanato eva. **Ayanti** ayaṃ bhikkhu. **Pākatindriyoti** manacchaṭṭhānaṃ indriyānaṃ yathāsakaṃ visayesu vissajjanato sabhāvabhūtaindriyo, asaṃvutacakkhudvārādikoti attho. Yassa taṇhāsaṅgassa acchinnatāya so bhikkhu pākatindriyo viharati, tassa upamaṃ dassento “**migī yathā taruṇajātikā vane**”ti āha. Yathā ayaṃ taruṇasabhāvā migī puttanevassa acchinnatāya vane dukkhaṃ anubhavati, na taṃ ativattati, evamayampi bhikkhu saṅgassa acchinnatāya pākatindriyo viharanto vaṭṭadukkhaṃ nātivattatīti adhippāyo. “Tarūṇajātikā”ti vā pāṭho. Abhinavappasutā bālavacchāti attho. Taṃ sutvā so bhikkhu sañjātasamvego vipassanaṃ vaḍḍhetvā nacirasseeva arahattaṃ pāpuṇi.

Saṅgharakkhitattheragāthāvaṇṇanā niṭṭhitā.

10. Usabhattheragāthāvaṇṇanā

Nagā nagaggesu susaṃvirūḷhāti āyasmato usabhattherassa gāthā. Kā uppati? Ayampi purimabuddhesu katādhikāro tattha tattha bhava vivaṭṭūpanissayāni puññāni karonto ito ekatiṃse kappe sikhissa bhagavato kāle devaputto hutvā nibbato ekadivasaṃ sathhāraṃ disvā pasannaṃānaso dibbapupphehi pūjaṃ akāsi. Sā pupphapūjā sattāhaṃ pupphamaṇḍapākārena aṭṭhāsi. Devamanussānaṃ mahāsamaṅgamo ahosi. So tena puññakamma devamanussesu saṃsaranto imasmiṃ buddhuppāde kosalaratthe ibbhakule nibbatti, tassa **usabhoti** nāmaṃ ahosi. So viññutaṃ patto jetavanapaṭiggahaṇe sathhari laddhappasādo pabbajitvā katapubbakicco araṇṇe pabbatapāde viharati. Tena ca samayena pāvusakālaṃeghe abhippavuṭṭhe pabbatasikhahesu rukkhaḡacchalatāya ghanapaṇṇasaṇḍino honti. Athekadivasaṃ thero leṇato nikkhamitvā taṃ vanarāmaṇeyyakaṃ pabbatarāmaṇeyyakaṃ disvā yonisomanasikāravasena “imepi nāma rukkhadayo acetanā utusampattiyā vaḍḍhiṃ pāpuṇanti, atha kasmā nāhaṃ utusappāyaṃ labhitvā guṇehi vaḍḍhiṃ pāpuṇissāmi”ti cintento –

110. “Nagā nagaggesu susaṃvirūḷhā, udaggameghena navena sittā;
Vivekakāmassa araṇṇasaṇṇino, janeti bhiiyo usabhassa kalyata”nti. –

Gāthaṃ abhāsi.

Tattha **nagāti** rukkha, “nāgā”ti keci vadanti, nāgarukkhāti attho. **Nagaggesūti** pabbatasikhahesu. **Susaṃvirūḷhāti** suṭṭhu samantato virūḷhamulā hutvā parito upari ca sammadeva sañjātasākhagapallavappasākhāti attho. **Udaggameghena navena sittāti** paṭhamuppannaṃ ulārena mahatā pāvusameghena abhippavuṭṭhā. **Vivekakāmassāti** kilesavivattaṃ cittavivekaṃ icchantassa, araṇṇāvāsena tāva kāyaviveko laddho, idāni upadhivivekādhigamassa nissayabhūto cittaviveko laddhabboti taṃ patthayamaṇassa, jāgariyaṃ anuyuñjantassāti attho, tenāha “**araṇṇasaṇṇino**”ti. Araṇṇāvāso nāma sathhārā vaṇṇito thomito. So ca kho yāvadeva samathavipassanābhāvanāpāripūriyā, tasmā sā mayā hatthagatā kātabbāti evaṃ araṇṇagatasāṇṇino nekkhammasaṅkappabahulassāti attho. **Janetīti** uppādentī, puthutte hi idaṃ ekavacanaṃ. Keci pana “janetī”ti paṭhanti. **Bhiiyoti** uparūpari. **Usabhassāti** attānameva paraṃ viya vadati. **Kalyatanti** kalyabhāvaṃ cittaṃ kammaññataṃ bhāvanāyogyataṃ. Svāyamattho heṭṭhā vuttōyeva. Evaṃ thero imaṃ gāthaṃ vadantōyeva vipassanaṃ

ussukkāpetvā arahattaṃ pāpuṇi. Tena vuttaṃ **apadāne** (apa. thera 1.16.25-29) –

“Devaputto ahaṃ santo, pūjayiṃ sikhināyakaṃ;
Mandāravena pupphena, buddhassa abhiropayim.

“Sattāhaṃ chadanaṃ āsi, dibbaṃ mālaṃ tathāgate;
Sabbe janā samāgantvā, namassimsu tathāgataṃ.

“Ekatiṃse ito kappe, yaṃ pupphamabhipūjayim;
Duggatiṃ nābhijānāmi, buddhapūjāyidaṃ phalaṃ.

“Ito ca dasame kappe, rājāhosim jutindharo;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana’nti.
Ayameva ca therassa aññābyākaraṇagāthā ahoṣīti.

Usabhattheragāthāvaṇṇanā niṭṭhitā.

Ekādasamavaggavaṇṇanā niṭṭhitā.

12. Dvādasamavaggo

1. Jentattheragāthāvaṇṇanā

Duppabbajjaṃ ve duradhivāsā gehāti āyasmato jentattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭūpanissayaṃ kusalaṃ upacinanto sikhissa bhagavato kāle devaputto hutvā nibbatti. So ekadivasam sathhāraṃ disvā pasannacitto kiṃkirātapupphehi pūjaṃ akāsi. So tena puññakammena devamanussesu saṃsaranto imasmim buddhuppāde magadharatthe jentagāme ekassa maṇḍalikaṛājassa putto hutvā nibbatti, **jentotissa** nāmaṃ ahoṣi. So viññutaṃ patto daharakāleyeva hetusampattiyā codiyamāno pabbajjāninnamānaso hutvā puna cintesi – “pabbajjā nāma dukkarā, gharāpi durāvāsā, dhammo ca gambhīro, bhogā ca duradhigamā, kiṃ nu kho kattabba’nti evaṃ pana cintābahulo hutvā vicaranto ekadivasam sattu santikaṃ gantvā dhammaṃ suṇi. Sutakālato paṭṭhāya pabbajjābhirato hutvā sattu santike pabbajitvā kammaṭṭhānaṃ gahetvā vipassanaṃ vaḍḍhetvā sukhāya paṭipadāya khippābhiññāya arahattaṃ sacchākāsi. Tena vuttaṃ **apadāne** (apa. thera 1.16.21-24) –

“Devaputto ahaṃ santo, pūjayiṃ sikhināyakaṃ;
Kakkārupupphaṃ paggayha, buddhassa abhiropayim.

“Ekatiṃse ito kappe, yaṃ pupphamabhiropayim;
Duggatiṃ nābhijānāmi, buddhapūjāyidaṃ phalaṃ.

“Ito ca navame kappe, rājā sattuttamo ahuṃ;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā attano paṭipattiṃ paccavekkhanto, “asakkiṃ vatāhaṃ ādito mayhaṃ uppannavitakkaṃ chinditu’nti somanassajāto vitakkassa uppannākāraṃ tassa ca sammadeva chinnataṃ dassento –

111. “Duppabbajjaṃ ve duradhivāsā gehā, dhammo gambhīro duradhigamā bhogā;
Kicchā vutti no itarītarena, yuttaṃ cintetuṃ satatamaniccata”nti. –

Gāthaṃ abhāsi.

Tattha **duppabbajjanti** appaṃ vā mahantaṃ vā bhogakkhandhañceva nītiparivaṭṭaṅga pahāya imasmiṃ sāsane uraṃ datvā pabbajanassa dukkarattā dukkhaṃ pabbajanaṃ, dukkarā pabbajjāti duppabbajjaṃ. **Veti** nipātamattaṃ, daḥhattho vā “pabbajjā dukkhā”ti. Gehañce āvaseyyaṃ, **duradhivāsā gehā**, yasmā gehaṃ adhivasantena raññā rājakiccaṃ, issarena issarakiccaṃ, gahapatinā gahapatikiccaṃ kattabbaṃ hoti, pariṃjano ceva samaṇabrāhmaṇā ca saṅgahetabbā, tasmiṃ tasmiṅca kattabbe kariyamānēpi gharāvāso chiddaghaṭo viya mahāsamuddo viya ca duppūro, tasmā gehā nāmete adhivasituṃ āvasituṃ dukkhā dukkarāti katvā duradhivāsā durāvāsāti. Pabbajjañce anutiṭṭheyyaṃ **dhammo gambhīro**, yadattā pabbajjā, so pabbajitena adhigantabbo paṭivedhasaddhammo gambhīro, gambhīraññānagocarattā duddaso, duppaṭivijjho dhammassa gambhīrabhāvena duppaṭivijjhata. Gehañce āvaseyyaṃ, **duradhigamā bhogā** yehi vinā na sakkā gehaṃ āvasituṃ, te bhogā dukkhena kasirena adhigantabbatāya duradhigamā. Evaṃ sante gharāvāsaṃ pahāya pabbajjaṃyeva anutiṭṭheyyaṃ, evampi **kiicchā vutti no itarītarena idha** imasmiṃ buddhasāsane itarītarena yathāladhena paccayena amhākaṃ vutti jīvikā kicchā dukkhā, gharāvāsaṃ duradhivāsatāya bhogānaṅga duradhigamatāya gehe itarītarena paccayena yāpetabbatāya kicchā kasirā vutti amhākaṃ, tattha kiṃ kātuṃ vaṭṭatīti? **Yuttaṃ cintetuṃ satatamaniccataṃ** sakalaṃ divasaṃ pubbarattāpararattaṅga tebhūmakadhammajātaṃ aniccatanti, tato uppādavayavantato ādiantavantato tāvakālikato ca na niccanti “anicca”nti cintetuṃ vipassituṃ yuttaṃ. Aniccānupassanāya siddhāya itarānupassanā sukheneva sījjhantīti aniccānupassanāva ettha vuttā, aniccassa dukkhānattatānaṃ abyabharāṇato sāsānikassa sukhaggahaṇato ca. Tenāha – “yadaniccaṃ taṃ dukkhaṃ, yaṃ dukkhaṃ tadanattā”ti (saṃ. ni. 3.15), “yaṃ kiñci samudayadhammaṃ, sabbaṃ taṃ nirodhadhammaṃ” (mahāva. 16; dī. ni. 2.371; saṃ. ni. 5.1081), “vayadhammā saṅkhārā”ti (dī. ni. 2.218) ca tadaminā evaṃ aññamaññaṃ paṭipakkhavasena aparāparaṃ uppanne vitakke niggahetvā aniccatāmukhena vipassanaṃ ārabhitvā idāni katakicco jātoto dasseti. Tena vuttaṃ “attano paṭipatti”ntiādi. Idameva therassa aññābyākaraṇaṃ ahoṣi.

Jentattheragāthāvaṇṇanā niṭṭhitā.

2. Vacchagottattheragāthāvaṇṇanā

Tevijjohaṃ mahājhāyīti āyasmato vacchagottattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭūpanissayaṃ kusalaḥbījaṃ ropento vipassissa bhagavato kāle bandhumatīnagare kulagehe nibbattivā viññutaṃ patto ekadivasaṃ raññā nāgarehi ca saddhiṃ buddhapūjaṃ katvā tato paraṃ devamanussesu saṃsaranto imasmiṃ buddhuppāde rājagahe vibhavasampannassa brāhmaṇassa putto hutvā nibbatti, tassa vacchagottatāya **vacchagottot**veva samaññā ahoṣi. So viññutaṃ patvā brāhmaṇavijjāsu nipphattiṃ gato vimuttiṃ gavesanto tattha sāraṃ adisvā paribbājakapabbajjaṃ pabbajitvā vicaranto satthāraṃ upasaṅkamitvā pañhaṃ pucchitvā tasmiṃ vissajjite pasannamānaso satthu santike pabbajitvā vipassanāya kammaṃ karonto nacirasseva chaḥabhiñño ahoṣi. Tena vuttaṃ **apadāne** (apa. thera 1.16.15-20) –

“Udentā sataṃsiṃva, pītaraṃsiṃva bhāṇumaṃ;
Pannarase yathā candaṃ, niyyantaṃ lokanāyakaṃ.

“Aṭṭhasatṭhisahassāni, sabbe khīṇāsavā ahuṃ;
Parivāriṃsu sambuddhaṃ, dvipadindaṃ narāsabhaṃ.

“Sammajjitvāna taṃ vīthiṃ, niyyante lokanāyake;
Ussāpesiṃ dhajaṃ tattha, vipassanena cetasā.

“Ekanavutito kappe, yaṃ dhajaṃ abhiropayaṃ;
Duggatiṃ nābhijānāmi, dhajadānassidaṃ phalaṃ.

“Ito catutthake kappe, rājāhosim mahabbalo;
Sabbākārena sampanno, sudhajo iti vissuto.

“Kilesā jhāpitā mayhaṃ...pe... kataṃ buddhassa sāsana’nti.
Chaḷabhiñño pana hutvā attano paṭipattiṃ paccavekkhitvā somanassajāto udānavasena –

112. “Tevijjohaṃ mahājhāyī, cetosamathakovidō;
Sadattho me anuppatto, kataṃ buddhassa sāsana’nti. – gāthaṃ abhāsi;

Tattha **tevijjohanti** yadipi maṃ pubbe tiṇṇaṃ vedānaṃ pāraṃ gatattā “brāhmaṇo tevijjo”ti sañjānanti, taṃ pana samaññāmatṭaṃ vedesu vijjākicassa abhāvato. Idāni pana pubbenivāsaññādīnaṃ tissannaṃ vijjānaṃ adhigatattā paramatthato tevijjo ahaṃ, mahantassa anavasesassa samudayapakkhiyassa kilesagaṇassa jhāpanato, mahantena maggaphalajhānena mahantassa uḷārasa paṇītassa nibbānassa jhāyanato ca **mahājhāyī. Cetosamathakovidoti** cittasaṅkhobhakarānaṃ saṃkilesadhammānaṃ vūpasamana cetaso samādahane kusalo. Etena tevijjabhāvassa kāraṇamāha. Samādhikosallasahitena hi āsavakkhayena tevijjajā, na kevalena. **Sadatthoti** sakattho ka-kārassāyaṃ da-kāro kato “anuppattasadattho”tiādīsu (ma. ni. 1.9; a. ni. 3.38) viya. “Sadattho”ti ca arahattaṃ veditabbaṃ. Tañhi attapaṭibandhaṭṭhena attānaṃ avijahanaṭṭhena attano paramatthaṭṭhena attano atthattā “sakattho”ti vuccati. Svāyaṃ sadattho **me** mayā **anuppatto** adhigato. Etena yathāvuttaṃ mahājhāyibhāvaṃ sikhāpattaṃ katvā dasseti. Sesam vuttanayameva.

Vacchagottattheragāthāvaṇṇanā niṭṭhitā.

3. Vanavacchattheragāthāvaṇṇanā

Acchodikā puthusilāti āyasmato vanavacchattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭūpanissayaṃ kusalabijaṃ ropento vipassissa bhagavato kāle kulagehe nibbattitvā viññutaṃ patto parassa kammaṃ katvā jīvanto kassaci aparādhaṃ katvā maraṇabhayaena tajjito palāyanto antarāmagge bodhirukkhaṃ disvā pasannamānaso tassa mūlaṃ sammajjitvā piṇḍibandhehi asokapupphehi pūjaṃ katvā vanditvā bodhiṃ abhimukho namassamāno pallaṅkena nisinno māretuṃ āgate paccatthike disvā tesu cittaṃ akopetvā bodhiṃ eva āvajjento sataporise papāte papati. So tena puññakammena devaloke nibbattitvā aparāparaṃ puññāni katvā devamanussesu saṃsaranto imasmiṃ buddhuppāde rājagahe vibhavasampannassa brāhmaṇassa putto hutvā nibbatti, “vaccho”tissa nāmaṃ ahosi. So vayappatto bimbisārasamāgame paṭiladdhasaddho pabbajitvā arahattaṃ pāpuṇi. Tena vuttaṃ **apadāne** (apa. therā 1.16.7-14) –

“Parakammāyane yutto, aparādhaṃ akāsahaṃ;
Vanantaṃ abhidhāvissaṃ, bhayaverasamappito.

“Pupphitaṃ pādapaṃ disvā, piṇḍibandhaṃ sunimmitaṃ;
Tambapupphaṃ gahetvāna, bodhiyaṃ okiriṃ ahaṃ.

“Sammajjitvāna taṃ bodhiṃ, pāṭaliṃ pādaputtamaṃ;
Pallaṅkaṃ ābhujitvāna, bodhimūle upāvisiṃ.

“Gatamaggaṃ gavesantā, āgacchuṃ mama santikaṃ;
Te ca disvānaṃ tattha, āvajjiṃ bodhimuttamaṃ.

“Vanditvāna ahaṃ bodhiṃ, vipprasanna cetasā;
Anekatale papatiṃ, giridugge bhayānake.

“Ekanavutito kappe, yaṃ pupphamabhiropayim;
Duggatiṃ nābhijānāmi, bodhipūjāyidaṃ phalaṃ.

“Ito ca tatiye kappe, rājā susaṅgato ahaṃ;
Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā vivekābhiratiyā vaneyeva vasi, tena **vanavacchoti** samañña udapādi. Atha kadāci thero nātijanānuggahattaṃ rājagahaṃ gato tattha nātakehi upaṭṭhiyamāno katipāhaṃ vasitvā gamanākāraṃ sandasseti. Taṃ nātakā, “bhante, amhākaṃ anuggahattaṃ dhuravihāre vasatha, mayaṃ upaṭṭhahissāmā”ti yāciṃsu. Thero tesam pabbatarāmaṇeyyakittanāpadesena vivekābhiratiṃ nivedento –

113. “Acchodikā puthusilā, gonaṅgulamigāyutā;
Ambusevālasaṅchannā, te selā ramayanti ma”nti. – gāthaṃ abhāsi;

Tattha **acchodikā**ti acchaṃ abahalaṃ sukhamaṃ udakaṃ etesūti “acchodakā”ti vattabbe līngavipallāsena acchodikā”ti vuttaṃ. Etena tesam udakasampattiṃ dasseti. **Puthusilā**ti puthulā vitthata mudusukhasamphassā silā etesūti puthusilā. Etena nisajjanaṭṭhānasampattiṃ dasseti. Gunnaṃ viya naṅgulaṃ naṅguṭṭhaṃ etesanti **gonaṅgulā**, kālamakkaṭā, “pakatimakkaṭā”tipi vadantiyeva. Gonaṅgulehi ca pasadādikeyhi migehi ca tahaṃ tahaṃ vicarantehi āyutā missitāti **gonaṅgulamigāyutā**. Etena tesam amanussūpacāritāya araṅgālakkaṅgūpetataṃ dasseti. **Ambusevālasaṅchannā**ti pasavanato satataṃ paggharamānasalilatāya tahaṃ tahaṃ udakasevālasaṅchādītā. **Te selā ramayanti manti** yatthāhaṃ vasāmi; te edisā selā pabbatā vivekābhiratiyā maṃ ramayanti, tasmā tatthevāhaṃ gacchāmīti adhippāyo. Idameva ca therassa aṅgābyākaraṇaṃ ahoṣi.

Vanavacchattheragāthāvaṇṇanā niṭṭhitā.

4. Adhimuttattheragāthāvaṇṇanā

Kāyaduṭṭhullagarunoti āyasmato adhimuttattherassa gāthā. Kā uppatti? So kira padumuttarassa bhagavato kāle brāhmaṇakule nibbattitvā viññutaṃ patto brāhmaṇavijjāsu nipphattiṃ gato kāmesu ādīnaṃ disvā gharāvāsaṃ pahāya tāpasapabbajjaṃ pabbajitvā araṅgā viharanto buddhuppādaṃ sutvā manussūpacāraṃ upagantvā satthāraṃ bhikkhusaṅghaparivutaṃ gacchantaṃ disvā pasannamānaso attano vācāraṃ satthu pādamaṃle patthari. Satthā tassa ajjhāsayaṃ nātva tasmim aṭṭhāsi. Tattha ṭhitaṃ bhagavantaṃ kālānusārena gandhena pūjetvā “samuddharasimaṃ loka”ntiādikāhi dasahi gāthāhi abhitthavi. Taṃ satthā “anāgate ito satahassakappamatthake gotamassa nāma sammāsambuddhassa sāsane pabbajitvā chaḷabhiñño bhavissati”ti byākāritvā pakkāmi. So tena puññakamma devaloke nibbattitvā tato yāvāyaṃ buddhuppādo, tāva devamanussesu saṃsaranto imasmim buddhuppāde sāvattiyā brāhmaṇakule nibbattitvā **adhimuttoti** laddhanāmo viññutaṃ patto brāhmaṇavijjāsu nipphattiṃ gantvā tattha sāraṃ apassanto pacchimabhavikattā nissaraṇaṃ gavesanto jetavanapaṭiggahaṇe buddhānubhāvaṃ disvā paṭiladdhasaddho satthu santike pabbajitvā vipassanaṃ paṭṭhapetvā nacirasseva arahattaṃ pāpuṇi. Tena vuttaṃ **apadāne** (apa. thera 1.40.304-332) –

“Kaṇikāraṃva jalitaṃ, dīparukkhaṃva ujjalaṃ;
Osadhiṃva virocantaṃ, vijjutaṃ gagane yathā.

“Asambhītaṃ anuttāsim, migarājaṃva kesariṃ;
Ñāṅalokaṃ pakāsentaṃ, maddantaṃ titthiye gaṇe.

“Uddharantaṃ imaṃ lokaṃ, chindantaṃ sabbasaṃsayamaṃ;
Gajjantaṃ migarājaṃva, addasaṃ lokanāyakaṃ.

“Jaṭājinadharo āsiṃ, brahā uju patāpavā;
Vākacīraṃ gahetvāna, pādamūle apatthariṃ.

“Kāḷānusāriyaṃ gayhaṃ, anulimpiṃ tathāgataṃ;
Sambuddhamanulimpetvā, santhaviṃ lokanāyakaṃ.

“Samuddharasimaṃ lokaṃ, oghatiṇṇa mahāmuni;
Ñāḷalokena jotesi, nāvaṭaṃ ñāṇamuttamaṃ.

“Dhammacakkaṃ pavattesi, maddase paratitthiye;
Usabho jitasāṅgāmo, sampakampesi medaniṃ.

“Mahāsamudde ūmiyo, velantamhi pabhijjare;
Tatheva tava ñāṇamhi, sabbadiṭṭhī pabhijjare.

“Sukhumacchikajālena, saramhi sampatānite;
Antojālīkatā paṇā, pīḷitā honti tāvade.

“Tatheva titthiyā loke, puthupāsaṅḍanissitā;
Antoñāṇavare tuyhaṃ, parivattanti mārisa.

“Patiṭṭhā vuyhataṃ oghe, tvañhi nātho abandhunaṃ;
Bhayaṭṭitānaṃ saraṇaṃ, muttitthīnaṃ parāyaṇaṃ.

“Ekavīro asadiso, mettākaruṇasañcayo;
Asamo susamo santo, vasī tādī jitañjayo.

“Dhīro vigatasammoho, anejo akathaṃkathī;
Tusito vantadososi, nimmalo saṃyato suci.

“Saṅgātigo hatamado, tevijjo tibhavantago;
Sīmātigo dhammagaru, gatatto hitavabbhuto.

“Tārako tvaṃ yathā nāvā, nidhīvassāsakārako;
Asambhīto yathā sīho, gajarājāva dappito.

“Thometvā dasagāthāhi, padumuttaraṃ mahāyasaṃ;
Vanditvā satthuno pāde, tuṇhī aṭṭhāsahaṃ tadā.

“Padumuttaro lokavidū, āhutīnaṃ paṭiggaho;
Bhikkhusaṅghe ṭhito satthā, imā gāthā abhāsatha.

“Yo me sīlañca ñāṇañca, saddhammañcāpi vaṇṇayi;
Tamaṃ kittayissāmi, suṇātha mama bhāsato.

“Saṭṭhi kappasahassāni, devaloke ramissati;
Aññe devebhibhavitvā, issaraṃ kārayissati.

“So pacchā pabbajitvāna, sukkamūlena codito;
Gotamassa bhagavato, sāsane pabbajissati.

“Pabbajitvāna kāyena, pāpakammaṃ vivajjiya;
Sabbāsave pariññāya, nibbāyissatināsavo.

“Yathāpi megho thanayaṃ, tappeti medaniṃ imaṃ;
Tattheva tvaya mahāvīra, dhammena tappayī mamaṃ.

“Sīlaṃ paññañca dhammañca, thavitvā lokanāyakam;
Pattomhi paramaṃ santiṃ, nibbānaṃ padamaccutaṃ.

“Aho nūna sa bhagavā, ciraṃ tiṭṭheyya cakkhumā;
Aññañca vijāneyyumaṃ, phuseyyumaṃ amataṃ padaṃ.

“Ayaṃ me pacchimā jāti, bhavā sabbe samūhatā;
Sabbāsave pariññāya, viharāmi anāsavo.

“Satasahassito kappe, yaṃ buddhamabhithomayim;
Duggatiṃ nābhijānāmi, kittanāya idaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’’nti.
Arahattaṃ pana patvā attanā saha vasante kāyadaḥhibahule bhikkhū ovadanto –

114. “Kāyaduṭṭhullagaruno, hiyyamānamhi jīvite;
Sarīrasukhagiddhassa, kuto samaṇasādhutā’’ti. – gāthaṃ abhāsi;

Tattha **kāyaduṭṭhullagarunoti** duṭṭhullaṃ asubhayogyatā, kāyassa duṭṭhullaṃ kāyaduṭṭhullaṃ, kāyaduṭṭhullaṃ garu sambhāvitam yassa so kāyaduṭṭhullagaru, anissaraṇappañño hutvā kāyaposaṇappasuto kāyadaḥhibahuloti attho, tassa kāyaduṭṭhullagaruno. **Hiyyamānamhi jīvite** kunnadīnaṃ udakaṃ viya jīvitasaṅkhāre lahuso khīyamāne. **Sarīrasukhagiddhassāti** pañitāhārādīhi attano kāyassa sukkena gedhaṃ āpannassa. **Kuto samaṇasādhutāti** evarūpassa puggalassa samaṇabhāvena sādhutā susamaṇatā kuto kena kāraṇena siyā, ekaṃsato pana kāye jīvite ca nirapekkhassa itaritarasantosena santuṭṭhassa āradhaviṛiyasseva samaṇasādhutāti adhippayo.

Adhimuttattheragāthāvaṇṇanā niṭṭhitā.

5. Mahānāmattheragāthāvaṇṇanā

Esāvahiyyase pabbatenāti āyasmato mahānāmattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto sumedhassa bhagavato kāle brāhmaṇakule nibbattitvā brāhmaṇavijjāsu nipphattiṃ gato gharāvāsaṃ pahāya aññatarāya nadiyā tīre assamaṃ kāretvā sambahule brāhmaṇe mante vācento viharati. Athekadivasaṃ bhagavā taṃ anuggaṇhituṃ tassa asamapadaṃ upagacchi. So bhagavantaṃ disvā pasannacitto āsanaṃ paññāpetvā adāsi. Nisinne bhagavati sumadhuraṃ madhuṃ upanāmesi. Taṃ bhagavā paribhuñjitvā heṭṭhā adhimuttattheravatthumhi vuttanayena anāgataṃ byākaritvā pakkāmi. So tena puññakamma devaloke nibbattitvā aparāparaṃ sugatīsuveva parivattento imasmiṃ buddhuppāde sāvattiyam brāhmaṇakule nibbattitvā **mahānāmoti** laddhanāmo viññutaṃ patto bhagavato santikaṃ upasaṅkamitvā dhammaṃ sutvā paṭiladdhasaddho pabbajitvā kammaṭṭhānaṃ gahetvā nesādake nāma pabbate viharanto kilesapariyutṭhānaṃ vikkhambhetuṃ asakko “kiṃ me iminā saṃkiliṭṭhacittassa jīvitena’’ti attabhāvaṃ nibbindanto uccaṃ pabbatasikharaṃ abhiruhitvā “ito pātetvā taṃ māressāmi’’ti attānaṃ

param viya niddisanto –

115. “Esāvahiyyase pabbatena, bahukuṭajasallakikena;
Nesādakena girinā, yasassinā paricchadenā”ti. – gāthaṃ abhāsi;

Tattha **esāvahiyyaseti** eso tvaṃ mahānāma avahiyyase parihāyasi. **Pabbatenāti** nivāsaṭṭhānabhūtena iminā pabbatena. **Bahukuṭajasallakikenāti** bahūhi kuṭajehi indasālarukkhehi sallakīhi indasālarukkhehi vā samannāgatena. **Nesādakenāti** evaṃnāmakena. **Girināti** selenā. Selo hi sandhisāṅkhātehi pabbehi ṭhitattā “pabbato”ti, pasavanādivasena jalassa, sārabhūtānaṃ bhesajjādivatthūnaṃ girāṇato “girī”ti vuccati. Tadubhayatthasambhavato panettha “pabbatenā”ti vatvā “girinā”ti ca vuttaṃ. **Yasassināti** sabbaguṇehi vissutena pakāsenā. **Paricchadenāti** nānāvīdharukkhaḡacchalatāhi samantato channena, vasanaṭṭhānatāya vā tuyhaṃ paricchadabhūtena. Ayañhettha adhippāyo – mahānāma, yaḡi kammaṭṭhānaṃ vissajjtvā vitakkabahulo hosi, evaṃ tvaṃ iminā chāyūḡakasampannena sappāyena nivāsaṇaṭṭhānabhūtena nesādakagirinā parihāyasi, idānihaṃ taṃ ito pātetvā māressāmi, tasmā na labbhā vitakkavasikena bhavitunti. Evaṃ thero attānaṃ santajjento yeva vipassanaṃ ussukkāpetvā arahattaṃ pāpuṇi. Tena vuttaṃ **apadāne** (apa. thera 1.40.333-352) –

“Sindhuyā nadiyā tīre, sukato assamo mama;
Tattha vācemahaṃ sisse, itihāsaṃ salakkhaṇaṃ.

“Dhammakāmā vinītā te, sotukāmā susāsaṇaṃ;
Chalaṅge pāramippattā, sindhukūle vasanti te.

“Uppātagamane ceva, lakkhaṇesu ca kovidā;
Uttamatthaṃ gavesantā, vasanti vipine tadā.

“Sumedho nāma sambuddho, loke uppajji tāvade;
Amhākaṃ anukampanto, upāgacchi vināyako.

“Upāgataṃ mahāvīraṃ, sumedhaṃ lokanāyakaṃ;
Tiṇasanthāraḡaṃ katvā, lokajetṭhassadāsahaṃ.

“Vipināto madhuṃ gayha, buddhaseṭṭhassadāsahaṃ;
Sambuddho paribhuñjivā, idaṃ vacanamabravi.

“Yo taṃ adāsi madhuṃ me, pasanno sehi pāṇibhi;
Tamaḡaṃ kittayissāmi, suṇātha mama bhāsato.

“Iminā madhudānena, tiṇasanthāraḡakena ca;
Tiṃsa kappasahassāni, devaloke ramissati.

“Tiṃsakappasahassamhi, okkākakulasambhavo;
Gotamo nāma gottena, sathā loke bhavissati.

“Tassa dhammesu dāyādo, oraso dhammanimitto;
Sabbāsava pariññāya, nibbāyissatināsavo.

“Devalokā idhāgantvā, mātukucchiṃ upāgate;
Madhuvassaṃ pavassittha, chādayaṃ madhunā mahiṃ.

“Mayi nikkhantamattamhi, kucchiyā ca suduttarā;
Tatrāpi madhuvassam me, vassate niccakālikam.

“Agārā abhinikkhamma, pabbajim anagāriyam;
Lābhī annassa pānassa, madhudānassidaṃ phalaṃ.

“Sabbakāmasamiddhohaṃ, bhavitvā devamānuse;
Teneva madhudānena, pattomhi āsavakkhayam.

“Vuṭṭhamhi deve caturaṅgule tiṇe, sampupphite dharaṇīruhe sañchanne;
Suññe ghare maṇḍaparukkhamūlake, vasāmi niccam sukrito anāsavo.

“Majjhe mahante hīne ca, bhava sabbe atikkamim;
Ajja me āsavā khīṇā, natthi dāni punabbhavo.

“Timsakappasahassamhi, yaṃ dānamadadiṃ tadā;
Duggatiṃ nābhijānāmi, madhudānassidaṃ phalaṃ.

“Kilesā jhāpitā mayham...pe... kataṃ buddhassa sāsana’nti.
Ayameva ca therassa aññābyākaraṇagāthā ahoṣīti.

Mahānāmattheragāthāvaṇṇanā niṭṭhitā.

6. Pārāpariyattheragāthāvaṇṇanā

Chaphassāyatane hitvāti āyasmato pārāpariyattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacīnanto piyadassissa bhagavato kāle nesādayoniyam nibbattitvā tassa viññutaṃ pattassa vicaraṇaṭṭhāne aññatarasmim vanasaṇḍe piyadassī bhagavā taṃ anuggaṇhituṃ nirodhasamāpattim samāpajjitvā nisīdi. So ca mige pariyesanto taṃ ṭhānam gato satthāraṃ disvā pasannamānaso bhagavantaṃ anto katvā kataṃ sākhamāṇḍapaṃ padumapupphēhi kūṭāgārākārena sañchādetvā uḷāraṃ pītisomanassam paṭisaṃvedento sattāhaṃ namassamāno aṭṭhāsi. Divase divase ca milātamilātāni apānetvā abhinavehi chādesi. Satthā sattāhassa accayena nirodhato vuṭṭhahitvā bhikkhusaṅgham anussari. Tāvadeva asītisahassamattā bhikkhū satthāraṃ parivāresuṃ. “Madhuradhammakathaṃ suñissamā”ti devatā sannipatiṃsu, mahā samāgamo ahoṣi. Satthā anumodanaṃ karonto tassa devamanussesu bhāvinim sampattim imasmim buddhuppāde sāvakabodhiṅca byākāritvā pakkāmi. So tena puññakammaena devamanussesu saṃsaranto imasmim buddhuppāde rājagahe brāhmaṇakule nibbattitvā viññutaṃ patto tiṇṇam vedānam pāragū hutvā parāparagottatāya **pārāpariyoti** laddhasamañño bahū brāhmaṇe mante vācento satthu rājagahagamane buddhānubhāvaṃ disvā paṭiladdhasaddho pabbajitvā vipassanāya kammaṃ karonto nacirasseva arahattaṃ pāpuṇi. Tena vuttaṃ **apadāne** (apa. thera 1.40.353-385) –

“Piyadassī nāma bhagavā, sayambhū lokanāyako;
Vivekakāmo sambuddho, samādhikusalo muni.

“Vanasāṇḍam samoggayha, piyadassī mahāmuni;
Paṃsukūlam pattharivā, nisīdi purisuttamo.

“Migaluddo pure āsim, araññe kānane aham;
Pasadaṃ migamesanto, āhiṇḍāmi aham tadā.

“Tatthaddasāsim sambuddham, oghatiṇṇamanāsavaṃ;

Pupphitaṃ sālārājaṃva, sataraṃsiṃva uggataṃ.

“Disvānaḥaṃ devadevaṃ, piyadassiṃ mahāyasaṃ;
Jātassaraṃ samoggayha, padumaṃ āharaṃ tadā.

“Āharitvāna padumaṃ, satapattaṃ manoramaṃ;
Kūṭāgāraṃ karitvāna, chādayiṃ padumenaḥaṃ.

“Anukampako kāruṇiko, piyadassī mahāmuni;
Sattarattindivaṃ buddho, kūṭāgāre vasī jino.

“Purāṇaṃ chaḍḍayitvāna, navena chādayiṃ ahaṃ;
Añjaliṃ paggahetvāna, aṭṭhāsiṃ tāvade ahaṃ.

“Vuṭṭhahitvā samādhimhā, piyadassī mahāmuni;
Disaṃ anuvilokento, nisīdi lokanāyako.

“Tadā sudassano nāma, upaṭṭhāko mahiddhiko;
Cittamaññāya buddhassa, piyadassissa satthuno.

“Asītiyā sahassehi, bhikkhūhi parivārito;
Vanante sukhamāsīnaṃ, upesi lokanāyakaṃ.

“Yāvataṃ vanasaṇḍamhi, adhivatthā ca devatā;
Buddhassa cittamaññāya, sabbe sannipatuṃ tadā.

“Samāgatesu yakkhesu, kumbhaṇḍe saharakkhase;
Bhikkhusaṅghe ca sampatte, gāthā pabyāharī jino.

“Thomaṃ sattāhaṃ pūjesi, āvāsaṅca akāsi me;
Tamaḥaṃ kittayissāmi, suṇātha mama bhāsato.

“Sududdasaṃ sunipuṇaṃ, gambhīraṃ suppakāsitaṃ;
Ñāṇena kittayissāmi, suṇātha mama bhāsato.

“Catuddasāni kappāni, devarajjaṃ karissati;
Kūṭāgāraṃ mahantassa, padmapupphehi chādiṭaṃ.

“Ākāse dhārayissati, pupphakammassidaṃ phalaṃ;
Catubbīse kappasate, vokiṇṇaṃ saṃsarissati.

“Tattha pupphamayaṃ byamaḥaṃ, ākāse dhārayissati;
Yathā padumapattamhi, toyaṃ na upalimpati.

“Tathevīmassa ñāṇamhi, kilesā nopalimpare;
Manasā vinivaṭṭetvā, pañca nīvaraṇe ayaṃ.

“Cittaṃ janetvā nekkhamme, agārā pabbajissati;
Tato pupphamaye byamhe, dhārente nikkhamissati.

“Rukkhamūle vasantassa, nipakassa satīmato;
Tattha pupphamaṃ byamaṃ, matthake dhārayissati.

“Cīvaraṃ piṇḍapātañca, paccayaṃ sayanāsaṃ;
Datvāna bhikkhusaṅghassa, nibbāyissatināsavo.

“Kūṭāgārena caratā, pabbajjaṃ abhinikkhamiṃ;
Rukkhamūle vasantampi, kūṭāgāraṃ dharīyati.

“Cīvare piṇḍapāte ca, cetanā me na vijjati;
Puññakammena saṃyutto, labhāmi pariniṭṭhitam.

“Gaṇanāto asaṅkheyyā, kappakoṭī bahū mama;
Rittakā te atikkantā, pamuttā lokanāyakā.

“Aṭṭhārase kappasate, piyadassī vināyako;
Tamaṃ payirupāsivā, imaṃ yoniṃ upāgato.

“Idha passāmi sambuddhaṃ, anomāṃ nāma cakkhumaṃ;
Tamaṃ upagantvāna, pabbajiṃ anagāriyaṃ.

“Dukkassantakaro buddho, maggaṃ me desayī jino;
Tassa dhammaṃ suṇitvāna, pattomhi acalaṃ padaṃ.

“Tosayitvāna sambuddhaṃ, gotamaṃ sakyapuṅgavaṃ;
Sabbāsava pariññāya, viharāmi anāsavo.

“Aṭṭhārase kappasate, yaṃ buddhamabhipūjayiṃ;
Duggatiṃ nābhijānāmi, buddhapūjāyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’’nti.
Arahattaṃ pana patvā attano paṭipattiṃ paccavekkhitvā sañjātasomanasso udānavasena –

116. “Chaphassāyatane hitvā, guttadvāro susaṃvuto;
Aghamūlaṃ vamtivāna, patto me āsavakkhayo’’ti. – gāthaṃ abhāsi;

Tattha **chaphassāyatane hitvā**ti cakkhusamphassādīnaṃ channaṃ samphassānaṃ uppattiṭṭhānatāya “phassāyatanāni’’ti laddhanāmāni cakkhādīni cha ajjhantikāyatanāni tappaṭibaddhasaṃkilesappahānavasena pahāya. **Guttadvāro susaṃvutoti** tato eva cakkhudvārādīnaṃ guttattā, tattha pavattanakānaṃ abhijjhādīnaṃ pāpadhammānaṃ pavesananivāraṇena satikavāṭena suṭṭu pihitattā guttadvāro susaṃvuto. Atha vā manacchaṭṭhānaṃ channaṃ dvārānaṃ vuttanayena rakkhitattā guttadvāro, kāyādīhi suṭṭhu saññatattā susaṃvutoti evamettha attho vedītabbo. **Aghamūlaṃ vamtivānā**ti aghassa vaṭṭadukkassa mūlabhūtaṃ avijjābhavataṇhāsankhātaṃ dosaṃ, sabbaṃ vā kilesadosaṃ ariyamaggasaṅkhātavamanayogapānaṃ uggiritvā santānato bahi katvā, bahikaraṇahetu vā. **Patto me āsavakkhayo**ti kāmāsavādayo āsavā ettha khīyanti, tesam vā khayena pattabboti āsavakkhayo, nibbānaṃ arahattañca. So āsavakkhayo patto adhiगतoti udānavasena aññaṃ byākāsi.

Pārāpariyattheragāthāvaṇṇanā niṭṭhitā.

7. Yasattheragāthāvaṇṇanā

Suvilitto suvasanoti āyasmato yasattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭupānissayāni puññāni upacinanto sumedhassa bhagavato kāle mahānubhāvo nāgarājā hutvā buddhappamukhaṃ bhikkhusaṅghaṃ attano bhavanaṃ netvā mahādānaṃ pavattesi. Bhagavantaṃ mahagghena ticīvarena acchādesi, ekamekañca bhikkhuṃ mahaggheneva paccekadussayugena sabbenā samaṇaparikkhārena acchādesi. So tena puññakammena devamanussesu saṃsaranto siddhatthassa bhagavato kāle seṭṭhiputto hutvā mahābodhimaṇḍaṃ sattahi ratanehi pūjesi. Kassapassa bhagavato kāle sāsane pabbajitvā samaṇadhammaṃ akāsi. Evaṃ sugatūsuyeva saṃsaranto imasmiṃ amhākaṃ bhagavato kāle bārāṇasiyaṃ mahāvibhavassa seṭṭhino putto hutvā nibbatti, **yaso** nāma nāmena paramasukhumālo. “Tassa tayo pāsādā”ti sabbaṃ khandhake (mahāva. 25) āgatanayena veditabbaṃ.

So pubbahetunā codiyamāno rattibhāge niddābhībūtassa parijanassa vippakāraṃ disvā sañjātasamvego suvaṇṇapādukārūḷhova gehato niggato devatāvivaṭṭena nagaradvārena nikkhamitvā isipatanasamīpaṃ gato “upaddutaṃ vata, bho, upassaṭṭhaṃ vata, bho”ti āha. Tena samayena bhagavatā isipatane viharantena tasseva anuggaṇhanatthaṃ abbhokāse caṅkamantena “ehi, yasa, idaṃ anupaddutaṃ, idaṃ anupassaṭṭha”nti vutto, “anupaddutaṃ anupassaṭṭhaṃ kira atthi”ti somanassajāto suvaṇṇapādukā oruyha bhagavantaṃ upasaṅkamtivā ekamantaṃ nisinno sathārā anupubbikathaṃ kathetvā saccadesanāya katāya saccapariyosāne sotāpanno hutvā gavesanattaṃ āgatassa pitu bhagavatā saccadesanāya kariyamānāya arahattaṃ sacchākāsi. Tena vuttaṃ **apadāne** (apa. therā 1.40.456-483) –

“Mahāsamuddaṃ oggayha, bhavanaṃ me sunimmitaṃ;
Sunimmitā pokkharāṇī, cakkavākapakūjītā.

“Mandālakehi sañchannā, padumuppalakehi ca;
Nadī ca sandate tattha, supatitthā manoramā.

“Macchakacchapasañchannā, nānādijjasamotthātā;
Mayūraḥkoṇcābhīrudā, kokilādīhi vaggūhi.

“Pārevatā ravihaṃsā ca, cakkavākā nadīcarā;
Dindibhā sāḷikā cettha, pammakā jīvajivakā.

“Haṃsā koṇcāpi naditā, kosiyā piṅgalā bahū;
Sattaratanasampannā, maṇimuttikavālukā.

“Sabbasoṇṇamayā rukkhā, nānāgandhasameritā;
Ujjetenti divārattim, bhavanaṃ sabbakālikam.

“Saṭṭhitūriyasahassāni, sāyaṃ pāto pavajjare;
Soḷasitthisahassāni, parivārenti maṃ sadā.

“Abhinikkhamma bhavanā, sumedhaṃ lokanāyakam;
Pasannacitto sumano, vandayim taṃ mahāyasaṃ.

“Sambuddhaṃ abhivādetvā, sasāṅghaṃ taṃ nimantayim;
Adhivāsesi so dhīro, sumedho lokanāyako.

“Mama dhammakathaṃ katvā, uyyojesi mahāmuni;
Sambuddhaṃ abhivādetvā, bhavanaṃ me upāgamim.

“Āmantayim parijanaṃ, sabbe sannipatātha vo;

Pubbaṅhasamayaṃ buddho, bhavanaṃ āgamissati.

“Lābhā amhaṃ suladdhaṃ no, ye vasāma tavantike;
Mayampi buddhaseṭṭhassa, pūjaṃ kassāma satthuno.

“Annaṃ pānaṃ paṭṭhapetvā, kālaṃ ārocayiṃ ahaṃ;
Vasīsatasahasseehi, upesi lokanāyako.

“Pañcaṅgikehi tūriyehi, paccuggamanamakāsahaṃ;
Sabbasoṇṇamaye pīṭhe, nisīdi purisuttamo.

“Uparicchadanaṃ āsi, sabbasoṇṇamayaṃ tadā;
Bījaniyo pavāyanti, bhikkhusaṅghassa antare.

“Pahūtenannapānena, bhikkhusaṅghamatappayiṃ;
Paccekadussayugaḷe, bhikkhusaṅghassadāsahaṃ.

“Yaṃ vadanti sumedhoti, lokāhutipaṭiggahaṃ;
Bhikkhusaṅghe nisīditvā, imā gāthā abhāsatha.

“Yo me annena pānena, sabbe ime ca tappayiṃ;
Tamaḥaṃ kittayissāmi, suṇātha mama bhāsato.

“Aṭṭhārase kappasate, devaloke ramissati;
Sahassakkhattuṃ rājā ca, cakkavattī bhavissati.

“Upapajjati yaṃ yoniṃ, devattaṃ atha mānusam;
Sabbadā sabbasovaṇṇam, chadanaṃ dhārayissati.

“Timsakappasahassamhi, okkākakulasambhavo;
Gotamo nāma gottena, sathā loke bhavissati.

“Tassa dhammesu dāyādo, oraso dhammanimmito;
Sabbāsave pariññāya, nibbāyissatināsavo.

“Bhikkhusaṅghe nisīditvā, sīhanādaṃ nadissati;
Citake chattaṃ dhārenti, heṭṭhā chattaṃhi ḍayhatha.

“Sāmaññaṃ me anuppattaṃ, kilesā jhāpitā mayā;
Maṇḍape rukkhamūle vā, santāpo me na vijjati.

“Timsakappasahassamhi, yaṃ dānamadadiṃ tadā;
Duggatiṃ nābhijānāmi, sabbadānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Atha bhagavā āyasmantaṃ yasaṃ dakkhiṇaṃ bāhuṃ pasāretvā “ehi bhikkhū”ti āha.

Vacanasamanantarameva dvaṅgulamattakesamassu aṭṭhaparikkhāradharo vassasaṭṭhikatthero viya ahoṣi.
So attano paṭipattiṃ paccavekkhitvā udānento ehibhikkhubhāvappattito purimāvattahasena –

117. “Suvilitto suvasano, sabbābharaṇabhūsito;

Tisso vijjā ajjhagamim, kataṃ buddhassa sāsana’’nti. – gātham abhāsi;

Tattha **suvilittoti** sundarena kunkumacandanānulepanena vilittagatto. **Suvasanoti** suṭṭhu mahagghakāsikavattavasano. **Sabbābharaṇabhūsitoti** sīsūpagādīhi sabbehi ābharaṇehi alaṅkato. **Ajjhagaminti** adhigacchim. Sesam vuttanayameva.

Yasattheragāthāvaṇṇanā niṭṭhitā.

8. Kimilattheragāthāvaṇṇanā

Abhisattova nipatatīti āyasmato kimilattherassa gāthā. Kā uppatti? Ayampi purimabuddhesu katādhikāro tattha tattha bhve puññāni karonto kakusandhassa bhagavato kāle kulagehe nibbattivā viññutaṃ patto parinibbute sathhari tassa dhātuyo uddissa saḷalamālāhi maṇḍapākārena pūjaṃ akāsi. So tena puññakammena tāvatimse nibbattivā aparāparaṃ devamanussesu saṃsaranto imasmim buddhuppāde kapilavatthunagare sākiyarājakule nibbatti, **kimilotissa** nāmaṃ ahosi. So vayappatto bhogasampattiyā sampanno viharati. Tassa ñāṇaparipākaṃ disvā saṃvegajananattham anupiyāyaṃ viharanto sathā paṭhamayobbane ṭhitam dassanīyaṃ itthirūpaṃ abhinimminivā purato dassetvā puna anukkamena yathā jarārogavipattīhi abhibhūtā dissati, tathā akāsi. Taṃ disvā kimilakumāro ativiya saṃvegam pakāsento –

118. ‘‘Abhisattova nipatati vayo, rūpaṃ aññaṃiva tatheva santam;
Tasseva sato avippavasato, aññasseva sarāmi attāna’’nti. –

Gātham abhāsi.

Tattha **abhisattovāti** ‘‘tvam sīgham gaccha mā tiṭṭhā’’ti devehi anusitṭho āṇatto viya. ‘‘Abhisatṭho vā’’tipi pātho, ‘‘tvam lahum gacchā’’ti kenaci abhilāsāpito viyāti attho. **Nipatatīti** atipatati abhidhāvati na tiṭṭhati, khaṇe khaṇe khayavayaṃ pāpuṇātīti attho. **Vayoti** bālyayobbanādiko sarīrassa avatthāviseso. Idha panassa yobbaññaṃ adhippetam, taṃ hissa abhipatantam khīyantam hutvā upaṭṭhitam. **Rūpanti** rūpasampadāti vadati. **Rūpanti** pana sarīram ‘‘aṭṭhiṅca paṭicca nhāruṅca paṭicca maṃsaṅca paṭicca ākāso parivārito rūpaṃtveva saṅkham gacchatī’’tiādīsu (ma. ni. 1.306) viya. **Aññaṃiva tatheva santanti** idam rūpaṃ yādisam, sayam tatheva tenevākārena santam vijjamānaṃ aññaṃ viya mayham upaṭṭhātīti adhippāyo. ‘‘Tadeva santa’’nti ca keci paṭhanti. **Tasseva satoti** tasseva me anaññaṃ sato samānassa. **Avippavasatotī** na vippavasantassa, cīravippavāsena hi sato anaññaṃ viya upaṭṭhātī idampi idha natthīti adhippāyo. **Aññasseva sarāmi attānanti** imam mama attabhāvaṃ aññaṃ sattassa viya sarāmi upadhāremi sañjānāmīti attho. Tassevam aniccataṃ manasi karontassa daḷhataro saṃvego udapādi, so saṃvegajāto sathhāram upasaṅkamitvā dhammaṃ sutvā paṭiladdhasaddho pabbajitvā vipassanaṃ paṭṭhapetvā nacirasseva arahattaṃ pāpuṇi. Tena vuttaṃ **apadāne** (apa. thera 2.56.42-48) –

‘‘Nibbute kakusandhamhi, brāhmaṇamhi vusīmati;
Gahetvā saḷalam mālam, maṇḍapaṃ kārayim aham.

‘‘Tāvatimsam gato santo, labhimha byamhamuttamaṃ;
Aññe devetirocāmi, puññakammassidaṃ phalam.

‘‘Divā vā yadi vā rattim, caṅkamanto ṭhito caham;
Channo saḷalapupphehi, puññakammassidaṃ phalam.

‘‘Imasmimyeva kappamhi, yaṃ buddhamabhipūjayim;
Duggatim nābhijānāmi, buddhapūjāyidaṃ phalam.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvāpi therō attano purimuppannaṃ aniccatāmanasikāraṃ vibhāvento tameva gāthaṃ paccudāhāsi. Tenetaṃ imassa therassa aññābyākaraṇampi ahoṣi.

Kimilattheragāthāvaṇṇanā niṭṭhitā.

9. Vajjiputtattheragāthāvaṇṇanā

Rukkhamūlagahaṇaṃ pasakkiyāti āyasmato vajjiputtattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭuppanissayaṃ puññaṃ upacinanto ito cātunavute kappe ekaṃ paccekasambuddhaṃ bhikkhāya gacchantaṃ disvā pasannaṃānaso kadaliphalāni adāsi. So tena puññaṃkamma devaloke nibbattitvā aparāparaṃ puññāni katvā devamanussesu saṃsaraṇto imasmiṃ buddhuppāde vesāliyaṃ licchavirājaputto hutvā nibbatti, vajjirājaputtattā **vajjiputtot**veva cassa samañña ahoṣi. So daharo hutvā hatthisikkhādisikkhanakālepi hetusaṃpannatāya nissaraṇajjhāsayova hutvā vicaranta satthu dhammadeśanākāle vihāraṃ gantvā parisapariyante nisinna dhammaṃ sutvā paṭiladdhasaddho satthu santike pabbajitvā vipassanāya kammaṃ karonto nacirasseva chaḷabhiñño ahoṣi. Tena vuttaṃ **apadāne** (apa. therā 2.51.57-62) –

“Sahassaraṃsī bhagavā, sayambhū aparājito;
Vivekā vuṭṭhahitvāna, gocarāyābhinikkhāmi.

“Phalahattho ahaṃ disvā, upagacchim narāsabhaṃ;
Pasannacitto sumano, avataṃ adadiṃ phalaṃ.

“Cātunnavutito kappe, yaṃ phalaṃ adadiṃ tadā;
Duggatiṃ nābhijānāmi, phaladānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Chaḷabhiñño pana hutvā aparabhāge acirapariniḅbute sathari dhammaṃ saṅgāyitum saṅketam katvā mahātheresu tattha tattha viharantesu ekadivasaṃ āyasmantaṃ ānandaṃ sekhaṃyeva samānaṃ mahatiyā parisāya parivutaṃ dhammaṃ desentaṃ disvā tassa uparimaggādhigamāya ussāhaṃ janento –

119. “Rukkhamūlagahaṇaṃ pasakkiya, nibbānaṃ hadayasmim opiya;
Jhāya gotama mā ca pamādo, kiṃ te bilibīlikā karissatī”ti. –

Gāthaṃ abhāsi.

Tattha **rukkhamūlagahaṇanti** rukkkhamūlabhūtaṃ gahaṇaṃ, gahaṇāhi atthi, na rukkkhamūlaṃ, rukkkhamūlañca atthi, na gahaṇaṃ, tesu rukkkhamūlagahaṇena ṭhānassa chāyāsampaṇnatāya vātātapaparissayābhāvaṃ dasseti. Gahaṇaggahaṇena nivātabhāvena vātaparissayābhāvaṃ janasaṃbādābhāvañca dasseti, tadubhayena ca bhāvanāyogyataṃ. **Pasakkiyāti** upagantvā. **Nibbānaṃ hadayasmim opiyāti** “evaṃ mayā paṭipajjitvā nibbānaṃ adhigantabba”nti nibbutiṃ hadaye ṭhapetvā citte karitvā. **Jhāyāti** lakkhaṇūpanijjhānena jhāya, vipassanābhāvanāsahitaṃ maggabhāvaṇaṃ bhāvehi. **Gotamāti** dhammabhaṇḍāgārikaṃ gottena ālapati. **Mā ca pamādoti** adhikusalesu dhammesu mā pamādaṃ āpajji. Idāni yādiso therassa pamādo, taṃ paṭikkhepavasena dassento “**kiṃ te bilibīlikā karissatī**”ti āha. Tattha **bilibīlikāti** vilivīlikiriya, bilibīlīti saddapavatti yathā niratthakā, evaṃ bilibīlikāsadisā janapaññatti **kiṃ te karissati** kīdisaṃ atthaṃ tuyhaṃ sādheti, tasmā janapaññattiṃ pahāya sadatthapasuto hohīti ovādaṃ adāsi.

Taṃ sutvā aññehi vuttavisagandhavāyanavacanena saṃvegajāto bahudeva rattim caṅkamaṇa vītināmento vipassanaṃ ussukkāpetvā senāsanaṃ pavisitvā mañcake nipannaṃattova arahattaṃ pāpuṇi.

Vajjiputtattheragāthāvaṇṇanā niṭṭhitā.

10. Isidattattheragāthāvaṇṇanā

Pañcakkhandhā pariññātāti āyasmato isidattattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭupānissayaṃ puññaṃ upacinanto vipassissa bhagavato kāle kulagehe nibbattitvā viññutaṃ patto ekadivasaṃ bhagavantaṃ rathiyāṃ gacchantaṃ disvā pasannamānaso madhuraṃ āmodaphalaṃ adāsi. So tena puññakammena devaloke nibbattitvā aparāparaṃ puññāni katvā devamanussesu saṃsaranto imasmiṃ buddhuppāde avantiraṭṭhe vaḍḍhagāme aññatarassa satthavāhassa putto hutvā nibbatti, **isidattotissa** nāmaṃ ahoṣi. So vayappatto macchikāsaṇḍe cittaṃ gahapatino aditṭhasahāyo hutvā tena buddhaguṇe likhitvā pesitasāsaṇaṃ paṭilabhitvā sāsane sañjātappasādo therassa mahākaccānassa santike pabbajitvā vipassanaṃ ārabhitvā nacirasseva chaḷabhiñño ahoṣi. Tena vuttaṃ **apadāne** (apa. thera 2.51.80-84) –

“Suvaṇṇavaṇṇaṃ sambuddhaṃ, āhutaṇaṃ paṭiggahaṃ;
Rathiyāṃ paṭipajantaṃ, āmodamadadiṃ phalaṃ.

“Ekanavutito kappe, yaṃ phalaṃ adadiṃ tadā;
Duggatiṃ nābhijānāmi, phaladānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Chaḷabhiñño pana hutvā “buddhupaṭṭhānaṃ gamissāmi”ti therāṃ āpucchitvā anukkamena majjhimadesaṃ gantvā satthāraṃ upasaṅkamitvā vanditvā ekamantaṃ nisinna, “kacci, bhikkhu, khamaṇīyaṃ, kacci yāpaṇīya”ntiādinaṃ satthārā katapaṭisaṅhāro paṭivacanamukhena, “bhagavā tumhākaṃ sāsanaṃ upagatakālato paṭṭhāya mayhaṃ sabbadukkhāṃ apagataṃ, sabbo parissayo vūpasanto”ti pavedanavasena aññaṃ byākaronto –

120. “Pañcakkhandhā pariññātā, tiṭṭhanti chinnaṃ mūlakā;
Dukkhaḅbhayo anuppatto, patto me āsavakḅbhayo”ti. – gāthaṃ abhāsi;

Tattha **pañcakkhandhā pariññātā**ti pañcapi me upādānakkhandhā vipassanāpaññāsahitāya maggapaññāya “idaṃ dukkhaṃ, ettaṃ dukkhaṃ, na ito bhīyyo”ti sabbaso paricchijja ñātā, na tesu kiñcīpi pariññātābbaṃ atthīti adhippāyo. **Tiṭṭhanti chinnaṃ mūlakā**ti sabbaso pariññātattā eva tesāṃ avijjātaṇhādikassa mūlassa samucchinnattā ariyamaggena pahīnattā yāvacarimacittanirodhā te tiṭṭhanti. **Dukkhaḅbhayo anuppattoti** chinnaṃ mūlakattāyeva ca nesāṃ vaṭṭadukkhassa bhayo parikkhāyo anuppatto, nibbānaṃ adhigataṃ. **Patto me āsavakḅbhayoti** kāmāsavādīnaṃ sabbesaṃ āsavānaṃ khayante abhigantabbatāya “āsavakḅbhayo”ti laddhanāmaṃ arahattaṃ pattaṃ paṭiladdhanti attho. Keci pana antimāyaṃ samussayo”ti paṭhanti. Nibbānassa adhigatattāyeva ayaṃ mama samussayo attabhāvo antimo sabbapacchimako, natthi dāni punabbhavoti attho. Yaṃ pana tattha tattha avuttaṃ, taṃ heṭṭhā vuttanayattā uttānaṃyevāti.

Isidattattheragāthāvaṇṇanā niṭṭhitā.

Dvādasamavaggavaṇṇanā niṭṭhitā.

Niṭṭhitā ca paramatthadīpaniyaṃ theragāthāvaṇṇanāyaṃ

Vīsādhikasattharagāthāpaṭimaṇḍitaṃ ekakanipātassa

Atthavaṇṇanā.

2. Dukanipāto

1. Paṭhamavaggo

1. Uttaratheragāthāvaṇṇanā

Dukanipāte **natthi koci bhavo niccoti**ādikā āyasmato uttaratherassa gāthā. Kā uppatti? Ayampi purimabuddhesu katādhikāro tattha tattha bhave vivaṭṭūpanissayaṃ puññaṃ upacinanto sumedhassa bhagavato kāle vijjādharo hutvā ākāseṇa vicarati. Tena ca samayena satthā tassa anuggaṇhanatthaṃ vanantare aññatarasmiṃ rukkhamaṇe nisīdi chabbaṇṇabuddharaṃsiyo vissajjento. So antalikkhena gacchanto bhagavantaṃ disvā pasannacitto ākāso oruyha suvisuddhehi vipulehi kaṇikārapupphehi bhagavantaṃ pūjesi, pupphāni buddhānubhāveṇa satthu upari chattākāreṇa aṭṭhaṃsu, so tena bhīyosomattāya pasannacitto hutvā aparabhāge kālaṃ katvā tāvatimse nibbattivā uḷāraṃ dibbasampattiṃ anubhavanto yāvātāyukaṃ tattha ṭhatvā tato cuto devamanussesu saṃsaranto imasmiṃ buddhuppāde rājagahe brāhmaṇamahāsālaputto hutvā nibbatti, **uttarotissa** nāmaṃ ahoṣi. So viññutaṃ patto brāhmaṇavijjāsu nipphattiṃ gantvā jātiyā rūpeṇa vijjāya vayeṇa sīlācāreṇa ca lokassa sambhāvanīyo jāto. Tassa taṃ sampattiṃ disvā vassakāro magadhamahāmatto attano dhītaraṃ dātukāmo hutvā attano adhippāyaṃ pavedesi. So nissaraṇajjhāsayatāya taṃ paṭikkhipitvā kāleṇa kālaṃ dhammasenāpatiṃ payirupāsanto tassa santike dhammaṃ sutvā paṭiladdhasaddho pabbajitvā vattasampanno hutvā therāṃ upaṭṭhahati.

Tena ca samayena therassa aññataro ābādho uppanno, tassa bhesajjathāya uttaro sāmaṇero pātova pattacīvaramādāya vihārato nikkhanto antarāmagge taḷākassa tīre pattaṃ ṭhapetvā udakasamīpaṃ gantvā mukhaṃ dhovati. Atha aññataro umaṅgacoro ārakkhapurisehi anubaddho aggadvāreṇeva nagarato nikkhamitvā palāyanto attanā gahitaṃ ratanabhaṇḍikaṃ sāmaṇerassa patte pakkhipitvā palāyi. Sāmaṇero pattasamīpaṃ upagato. Coraṃ anubandhantā rājapurisā sāmaṇerassa patte bhaṇḍikaṃ disvā, “ayaṃ coro, iminā coriyaṃ kata”nti sāmaṇeraṃ pacchābāhaṃ bandhitvā vassakārassa brāhmaṇassa dassesuṃ. Vassakāro ca tadā rañño vinicchaye niyutto hutvā chejjabhejjaṃ anusāsati. So “pubbe mama vacanaṃ nādiyi, suddhapāsaṇḍiyesu pabbajī”ti ca baddhāghātattā kammaṃ asodhetvāva jīvantameva taṃ sūle uttāsesi.

Athassa bhagavā ñāṇaparipākaṃ oloketvā taṃ ṭhānaṃ gantvā vipphurantahatthanakhamāṇimayūkkhasambhinnasitābhatāya paggharantajātihiṅgulakasuvaṇṇarasadhāraṃ viya jālāguṇṭhitamudalunadīghaṅgulihatthaṃ uttarassa sīse ṭhapetvā, “uttara, idaṃ te purimakammaṃ phalaṃ uppannaṃ, tattha tayā paccavekkhaṇabalena adhivāsanā kātabbā”ti vatvā ajjhāsayānurūpaṃ dhammaṃ desesi. Uttaro amatābhisekasadisena satthu hatthasamphassaṇa sañjātappasādasomanassatāya uḷāraṃ pītipāmojjaṃ paṭilabhitvā yathāparicitaṃ vipassanāmaggaṃ samārūḷho ñāṇassa paripākaṃ gatattā satthu ca desanāvīlāsena tāvadeva maggapaṭipāṭiyā sabbakilese khetvā chaḷabhiñño ahoṣi. Tena vuttaṃ **apadāne** (apa. thera 2.56.55-92)

“Sumedho nāma sambuddho, bāttimsavaralakkhaṇo;
Vivekakāmo bhagavā, himavantamupāgami.

“Ajhogāhetvā himavantaṃ, aggo kāruṇiko muni;
Pallaṅkaṃ ābhujitvāna, nisīdi parisuttamo.

“Vijjādharo tadā āsiṃ, antalikkhacaro ahaṃ;
Tisūlaṃ sugataṃ gayha, gacchāmi ambare tadā.

“Pabbatagge yathā aggi, puṇṇamāyeva candimā;
Vanam obhāsate buddho, sālārājāva phullito.

“Vanaggā nikkhamitvāna, buddharamsībhidhāvare;
Naḷaggivaṇṇasankāsā, disvā cittaṃ pasādayiṃ.

“Vicinaṃ addasaṃ pupphaṃ, kaṇikāraṃ devagandhikaṃ;
Tīṇi pupphāni ādāya, buddhaseṭṭhamapūjayiṃ.

“Buddhassa ānubhāvena, tīṇi pupphāni me tadā;
Uddhamvaṇṭā adhopattā, chāyaṃ kubbanti satthuno.

“Tena kamma sukatenā, cetanāpaṇidhīhi ca;
Jahitvā mānusaṃ dehaṃ, tāvatimsamagacchahaṃ.

“Tattha me sukataṃ byamaṃ, kaṇikārīti ñāyati;
Saṭṭhiyojanamubbedhaṃ, tiṃsayojanavitthataṃ.

“Sahassakaṇḍaṃ satabheṇḍu, dhajālu haritāmayaṃ;
Satasahassaniyyūhā, byamhe pātubhaviṃsu me.

“Soṇṇamayā maṇimayā, lohitaṅkamayāpi ca;
Phalikāpi ca pallaṅkā, yenicchakā yadicchakā.

“Mahārahaṅca sayanaṃ, tūlikā vikatīyutaṃ;
Uddhalomiṅca ekantaṃ, bimbohanasamāyutaṃ.

“Bhavanā nikkhamitvāna, caranto devacārikaṃ;
Yathā icchāmi gamanaṃ, devasaṅghapurakkhato.

“Pupphassa heṭṭhā tiṭṭhāmi, uparicchadanaṃ mama;
Samantā yojanasataṃ, kaṇikārehi chāditaṃ.

“Saṭṭhitūriyasahassāni, sāyaṃ pātaṃ upaṭṭhahaṃ;
Parivārenti maṃ niccaṃ, rattindivamatanditā.

“Tattha naccehi gītehi, tālehi vāditehi ca;
Ramāmi khiḍḍā ratiyā, modāmi kāmakāmahaṃ.

“Tattha bhutvā pivitvā ca, modāmi tidase tadā;
Nārīgaṇehi sahito, modāmi byamhamuttame.

“Satānaṃ pañcakkhattuṅca, devarajjamakārayiṃ;
Satānaṃ tīṇikkhattuṅca, cakkavattī ahasahaṃ;
Padesarajjaṃ vipulaṃ, gaṇanāto asaṅkhiyaṃ.

“Bhave bhava saṃsaranto, mahābhogaṃ labhāmahaṃ;
Bhoge me ūnatā natthi, buddhapūjāyidaṃ phalaṃ.

“Duve bhava saṃsarāmi, devatte atha mānuse;

Aññaṃ gatiṃ na jānāmi, buddhapūjāyidaṃ phalaṃ.

“Duve kule pajāyāmi, khattiye cāpi brāhmaṇe;
Nīce kule na jānāmi, buddhapūjāyidaṃ phalaṃ.

“Hatthiyānaṃ assayānaṃ, sivikaṃ sandamānikaṃ;
Labhāmi sabbamevetāṃ, buddhapūjāyidaṃ phalaṃ.

“Dāsīgaṇaṃ dāsagaṇaṃ, nāriyo samalaṅkatā;
Labhāmi sabbamevetāṃ, buddhapūjāyidaṃ phalaṃ.

“Koseyyakambaliyāni, khomakappāsikāni ca;
Labhāmi sabbamevetāṃ, buddhapūjāyidaṃ phalaṃ.

“Navavatthaṃ navaphalaṃ, navaggarasabhojanaṃ;
Labhāmi sabbamevetāṃ, buddhapūjāyidaṃ phalaṃ.

“Imaṃ khāda imaṃ bhuñja, imamhi sayane saya;
Labhāmi sabbamevetāṃ, buddhapūjāyidaṃ phalaṃ.

“Sabbattha pūjito homi, yaso accuggato mama;
Mahāpakkho sadā homi, abhejjapariso sadā;

Ñātīnaṃ uttamo homi, buddhapūjāyidaṃ phalaṃ.

“Sītaṃ uṇhaṃ na jānāmi, pariḷāho na vijjati;
Atho cetasikaṃ dukkhaṃ, hadaye me na vijjati.

“Suvaṇṇavaṇṇo hutvāna, saṃsarāmi bhavābhava;
Vevaṇṇiyaṃ na jānāmi, buddhapūjāyidaṃ phalaṃ.

“Devalokā cavitvāna, sukkamūlena codito;
Sāvattiyaṃ pure jāto, mahāsāle suaḍḍhake.

“Pañca kāmagaṇe hitvā, pabbajimā anagāriyaṃ;
Jātiyā sattavassohaṃ, arahattamaṃpāpuṇim.

“Upasampādayī buddho, guṇamaññāya cakkhumā;
Taruṇo pūjanīyo haṃ, buddhapūjāyidaṃ phalaṃ.

“Dibbacakkhu visuddhaṃ me, samādhikusalo ahaṃ;
Abhiññāpāramippatto, buddhapūjāyidaṃ phalaṃ.

“Paṭisambhidā anuppatto, iddhipādesu kovido;
Dhammesu pāramippatto, buddhapūjāyidaṃ phalaṃ.

“Tīṃsakappasahassamhi, yaṃ buddhamabhipūjayaṃ;
Duggatiṃ nābhijānāmi, buddhapūjāyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Chaḷabhiñño puna hutvā sūlato uṭṭhahitvā parānuddayāya ākāse ṭhatvā pāṭihāriyaṃ dassesi. Mahājano acchariyabbhuta cittaṃ jāto ahoṣi. Tāvadevassa vaṇo samrūlhi, so bhikkhūhi, “āvuso, tādisaṃ dukkhaṃ anubhavanto kathaṃ tvaṃ vipassanaṃ anuyuñjituṃ asakkhī”ti puṭṭho, “pageva me, āvuso, saṃsāre ādīnava, saṅkhārānañca sabhāvo sudiṭṭho, evāhaṃ tādisaṃ dukkhaṃ anubhavanto pi asakkhīṃ vipassanaṃ vaḍḍhetvā viṣesaṃ adhigantu”nti dassento –

121. “Natthi koci bhavo nicco, saṅkhārā vāpi sassatā;
Uppajjanti ca te khandhā, cavanti aparāparaṃ.

122. “Etamādīnavaṃ ñatvā, bhavenamhi anattiko;
Nissaṭṭo sabbakāmehi, patto me āsavakkhayo”ti. –

Imaṃ gāthādvayaṃ abhāsi.

Tattha **natthi koci bhavo niccoti** kammabhavo upapattibhavo kāmabhavo rūpabhavo arūpabhavo saññībhavo asaññībhavo nevasaññīnāsaññībhavo ekavokārabhavo catuvokārabhavo pañcavokārabhavoti evaṃbhedo, tatthāpi hīno majjhimo ukkaṭṭho dīghāyuko sukhabahulo vomissasukhadukkhoti evaṃvibhāgo yokoci nicco dhuvo thiro apalokiyadhammo natthi taṃ taṃ kāraṇaṃ paṭicca samuppannattā. Yasmā ca etadevaṃ, tasmā **saṅkhārā vāpi sassatā** natthīti yojanā. Paccayehi saṅkhatattā “saṅkhārā”ti laddhanāme hi pañcakkhandhe upādāya bhavasamaññāya saṅkhārāva hutvā sambhūtā jarāmarañena ca vipariṇāmantīti asassatā vipariṇāmadhammā. Tathā hi te “saṅkhārā”ti vuccanti. Tenāha **uppajjanti ca te khandhā, cavanti aparāparanti**. Te bhavapariyāyena saṅkhārapariyāyena ca vuttā pañcakkhandhā yathāpaccayaṃ aparāparaṃ uppajjanti, uppannā ca jarāya paripīlītā hutvā cavanti paribhijjantīti attho. Etena “bhavo, saṅkhārā”ti ca laddhavohārā pañcakkhandhā udayabbayasabhāvāti dasseti. Yasmā tilakkhaṇaṃ āropetvā saṅkhāre sammasantassa tayopi bhavā ādittaṃ viya saṅkhate **ādīnavaṃ** dosaṃ pageva vipassanāpaññāya jānitvā aniccalakkhaṇehi diṭṭhā saṅkhārā dukkhānattā vibhūtatarā upaṭṭhahanti, tenāha bhagavā – “yadaniccaṃ taṃ dukkhaṃ, yaṃ dukkhaṃ tadanattā”ti (saṃ. ni. 3.15).

Yasmā tilakkhaṇaṃ āropetvā saṅkhāre sammasantassa tayopi bhavā ādittaṃ viya agāraṃ sappatibhayaṃ upaṭṭhahanti, tasmā āha “**bhavenamhi anattiko**”ti. Evaṃ pana sabbaso bhavehi vinivattiyamānassa kāmesu apekkhāya lesopi na sambhavatiyeva, tenāha “**nissaṭṭo sabbakāmehi**”ti, amhīti yojanā. Mānusehi viya dibbehi kāmehi nivattitacittosmīti attho. **Patto me āsavakkhayo**ti yasmā evaṃ suparimajjitasaṅkhāro bhavesu suparidiṭṭhādīnava kāmesu ca anāsattamānaso tasmā sūlamatthake nisinnenāpi me mayā patto adhigato āsavakkhayo nibbānaṃ arahattañcāti. Aññehi ca sabrahmacārīhi appattamānasehi tadadhigamāya ussāho karaṇīyoti bhikkhūnaṃ ovādamadāsi.

Uttaratheragāthāvaṇṇanā niṭṭhitā.

2. Piṇḍolabhāradvājattheragāthāvaṇṇanā

Nayidaṃ anayenātiādikā āyasmato piṇḍolabhāradvājattherassa gāthā. Kā uppatti? Ayaṃ kira padumuttarassa bhagavato kāle sīhayoniyam nibbattitvā pabbataguhāyaṃ viharati. Bhagavā tassa anuggahaṃ kātuṃ gocarāya pakkantakāle sayanaguhaṃ pavisitvā nirodhaṃ samāpajjitvā nisīdi. Sīho gocaraṃ gahetvā nivatto guhādvāre bhagavantaṃ disvā haṭṭhatuṭṭho jalajathalajapupphehi pūjaṃ katvā cittaṃ pasādentō bhagavato āraṅkhatthāya araṅñe vālamige apanetuṃ tīsu velāsu sīhanādaṃ nadanto buddhagatāya satiyā aṭṭhāsi. Yathā paṭhamadivasam, evaṃ sattāhaṃ pūjesi. Bhagavā sattāhaccayena nirodhā vuṭṭhahitvā “vattissati imassa ettako upanissayo”ti tassa passantasseva ākāsaṃ pakkhanditvā vihārameva gato. Sīho pālileyyakatthī viya buddhaviyogadukkhaṃ adhivāsetuṃ asakkonto kālaṃ katvā haṃsavatīnagare mahābhogakule nibbattitvā vayappatto nagaravāsīhi saddhīṃ vihāraṃ gato dhammadesanaṃ sutvā sattāhaṃ mahādānaṃ pavattetvā yāvajīvaṃ puññāni katvā aparāparaṃ

devamanussesu saṃsaranto amhākaṃ bhagavato kāle kosambiyaṃ rañño utenassa purohitaputto hutvā nibbatti **bhāradvājo** nāma nāmena. So vayappatto tayo vede uggahetvā pañca māṇavakasatāni mante vācento mahagghasabhāvena ananurūpācārattā tehi pariccajjanto rājagahaṃ gantvā bhagavato bhikkhusaṅghassa ca lābhasakkāraṃ disvā sāsane pabbajitvā bhojane amattaññū hutvā vicaranto sathhārā upāyena mattaññūtāya patiṭṭhāpito vipassanaṃ paṭṭhapetvā nacirasseva chaḷabhiñño ahoṣi. Tena vuttaṃ **apadāne** (apa. therā 2.50.104-109) –

“Migaluddo pure āsiṃ, vipine vicaraṃ tadā;
Addasaṃ virajaṃ buddhaṃ, sabbadhammāna pāraguṃ.

“Piyālapahalamādāya, buddhasetṭhassadāsahaṃ;
Puññaakkhettassa vīrassa, pasanno sehi paṇibhi.

“Ekatiṃse ito kappe, yaṃ phalaṃ adadiṃ tadā;
Duggatiṃ nābhijānāmi, phaladānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Chaḷabhiñño pana hutvā “bhagavato sammukhā yaṃ sāvakehi pattaṃ, taṃ mayā patta”nti, bhikkhusaṅghe ca “yassa magge vā phale vā kaṅkhā atthi, so maṃ pucchatū”ti sīhanādaṃ nadi. Tena taṃ bhagavā, “etadaggaṃ, bhikkhave, mama sāvakaṇaṃ bhikkhūnaṃ sīhanādikaṇaṃ yadidaṃ piṇḍolabhāradvājo”ti (a. ni. 1.188, 195) etadagge ṭhapesi. So ekadivasaṃ attano santikaṃ upagataṃ gihikāle saḥāyabhūtaṃ macchariṃ micchādīṭṭhibrāhmaṇaṃ anukampamāno tassa dānakathaṃ kathetvā tena ca “ayaṃ mama dhaṇaṃ vināsetukāmo”ti bhakuṭiṃ katvāpi “tuyhaṃ ekabhattaṃ demī”ti vutte, “taṃ saṅghassa dehi mā mayha”nti saṅghassa pariṇāmesi. Puna brāhmaṇena “ayaṃ maṃ bahūnaṃ dāpetukāmo”ti appaccaye pakāsite dutiyadivasaṃ dhammasenāpatinā saṅghagatāya dakkhiṇāya mahapphalabhāvappakāsanena taṃ pasādetvā, “ayaṃ brāhmaṇo ‘āhāragedhena maṃ dāne nīyojesi”ti maññati, āhārassa pana mayā sabbaso pariññātabhāvaṃ na jānāti, handa naṃ jānāpemi”ti –

123. “Nayidaṃ anayena jīvitaṃ, nāhāro hadayassa santiko;
Āhāraṭṭhitiko samussayo, iti disvāna carāmi esanaṃ.

124. “Paṅkoti hi naṃ avedayaṃ, yāyaṃ vandanapūjanā kulesu;
Sukhumaṃ sallaṃ durubbahaṃ, sakkāro kāpurisena dujjaho”ti. –

Gāthādvayaṃ abhāsi.

Tattha **nayidaṃ anayena jīvitaṃ** idaṃ mama jīvitaṃ anayena añāyena veḷudānapupphadānādiānesanāya na hoti jīvitanikantiyā abhāvato. **Nāhāro hadayassa santikoti** āhāro ca āhāriyamāno maggaphalaññaṃ viya hadayassa cittassa santikaro na hoti, kevalaṃ pana sajjukaṃ khudāpaṭiḡhātamattaṃ karotīti adhippāyo. Atha vā **nāhāro hadayassa santikoti** āhāro rasataṇhāvattu me hadayassa santiko āsatto na hoti rasataṇhāya eva abhāvato. “Santike”tipi paṭhanti. Yo hi āhāragiddho lābhasakkārapasuto vicarati, tassa āhāro hadayassa santike nāma abhiṇhaṃ manasikātabbato. Yo pana pariññātāhāro, so tattha pahīnacchandarāgo, na tassāhāro hadayassa santike nāma – “kathaṃ nu kho labheyya”ntiādimanasikaraṇasseva abhāvato. Yadi hi jīvitanikanti āhārarasataṇhā ca natthi, atha kasmā piṇḍāya carasīti anuyogaṃ manasi katvā āha “**āhāraṭṭhitiko samussayo, iti disvāna carāmi esana**”nti. Āhāro bhojanaṃ ṭhiti ṭhānaṃ paccayo etassāti āhāraṭṭhitiko. “Āhārapaṭibaddhavuttiko samussayo kāyo”iti disvāna evaṃ ṇatvā imamatthaṃ buddhiyaṃ ṭhapetvā carāmi esanaṃ, bhikkhāpariyesanaṃ karomīti attho.

Paccayanimittaṃ kulāni upasaṅkamanto tattha vandanapūjanāhi lābhasakkārehi ca bajjhatīti evaṃ mādisesu na cintetabbanti dassento “**paṅko**”tigāthaṃ abhāsi. Tassattho – **yā ayaṃ** paccayanimittaṃ

upagatānaṃ pabbajitānaṃ **kulesu** gehavāsīsu pavattissati guṇasambhāvanā **pūjanā** ca, yasmā taṃ abhāvitattānaṃ osīdāpanatthēna malīnabhāvakarāṇena ca **paṅko** kaddamoti buddhādayo **avedayum** abbhāññāsum pavedesum vā, tasmā sā sappurisānaṃ bandhāya na hoti sakkārāsāya pageva pahīnatā. Asappurisassa pana sakkārāsā duviññeyyasabhāvatāya pīlājananato anto tudanato uddharitum asakkuṇeyyato ca **sukhumam sallam durubbaham**. Tato eva tena **sakkāro kāpurisena dujjaho** durubbaheyyo tassa pahānapaṭipattiyā appaṭipajjanato, sakkārāsāpahānena pahīno hotīti. Taṃ sutvā brāhmaṇo there abhippasanno ahosi.

Piṇḍolabhāradvājattheragāthāvaṇṇanā niṭṭhitā.

3. Valliyattheragāthāvaṇṇanā

Makkaṭo pañcadvārāyantiādikā āyasmato valliyattherassa gāthā. Kā uppatti? Ayampi purimabuddhesu katādhikāro tattha tattha bhave puññāni upacinanto ito ekatiṃse kappe kulagehe nibbattivā viññutaṃ patto ekadivasam kenacideva karaṇīyena araññaṃ gato tattha nāradaṃ nāma paccekasambuddham rukkhāmūle vasantaṃ disvā pasannamānaso naḥēhi sālaṃ katvā tiṇehi chādetvā adāsī. Caṅkamaṇaṭṭhānañcassa sodhetvā vālukā okiritvā adāsī. So tena puññakammena devamanussesu saṃsaranto imasmiṃ buddhuppāde sāvattiyam brāhmaṇamaḥāsālassa putto hutvā nibbatti, **valliyotissa** nāmaṃ ahosi. So vayappatto yobbanamanuppatto indriyavasiko hutvā vicaranto kalyāṇamittasaṃsaggena bhagavantaṃ upasaṅkamitvā dhammaṃ sutvā paṭiladdhasaddho pabbajitvā vipassanaṃ paṭṭhapetvā nacirasseva arahattaṃ pāpuṇi. Tena vuttaṃ **apadāne** (apa. thera 2.50.93-103) –

“Himavantassāvidūre, hārito nāma pabbato;
Sayambhū nārado nāma, rukkhāmūle vasī tadā.

“Naḷāgāraṃ karitvāna, tiṇena chādayiṃ ahaṃ;
Caṅkamaṃ sodhayitvāna, sayambhussa adāsahaṃ.

“Tena kammaṇa sukateṇa, cetanāpaṇidhīhi ca;
Jahitvā mānusaṃ dehaṃ, tāvatimsamagacchahaṃ.

“Tattha me sukataṃ byamaṃ, naḷakuṭikanimittaṃ;
Saṭṭhiyojanamubbedhaṃ, tiṃsayojanavitthataṃ.

“Catuddasesu kappesu, devaloke ramiṃ ahaṃ;
Ekasattatikkhattuñca, devarajjamakārayiṃ.

“Catuttiṃsatikkhattuñca, cakkavattī ahasahaṃ;
Padesarajjaṃ vipulaṃ, gaṇanāto asaṅkhiyaṃ.

“Dhammapāsādamāruyha, sabbākāravarūpamaṃ;
Yadicchakāhaṃ vihare, sakyaputtassa sāsane.

“Ekatiṃse ito kappe, yaṃ kammamakarim tadā;
Duggatiṃ nābhijānāmi, naḷakuṭiyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā puthujjanakāle attano cittassa rūpādiārammaṇesu yathākāmappavattiyā, idāni ariyamaggena niggahitabhāvassa ca vibhāvanena aññaṃ byākaronto –

125. “Makkaṭo pañcadvārāyaṃ, kuṭikāyaṃ pasakkiya;
Dvārena anupariyeti, ghaṭṭayanto muhuṃ muhuṃ.

126. “Tiṭṭha makkaṭa mā dhāvi, na hi te taṃ yathā pure;
Niggahītosī paññāya, neva dūraṃ gamissasī” ti. – gāthādvayaṃ abhāsi;

Tattha **ghaṭṭayantoti** attano lolabhāvena rukkhassa aññaṃ sākhaṃ muñcitvā aññassa gahaṇena anekavāraṃ tattha rukkhaṃ cāleno phalūpabhogamakkaṭo viya tena tena cakkhādidvārena rūpādiārammaṇesu aññaṃ muñcitvā aññaṃ gaṇhanto cittasantānassa samādānavasena niccalaṃ ṭhātumaṃ appadānena abhikkhaṇaṃ ghaṭṭayanto cāleno tasmimyeva rūpādiārammaṇe anuparivattati yathākāmaṃ vicarati. Vattamānasamīpatāya cettha vattamānavacanaṃ. Evaṃ anupariyanto ca **tiṭṭha, makkaṭa, mā dhāvi** tvam, cittamakkaṭa, idāni tiṭṭha mā dhāvi, ito paṭṭhāya te dhāvituṃ na sakkā, tasmā **na hi te taṃ yathā pure** yasmā taṃ attabhāvagehaṃ pubbe viya na te sevitaṃ pihitadvārabhāvato, kiñca **niggahītosī paññāya** sayañca idāni maggapaññāya kilesābhisaṅkhārasaṅkhātānaṃ pādānaṃ chedanena accantikāṃ niggahaṃ pattosī, tasmā **neva dūraṃ gamissasī** ito attabhāvato dūraṃ dutiyādiattabhāvaṃ neva gamissasī yāvacarimakacittaṃ eva te gamananti dasseti. “Neto dūra”ntipi pāṭho, so evattho.

Valliyattheragāthāvaṇṇanā niṭṭhitā.

4. Gaṅgātīriyattheragāthāvaṇṇanā

Tiṇṇaṃ me tālapattānantiādikā āyasmato gaṅgātīriyattherassa gāthā. Kā uppatti? Ayaṃ kira padumuttarassa bhagavato kāle kulagehe nibbattitvā viññutaṃ patto sāsane abhippasanno hutvā bhikkhusaṅghassa pānīyamadāsi. So tena puññakammena devaloke nibbattitvā aparāparaṃ puññāni katvā devamanussesu saṃsaranto imasmim buddhuppāde sāvattiyam aññatarassa gahapatissa putto hutvā nibbatti, “datto” tissa nāmaṃ ahoṣi. So vayappatto gharāvāsaṃ vasanto agamanīyaṭṭhānabhāvaṃ ajānitvā vitikkamaṃ katvā puna agamanīyaṭṭhānabhāvaṃ ñatvā saṃvegajāto pabbajitvā taṃ kammaṃ jigucchitvā lūkhapaṭipattiṃ anutiṭṭhanto paṃsukūlacīvaraṃ chavasittasadisam mattikāpattañca gahetvā gaṅgātīre tīhi tālapattehi kuṭikaṃ katvā vihāsi, tenevassa **gaṅgātīriyoti** samañña ahoṣi. So “arahattaṃ appatvā na kenaci sallapissāmi” ti cittaṃ adhiṭṭhāya paṭhamam saṃvaccharaṃ tuṇhībhūto vacībhedaṃ akarontova vihāsi. Dutīye saṃvacchare gocaragāme aññatarāya itthiyā “mūgo nu kho no” ti vīmaṃsitukāmāya patte khīraṃ āsiñcantiyā hatthavihāre katepi okirite, “alaṃ, bhaginī” ti vācaṃ nicchāri. Tatiye pana saṃvacchare antaravasseva ghaṭṭayanto vāyamanto arahattaṃ pāpuṇi, tena vuttaṃ **apadāne** (apa. therā 2.50.51-56) –

“Padumuttarabuddhassa, bhikkhusaṅge anuttare;
Pasannacitto sumano, pānīghaṭamapūrayim.

“Pabbatagge dumagge vā, ākāse vātha bhūmiyaṃ;
Yadā pānīyamicchāmi, khippaṃ nibbattate mama.

“Satasahassito kappe, yaṃ dānamadadiṃ tadā;
Duggatiṃ nābhijānāmi, dakadānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.
Arahā pana hutvā attano pubbhāgapaṭipattiyā vibhāvanamukhena aññaṃ byākaronto –

127. “Tiṇṇaṃ me tālapattānaṃ, gaṅgātīre kuṭi katā;
Chavasittova me patto, paṃsukūlañca cīvaraṃ.

128. “Dvinnaṃ antaravassānaṃ, ekā vācā me bhāsītā;

Tatiye antaravassamhi, tamokhandho padālito’’ti. – gāthādvayaṃ abhāsi;

Tattha **tiṇṇaṃ me tālapattānaṃ, gaṅgātīre kuṭi katāti** tālarukkhato pahitehi tīhi tālapaṇṇehi mayhaṃ vassanapariharaṇatthaṃ gaṅgāya nadiyā tīre kuṭikā katā. Tena attano senāsanasantosaṃ dasseti. Vuttañhi dhammasenāpatinā –

‘‘Pallaṅkena nisinnassa, jaṇṇuke nābhivassati;
Alaṃ phāsuvihārāya, pahitattassa bhikkhuno’’ti. (theragā. 985; mi. pa. 6.1.1);

‘‘Tālapattīna’’ntipi pāṭho, so evattho. **Chavasittova me pattoti** mayhaṃ patto chavasittasadiṣo, matānaṃ khīrasecanakuṇḍasadiṣoti attho. **Pamsukūlaṅca cīvaraṅca** me antaramaggasusānādiṣu chaḍḍitanantakehi kataṃ pamsukūlaṃ. Padadvayena parikkhārasantosaṃ dasseti.

Dvinnaṃ antaravassānanti dvīsu antaravassesu pabbajitato arahattamappattasaṃvaccharesu. **Ekā vācā me bhāsītāti** ekā, ‘‘alaṃ, bhaginī’’ti khīrapaṭikkhepavācā eva mayā vuttā, añño tattha vacībhedo nāhosi. Tena ukkaṃsagataṃ kāyavacīsaṃyamaṃ dasseti. **Tatiye antaravassamhīti** tatiyassa saṃvaccharassa abbhantare, tasmaṃ aparipuṇṇeyeva. **Tamokhandho padālito**ti aggamaggena tamokhandho bhinno, avijjānusayo samucchinnoti attho. Tena tadekaṭṭhatāya sabbakilesānaṃ anavaśesappahānaṃ vadati.

Gaṅgātīriyattheragāthāvaṇṇanā niṭṭhitā.

5. Ajinattheragāthāvaṇṇanā

Api ce hoti tevijjotiādikā āyasmato ajinattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto buddhasuññe loke kulagehe nibbattitvā viññutaṃ patto kenacideva karaṇīyena araṇṇaṃ gato tattha sucintitaṃ nāma paccekasambuddhaṃ ābādhena pīḷitaṃ nisinnaṃ disvā upasaṅkamitvā vanditvā bhesajjathāya pasannamānaso ghatamaṇḍaṃ adāsi. So tena puññakamma devaloke nibbattitvā aparāparaṃ puññāni katvā sugatīsuveva saṃsaranto imasmiṃ buddhuppāde sāvattiyā aññatarassa daliddabrāhmaṇassa gehe paṭisandhiṃ gaṇhi. Taṃ vijāyanakāle ajinacamma sampācchimsu. Tenassa **ajinot**veva nāmaṃ akaṃsu. So bhogasaṃvattaniyassa kamma akatattā daliddakule nibbato vayappattopi appannapānabhojano hutvā vicaranto jetavanapaṭiggahaṇe buddhānubhāvaṃ disvā paṭiladdhasaddho pabbajitvā vipassanāya kammaṃ karonto nacirasseva chaḷabhiñño ahoṣi. Tena vuttaṃ **apadāne** (apa. thera 2.43.78-87) –

‘‘Sucintitaṃ bhagavantaṃ, lokajetthaṃ narāsabhaṃ;
Upaviṭṭhaṃ mahāraṇṇaṃ, vātābādhena pīḷitaṃ.

‘‘Disvā cittaṃ pasādetvā, ghatamaṇḍamupānayaṃ;
Katattā ācitattā ca, gaṅgā bhāgīrathī ayaṃ.

‘‘Mahāsamuddā cattāro, ghatam sampajjare mama;
Ayaṅca pathavī ghorā, appamāṇā asaṅkhiyā.

‘‘Mama saṅkappamaññāya, bhavate madhusakkarā;
Cātuddīpā ime rukkhā, pādapā dharaṇīruhā.

‘‘Mama saṅkappamaññāya, kapparukkhā bhavanti te;
Paññāsakkhattuṃ devindo, devarajjamakārayiṃ.

“Ekapaññāsakkhattuñca, cakkavattī ahosahaṃ;
Padesarajjaṃ vipulaṃ, gaṇanāto asaṅkhiyaṃ.

“Catunnavutito kappe, yaṃ dānamadadiṃ tadā;
Duggatiṃ nābhijānāmi, ghatamaṇḍassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvāpi purimakammanissandena appalābhī appaṇṇātova ahoṣi.

Uddesabhattasālākabhattānīpi lāmakāneva pāpuṇanti. Kammaphaleneva ca naṃ puthujjanā bhikkhū sāmaṇerā ca “appaṇṇāto”ti avamaññanti. Thero te bhikkhū saṃvejento –

129. “Api ce hoti tevijjo, maccuhāyī anāsavo;
Appaṇṇātoti naṃ bālā, avajānanti ajānatā.

130. “Yo ca kho annapānassa, lābhī hotīdha puggalo;
Pāpadhammopi ce hoti, so nesam hoti sakkato”ti. –

Gāthādvayaṃ abhāsi.

Tattha **apī**ti sambhāvane nipāto. **Ceti** parikkappane. **Hotīti** bhavati. Tisso vijjā etassāti **tevijjo**. Maccaṃ pajahatīti **maccuhāyī**. Kāmāsavādīnaṃ abhāvena **anāsavo**. Idaṃ vuttaṃ hoti – dībbacakkhuñāṇaṃ pubbenivāsañāṇaṃ āsavakkhayañāṇanti imāsaṃ tissannaṃ vijjānaṃ adhigatattā **tevijjo** tato eva sabbaso kāmāsavādīnaṃ parikkhīnattā **anāsavo** āyatiṃ punabbhavassa aggahaṇato maraṇābhāvena **maccuhāyī** yadipi hoti, evaṃ santepi **appaṇṇātoti naṃ bālā avajānanti** yassatthāya kulaputtā sammadeva agārasmā anagāriyaṃ pabbajanti, taṃ sadatthaṃ anupāpuṇitvā tḥitampi naṃ uttamaṃ purisaṃ “dhutavādo bahussuto dhammakathiko”ti uppannalābhassa abhāvato “na paññāto na pākaṭo”ti bālā dummedhapuggalā avajānanti, kasmā? **Ajānatā** ajānanakāraṇā guṇānaṃ ajānaneva tattha kāraṇanti dasseti.

Yathā ca guṇānaṃ ajānanato bālā lābhagarutāya sambhāvanīyampi avajānanti, evaṃ guṇānaṃ ajānanato lābhagarutāya evaṃ avajānitabbampi sambhāventīti dassento dutiyaṃ gāthaṃ āha. Tattha **yoti** aniyamavacanaṃ. **Ca**-saddo byatireke, tena yathāvuttapuggalato imassa puggalassa vuccamānaṃyeva viresaṃ janeti. **Khoti** avadhāraṇe. **Annapānassāti** nidassanamattaṃ. **Lābhīti** lābhavā. **Idhāti** imasmiṃ loke. Jarāmarañehi tassa tassa sattāvāsassa pūraṇato galanato ca **puggalo**. **Pāpadhammoti** lāmakadhammo. Ayañhettha attho – yo pana puggalo cīvarādipaccayamattasseva lābhī hoti, na jhānādīnaṃ, so pāpicchatāya dussīlabhāvena hīnadhammopi samāno idha imasmiṃ loke bālānaṃ lābhagarutāya sakkato garukato hotīti.

Ajīnattheragāthāvaṇṇanā niṭṭhitā.

6. Meḷajīnattheragāthāvaṇṇanā

Yadāhaṃ dhammamassosintiādikā āyasmato meḷajīnattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto sumedhassa bhagavato kāle kulagehe nibbattitvā viññutaṃ patto ekadivasaṃ bhagavantaṃ piṇḍāya gacchantaṃ disvā pasannamānaso madhuraṃ āmodaphalaṃ adāsi. So tena puññakammena devamanussesu saṃsaranto imasmiṃ buddhuppāde bārāṇasiyaṃ khattiyakule nibbattitvā **meḷajīnoti** laddhanāmo vijjāsippesu nipphattiṃ gato paṇḍito byatto disāsu pākaṭo ahoṣi. So bhagavati bārāṇasiyaṃ isipatane viharante vihāraṃ gantvā satthāraṃ upasaṅkamitvā dhammaṃ sutvā paṭiladdhasaddho pabbajitvā vipassanaṃ paṭṭhapetvā tadaheva arahattaṃ pāpuṇi. Tena vuttaṃ **apadāne** (apa. thera 2.51.57-62) –

“Sahassaramsī bhagavā, sayambhū aparājito;
Vivekā vuṭṭhahitvāna, gocarāyābhinikkhami.

“Phalahattho ahaṃ disvā, upagacchiṃ narāsabhaṃ;
Pasannacitto sumano, avaṭaṃ adadiṃ phalaṃ.

“Catunnavutito kappe, yaṃ phalaṃ adadiṃ tadā;
Duggatiṃ nābhijānāmi, phaladānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā aparabhāge bhikkhūhi, “āvuso, kiṃ tayā uttarimanussadhammo adhigato”ti puṭṭho sīhanādaṃ nadanto –

131. “Yadāhaṃ dhammamassosiṃ, bhāsamānassa satthuno;
Na kaṅkhamabhi jānāmi, sabbaññū aparājite.

132. “Satthavāhe mahāvīre, sārathīnaṃ varuttame;
Magge paṭipadāyaṃ vā, kaṅkhā mayhaṃ na vijjati”ti. – gāthādvayaṃ abhāsi;

Tattha **yadāti** yasmim kāle. **Ahanti** attānaṃ niddisati. **Dhammanti** catusaccadhammaṃ. **Assosinti** suṇim. **Satthunoti** diṭṭhadhammikādiatthehi veneyyānaṃ sāsanaṭṭhena satthuno. **Kaṅkhanti** saṃsayāṃ. Saṅkhatamasāṅkhatañca anavasesato jānanaṭṭhena **sabbaññū**. Kutoci pi parājita bhāvena **aparājite**. Veneyyasattānaṃ saṃsarakantārato nibbānaṃ paṭivāhanaṭṭhena **satthavāhe**. Idaṃ vuttaṃ hoti – yato pabhuti ahaṃ satthuno dhammaṃ desentassa catusaccadhammaṃ **assosiṃ** sotadvārānusārena upadhāresim upalabhim, tato paṭṭhāya anavasesasaṅkhatasaṅkhatasammuditdhammānaṃ sayambhūñāṇena jānanaṭṭhena **sabbaññū** anāvaraṇadassāvimihi, pañcannampi mārānaṃ abhibhavanato tehi aparājitatā sadevake loke appaṭihatadhammacakkattā ca **aparājite**, veneyyasattānaṃ lobhakantārādito vāhanaṭṭhena **satthavāhe**, mahāvikkantatāya **mahāvīre**, aññehi duddamānaṃ purisadammanānaṃ saraṇato accantikena damathena damanato **sārathīnaṃ** pavarabhūte **uttame** sammāsambuddhe, “buddho nu kho no nu kho”ti **kaṅkhaṃ nābhijānāmi** aparappaccayabhāvato. Tathārūpe desite ariyamagge tadupādāyabhūtāya ca sīlādipaṭipadāya “niyyāniko nu kho na nu kho”ti **kaṅkhā** vicikicchā **na vijjati** natthīti. Ettha ca ariyadhamme saṃsayābhāvakathanena ariyasaṅghepi saṃsayābhāvo kathitoyevāti daṭṭhabbaṃ tattha paṭiṭṭhitassa anaññathābhāvatoti.

Meḷajinattheragāthāvaṇṇanā niṭṭhitā.

7. Rādhatheragāthāvaṇṇanā

Yathā agāraṃ ducchannantiādikā āyasmato rādhatherassa gāthā. Kā uppatti? Ayaṃ kira padumuttarassa bhagavato kāle haṃsavatīnagare kulagehe nibbattivā viññutaṃ patto vihāraṃ gantvā satthāraṃ upasaṅkamtivā vanditvā ekamantaṃ nisinno satthārā ekaṃ bhikkhuṃ paṭibhāneyyakānaṃ aggaṭṭhāne ṭhapiyamānaṃ disvā sayāṃ taṃ ṭhānantaraṃ patthetvā mahādānaṃ pavattesi. Satthu uḷārañca pūjaṃ akāsi. So evaṃ katapaṇidhāno tato cuto tattha tattha bhava puññāni upacinanto vipassissa bhagavato kāle kulagehe nibbattivā viññutaṃ patto ekadivasaṃ satthāraṃ piṇḍāya gacchantaṃ disvā pasannamānaso madhurāni ambaphalānī adāsi. So tena puññakammena devaloke nibbattivā aparāparaṃ puññāni katvā devamanussesu saṃsaranto amhākaṃ bhagavato kāle rājagahe brāhmaṇakule nibbattivā **rādhoti** laddhanāmo vayappatto hutvā gharāvāsaṃ vasanto mahallakakāle puttadārehi apasādito, “kiṃ me gharāvāsena, pabbajissāmi”ti vihāraṃ gantvā there bhikkhū upasaṅkamtivā pabbajjaṃ yācitvā tehi “ayaṃ brāhmaṇo jiṇṇo na sakkoti vattapaṭivattaṃ pūretu”nti paṭikkhitto satthu santikaṃ gantvā attano ajjhāsayaṃ pavedetvā satthārā upanissayasampattiṃ oloketvā āṇattena dhammasenāpatinā pabbājito vipassanaṃ paṭṭhapetvā nacirasseva arahattaṃ pāpuṇi. Tena

vuttaṃ **apadāne** (apa. therā 2.51.63-67) –

“Suvaṇṇavaṇṇaṃ sambuddhaṃ, āhutaṇṇaṃ paṭiggahaṃ;
Rathiyaṃ paṭipajantaṃ, pādaphalaṃ adāsahaṃ.

“Ekanavutito kappe, yaṃ phalaṃ adadiṃ tadā;
Duggatiṃ nābhijānāmi, phaladānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā satthu santikāvacaro hutvā vicaranto satthu dhammadesanāpaṭibhānassa paccayabhūtānaṃ paṭibhānājānanakānaṃ aggo jāto. Therassa hi diṭṭhisamudācāraṇca āgama dasabalassa navanavā dhammadesanā paṭibhāti. Tenāha bhagavā – “etadaggaṃ, bhikkhave, mama sāvakānaṃ bhikkhūnaṃ paṭibhāneyyakānaṃ yadidaṃ rādho”ti (a. ni. 1.219, 233). So ekadivasaṃ “ime sattā abhāvanāya rāgena abhibhuyyanti, bhāvanāya sati taṃ natthī”ti bhāvanaṃ thomento “**yathā agāra**”ntiadinā gāthādvayamāha.

133-4. Tattha **agāranti** yaṃkiñci gehaṃ. **Ducchannanti** viraḷacchannaṃ chiddāvachiddaṃ. **Samativijjhātī** vassavutṭhi vinivijjhāti. **Abhāvīti** taṃ agāraṃ vuṭṭhi viya bhāvanāya rahitattā abhāvitaṃ cittaṃ. **Rāgo samativijjhātī** na kevalaṃ rāgo va dosamohamānādayopi sabbakilesā tathārūpaṃ cittaṃ ativijjhantiyeva. **Subhāvīti** samathavipassanābhāvanāhi suṭṭhu bhāvitaṃ, evarūpaṃ cittaṃ succhannaṃ gehaṃ vuṭṭhi viya rāgādayo kilesā ativijjhitaṃ na sakkontīti.

Rādhattheragāthāvaṇṇanā niṭṭhitā.

8. Surādhattheragāthāvaṇṇanā

Khīṇā hi mayhaṃ jātītiādikā āyasmato surādhattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto sikhissa bhagavato kāle kulagehe nibbattitvā viññutaṃ patto ekadivasaṃ sathāraṃ disvā pasannamānaso mātuluṅgaphalaṃ adāsi. So tena puññakamma devaloke nibbattitvā aparāparaṃ puññāni katvā sugatīyeva saṃsaranto imasmiṃ buddhuppāde anantaraṃ vuttassa rādhattherassa kaniṭṭho hutvā nibbatti, **surādhotissa** nāmaṃ ahosi. So jeṭṭhabhātari rādhe pabbajite sayampi pabbajitvā vipassanāya kammaṃ karonto nacirasseva arahattaṃ pāpuṇi. Tena vuttaṃ **apadāne** (apa. therā 2.51.68-72) –

“Kaṇikāraṃva jalitaṃ, puṇṇamāyeva candimaṃ;
Jalantaṃ dīparukkhāva, addasaṃ lokanāyakaṃ.

“Mātuluṅgaphalaṃ gayha, adāsiṃ satthuno ahaṃ;
Dakkiṇeyyassa vīrassa, pasanno sehi pāṇibhi.

“Ekatimse ito kappe, yaṃ phalaṃ adadiṃ tadā;
Duggatiṃ nābhijānāmi, phaladānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā sāsanaṃ niyyānikabhāvadassanattaṃ aññaṃ byākaronto “**khīṇā hī mayha**”ntiadinā gāthādvayamāha.

135-6. Tattha **khīṇā**ti khayāṃ pariyoṣānaṃ gatā. **Jātī**ti bhavo bhavanibbatti vā. **Vusitaṃ jinasāsananti** jinassa sammāsambuddhassa sāsanaṃ maggabrahmacariyaṃ vuṭṭhaṃ parivuṭṭhaṃ. **Pahīno jālasaṅkhātō**ti sattaṃsānassa ottharaṇato nissaritaṃ appadānato ca “jālasaṅkhātō”ti ca

laddhanāmā diṭṭhi avijjā ca pahīnā maggena samucchinnā. **Bhavanetti samūhatāti** kāmabhavādikassa bhavassa nayanato pavattanato bhavanettisaññitā taṇhā samugghāṭitā. **Yassatthāya pabbajitoti** yassa atthāya yadatthaṃ ahaṃ **agāasmā** gehato **anagāriyaṃ** pabbajjaṃ **pabbajito** upagato. **So** sabbesaṃ orambhāgiyuddhambhāgiyappabhedānaṃ saṃyojanānaṃ bandhanānaṃ khayabhūto **attho** nibbānasankhāto paramattho arahattasankhāto sadattho ca mayā **anuppatto** adhigatoti attho.

Surādhatheragāthāvaṇṇanā niṭṭhitā.

9. Gotamattheragāthāvaṇṇanā

Sukhaṃ supantī āyasmato gotamattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭūpanissayaṃ puññaṃ upacinanto vipassissa bhagavato kāle kulagehe nibbattivā viññutaṃ patto ekadivasaṃ bhagavantaṃ disvā pasannamānaso āmodaphalamadāsi. Tena puññakammena devaloke nibbattivā aparāparaṃ puññāni katvā sugatīsuyeva saṃsaranto imasmiṃ buddhuppāde rājagahe brāhmaṇakule nibbattivā **gotamoti** laddhanāmo sattavassikakāle upanayanaṃ katvā ratanabhikkhaṃ caritvā sahasaṃ labhivā taṃ tādise ṭhāne ṭhapetvā vataṃ caranto soḷasasattarasavassuddesikakāle akalyāṇamittehi kāmesu parinīyamāno ekissā rūpūpajīvinīyā taṃ sahasabhāṇḍikaṃ datvā brahmacariyavināsaṃ patvā tāya cassa brahmacārirūpaṃ disvā virattākāre dassite ekarattivāseneva nibbinnarūpo attano brahmacariyanivāsaṃ dhanajāniṅca saritvā “ayuttaṃ mayā kata”nti vippiṭṭisārī ahoṣi. Satthā tassa hetusampattiṃ cittācāraṅca ṇatvā tassa āsannaṭṭhāne attānaṃ dassesi. So satthāraṃ disvā pasannamānaso upasaṅkami, tassa bhagavā dhammaṃ desesi. So dhammaṃ sutvā paṭiladdhasaddho pabbajanto khuraggeyeva arahattaṃ pāpuṇi. Tena vuttaṃ **apadāne** (apa. therā 2.51.80-84) –

“Suvanṇavaṇṇaṃ sambuddhaṃ, āhutīnaṃ paṭiggahaṃ;
Rathiyaṃ paṭipajjantaṃ, āmodamadadiṃ phalaṃ.

“Ekanavutito kappe, yaṃ phalaṃ adadiṃ tadā;
Duggatiṃ nābhijānāmi, phaladānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā jhānasukhena phalasukhena vītināmetaṃ eko gihisahāyo upagantvā, “āvuso, tayā ratanabhikkhāya laddhaṃ pabbajanto kiṃ akāsī”ti pucchi. Taṃ sutvā thero “idaṃ nāma kata”nti anācikkhitvā mātuḡāme dosaṃ pakāsetvā attano vītarāgabhāvena aññaṃ byākaronto “**sukhaṃ supantī**”tiādinaṃ gāthādvayamāha.

137. Tattha **sukhaṃ supantī munayo, ye itthīsu na bajjhareti** ye itthīsu visayabhūtāsu nimittabhūtāsu vā rāgabandhanena na bajjhanti, te munayo tapassino saṃyatindriyā sukhaṃ supanti sukhaṃ viharanti, natthi tesam dukkhanti adhippāyo. “Supantī”ti hi nidassanamattametaṃ. **Sadā ve rakkhitabbāsūti** ekaṃsena sabbakālaṃ rakkhitabbāsu. Itthiyo hi sattaḥūmike nippurise pāsāde uparibhūmiyaṃ vasāpetvāpi, kucchiyaṃ pakkhipitvāpi na sakkā rakkhituṃ, tasmā tā kiṭṭhādigāviyo viya sabbakālaṃ rakkhaṇīyā honti. Bahucittatāya vā sāmikena vatthālaṅkāranuppādānādinaṃ cittaññāthattato sabbakālaṃ rakkhitabbā. Sarīrasabhāvaṃ vā mālāgandhādīhi paṭicchādanavasena rakkhitabbacittatāya rakkhitabbāti. **Yāsu saccam sudullabhanti** yāsu saccavacanaṃ laddhuṃ na sakkā, itthiyo hi aggimpi pavisanti, visampi khādanti, satthampi āharanti, ubbandhivāpi kālaṃ karonti, na pana sacce ṭhātuṃ sakkonti. Tasmā evarūpā itthiyo vajjetvā ṭhitā munayo sukhitā vatāti dasseti.

138. Idāni yassa appahīnattā evarūpāsu itthīsupi bajjhanti, tassa kāmassa attano suppahīnataṃ accantaniṭṭhitataṅca dassento dutiyaṃ gāthamāha. **Vadhaṃ carimha te kāmāti** ambho kāma, tava vadhaṃ accantasamucchedaṃ ariyamaggena carimha, “vadhaṃ carimhase”tipi pāṭho, vadhāya

pahānāya maggabrahmacariyaṃ acarimhāti attho. **Anaṇā dāni te mayanti** idāni aggamaggapattito paṭṭhāya iṇabhāvakarāya pahīnattā kāma te anaṇā mayaṃ, na tuyhaṃ iṇaṃ dhārema. Avītarāgo hi rāgassa vase vattanato tassa iṇaṃ dhārento viya hoti, vītarāgo pana taṃ atikkamitvā paramena cittissariyena samannāgato. Anaṇattā eva **gacchāma dāni nibbānaṃ, yattha gantvā na socati** yasmimṃ nibbāne gamanahetu sabbaso sokahetūnaṃ abhāvato na socati, taṃ anupādisesanibbānameva idāni gacchāma anupāpuṇāmāti attho.

Gotamatheragāthāvaṇṇanā niṭṭhitā.

10. Vasabhattheragāthāvaṇṇanā

Pubbe hanati attānanti āyasmato vasabhattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto buddhasuññe loke brāhmaṇakule nibbattitvā vayappatto brāhmaṇānaṃ vijjāsippesu nipphattiṃ gantvā nekkhammajjhāsayaṭāya gharāvāsaṃ pahāya tāpasapabbajjaṃ pabbajitvā cuddasasahassatāpasaparivāro himavantassa avidūre samagge nāma pabbate assamaṃ kāretvā vasanto jhānābhīññāyo nibbattitvā tāpasānaṃ ovādānusāsaniyo dento ekadivasaṃ evaṃ cintesi – “ahaṃ kho dāni imehi tāpasehi sakkato garukato pūjito viharāmi, mayā pana pūjetabbo na upalabbhati, dukkho kho panāyaṃ loke yadidaṃ agaruvāso”ti. Evaṃ pana cintetvā purimabuddhesu katādhikāratāya purimabuddhānaṃ cetiye attanā kataṃ pūjāsakkāraṃ anussarivā “yaṃnūnāhaṃ purimabuddhe uddissa pulinacetiyaṃ katvā pūjaṃ kareyya”nti haṭṭhatuṭṭho iddhiyā pulinathūpaṃ suvaṇṇamayāṃ māpetvā suvaṇṇamayādīhi tisahassamattehi pupphehi devasikaṃ pūjaṃ karonto yāvatāyukaṃ puññāni katvā aparihīnajjhāno kālaṃ katvā brahmaloke nibbatto. Tatthapi yāvatāyukaṃ ṭhatvā tato cuto tāvatimse nibbattitvā aparāparaṃ devamanussesu saṃsaranto imasmimṃ buddhuppāde vesāliyaṃ licchavirājakule nibbattitvā **vasabhoti** laddhanāmo vayappatto bhagavato vesāligamane buddhānubhāvaṃ disvā paṭiladdhasaddho pabbajitvā vipassanaṃ paṭṭhapetvā nacirasseva arahattaṃ pāpuṇi. Tena vuttaṃ **apadāne** (apa. therā 2.50.57-92) –

“Himavantassāvidūre, samaggo nāma pabbato;
Assamo sukato mayhaṃ, paṇṇasālā sumāpitā.

“Nārado nāma nāmena, jaṭilo uggatāpano;
Catuddasasahassāni, sissā paricaranti maṃ.

“Paṭisallīnako santo, evaṃ cintesahaṃ tadā;
Sabbo jano maṃ pūjeti, nāhaṃ pūjemi kiñcanaṃ.

“Na me ovādako atthi, vattā koci na vijjati;
Anācariyupajjhāyo, vane vāsaṃ upemaṃ.

“Upāsamaṇo yamaṃ, garucittaṃ upaṭṭhahe;
So me ācariyo natthi, vanavāso niratthako.

“Āyāgaṃ me gavesissaṃ, garuṃ bhāvaniyaṃ tathā;
Sāvassayo vasissāmi, na koci garahissati.

“Uttānakūlā nadikā, supatitthā manoramā;
Saṃsuddhapulinākiṇṇā, avidūre mamassamaṃ.

“Nadiṃ amarikaṃ nāma, upagantvānahaṃ tadā;
Saṃvaḍḍhayitvā pulinaṃ, akaṃ pulinacetiyaṃ.

“Ye te ahesuṃ sambuddhā, bhavantakaraṇā munī;
Tesaṃ etādiso thūpo, taṃ nimittaṃ karomahaṃ.

“Karitvā pulinaṃ thūpaṃ, sovaṇṇaṃ māpayiṃ ahaṃ;
Soṇṇakiṅkaṇipupphāni, sahasse tīṇi pūjayiṃ.

“Sāyapātaṃ namassāmi, vedajāto katañjalī;
Sammukhā viya sambuddhaṃ, vandiṃ pulinacetiyaṃ.

“Yadā kilesā jāyanti, vitakkā gehanissitā;
Sarāmi sukataṃ thūpaṃ, paccavekkhāmi tāvade.

“Upanissāya viharaṃ, satthavāhaṃ vināyakaṃ;
Kilese saṃvaseyyāsi, na yuttaṃ tava mārisa.

“Saha āvajjite thūpe, gāraṃ hoti me tadā;
Kuvitakke vinodesiṃ, nāgo tattaṭṭito yathā.

“Evaṃ viharamānaṃ maṃ, maccurājābhimaddatha;
Tattha kālaṅkato santo, brahmalokamagacchahaṃ.

“Yāvatāyumaṃ vasitvāna, tidive upapajjahaṃ;
Asītikkhattuṃ devindo, devarajjamakārayiṃ.

“Satānaṃ tīṇikkhattuñca, cakkavattī ahasahaṃ;
Padesarajjaṃ vipulaṃ, gaṇanāto asaṅkhiyaṃ.

“Soṇṇakiṅkaṇipupphānaṃ, vipākaṃ anubhomahaṃ;
Dhātīsatasahassāni, parivārenti maṃ bhava.

“Thūpassa pariciṇṇattā, rajojallaṃ na limpati;
Gatte sedā na muccanti, suppabhāso bhavāmahaṃ.

“Aho me sukato thūpo, sudiṭṭhāmarikā nadī;
Thūpaṃ katvāna pulinaṃ, pattomhi acalaṃ padaṃ.

“Kusalaṃ kattukāmena, jantunā sāragāhinā;
Natthi khettaṃ akhettaṃ vā, paṭipattīva sādhaṃ.

“Yathāpi balavā poso, aṇṇavaṃtaritussahe;
Parittaṃ kaṭṭhamādāya, pakkhandeyya mahāsaraṃ.

“Imāhaṃ kaṭṭhaṃ nissāya, tarissāmi mahodadhiṃ;
Ussāhena vīriyena, tareyya udadhiṃ nara.

“Tatheva me kataṃ kammaṃ, parittaṃ thokakañca yaṃ;
Taṃ kammaṃ upanissāya, saṃsāraṃ samatikkamiṃ.

“Pacchime bhava sampatte, sukkamūlena codito;
Sāvattiyaṃ pure jāto, mahāsāle suaḍḍhake.

“Saddhā mātā pitā mayhaṃ, buddhassa saraṇaṃ gatā;
Ubho diṭṭhapadā ete, anuvattanti sāsanaṃ.

“Bodhipapaṭikaṃ gayha, soṇṇathūpamakārayuṃ;
Sāyapātaṃ namassanti, sakyaputtassa sammukhā.

“Uposathamhi divase, soṇṇathūpaṃ vinīharuṃ;
Buddhassa vaṇṇaṃ kittentā, tiyāmaṃ vītināmayuṃ.

“Saha disvānaṃ thūpaṃ, sarim pulinacetiyaṃ;
Ekāsane nisīditvā, arahattamaṃ pāpuṇim.

“Gavesamāno taṃ vīraṃ, dhammasenāpatiddasaṃ;
Agārā nikkhamitvāna, pabbajim tassa santike.

“Jātiyā sattavassena, arahattamaṃ pāpuṇim;
Upasampādayī buddho, guṇamaññāya cakkhumā.

“Dārakeneva santena, kiriyam niṭṭhitaṃ mayā;
Kataṃ me karaṇīyajja, sakyaputtassa sāsane.

“Sabbaverabhayātīto, sabbasaṅgātigo isi;
Sāvako te mahāvīra, soṇṇathūpassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā dāyakanuggahaṃ karonto tehi upanīte paccaye na paṭikkhipati, yathāladdheyeva paribhuñjati. Taṃ puthujjanā “ayaṃ kāyadaḥhibahulo arakkhitacitto”ti maññamānā avamaññanti. Thero taṃ agaṇento va viharati. Tassa pana avidūre aññataro kuhakabhikkhu pāpiccho samāno appiccho viya santuṭṭho viya attānaṃ dassento lokaṃ vañcento viharati. Mahājano taṃ arahantaṃ viya sambhāveti. Athassa sakko devānamindo taṃ pavattiṃ ñatvā theram upasaṅkamtivā, “bhante, kiṃ nāma kuhako karoti”ti pucchi. Thero pāpicchaṃ garahanto –

139. “Pubbe hanati attānaṃ, pacchā hanati so pare;
Suhataṃ hanti attānaṃ, vītaṃseneva pakkhimā.

140. “Na brāhmaṇo bahivaṇṇo, antovaṇṇo hi brāhmaṇo;
Yasmim pāpāni kammāni, sa ve kaṇho sujampati”ti. – gāthādvayamāha;

Tattha **pubbe hanati attānanti** kuhakapuggalo attano kuhakavuttiiyā lokaṃ vañcento pāpicchatādīhi pāpadhammehi paṭhamameva attānaṃ hanati, attano kusalakoṭṭhāsaṃ vināseti. **Pacchā hanati so pareti** so kuhako paṭhamam tāva vuttanayena attānaṃ hantvā pacchā pare yehi “ayaṃ bhikkhu pesalo ariyo”ti vā sambhāventehi kārā katā, te hanati tesam kārāni attani katāni amahapphalāni katvā paccayavināsanena vināseti. Satipi kuhakassa ubhayahanane attahanane pana ayaṃ visesoti dassento āha **suhataṃ hanti attānanti**. So kuhako attānaṃ hananto suhataṃ katvā hanti vināseti, yathā kiṃ? **Vītaṃseneva pakkhimāti**, **vītaṃsoti** dīpakasakuṇo, tena. **Pakkhimāti** sākuṇiko. Yathā tena vītaṃsasakuṇena aññe sakuṇe vañcivā hananto attānaṃ idha lokepi hanati viññugarahasāvajasabhāvādīnā, samparāyaṃ pana duggatiparikkilesena hanatiyeva, na pana te sakuṇe pacchā hantuṃ sakkoti, evaṃ kuhakopi kohaññena lokaṃ vañcivā idha lokepi attānaṃ hanati vip̄paṭisāraviññugarahādīhi, paralokepi duggatiparikkilesehi, na pana te paccayadāyake apāyadukkhaṃ pāpeti. Apica kuhako dakkhiṇāya amahapphalabhāvakaraneva dāyakaṃ hanatīti vutto, na nipphalabhāvakaraneva. Vuttañhetam bhagavatā – “dussīlassa manussabhūtassa dānaṃ datvā

sahassaguṇā dakkhiṇā pāṭikaṅkhitabbā”ti (ma. ni. 3.379). Tenāha “**suhataṃ hanti attāna**”nti.

Evam bāhiraparimajjanamate ʃhitā puggalā suddhā nāma na honti, abbhantarassuddhiyā eva pana suddhā hontīti dassento “**na brāhmaṇo**”ti dutiyaṃ gāthamāha. Tassattho – iriyāpathasaṅghapanādibahisampattimattena brāhmaṇo na hoti. Sampattiattho hi idha **vaṇṇa**-saddo. Abbhantare pana silādisampattiyā brāhmaṇo hoti, “bāhitapāpo **brāhmaṇo**”ti katvā. Tasmā “**yasmiṃ pāpāni** lāmakāni **kammāni** saṃvijjanti, ekaṃsena so **kaṇho** nihīnapuggalo”ti **sujaṃpati**, devānaminda, jānāhi. Taṃ sutvā sakko kuhakabhikkhuṃ tajjetvā “dhamme vattāhi”ti ovaditvā sakaṭṭhānameva gato.

Vasabhattheragāthāvaṇṇanā niṭṭhitā.

Dukanipāte paṭhamavaggavaṇṇanā niṭṭhitā.

2. Dutiyavaggo

1. Mahācundattheragāthāvaṇṇanā

Sussūsāti āyasmato mahācundattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto vipassissa bhagavato kāle kumbhakārakule nibbattitvā viññutaṃ patto kumbhakārakamma jīvanto ekadivasam sathhāraṃ disvā pasannamānaso ekaṃ mattikāpattam svābhisaṅkhatam katvā bhagavato adāsi. So tena puññakamma devamanussesu saṃsaranto imasmiṃ buddhuppāde magadharaṭṭhe nālakagāme rūpasāriyā brāhmaṇiyā putto sārīputtattherassa kaniṭṭhabhātā hutvā nibbatti, **cundotissa** nāmaṃ ahosi. So vayappatto dhammasenāpatiṃ anupabbajitvā taṃ nissāya vipassanaṃ paṭṭhapetvā ghaṭento vāyamanto nacirasseva chaḷabhiñño ahosi. Tena vuttaṃ **apadāne** (apa. therā 2.51.39-50) –

“Nagare haṃsavatīyā, kumbhakāro ahosahaṃ;
Addasaṃ virajaṃ buddhaṃ, oghatiṇṇamanāsavaṃ.

“Sukataṃ mattikāpattam, buddhasatṭhassadāsahaṃ;
Pattam datvā bhagavato, ujubhūtassa tādino.

“Bhave nibbattamānohaṃ, soṇṇathāle labhāmahaṃ;
Rūpimaye ca sovaṇṇe, taṭṭike ca maṇimaye.

“Pātiyo paribhuñjāmi, puññakammassidaṃ phalaṃ;
Yasānaṅca dhanānaṅca, aggabhūto ca homahaṃ.

“Yathāpi bhaddake khette, bījaṃ appampi ropitaṃ;
Sammādhāraṃ paveccante, phalaṃ toseti kassakaṃ.

“Tathevidaṃ pattadānaṃ, buddhakhettaṃhi ropitaṃ;
Pītidhāre pavassante, phalaṃ maṃ tosayissati.

“Yāvataṃ khettaṃ vijjanti, saṅghāpi ca gaṇāpi ca;
Buddhakhettaṃsamo natthi, sukhado sabbapāṇinaṃ.

“Namo te purisājañña, namo te purisuttama;
Ekapattam daditvāna, pattomhi acalaṃ padaṃ.

“Ekanavutito kappe, yaṃ pattamadadiṃ tadā;
Duggatiṃ nābhijānāmi, pattadānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Chaḷabhiñño pana hutvā attanā paṭiladdhasampattiyā kāraṇabhūtaṃ garūpanissayaṃ vivekavāsañca kittento –

141. “Sussūsā sutavaddhanī, sutam paññāya vaddhanaṃ;
Paññāya atthaṃ jānāti, ñāto attho sukhāvaho.

142. “Sevetha pantāni senāsanāni, careyya saṃyojanavippamokkhaṃ;
Sace ratim nādhigaccheyya tattha, saṅghe vase rakkhitatto satimā”ti. –

Gāthādvayaṃ abhāsi.

Tattha **sussūsā**ti sotabbayuttassa sabbasutassa sotumicchā, garusannivāsopi. Diṭṭhadhammikādibhedañhi atthaṃ sotumicchantena kalyāṇamitte upasaṅkamitvā vattakaraṇena payirupāsītivā yadā te payirupāsānāya ārādhītacittā kañci upanisīditukāmā honti, atha ne upanisīditvā adhiḡatāya sotumicchāya ohitasotena sotabbaṃ hotīti garusannivāsopi sussūsāhetutāya “sussūsā”ti vuccati. Sā panāyaṃ sussūsā saccapaṭiccasamuppādādipāṭisamūyuttam sutam taṃsamaṅgino puggalassa vaḍḍheti brūhetīti **sutavaddhanī**, bāhusaccakārīti attho. **Sutam paññāya vaddhananti** yaṃ taṃ “sutadharo sutasannicayo”ti (ma. ni. 1.339; a. ni. 4.22) “idhekaccassa bahukaṃ sutam hoti suttaṃ geyyaṃ veyyākaraṇa”nti (a. ni. 4.6) ca evamādinā nayena vuttaṃ bāhusaccaṃ, taṃ akusalappahānakusalādhigamanahetubhūtaṃ paññaṃ vaddhetīti sutam paññāya vaddhanaṃ, vuttañhetam bhagavatā –

“Sutāvudho kho, bhikkhave, ariyasāvako akusalam pajahati, kusalam bhāveti, sāvajjam pajahati, anavajjam bhāveti, suddham attānaṃ pariharatī”ti (a. ni. 7.67).

Paññāya atthaṃ jānātīti bahussuto sutamayaññaṇe ṭhito taṃ paṭipattim paṭipajjanto sutānusārena atthūparikkhāya dhammanijjhānena bhāvanāya ca lokiyalokuttarabhedam diṭṭhadhammādivibhāgam dukkhādivibhāgañca atthaṃ yathābhūtaṃ pajānāti ca paṭivijjhati ca, tenāha bhagavā –

“Sutassa yathāpariyattassa atthamaññāya dhammamaññāya dhammānudhammapaṭipanno hotī”ti (a. ni. 4.6).

“Dhatānaṃ dhammānaṃ atthaṃ upaparikkhati, atthaṃ upaparikkhato dhammā nijjhānaṃ khamanti, dhammanijjhānakkhantiyā sati chando jāyati, chandajāto ussahati, ussahitvā tuletī, tulayitvā padahati, pahitatto samāno kāyena ceva paramasaccaṃ sacchikarotī, paññāya ca naṃ ativijjha passatī”ti (ma. ni. 2.432) ca.

Ñāto attho sukhāvahoti yathāvutto diṭṭhadhammikādiattho ceva dukkhādiattho ca yāthāvato ñāto adhiḡato lokiyalokuttarabhedam sukham āvahati nipphādetīti attho.

Ṭhitāya bhāvanāpaññāya sutamatteneva na sijjhatīti tassā paṭipajjanavidhiṃ dassento “**sevetha... pe...vippamokkha**”nti āha. Tattha **sevetha pantāni senāsanānīti** kāyavivekamāha. Tena saṃyojanappahānassa ca vakkhamānattā vivekārahasseva vivekavāsoti sīlasaṃvarādayo idha avuttasiddhā vedītabbā. **Careyya saṃyojanavippamokkhanti** yathā saṃyojanehi cittaṃ vippamuccati, tathā vipassanābhāvanaṃ maggabhāvanañca careyya paṭipajjeyyāti attho. **Sace ratim nādhigaccheyya tatthāti** tesu pantasenāsanesu yathāladdhesu adhikusaladhammesu ca ratim pubbenāparaṃ visesassa alābhato abhiratiṃ na labheyya, **saṅghe** bhikkhusamūhe **rakkhitatto** kammaṭṭhānaparigaṇhanato

rakkhitacitto chasu dvāresu satiārakkhāya upaṭṭhapanena **satimā vaseyya** vihareyya, evaṃ viharantassa ca api nāma saṃyojanavippamokkho bhaveyyāti adhippāyo.

Mahācundattheragāthāvaṇṇanā niṭṭhitā.

2. Jotidāsattheragāthāvaṇṇanā

Ye kho teti āyasmato jotidāsattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto sikhissa bhagavato kāle kulagehe nibbattivā viññutaṃ patto ekadivasam sathhāraṃ piṇḍāya gacchantam disvā pasannacitto kāsūmārikaphalaṃ adāsi. So tena puññakammena devamanussesu saṃsaranto imasmim buddhuppāde pādiyattahajanapade vibhavasampannassa brāhmaṇassa putto hutvā nibbatti, **jotidāsotissa** nāmaṃ ahoṣi. So viññutaṃ patvā gharamāvasanto ekadivasam mahākassapattheraṃ attano gāme piṇḍāya carantaṃ disvā pasannacitto bhojetvā therassa santike dhammaṃ sutvā attano gāmasamīpe pabbate mahantaṃ vihāraṃ kāretvā theram tattha vāsetvā catūhi paccayehi upaṭṭhahanto therassa dhammadesanāya paṭiladdhasamvego pabbajitvā vipassanāya kammaṃ karonto nacirasseva chaḷabhiñño ahoṣi. Tena vuttaṃ **apadāne** (apa. thera 2.51.51-56) –

“Kaṇikāraṃva jotantaṃ, nisinnaṃ pabbatantare;
Addasaṃ virajaṃ buddhaṃ, lokajeṭṭhaṃ narāsabhaṃ.

“Pasannacitto sumano, sire katvāna añjaliṃ;
Kāsūmārikamādāya, buddhaseṭṭhassadāsahaṃ.

“Ekatimse ito kappe, yaṃ phalaṃ adadiṃ tadā;
Duggatiṃ nābhijānāmi, phaladānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Chaḷabhiñño pana hutvā tīṇi piṭakāni uggahetvā visesato vinayapiṭake sukusalabhāvaṃ patvā dasavassiko parisupaṭṭhāko ca hutvā bahūhi bhikkhūhi saddhiṃ bhagavantaṃ vanditum sāvattiṃ gacchanto antarāmagge addhānaparissamavinodanattaṃ titthiyānaṃ ārāmaṃ pavisitvā ekamantaṃ nisinnā ekam pañcatapaṃ tapantaṃ brāhmaṇaṃ disvā, “kiṃ, brāhmaṇa, aññasmim tapanīye aññaṃ tapatī”ti āha. Taṃ sutvā brāhmaṇo kupito, “bho, muṇḍaka, kiṃ aññaṃ tapanīya”nti āha. Thero tassa –

“Kopo ca issā paraheṭhanā ca, māno ca sārambhamado pamādo;
Taṇhā avijjā bhavasāngatī ca, te tapanīyā na hi rūpakhandho”ti. –

Gāthāya dhammaṃ desesi. Taṃ sutvā so brāhmaṇo tasmim titthiyārāme sabbe aññatitthiyā ca therassa santike pabbajimsu. Thero tehi saddhiṃ sāvattiṃ gantvā bhagavantaṃ vanditvā katipāhaṃ tattha vasitvā attano jātibhūmiṃyeva gato dassanattaṃ upagatesu ñātakesu nānāladdhike yaññasuddhike ovadanto –

143. “Ye kho te veṭhamissena, nānattena ca kammunā;
Manusse uparundhanti, pharusūpakkamā janā;
Tepi tattheva kīranti, na hi kammaṃ panassati.

144. “Yaṃ karoti naro kammaṃ, kalyāṇaṃ yadi pāpakam;
Tassa tasseva dāyādo, yaṃ yaṃ kammaṃ pakubbatī”ti. – gāthādvayaṃ abhāsi;

Tattha **yeti** aniyamuddeso. **Teti** aniyamato eva paṭiniddeso. Padadvayassāpi “janā”ti iminā sambandho. **Khoti** nipātamattaṃ. **Veṭhamissenā**ti varattakhaṇḍādinā sīsādīsu veṭhadānena.

“Vedhamissenā” tipi pāḷi, so evattho. **Nānattena ca kammunāti** hananaghātanahatthapādādicchedanena khuddakaseḷadānādinā ca nānāvidhena parūpaghātakammena. **Manusseti** nidassanamattam, tasmā ye keci satteti adhippāyo. **Uparundhantīti** vibādhenti. **Pharusūpakkamāti** dāruṇapayogā, kurūrakammantāti attho. **Janāti** sattā. **Tepi tattheva kīrantīti** te vuttappakārā puggalā yāhi kammakāraṇāhi aññe bādhiṃsu. **Tattheva** tāsuyeva kāraṇāsu sayampi kīranti pakkhipīyanti, tathārūpamyeva dukkham anubhavantīti attho. “Tattheva kīrantī” ti ca pāḷho, yathā sayam aññesaṃ dukkham akamsu, tattheva aññehi karīyanti, dukkham pāpīyantīti attho, kasmā? **Na hi kammaṃ panassati** kammañhi ekantaṃ upacitaṃ vipākaṃ adatvā na vigacchati, avasesapaccayasamavāye vipaccatevāti adhippāyo.

Idāni “na hi kammaṃ panassati” ti saṅkhepato vuttamattham vibhajitvā sattānaṃ kammassakataṃ vibhāvetuṃ “**yaṃ karoti**” ti gātham abhāsi. Tassattho **yaṃ kammaṃ kalyāṇaṃ** kusalam, **yadi** vā **pāpakaṃ** akusalam satto **karoti**, karonto ca tattha **yaṃ kammaṃ** yathā phaladānasamattham hoti, tathā **pakubbati** upacinoti. **Tassa tasseva dāyādoti** tassa tasseva kammaphalassa gaṇhanato tena tena kamma dātabbavipākassa bhāgī hotīti attho. Tenāha bhagavā – “kammassakā, māṇava, sattā kammadāyādā” tiādi (ma. ni. 3.289). Imā gāthā sutvā therassa ñātakā kammassakatāyaṃ paṭiṭṭhahimsūti.

Jotidāsattheragāthāvaṇṇanā niṭṭhitā.

3. Heraññakānītheragāthāvaṇṇanā

Accayanti ahorattāti āyasmato heraññakānītherassa gāthā. Kā uppatti? Ayaṃ kira padumuttarassa bhagavato kāle haṃsavatīnagare kulagehe nibbattitvā viññutaṃ patto paresaṃ bhatako hutvā jīvanto ekadivasam sujātassa nāma satthusāvakaṃ paṃsukūlam pariyesantassa upaḍḍhadussaṃ pariccaji. So tena puññakamma tāvatiṃsesu nibbattitvā aparāparaṃ devamanussesu saṃsaranto imasmim buddhuppāde kosalarañño gāmahojakassa coravosāsakassa putto hutvā nibbatti, **heraññakānī**tissa nāmaṃ ahoṣi. So vayappatto pitu accayena raññā tasmimyeva gāmahojakaṭṭhāne ṭhapito jetavanapaṭiggahaṇe buddhānubhāvaṃ disvā paṭiladdhasaddho attano kaniṭṭhassa taṃ ṭhānantaram dāpetvā rājānaṃ āpucchitvā pabbajitvā vipassanaṃ paṭṭhapetvā nacirasseva arahattaṃ pāpuṇi. Tena vuttam **apadāne** (apa. thera 2.50.31-40) –

“Padumuttarabhagavato, sujāto nāma sāvako;
Paṃsukūlam gavesanto, saṅkāre carate tadā.

“Nagare haṃsavatīyā, paresaṃ bhatako aham;
Upaḍḍhadussaṃ datvāna, sirasā abhivādayim.

“Tena kamma sukatenā, cetanāpaṇidhīhi ca;
Jahitvā mānaṃ deham, tāvatiṃsamagacchaham.

“Tetiṃsakkhattuṃ devindo, devarajjamakārayim;
Sattasattatikhattuṃca, cakkavattī ahosaham.

“Padesarajjam vipulam, gaṇanāto asaṅkhiyam;
Upaḍḍhadussadānena, modāmi akutobhayo.

“Icchamāno caham ajja, sakānaṃ sapabbatam;
Khomadussehi chādeyyam, aḍḍhadussassidaṃ phalam.

“Satasahassito kappe, yaṃ dānamadadiṃ tadā;
Duggatiṃ nābhijānāmi, aḍḍhadussassidaṃ phalam.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā attano kaniṭṭhabhātaraṃ tato kammato nivattetukāmo tasmimyeva kamme abhirataṃ disvā taṃ codento –

145. “Accayanti ahorattā, jīvitam uparujjhati;
Āyu khīyati maccānaṃ, kunnadīnaṃva odakaṃ.

146. “Atha pāpāni kammāni, karaṃ bālo na bujjhati;
Pacchāssa kaṭukaṃ hoti, vipāko hissa pāpako”ti. –

Gāthādvayaṃ abhāsi.

Tattha **accayantī** atikkamanti, lahuṃ lahuṃ apagacchantī attho. **Ahorattā**ti rattindivā. **Jīvitam uparujjhatī**ti jīvitindriyañca khaṇikanirodhavasena nirujjhati. Vuttañhi “khaṇe khaṇe, tvaṃ bhikkhu, jāyasi ca jīyasi ca miyyasi ca cavasi ca upapajjasi cā”ti. **Āyu khīyati maccānanti** maritabbasabhāvattā **maccāti** laddhanāmānaṃ imesaṃ sattānaṃ **āyu** “yo ciraṃ jīvati, so vassasataṃ appaṃ vā bhiyyo”ti (dī. ni. 2.91; saṃ. ni. 2.143; a. ni. 7.74) evaṃ paricchinnakālaparamāyu **khīyati** khayañca sambhedañca gacchati, yathā kiṃ? **Kunnadīnaṃva odakaṃ** yathā nāma kunnadīnaṃ pabbateyyānaṃ khuddakanadīnaṃ udakaṃ ciraṃ na tiṭṭhati, lahutaraṃ khīyati, āgatamattaṃyeva vigacchati, evaṃ sattānaṃ āyu lahutaraṃ khīyati khayaṃ gacchati. Ettha ca udakameva “odaka”nti vuttaṃ, yathā manoyeva mānasanti.

Atha pāpāni kammāni, karaṃ bālo na bujjhatīti evaṃ saṃsāre aniccepi samāne bālo lobhavasena vā kodhavasena vā pāpāni kammāni karoti, karontopi na bujjhati, pāpaṃ karonto ca “pāpaṃ karomī”ti abujjhanako nāma natthi, “imassa kammassa evarūpo dukkho vipāko”ti pana ajānanato “na bujjhati”ti vuttaṃ. **Pacchāssa kaṭukaṃ hotī**ti yadipi pāpassa kammassa āyūhanakkhaṇe “imassa kammassa evarūpo vipāko”ti na bujjhati, tato pacchā pana nirayādīsu nibbattassa assa bālassa kaṭukaṃ aniṭṭhaṃ dukkhameva hoti. **Vipāko hissa pāpako** yasmā assa pāpakammassa nāma vipāko pāpako nihīno aniṭṭho evāti. Imaṃ pana ovādaṃ sutvā therassa kaniṭṭhabhātā rājānaṃ apucchitvā pabbajitvā nacirasseva sadatthaṃ nipphādesi.

Heraññakānittheragāthāvaṇṇanā niṭṭhitā.

4. Somamittattheragāthāvaṇṇanā

Parittaṃ dārunti āyasmato somamittattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto sikhissa bhagavato kāle kulagehe nibbattitvā viññutaṃ patto buddhaguṇe sutvā pasannamānaso ekadivasam kiṃsukarukkhaṃ pupphitaṃ disvā pupphāni gahetvā sathhāraṃ uddissa ākāse khipitvā pūjesi. So tena puññakammena devamanussesu saṃsaranto imasmim buddhuppāde bārānasiyaṃ brāhmaṇakule nibbattitvā **somamitto**ti laddhanāmo tiṇṇaṃ vedānaṃ pāragū hutvā vimalena nāma therena kataparicayattā abhiṇhaṃ tassa santikaṃ gacchanto dhammaṃ sutvā sāsane laddhappasādo pabbajitvā laddhūpasampado vattapaṭivattaṃ pūrento vicarati. Vimalatthero pana kusīto middhabahulo rattindivaṃ vītināmeti. Somamitto “kusītaṃ nāma nissāya ko guṇo”ti taṃ pahāya mahākassapattheraṃ upasaṅkamitvā tassa ovāde ṭhatvā vipassanaṃ paṭṭhapetvā nacirasseva arahatte patiṭṭhāsi. Tena vuttaṃ **apadāne** (apa. thera 2.50.25-30) –

“Kiṃsukaṃ pupphitaṃ disvā, paggahetvāna añjalim;
Buddhaseṭṭhaṃ saritvāna, ākāse abhipūjayim.

“Tena kammaṃ sukateṇa, cetanāpaṇidhīhi ca;
Jahitvā mānusaṃ dehaṃ, tāvatimsamagacchahaṃ.

“Ekatimse ito kappe, yaṃ kammamakarim tadā;
Duggatiṃ nābhijānāmi, buddhapūjāyidaṃ phalaṃ.

“Kilesā jhāpitā mayhaṃ, bhavā sabbe samūhatā;
Nāgoṃ bandhanaṃ chetvā, viharāmi anāsavo.

“Svāgataṃ vata me āsi, mama buddhassa santike;
Tisso vijjā anuppattā, kataṃ buddhassa sāsana”’nti.

Arahattaṃ pana patvā vimalattheraṃ ovādena tajjento –

147. “Parittaṃ dārumāruya, yathā sīde mahaṇṇave;
Evaṃ kusītamāgama, sādhujīvīpi sīdati;
Tasmā taṃ parivajjeyya, kusītaṃ hīnavīriyaṃ.

148. “Pavivittehi ariyehi, pahitattehi jhāyibhi;
Niccaṃ āradhaviīriyehi, paṇḍitehi sahāvase”’ti. – gāthādvayaṃ abhāsi;

Tattha **parittaṃ dārumāruya, yathā sīde mahaṇṇave**ti pesalopi kulaputto kusītaṃ alasapuggalaṃ nissāya sīdati saṃsāre patati, na tassa pāraṃ nibbānaṃ gacchati. Yasmā etadevaṃ, **tasmā taṃ** adhiṅkusaladhammavasena sīsaṃ anukhipitvā kucchitaṃ sīdanato **kusītaṃ** vīriyārambhābhāvato **hīnavīriyaṃ** puggalaṃ sabbathā vajjeyya, na tassa diṭṭhānugatiṃ āpajjeyyāti attho.

Evaṃ puggalādiṭṭhānāya gāthāya kosajje ādīnavaṃ dassetvā idāni vīriyārambhe ānisaṃse dassetuṃ “**pavivittehi**”tiādi vuttaṃ. Tassattho – ye pana kāyavivekasambhavana **pavivittā**, tato eva kilesehi ārakattā **ariyā**, nibbānaṃ patipesitattatāya **pahitattā** ārammaṇūpanijjhānavasena lakkhaṇūpanijjhānavasena ca **jhāyino**, sabbakālaṃ paggahitavīriyatāya **āradhaviīriyā**, lokiyalokuttarabhedāya paññāya samannāgatattā **paṇḍitā**, tehiyeva **saha** āvaseyya sadatthaṃ nipphādetukāmo saṃvaseyyāti. Taṃ sutvā vimalatthero saṃviggamānaso vipassanaṃ paṭṭhapetvā sadatthaṃ ārādhesi. Svāyamattho parato āgamissati.

Somamittattheragāthāvaṇṇanā niṭṭhitā.

5. Sabbamittattheragāthāvaṇṇanā

Jano janamhi sambaddhoti āyasmato sabbamittattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto ito dvānavute kappe tissassa bhagavato kāle nesādakule nibbattitvā vanacāriko hutvā vane mige vadhitvā maṃsaṃ khādanto jīvati. Athassa bhagavā anuggaṇhanatthaṃ vasanaṭṭhānasamīpe tīṇi padacetiyāni dassetvā pakkāmi. So atītakāle sammāsambuddhesu kataparicayattā cakkankitāni disvā pasannamānaso koraṇḍapupphehi pūjaṃ katvā tena puññakammaena tāvatimsabhavane nibbattitvā aparāparaṃ sugatīsuyeva saṃsaranto imasmim buddhuppāde sāvattinagare brāhmaṇakule nibbatti, **sabbamittotissa** nāmaṃ ahoṣi. So viññutaṃ patto jetavanapaṭiggaṇe buddhānubhāvaṃ disvā paṭiladdhasaddho pabbajitvā kammaṭṭhānaṃ gahetvā araṇṇe viharanto vassaṃ upagantvā vuṭṭhavasso bhagavantaṃ vandituṃ sāvattiṃ gacchanto antarāmagge māgavikehi oḍḍite pāse migapotakaṃ baddhaṃ addasa. Mātā panassa migī pāsaṃ appavittāpi puttasiṅhena dūraṃ na gacchati, maraṇabhayena pāsasamīpampi na upagacchati migapotako ca bhīto ito cito ca parivattento karuṇaṃ vilapati, taṃ disvā thero, “aho sattānaṃ snehahetukaṃ dukkha”’nti gacchanto tato paraṃ sambahule core ekaṃ purisaṃ jīvagāhaṃ gahetvā palālaveniyā sarīraṃ veṭhetvā jhāpente, tañca mahāviraṃ viravantaṃ disvā tadubhayaṃ nissāya sañjātasamvego tesam corānaṃ suṇantānaṃyeva –

149. “Jano janamhi sambaddho, janamevassito jano;
Jano janena heṭhīyati, heṭheti ca jano janam.

150. “Ko hi tassa janenattho, janena janitena vā;
Janam ohāya gacchaṃ taṃ, heṭhayitvā bahum jana”nti. – gāthādvayaṃ abhāsi;

Tattha **janoti** andhabārajano. **Janamhīti** aññe jane. **Sambaddhoti** taṇhābandhanena baddho. “Ayaṃ me putto, mātā”tiādinā paṭibaddho. Ayameva vā pāṭho, “ime maṃ posenti, ahaṃ ime nissāya jīvāmi”ti paṭibaddhacittoti attho. **Janamevassito janoti** “ayaṃ me putto, dhītā”tiādinā aññameva janaṃ añño jano assito taṇhāya allīno pariggayha ṭhito. **Jano janena heṭhīyati, heṭheti ca jano jananti** kammassakatāya yathābhūtāvabodhassa ca abhāvato ajjhupekkhanaṃ akatvā lobhavasena yathā jano janaṃ assito, evaṃ dosavasena jano janena heṭhīyati vibādhīyati. “Tayidaṃ mayhaṃva upari heṭhanaphalavasena paripatisati”ti ajānanto heṭheti ca jano janam.

Ko hi tassa janenatthoti tassa aññajanassa aññena janena taṇhāvasena assitena dosavasena heṭhitena vā ko attho. **Janena janitena vāti** mātāpitā hutvā tena aññena janena janitena vā ko attho. **Janam ohāya gacchaṃ taṃ, heṭhayitvā bahum jananti** yasmā saṃsāre carato janassa ayamevānurūpā paṭipatti, tasmā taṃ janaṃ, tassa ca bādhikā yā sā taṇhā ca, yo ca so doso eva bahum janaṃ bādhayitvā ṭhito, tañca ohāya sabbaso pahāya pariccajitvā gacchaṃ, tehi anupaddutaṃ ṭhānaṃ gaccheyyaṃ pāpuṇeyyanti attho. Evaṃ pana vatvā thero tāvadeva vipassanaṃ usukkāpetvā arahattamaṃpāpuṇi. Tena vuttaṃ **apadāne** (apa. therā 2.50.15-24) –

“Vanakammiko pure āsiṃ, pitumātumatenaṃ;
Pasumārena jīvāmi, kusalaṃ me na vijjati.

“Mama āsayasāmantā, tisso lokagganāyako;
Padāni tīṇi dassesi, anukampāya cakkhumā.

“Akkante ca pade disvā, tissanāmassa satthuno;
Haṭṭho haṭṭhena cittena, pade cittaṃ pasādayiṃ.

“Koraṇḍaṃ pupphitaṃ disvā, pādapaṃ dharaṇīruhaṃ;
Sakosakaṃ gahetvāna, padaseṭṭhamapūjayiṃ.

“Tena kammena sukatenā, cetanāpaṇidhīhi ca;
Jahitvā mānusaṃ dehaṃ, tāvatimsamagacchahaṃ.

“Yaṃ yaṃ yonupapajjāmi, devattaṃ atha mānusaṃ;
Koraṇḍakachavi homi, suppabhāso bhavāmahaṃ.

“Dvenavute ito kappe, yaṃ kammamakariṃ tadā;
Duggatiṃ nābhijānāmi, padapūjāyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Te pana corā therassa santike dhammaṃ sutvā saṃvegajātā pabbajitvā dhammānudhammaṃ paṭipajjimsūti.

Sabbamittattheragāthāvaṇṇanā niṭṭhitā.

6. Mahākāḷattheragāthāvaṇṇanā

Kālī itthī āyasmato mahākāḷattherassa gāthā. Kā uppatti? Ayampi purimabuddhesu katādhikāro tattha tattha bhve puññāni upacinanto ito ekanavute kappe kulagehe nibbattivā viññutaṃ patto kenacideva karaṇīyena araṇṇaṃ gato tattha aññatarassa rukkhassa sākāya olambamānaṃ paṃsukūlacīvaraṃ disvā “ariyaddhajo olambati” ti pasannacitto kiṅkaṇipupphāni gahetvā paṃsukūlaṃ pūjesi. So tena puññakammena devamanussesu saṃsaranto imasmiṃ buddhuppāde setabyanagare satthavāhakule nibbattivā **mahākāḷoti** laddhanāmo viññutaṃ patvā gharāvāsaṃ vasanto pañcahi sakataṣatehi bhaṇḍaṃ gahetvā vāṇijjivasena sāvattiṃ gato ekamantaṃ sakataṣatthaṃ nivesetvā addhānaparissamaṃ vinodetvā attano parisāya saddhiṃ nisinno sāyanhasamayaṃ gandhamālādihatthe upāsake jetavanaṃ gacchante disvā sayampi tehi saddhiṃ vihāraṃ gantvā satthu santike dhammaṃ sutvā paṭiladdhasaddho pabbajitvā sosānikaṅgaṃ adhiṭṭhāya susāne vasati. Athekadivasaṃ **kālī** nāma ekā itthī chavaḍāhikā therassa kammaṭṭhānatthāya aciramatasarīraṃ ubho satthī bhinditvā ubho ca bāhū bhinditvā sīsaṅca dadhithālakaṃ viya bhinditvā sabbam aṅgapaccaṅgaṃ sambandhameva katvā therassa oloketuṃ yogyaṭṭhāne ṭhapetvā ekamantaṃ nisīdi. Thero taṃ disvā attānaṃ oवादanto –

151. “Kālī itthī brahatī dhaṅkarūpā, satthiṅca bhettvā aparāṅca satthiṃ;
Bāhaṅca bhettvā aparāṅca bāhaṃ, sīsaṅca bhettvā dadhithālakaṃva;
Esā nisinnā abhisandahitvā.

152. “Yo ve avidvā upadhiṃ karoti, punappunaṃ dukkhamupeti mando;
Tasmā pajānaṃ upadhiṃ na kayirā, māhaṃ puna bhinnasiro sayissa” nti. –

Gāthādvayaṃ abhāsi.

Tattha **kālī**ti tassā nāmaṃ, kāḷavaṇṇattā vā evaṃ vuttaṃ. **Brahatī**ti mahāsarīrā ārohapariṇāhavatī. **Dhaṅkarūpā**ti kāḷavaṇṇattā eva kākasadisarūpā. **Satthiṅca bhettvā**ti matasarīrassa satthiṃ jaṇṇubhedanena bhaṅgitvā. **Aparāṅca satthiṃ** itaraṅca satthiṃ bhaṅgitvā. **Bāhaṅca bhettvā**ti bāhaṭṭhiṅca aggabāhaṭṭhāneyeva bhaṅgitvā. **Sīsaṅca bhettvā dadhithālakaṃvā**ti matasarīrassa sīsaṃ bhinditvā bhinnattā eva leḍḍudaṇḍādīhi paggharantaṃ dadhithālakaṃ viya, paggharantaṃ matthaluṅgaṃ katvāti attho. **Esā nisinnā abhisandahitvā**ti chinnabhinnāvayavaṃ matasarīraṃ te avayave yathāṭṭhāneyeva ṭhapanena sandahitvā sahitaṃ katvā maṃsāpaṇaṃ pasārentī viya esā nisinnā.

Yo ve avidvā upadhiṃ karotiti yo imāya upaṭṭhāpitaṃ kammaṭṭhānaṃ disvāpi avidvā akusalo kammaṭṭhānaṃ chaḍḍetvā ayonisomanasikārena kilesūpadhiṃ uppādeti, so **mando** mandapañño saṃsārassa anativattanato **punappunaṃ** aparāparaṃ nirayādīsu **dukkhaṃ upeti**. **Tasmā pajānaṃ upadhiṃ na kayirāti tasmā**ti yasmā cetadevaṃ, tasmā. **Pajānaṃ upadhinti** “idha yaṃ dukkhaṃ sambhoti” ti pajānanto yoniso manasikaronto kilesūpadhiṃ na kayirā na uppādeyya. Kasmā? **Māhaṃ puna bhinnasiro sayissanti** yathayidaṃ matasarīraṃ bhinnasiro sayati, evaṃ kilesūpadhīhi saṃsāre punappunaṃ uppattiyā kaṭasivaḍḍhako hutvā bhinnasiro ahaṃ mā sayissanti. Evaṃ vadanto eva thero vipassanaṃ ussukkāpetvā arahattaṃ pāpuṇi. Tena vuttaṃ **apadāne** (apa. thera 2.50.8-14) –

“Himavantassāvidūre, udaṅgaṇo nāma pabbato;
Tatthaddasaṃ paṃsukūlaṃ, dumaggamhi vilambitaṃ.

“Tīṇi kiṅkaṇipupphāni, ocinitvānahaṃ tadā;
Haṭṭho haṭṭhena cittaṃ, paṃsukūlamapūjayiṃ.

“Tena kammaṃ sukatena, cetanāpaṇidhīhi ca;
Jahitvā mānusaṃ dehaṃ, tāvatimsamagacchahaṃ.

“Ekanavutito kappe, yaṃ kammamakariṃ tadā;
Duggatiṃ nābhijānāmi, pūjitvā arahaddhajaṃ.

“Kilesā jhāpitā mayhaṃ...pe... kataṃ buddhassa sāsana’nti.
Mahākālattheragāthāvaṇṇanā niṭṭhitā.

7. Tissattheragāthāvaṇṇanā

Bahū sapatte labhatī āyasmato tissattherassa gāthā. Kā uppatti? Ayampi purimabuddhesu katādhikāro tattha tattha bhave vivaṭṭūpanissayaṃ puññaṃ upacīnanto piyadassissa bhagavato kāle brāhmaṇakule nibbattivā viññutaṃ patto sippesu nipphattiṃ gantvā kāmesu ādīnavaṃ disvā gharāvāsaṃ pahāya tāpasapabbajjaṃ pabbajitvā araññāyatane sālavane assamaṃ kāretvā vasati. Bhagavā tassa anuggaṇhanatthaṃ assamassa avidūre sālavane nirodhaṃ samāpajjitvā nisīdi. So assamato nikkhamitvā phalāphalattāyā gacchanto bhagavantaṃ disvā pasannamānaso cattāro danḍe ṭhapetvā bhagavato upari pupphitāhi sālasākhāhi sākhamaṇḍapaṃ katvā sattāhaṃ navanavehi sālappupphehi bhagavantaṃ pūjento aṭṭhāsi buddhārammaṇaṃ pītiṃ avijahanto. Sattāhattassa accayena nirodhato vuṭṭhahitvā bhikkhusaṅghaṃ cintesi. Tāvadeva satasahassamattā khīṇāsavā sattāraṃ parivāresuṃ. Bhagavā tassa bhāvinīṃ sampattiṃ vibhāvento anumodanaṃ vatvā pakkāmi. So tena puññakamma devaloke nibbattitvā aparāparaṃ sugatīsuyeva saṃsaranto imasmiṃ buddhuppāde rājagahe brāhmaṇakule nibbattitvā **tissoti** laddhanāmo vayappatto tiṇṇaṃ vedānaṃ pāragū hutvā pañcamattāni māṇavakasatāni mante vācento lābhaggayasaggappatto hutvā satthu rājagahagamane buddhānubhāvaṃ disvā paṭiladdhasaddho pabbajitvā vipassanaṃ paṭṭhapetvā nacirasseva arahattaṃ pāpuṇi. Tena vuttaṃ **apadāne** (apa. therā 2.49.190-220) –

“Ajjhogāhetvā sālavanaṃ, sukato assamo mama;
Sālappupphehi sañchanno, vasāmi vipine tadā.

“Piyadassī ca bhagavā, sayambhū aggapuggalo;
Vivekakāmo sambuddho, sālavanamupāgami.

“Assamā abhinikkhamma, pavanaṃ agamāsahaṃ;
Mūlaphalaṃ gavesanto, āhiṇḍāmi vane tadā.

“Tatthaddasāsīṃ sambuddhaṃ, piyadassīṃ mahāyasaṃ;
Sunisinnaṃ samāpannaṃ, virocantaṃ mahāvane.

“Catudaṇḍe ṭhapetvāna, buddhassa uparī ahaṃ;
Maṇḍapaṃ sukataṃ katvā, sālappupphehi chādayiṃ.

“Sattāhaṃ dhārayitvāna, maṇḍapaṃ sālachāditaṃ;
Tattha cittaṃ pasādetvā, buddhaseṭṭhamavandahaṃ.

“Bhagavā tamhi samaye, vuṭṭhahitvā samādhito;
Yugamattaṃ pekkhamāno, nisīdi purisuttamo.

“Sāvako varuṇo nāma, piyadassissa satthuno;
Vasīsatasahasseehi, upagacchi vināyakaṃ.

“Piyadassī ca bhagavā, lokajetṭho narāsabho;
Bhikkhusaṅghe nisīditvāna, sitaṃ pātukaṃ jīno.

“Anuruddho upaṭṭhāko, piyadassissa satthuno;
Ekaṃsaṃ cīvaram katvā, apucchittha mahāmunīṃ.

“Ko nu kho bhagavā hetu, sitakammasa satthuno;
Kāraṇe vijjamānamhi, satthā pātukare sitaṃ.

“Sattāhaṃ sālacchadanam, yo me dhāresi māṇavo;
Tassa kammaṃ saritvāna, sitaṃ pātukariṃ ahaṃ.

“Anokāsaṃ na passāmi, yattha puññaṃ vipaccati;
Devaloke manusse vā, okāsova na sammati.

“Devaloke vasantassa, puññakammasamaṅgino;
Yāvataṃ parisā tassa, sālacchannā bhavissati.

“Tattha dibbehi naccehi, gītehi vāditehi ca;
Ramissati sadā santo, puññakammasamāhito.

“Yāvataṃ parisā tassa, gandhagandhī bhavissati;
Sālassa pupphavasso ca, pavassissati tāvade.

“Tato cutoyaṃ manujo, mānusaṃ āgamissati;
Idhāpi sālacchadanam, sabbakālam dharissati.

“Idha naccañca gītañca, sammatāḷasamāhitaṃ;
Parivāressanti maṃ niccaṃ, buddhapūjāyidaṃ phalaṃ.

“Uggacchante ca sūriye, sālavassaṃ pavassati;
Puññakammena saṃyuttaṃ, vassate sabbakālikaṃ.

“Aṭṭhārase kappasate, okkākakulasambhavo;
Gotamo nāma gottena, satthā loke bhavissati.

“Tassa dhammesu dāyādo, oraso dhammanimmito;
Sabbāsava pariññāya, nibbāyissatināsavo.

“Dhammaṃ abhisamentassa, sālacchannaṃ bhavissati;
Cītake jhāyamānassa, chadanaṃ tattha hessati.

“Vipākaṃ kittayitvāna, piyadassī mahāmuni;
Parisāya dhammaṃ desesi, tappento dhammavuṭṭhiyā.

“Timsakappāni devesu, devarajjamakārayiṃ;
Satṭhi ca sattakkhattuñca, cakkavattī ahasaṃ.

“Devalokā idhāgantvā, labhāmi vipulaṃ sukhaṃ;
Idhāpi sālacchadanam, maṇḍapassa idaṃ phalaṃ.

“Ayaṃ pacchimako mayhaṃ, carimo vattate bhavo;
Idhāpi sālacchadanam, hessati sabbakālikaṃ.

“Mahāmuniṃ tosayitvā, gotamaṃ sakyapuṅgavaṃ;
Pattomhi acalaṃ ṭhānaṃ, hitvā jayaparājayaṃ.

“Aṭṭhārase kappasate, yaṃ buddhamabhipūjayiṃ;
Duggatiṃ nābhijānāmi, buddhapūjāyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

So arahattaṃ pana patvā visesato lābhagayasaggappatto ahosi. Tattha keci puthujjanabhikkhū therassa lābhasakkāraṃ disvā bālabhāvena asahanākāraṃ pavedesuṃ. Thero taṃ ñatvā lābhasakkāre ādīnavaṃ tattha attano alaggabhāvañca pakāsentō –

153. “Bahū sapatte labhati, muṇḍo saṅghātipāruto;
Lābhī annassa pānassa, vatthassa sayanassa ca.

154. “Etamādīnavaṃ ñatvā, sakkāresu mahabbhayaṃ;
Appalābho anavassuto, sato bhikkhu paribbaje”ti. –

Gāthādvayaṃ abhāsi.

Tassattho – sikhampi asesetvā muṇḍitakesatāya **muṇḍo**, chinditvā saṅghāṭitakāsāvadhāritāya **saṅghātipāruto**, evaṃ vevaññiyaṃ ajjhupagato parāyattavuttiko pabbajito sace annapānādīnaṃ **lābhī** hoti, sopi **bahū sapatte labhati**, tassa usūyantā bahū sambhavanti. Tasmā **etaṃ** evarūpaṃ lābhasakkāresu **mahabbhayaṃ** vipulabhayaṃ **ādīnavaṃ** dosaṃ viditvā appicchataṃ santosañca hadaye ṭhapetvā anavajjuppādassāpi uppanassa lābhassa parivajjanena **appalābho**, tato eva tattha taṇhāvassutābhāvena **anavassuto**, saṃsāre bhayassa ikkhanato bhinnakilesatāya vā **bhikkhu** santuṭṭhiṭṭhānīyassa satisampajaññaṃ vasena **sato** hutvā **paribbaje** careyya vihareyyāti. Taṃ sutvā te bhikkhū tāvadeva therāṃ khamāpesuṃ.

Tissattheragāthāvaṇṇanā niṭṭhitā.

8. Kimilattheragāthāvaṇṇanā

Pācīnavaṃsadāyamhītiādikā āyasmato kimilattherassa gāthā. Kā uppatti? Tassa pubbayogo saṃveguppatti pabbajjā ca ekakanipāte “abhisatto”ti gāthāya saṃvaṇṇanāyaṃ vuttāyeva. Tāya ca gāthāya therena attano visesādhigamassa kāraṇaṃ dassitaṃ. Idha pana adhigatavisesassa attano āyasmatā ca anuruddhena āyasmatā ca nandiyena saha samaggavāso dassitoti veditabbaṃ. Samaggavāsaṃ pana vasantā te yathā ca vasiṃsu, taṃ dassento –

155. “Pācīnavaṃsadāyamhi, sakyaputtā sahāyakā;
Pahāyānappake bhoge, uñche pattāgate ratā.

156. “Āraddhavīriyā pahitattā, niccaṃ daḷhaparakkamā;
Ramanti dhammaratiyā, hitvāna lokiyaṃ rati”nti. – gāthādvayaṃ abhāsi;

Tattha **pācīnavaṃsadāyamhī** pācīnavaṃsanāmake rakkhitagopite sahaparicchede vane. Tañhi vanaṃ gāmassa pācīnadisāyaṃ ṭhitattā vaṃsagumbaparikkhattattā ca “pācīnavaṃsadāyo”ti vutto, vaṃsavanabhāvena vāti. **Sakyaputtā**ti anuruddhattherādayo sakyarājakumārā. **Sahāyakā**ti saṃveguppattipabbajjāsamañadhammakaraṇasaṃvāsehi saha ayanato pavattanato sahāyakā. **Pahāyānappake bhogeti** ulārena puññānubhāvena adhigate kulaparamparāgate ca mahante bhogakkhandhe chaḍḍetvā. “Sahāyānappake”tipi pāli. **Uñche pattāgate ratā**ti uñchācariyāya ābhatattā uñche patte āgatattā pattāgate pattapariyāpanne ratā abhiratā, saṅghabhattādiatirekalābhaṃ paṭikkhipitvā jaṅghabalaṃ nissāya bhikkhācariyāya laddhena missakabhatteneva santuṭṭhāti attho.

Āraddhavīriyāti uttamatthassa adhigamāya āditova pageva sampāditavīriyā. **Pahitattā**ti

ninnapoṇapabbhārabhāvena kālena kālaṃ samāpajjanena ca nibbānaṃ patipesitacittā. **Niccaṃ dalhaparakkamā**ti vattapaṭipattīsu diṭṭhadhammasukhavihārānuyogena sabbakālaṃ asithilaparakkamā. **Ramanti dhammaratiyā, hitvāna lokiyaṃ ratinti** loke viditatāya lokapariyāpannatāya ca lokiyaṃ rūpārammaṇādiratiṃ pahāya maggapaññāya pajahitvā lokuttaradhammaratiyā aggaphalanibbānābhiratiyā ca ramanti abhiramantīti.

Kimilattheragāthāvaṇṇanā niṭṭhitā.

9. Nandattheragāthāvaṇṇanā

Ayoniso manasikārāti āyasmato nandattherassa gāthā. Kā uppatti? Ayaṃ kira padumuttarassa bhagavato kāle haṃsavatīnagare kulagehe nibbattitvā viññutaṃ patto bhagavato santike dhammaṃ suṇanto sathhāraṃ ekaṃ bhikkhuṃ indriyesu guttadvārānaṃ aggaṭṭhāne ṭhapentaṃ disvā sayampi taṃ ṭhānantaraṃ patthento bhagavato bhikkhusaṅghassa ca pūjāsakkārabahulaṃ mahādānaṃ pavattetvā, “ahampi anāgate tumhādisassa buddhassa evarūpo sāvako bhaveyya” nti pañidhānaṃ katvā tato paṭṭhāya devamanussesu saṃsaranto atthadassissa bhagavato kāle vinatāya nāma nadiyā mahanto kacchapo hutvā nibbatta ekadivasam sathhāraṃ nadiyā pāraṃ gantaṃ tīre ṭhitaṃ disvā sayam bhagavantaṃ tāretukāmo satthu pādamaṃle nipajji. Sathhā tassa ajjhāsayaṃ oloketvā piṭṭhiṃ abhiruhi. So haṭṭhatuṭṭho vegena sotaṃ chindanto sīghataraṃ paratūrameva pāpesi. Bhagavā tassa anumodanaṃ vadanto bhāviniṃ sampattiṃ kathetvā pakkāmi.

So tena puññakammaena sugatīsuveva saṃsaranto imasmiṃ buddhuppāde kapilavatthusmiṃ suddhodanamahārājassa putto hutvā mahāpajāpatiyā gotamiyā kucchimhi nibbatti. Tassa nāmaggaṇādivase ñātisaṅghaṃ nandento jātoti **nandot**veva nāmaṃ akaṃsu. Tassa vayappattakāle sathhā pavattavaradhammacakko lokānuggahaṃ karonto kapilavatthum gantvā ñātisaṃnāgame pokkharavassaṃ aṭṭhuppattiṃ katvā **vessantarajātakaṃ** (jā. 2.22.1655 ādayo) kathetvā dutiyadivase piṇḍāya pavitṭho “uttiṭṭhe nappamajjeyā” ti (dha. pa. 168) gāthāya pitaraṃ sotāpattiphale patiṭṭhāpetvā nivesanaṃ gantvā “dhammaṃ care sucarita” nti (dha. pa. 169) gāthāya mahāpajāpatiṃ sotāpattiphale rājānaṃ sakadāgāmiphale patiṭṭhāpetvā tatiye divase nandakumārassa abhisekanivesanappavesanavivāhamaṅgalesu vattamānesu piṇḍāya pavisitvā nandakumārassa hatthe pattaṃ datvā maṅgalaṃ vatvā tassa hatthato pattaṃ agahetvā vihāraṃ gato taṃ pattahatthaṃ vihāraṃ āgataṃ anicchamaṇāmyeva pabbājetvā tathā pabbajitattāyeva anabhiratiyā piṭṭhiṃ ñatvā upāyena tassa taṃ anabhiratiṃ vinodesi. So yoniso paṭisaṅkhāya vipassanaṃ paṭṭhapetvā nacirasseva arahattaṃ pāpuṇi. Tena vuttaṃ **apadāne** (apa. thera 2.49.148-163) –

“Atthadassī tu bhagavā, sayambhū lokanāyako;
Vinatānadiyā tīraṃ, upāgacchi tathāgato.

“Udakā abhinikkhamma, kacchapo vārigocaro;
Buddhaṃ tāretukāmoḥaṃ, upesiṃ lokanāyakaṃ.

“Abhirūhatu maṃ buddho, atthadassī mahāmuni;
Ahaṃ taṃ tārayissāmi, dukkhassantakaro tuvaṃ.

“Mama saṅkappamaññāya, atthadassī mahāyaso;
Abhirūhitvā me piṭṭhiṃ, aṭṭhāsi lokanāyako.

“Yato sarāmi attānaṃ, yato pattosmi viññutaṃ;
Sukhaṃ me tādisaṃ natthi, phuṭṭhe pādātale yathā.

“Uttarivāna sambuddho, atthadassī mahāyaso;

Naditīramhi t̥hatvāna, imā gāthā abhāsatha.

“Yāvātā vattate cittaṃ, gaṅgāsotaṃ tarāmaḥaṃ;
Ayañca kacchapo rājā, tāresi mama paññavā.

“Iminā buddhatarāṇena, mettacittavatāya ca;
Aṭṭhārase kappasate, devaloke ramissati.

“Devalokā idhāgantvā, sukkamūlena codito;
Ekāsane nisīditvā, kaṅkhāsotaṃ tarissati.

“Yathāpi bhaddake khette, bījaṃ appampi ropitaṃ;
Sammādhāraṃ paveccante, phalaṃ toseti kassakaṃ.

“Tathevidaṃ buddhakhettaṃ, sammāsambuddhadesitaṃ;
Sammādhāraṃ paveccante, phalaṃ maṃ tosayissati.

“Padhānapahitattomhi, upasanto nirūpadhi;
Sabbāsava pariññāya, viharāmi anāsavo.

“Aṭṭhārase kappasate, yaṃ kammamakariṃ tadā;
Duggatiṃ nābhijānāmi, taraṇāya idaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā vimuttisukhaṃ anubhavanto “aho satthu upāyakosallaṃ, yenāhaṃ bhavapaṅkato uddharitvā nibbānathale patiṭṭhāpito”ti attano pahīnasaṃkilesaṃ paṭiladdhañca sukhaṃ paccavekkhitvā sañjātasomanasso udānavasena –

157. “Ayoniso manasikārā, maṅḍanaṃ anuyuñjisaṃ;
Uddhato capalo cāsiṃ, kāmarāgena aṭṭito.

158. “Upāyakusalenāhaṃ, buddhenādiccabandhunā;
Yoniso paṭipajjitvā, bhava cittaṃ udabbahi”nti. – gāthādvayaṃ abhāsi;

Tattha **ayoniso manasikārā**ti anupāyamanasikārato asubhaṃ kāyaṃ subhato manasi karitvā subhato manasikārahetu, asubhaṃ kāyaṃ subhasaññāyāti attho. **Maṅḍananti** hatthūpagādiābharāṇehi ceva mālāgandhādīhi ca attabhāvassa alaṅkaraṇaṃ. **Anuyuñjisanti** anuyuñjiṃ, sarīrassa vibhūsanappasuto ahosinti attho. **Uddhatoti** jātigottarūpayobbanamadādīhi uddhato avūpasantacitto. **Capaloti** vanamakkato viya anavaṭṭhitacittatāya lolo, kāyamaṅḍanavattamaṅḍanādicāpalye yuttatāya vā capalo ca. **Āsinti** aho siṃ. **Kāmarāgenā**ti vatthukāmesu chandarāgena **aṭṭito** pīḷito vibādhitto āsinti yojanā.

Upāyakusalenāti vineyyānaṃ damanūpāyacchekena kovidena **buddhena** bhagavatā hetubhūtena. Hetuatthe hi etaṃ karaṇavacanāṃ. Paluṭṭhamakkaṭṭidevaccharādassanena hi upakkitaṃ vadacodanāya attano kāmarāgāpanayanaṃ sandhāya vadati. Bhagavā hi āyasmantaṃ nandattheraṃ paṭhamaṃ janapadakalyāṇiṃ upādāya “yathāyaṃ makkaṭṭi, evaṃ kakuṭapādiniyo upādāya janapadakalyāṇi”ti mahatiyā āṇiyā khuddakaṃ āṇiṃ nīharanto chaḍḍako viya, sinehapānena sarīraṃ kiledetvā vamanavirecanehi dosaṃ nīharanto bhisakko viya ca kakuṭapādinidassanena janapadakalyāṇiyaṃ virattacittaṃ kāretvā puna upakkitaṃ vadena kakuṭapādinisupi cittaṃ virājetvā sammadeva samathavipassanānuyogena ariyamagge patiṭṭhāpesi. Tena vuttaṃ “**yoniso paṭipajjitvā, bhava cittaṃ udabbahi**”nti. Upāyena ñāyena sammadeva samathavipassanāya visuddhipaṭipadaṃ paṭipajjitvā bhava

samsārapaṅke nimuggaṅca me cittaṃ ariyamaggena hatthena uttāriṃ, nibbānathale patiṭṭhāpesinti attho.

Imaṃ udānaṃ udānetvā thero punadivase bhagavantaṃ upasaṅkamtivā evamāha – “yaṃ me, bhante, bhagavā pāṭibhogo pañcannaṃ accharāsātānaṃ paṭilābhāya kakuṭapādānaṃ, muñcāmahaṃ, bhante, bhagavantaṃ etasmā paṭissavā”’ti (udā. 22). Bhagavāpi, “yadeva kho te, nanda, anupādāya āsavehi cittaṃ vimuttaṃ, athāhaṃ mutto etasmā paṭissavā”’ti (udā. 22) āha. Athassa bhagavā savisesaṃ indriyesu guttadvārataṃ ñatvā taṃ guṇaṃ vibhāvento, “etadaggaṃ, bhikkhave, mama sāvakānaṃ bhikkhūnaṃ indriyesu guttadvārānaṃ yadidaṃ nando”’ti (a. ni. 1.219, 230) indriyesu guttadvārābhāvena aggaṭṭhāne ṭhapesi. Thero hi “yamevāhaṃ indriyānaṃ asaṃvamaṃ nissāya imaṃ vipakāraṃ patto, tamevāhaṃ suṭṭhu niggahessāmī”’ti ussāhajāto balavahirottappo tattha ca katādhikāratā indriyasamvare ukkaṃsapāraṃmiṃ agamāsīti.

Nandattheragāthāvaṇṇanā niṭṭhitā.

10. Sirimattheragāthāvaṇṇanā

Pare ca naṃ pasamsantīti āyasmato sirimattherassa gāthā. Kā uppatti? Ayampi purimabuddhesu katādhikāro tattha tattha bhave puññāni upacinanto padumuttarassa bhagavato pāramiyo pūretvā tusitabhavane ṭhitakāle brāhmaṇakule nibbattitvā viññutaṃ patto tiṇṇaṃ vedānaṃ pāragū sanighaṇḍukeṭubhānaṃ sakkharappabhedānaṃ itihāsapañcamānaṃ padako veyyākaraṇo lokāyatamahāpurisalakkhaṇesu anavayo nekkhammajjhāsayatāya kāme pahāya tāpasapabbajjaṃ pabbajitvā caturāsītisahassaparimāṇena tāpasagaṇena parivuto himavantappadese devatābhinimite assame jhānābhīññāyo nibbattitvā vasanto purimabuddhesu katādhikāratāya lakkhaṇamantesu āgataniyāmena ca buddhagūṇe anussarivā atīte buddhe uddissa aññatarasmiṃ nadīnivattane pulinacetiyaṃ katvā pūjāsakkārābhīratō ahoṣi. Taṃ disvā tāpasā, “kaṃ uddissa ayaṃ pūjāsakkāro karīyatī”’ti pucchimsu. So tesam lakkhaṇamante āharitvā tattha āgatāni mahāpurisalakkhaṇāni vibhajitvā tadanusārena attano bale ṭhatvā buddhagūṇe kittesi. Taṃ sutvā tepi tāpasā pasannamānasā tato paṭṭhāya sammāsambuddhaṃ uddissa thūpapūjaṃ karontā viharanti.

Tena ca samayena padumuttarabodhisatto tusitakāyā cavitvā mātukucchiṃ okkanto hoti. Carimabhava dvattiṃsa pubbanimittāni pāturahasuṃ, sabbe ca acchariyabbhūtaḍḍhammā. Tāpasō tāni antevāsikānaṃ dassetvā bhīyyosomattāya sammāsambuddhesu tesam pasādaṃ vaḍḍhetvā kālaṃ katvā brahmaloke nibbattitvā tehi attano sarīrassa pūjāya karīyamānāya dissamānarūpo āgantvā, “ahaṃ tumhākaṃ ācariyo brahmaloke nibbato, tumhe appamattā pulinacetiyaṃ pūjamaṇuyūñjatha, bhāvanāya ca yuttappayuttā hothā”’ti vatvā brahmalokameva gato.

Evam so devamanussesu samsaranto imasmiṃ buddhuppāde sāvattiyāṃ gahapatikule nibbatti, tassa jātadivasato paṭṭhāya tasmīṃ kule sirisampattiyā vaḍḍhamānattā **sirimā**tveva nāmaṃ akaṃsu. Tassa padaṣā gamanakāle kaniṭṭhabhātā nibbatti, tassa “ayaṃ siriṃ vaḍḍhento jāto”’ti **sirivaḍḍhoti** nāmaṃ akaṃsu. Te ubhopi jetavanappaṭiggahaṇe buddhānubhāvaṃ disvā paṭiladdhasaddhā pabbajimsu. Tesu sirivaḍḍho na tāva uttarimanussadhammassa lābhī ahoṣi, catunnaṃ paccayānaṃ lābhī, gahaṭṭhapabbajitānaṃ sakkato garukato, sirimatthero pana pabbajitakālato paṭṭhāya tādisena kammaacchiddena appalābhī ahoṣi bahujanāsambhāvito, samathavipassanāsu kammaṃ karonto nacirasseva chaḷabhiñño ahoṣi. Tena vuttaṃ **apadāne** (apa. thera 2.49.111-147) –

“Pabbate himavantamhi, devalo nāma tāpasō;
Tattha me caṅkamo āsi, amanussehi māpito.

“Jaṭābhārena bharito, kamaṇḍaludharo sadā;
Uttamatthaṃ gavesanto, vipinā nikkhamiṃ tadā.

“Cullāsītisahassāni, sissā mayhaṃ upatṭhahaṃ;
Sakakammābhipasutā, vasanti vipine tadā.

“Assamā abhinikkhamma, akaṃ pulinacetiyaṃ;
Nānāpupphaṃ samānetvā, taṃ cetiyamaṃpūjayiṃ.

“Tattha cittaṃ pasādetvā, assamaṃ pavisāmaṃ;
Sabbe sissā samāgantvā, etamatthaṃ pucchimsu maṃ.

“Pulinena kato thūpo, yaṃ tvaṃ deva namassasi;
Mayampi ñātumicchāma, puṭṭho ācikkha no tuvaṃ.

“Niddiṭṭhā nu mantapade, cakkhumanto mahāyasā;
Te kho ahaṃ namassāmi, buddhaseṭṭhe mahāyase.

“Kīdisā te mahāvīrā, sabbaññū lokanāyakā;
Kathaṃvaṇṇā kathaṃsīlā, kīdisā te mahāyasā.

“Bāttimsalakkhaṇā buddhā, cattālīsadijāpi ca;
Nettā gopakhumā tesam, jiṅjukā phalasannibhā.

“Gacchamānā ca te buddhā, yugamattañca pekkhare;
Na tesam jāṇu nadati, sandhisaddo na suyyati.

“Gacchamānā ca sugatā, uddharantāva gacchare;
Paṭhamaṃ dakkhiṇaṃ pādaṃ, buddhānaṃ esa dhammatā.

“Asambhītā ca te buddhā, migarājāva kesarī;
Nevukkaṃsenti attānaṃ, no ca vambhenti pāṇinaṃ.

“Mānāvamānato muttā, samā sabbesu pāṇisu;
Anattukkaṃsakā buddhā, buddhānaṃ esa dhammatā.

“Uppajjantā ca sambuddhā, ālokaṃ dassayanti te;
Chappakāraṃ pakampenti, kevalaṃ vasudhaṃ imaṃ.

“Passanti nirayañcete, nibbāti nirayo tadā;
Pavassati mahāmegho, buddhānaṃ esa dhammatā.

“Īdisā te mahānāgā, atulā ca mahāyasā;
Vaṇṇato anatikkantā, appameyyā tathāgatā.

“Anumodiṃsu me vākyaṃ, sabbe sissā sagāravā;
Tathā ca paṭipajjimsu, yathāsatti yathābalaṃ.

“Paṭipūjenti pulinaṃ, sakakammābhilāsino;
Saddahantā mama vākyaṃ, buddhasakkatamānasā.

“Tadā cavitvā tusitā, devaputto mahāyaso;
Uppajji mātukucchimhi, dasasahassi kampatha.

“Assamassāvidūramhi, caṅkamamhi t̥hito ahaṃ;
Sabbe sissā samāgantvā, āgacchum̐ mama santike.

“Usabhova mahī nadati, migarājāva kūjati;
Susumārova saḷati, kiṃ vipāko bhavissati.

“Yaṃ pakittemi sambuddhaṃ, sikaṭāthūpasantike;
So dāni bhagavā satthā, mātukucchimupāgami.

“Tesam̐ dhammakathaṃ vatvā, kittayitvā mahāmunim̐;
Uyyojetvā sake sisse, pallaṅkamābhujim̐ ahaṃ.

“Balañca vata me khīṇaṃ, byādhinā paramena taṃ;
Buddhaseṭṭhaṃ saritvāna, tattha kālaṅkato ahaṃ.

“Sabbe sissā samāgantvā, akaṃsu citakaṃ tadā;
Kaḷevarañca me gayha, citakaṃ abhiropayum̐.

“Citakaṃ parivāretvā, sīse katvāna añjalim̐;
Sokasallaparetā te, vikkandiṃsu samāgatā.

“Tesam̐ lālappamānānaṃ, agamaṃ citakaṃ tadā;
Ahaṃ ācariyo tumhaṃ, mā socittha sumedhasā.

“Sadatthe vāyameyyātha, rattindivamatanditā;
Mā vo pamattā ahuttha, khaṇo vo paṭipādito.

“Sake sissenusāsivā, devalokaṃ punāgamim̐;
Aṭṭhārasa ca kappāni, devaloke ramāmaḥaṃ.

“Satānaṃ pañcakkhattuñca, cakkavattī ahosahaṃ;
Anekasatakkhattuñca, devarajjamakārayim̐.

“Avasesesu kappesu, vokiṇṇo saṃsariṃ ahaṃ;
Duggatiṃ nābhijānāmi, uppādassa idaṃ phalaṃ.

“Yathā komudike māse, bahū pupphanti pādapā;
Tathevāhampi samaye, pupphitomhi mahesinā.

“Vīriyaṃ me dhuradhorayaṃ, yogakkhemādhivāhanaṃ;
Nāgo va bandhanaṃ chetvā, viharāmi anāsavo.

“Satasahassito kappe, yaṃ buddhamabhikittayim̐;
Duggatiṃ nābhijānāmi, kittanāya idaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Chalābhiññāñhi samānaṃ āyasmantaṃ sirimattheraṃ “ariyo”ti ajānantā puthujjanā bhikkhū sāmaṇerā ca appalābhitāya lokassa anabhigatabhāvena asambhāventā yaṃkiñci kathetvā garahanti. Sirivaḍḍhattheraṃ pana paccayānaṃ lābhibhāvena lokassa sakkatarukatabhāvato sambhāventā pasamsanti. Thero “avaṇṇārahassa nāma vaṇṇabhaṇanaṃ, vaṇṇārahassa ca avaṇṇabhaṇanaṃ assa

puthujjanabhāvassa doso’’ti puthujjanabhāvañca garahanto –

159. ‘‘Pare ca naṃ pasamsanti, attā ce asamāhito;
Moghaṃ pare pasamsanti, attā hi asamāhito.

160. ‘‘Pare ca naṃ garahanti, attā ce susamāhito;
Moghaṃ pare garahanti, attā hi susamāhito’’ti.

– Gāthādvayamabhāsi.

Tattha **pareti** attato aññe pare nāma, idha pana paṇḍitehi aññe bālā pareti adhippetā. Tesañhi ajānitvā apariyogāhetvā bhāsanato garahā viya pasamsāpi appamāṇabhūtā. **Nanti** naṃ puggalaṃ. **Pasamsantīti** aviddasubhāvena taṇhāvīpannatāya vā, atha vā abhūtaṃyeva puggalaṃ ‘‘asuko bhikkhu jhānalābhī, ariyo’’ti vā abhūtaguṇaropanena kittenti abhitthavanti. Yo panettha **ca**-saddo, so attūpanayattho. Tena pare naṃ puggalaṃ pasamsanti ca, tañca kho tesam pasamsanamattaṃ, na pana tasmīṃ pasamsāya vatthu atthīti imamattaṃ dasseti. **Attā ce asamāhitoti** yaṃ puggalaṃ pare pasamsanti, so ce sayam asamāhito maggasamādhinā phalasamādhinā upacārappanāsamādhimatteneva vā na samāhito, samādhānassa paṭipakkhabhūtānaṃ kilesānaṃ appahīnatā vikkhīto vibbhantacitto hoti ceti attho. ‘‘Asamāhito’’ti ca etena samādhinimittānaṃ guṇānaṃ abhāvaṃ dasseti. **Moghanti** bhāvanapuṃsakaniddeso ‘‘visamaṃ candimasūriyā parivattantī’’tiādīsu viya. **Pare pasamsantīti** ye taṃ asamāhitaṃ puggalaṃ pasamsanti, te moghaṃ mudhā amūlakaṃ pasamsanti. Kasmā? **Attā hi asamāhito** yasmā tassa puggalassa cittaṃ asamāhitaṃ, tasmāti attho.

Dutiyagāthāyaṃ **garahantīti** attano aviddasubhāvena dosantarāya vā ariyaṃ jhānalābhiñca samānaṃ ‘‘asuko bhikkhu jāgariyaṃ nānuyuñjati antamaso goduhanamattampi kālaṃ kevalaṃ kāyadaḥhibahulo niddārāmo bhassārāmo saṅgaṇikārāmo viharatī’’tiādinā appaṭipajjamānatāvibhāvanena vā guṇaparidhamānaṃ vā garahanti nindanti, upakkosanti vāti attho. Sesam paṭhamagāthāya vuttapariyāyena veditabbaṃ. Evaṃ therena imāhi gāthāhi attano nikkilesabhāve sirivaḍḍhassa ca sakilesabhāve pakāsīte taṃ sutvā sirivaḍḍho saṃvegajāto vipassanaṃ paṭṭhapetvā nacirasseva sadatthaṃ paripūresi, garahakapuggalā ca theram khamāpesuṃ.

Sirimattheragāthāvaṇṇanā niṭṭhitā.

Dutiyavaggavaṇṇanā niṭṭhitā.

3. Tatiyavaggo

1. Uttarattheragāthāvaṇṇanā

Khandhā mayā pariññātāti āyasmato uttarattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭūpanissayaṃ kusalaṃ upacinanto ito catunavute kappe siddhatthassa bhagavato kāle kulagehe nibbattitvā viññutaṃ patto sāsane laddhappasādo hutvā upāsakattaṃ paṭivedesi. So sathari parinibbute attano ñātake sannipātetvā bahuṃ pūjāsakkāraṃ sambharitvā dhātupūjaṃ akāsi. So tena puññakamma devamanussesu saṃsaranto imasmīṃ buddhuppāde sākete brāhmaṇakule nibbattitvā **uttaroti** laddhanāmo vayappatto kenacideva karaṇīyena sāvattthiṃ gato kaṇḍambamūle kataṃ yamakapāṭihāriyaṃ disvā pasīditvā puna **kālakārāmasutta**desanāya (a. ni. 4.24) abhivaḍḍhamānasaddho pabbajitvā sathārā saddhiṃ rājagahaṃ gantvā upasampajjitvā tattheva vasanto vipassanaṃ paṭṭhapetvā nacirasseva chaḷabhiñño ahoṣi. Tena vuttaṃ **apadāne** (apa. thera 2.49.106-110) –

‘‘Nibbute lokanāthamhi, siddhatthe lokanāyake;

Mama ñātī samānetvā, dhātupūjaṃ akāsaṃ.

“Catunnavutito kappe, yaṃ dhātumabhipūjayiṃ;
Duggatiṃ nābhijānāmi, dhātupūjāyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Chalabhiñño pana hutvā satthari sāvattthiyaṃ viharante buddhupaṭṭhānatthaṃ rājagahato sāvattthiṃ upagato bhikkhūhi “kiṃ, āvuso, pabbajjākkiccaṃ tayā matthakaṃ pāpita”nti puṭṭho aññaṃ byākaronto –

161. “Khandhā mayā pariññātā, taṇhā me susamūhatā;
Bhāvitā mama bojjhaṅgā, patto me āsavakkhayo.

162. “Sohaṃ khandhe pariññāya, abbahitvāna jāliniṃ;
Bhāvayitvāna bojjhaṅge, nibbāyissaṃ anāsavo”ti. – gāthādvayaṃ abhāsi;

Tattha **khandhā**ti pañcupādānakkhandhā. **Pariññātā**ti “idaṃ dukkhaṃ, na ito bhiyyo”ti paricchijja ñātā bhāvitā. Tena dukkhassa ariyasaccassa pariññābhisamayamāha. **Taṇhā**ti tasati paritasatīti taṇhā. **Susamūhatā**ti samugghātīti. Etena samudayasaccassa pahānābhisamayaṃ vadati. **Bhāvitā mama bojjhaṅgā**ti bodhisāṅkhātāya satiādidhammasāmaggiyā, taṃsamāngino vā bodhisāṅkhātassa ariyapuggalassa aṅgāti bojjhaṅgā.

Satidhammavicayavīriyapītipassaddhisamādhīupekkhāsāṅkhātā maggapariyāpannā dhammā mayā bhāvitā uppādītā vaḍḍhitā. Bojjhaṅgaggahaṇeṇeva cettha taṃsahacaritatāya sabbe maggadhammā, sabbe ca bodhipakkhiyadhammā gahitāti daṭṭhabbā. Eteneva maggasaccassa bhāvanābhisamayaṃ dasseti. **Patto me āsavakkhayoti** kāmāsavādayo āsavā khīyanti etthāti āsavakkhayoti laddhanāmo asaṅkhatadhammo mayā patto adhigato. Etena nirodhasaccassa sacchikiriyābhisamayaṃ katheti. Ettāvātā attano saupādīsesanibbānasampattiṃ dasseti.

Idāni pana anupādīsesanibbānasampattiṃ dassento “**soha**”ntiādinā dutiyaṃ gāthamāha. Tassattho – sohaṃ evaṃ vuttanayena **khandhe pariññāya** parijānitvā, tathā parijānanto eva sakaattabhāvaparātabhāvesu ajjhattikabāhirāyatanesu atītādibhedabhinnesu saṃsibbanākāraṃ punappunaṃ pavattisaṅkhātāṃ jālaṃ etassa atthīti **jālinī**ti laddhanāmaṃ taṇhaṃ **abbahitvāna** mama cittasantānato uddharitvā, tathā naṃ uddharantoyeva vuttappabhede **bojjhaṅge bhāvayitvāna** te bhāvanāpāripūriṃ pāpetvā tato eva **anāsavo** hutvā ṭhito idāni carimakacittanīrodhena anupādāno viya jātavedo **nibbāyissaṃ** parinibbāyissāmīti.

Uttarattheragāthāvaṇṇanā niṭṭhitā.

2. Bhaddajittheragāthāvaṇṇanā

Panādo nāma so rājāti āyasmato bhaddajittherassa gāthā. Kā uppatti? Ayaṃ kira padumuttarassa bhagavato kāle brāhmaṇakule nibbattitvā viññutaṃ patto brāhmaṇānaṃ vijjāsippesu pāraṃ gantvā kāme pahāya tāpasapabbajjaṃ pabbajitvā araññāyatane assamaṃ kāretvā vasanto ekadivasam satthāraṃ ākāsaṃ gacchantaṃ disvā pasannamānaso añjaliṃ paggayha aṭṭhāsi. Satthā tassa ajjhāsayaṃ ñatvā ākāsaṃ otari. Otiṇṇassa pana bhagavato madhuñca bhisamuḷālañca sappiñca khirañca upanāmesi, tassa taṃ bhagavā anukampaṃ upādāya paṭiggahetvā anumodanaṃ vatvā pakkāmi. So tena puññakammaṃ tusite nibbatta tattha yāvatāyukaṃ ṭhatvā tato aparāparaṃ sugatīsusueva saṃsaranto vipassissa bhagavato kāle mahaddhano seṭṭhi hutvā aṭṭhasaṭṭhibhikkhusahassaṃ bhojetvā ticīvarena acchādesi.

Evaṃ bahuṃ kusalaṃ katvā devaloke nibbattitvā tattha yāvatāyukaṃ ṭhatvā tato cavitvā manussesu uppanno buddhasuññe loke pañca paccekabuddhasatāni catūhi paccayehi upaṭṭhahitvā tato cuto rājakule nibbattitvā rajjaṃ anusāsanto puttaṃ paccekabodhiṃ adhigantvā ṭhitaṃ upaṭṭhahitvā tassa

parinibbutassa dhātuyo gahetvā cetiyaṃ katvā pūjesi. Evaṃ tattha tattha tāni puññāni katvā imasmiṃ buddhuppāde bhaddiyanagare asītikoṭivibhavassa bhaddiyaseṭṭhissa ekaputtako hutvā nibbatti, **bhaddajī**tissa nāmaṃ ahoṣi. Tassa kira issariyabhogaparivārādisampatti carimabhava bodhisattassa viya ahoṣi.

Tadā satthā sāvattiyaṃ vassaṃ vasitvā bhaddajikumāraṃ saṅgaṇhituṃ mahatā bhikkhusaṅghena saddhiṃ bhaddiyanagaraṃ gantvā jātiyāvane vasi tassa ñāṇaparipākaṃ āgamayamāno. Sopi upari pāsāde nisinnō sīhapañjaraṃ vivaritvā olokeno bhagavato santike dhammaṃ sotuṃ gacchantaṃ mahājanaṃ disvā “katthāyaṃ mahājano gacchatī”ti pucchitvā taṃ kāraṇaṃ sutvā sayampi mahatā parivārena satthu santikaṃ gantvā dhammaṃ suṇanto sabbābharaṇapaṭimaṇḍitova sabbakilese khepetvā arahattaṃ pāpuṇi. Tena vuttaṃ **apadāne** (apa. therā 2.56.98-116) –

“Oggayha yaṃ pokkharāṇiṃ, nānākuñjarasevitaṃ;
Uddharāmi bhisāṃ tattha, ghāsahetu ahaṃ tadā.

“Bhagavā tamhi samaye, padumuttarasavhayo;
Rattambaradharo buddho, gacchate anilañjase.

“Dhunanto paṃsukūlāni, saddaṃ assosaṃ tadā;
Uddhaṃ nijjhāyamānohaṃ, addasaṃ lokanāyakaṃ.

“Tattheva thitako santo, āyāciṃ lokanāyakaṃ;
Madhuṃ bhisehi sahitaṃ, khīraṃ sappiṃ muḷālikaṃ.

“Paṭiggaṇhātu me buddho, anukampāya cakkhumā;
Tato kāruṇiko satthā, orohitvā mahāyaso.

“Paṭiggaṇhi mamaṃ bhikkhaṃ, anukampāya cakkhumā;
Paṭiggahetvā sambuddho, akā me anumodanaṃ.

“Sukhī hotu mahāpuñña, gati tuyhaṃ samijjhātu;
Iminā bhisadānena, labhassu vipulaṃ sukhaṃ.

“Idaṃ vatvāna sambuddho, jalajuttamanāmakō;
Bhikkhamādāya sambuddho, ākāsenāgamā jino.

“Tato bhisāṃ gahetvāna, āgacchiṃ mama assamaṃ;
Bhisāṃ rukkhe laggetvāna, mama dānaṃ anussariṃ.

“Mahāvāto uṭṭhahitvā, sañcālesi vanaṃ tadā;
Ākāso abhinādittha, asanī ca phalī tadā.

“Tato me asanīpāto, matthake nipatī tadā;
Sohaṃ nisinnako santo, tattha kālaṅkato ahaṃ.

“Puññakammena saññutto, tusitaṃ upapajjahaṃ;
Kaḷevaraṃ me patitaṃ, devaloke ramāmaṃ.

“Chalasītisahassāni, nāriyo samalaṅkatā;
Sāyaṃ pātaṃ upaṭṭhanti, bhisadānassidaṃ phalaṃ.

“Manussayonimāgantvā, sukhito homahaṃ tadā;
Bhoge me ūnatā natthi, bhisadānassidaṃ phalaṃ.

“Anukampitako tena, devadevena tādina;
Sabbāsavā parikkhīṇā, natthi dāni punabbhavo.

“Satasahassito kappe, yaṃ bhisam adadiṃ tadā;
Duggatiṃ nābhijānāmi, bhisadānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Arahatte pana tena adhigate satthā bhaddiyasetthiṃ āmantesi – “tava putto alaṅkatapaṭiyatto dhammaṃ suṇanto arahatte patiṭṭhāsi, tenassa idāneva pabbajitum yuttaṃ, no ce pabbajati, parinibbāyissati”ti. Setthi “na mayhaṃ puttassa daharasseva sato parinibbānena kiccaṃ atthi, pabbājetha na”nti āha. Taṃ satthā pabbājetvā upasampādetvā tattha sattāhaṃ vasitvā koṭigāmaṃ pāpuṇi, so ca gāmo gaṅgātīre. Koṭigāmavāsino buddhappamukhassa bhikkhusaṅghassa mahādānaṃ pavattesuṃ. Bhaddajitthero satthārā anumodanāya āradhamattāya bahigāmaṃ gantvā “gaṅgātīre maggasamīpe satthu āgatakāle vuṭṭhahissāmi”ti samāpattiṃ samāpajjitvā nisīdi. Mahātheresu āgacchantesupi avuṭṭhahitvā satthu āgatakāleyeva vuṭṭhahi. Puthujjanabhikkhū, “ayaṃ adhunā pabbajito mahātheresu āgacchantesu mānatthaddho hutvā na vuṭṭhāsi”ti ujjhāyimsu. Koṭigāmavāsino satthu bhikkhusaṅghassa ca bahū nāvāsaṅghāṭe bandhimsu, satthā “handassa ānubhāvaṃ pakāsemi”ti nāvāsaṅghāṭe ṭhatvā, “kahaṃ, bhaddaji”ti pucchi. Bhaddajitthero “esohaṃ, bhante”ti satthāraṃ upasaṅkamitvā añjaliṃ katvā aṭṭhāsi. Satthā, “ehi, bhaddaji, amhehi saddhiṃ ekanāvaṃ abhiruhā”ti. So uppatitvā satthu ṭhitanāvāyaṃ aṭṭhāsi. Satthā gaṅgāmajjhaṃ gatakāle, “bhaddaji, tayā mahāpanādarājakāle ajjhāvuṭṭharatanapāsādo kaha”nti āha. “Imasmiṃ ṭhāne nimuggo”ti. “Tena hi, bhaddaji, sabrahmacārīnaṃ kaṅkhaṃ chindā”ti. Tasmim khaṇe thero satthāraṃ vanditvā iddhibalena gantvā pāsādathūpikaṃ pādaṅgulantarena sannirumbhitvā pañcavīsatiyojanaṃ pāsādaṃ gahetvā ākāse uppati, uppatanto ca paññāsa yojanāni pāsādaṃ udakato ukkhipi. Athassa purimabhavae nātakā pāsādagatena lobhena macchakacchapamaṇḍūkā hutvā tasmim pāsāde uṭṭhahante parivattitvā udaye patimsu. Satthā te patante disvā “nātakā te, bhaddaji, kilamanti”ti āha. Thero satthu vacanena pāsādaṃ vissajjesi. Pāsādo yathāṭhāne eva patiṭṭhahi. Satthā pāraṅgato bhikkhūhi “kadā, bhante, bhaddajittherena ayaṃ pāsādo ajjhāvuṭṭho”ti puttḥo **mahāpanādajātakaṃ** (jā. 1.3.40-41) kathetvā mahājanaṃ dhammāmatam pāyesi. Thero pana attano ajjhāvuṭṭhapubbaṃ suvaṇṇapāsādaṃ dassetvā –

163. “Panādo nāma so rājā, yassa yūpo suvaṇṇayo;
Tiriyaṃ soḷasubbedho, ubbhamaṃhu sahasadhā.

164. “Sahassakaṇḍo satageṇḍu, dhajālu haritāmayo;
Anaccuṃ tattha gandhabbā, cha sahasāni sattadhā”ti. –

Dvīhi gāthāhi vaṇṇento aññaṃ byākāsi.

Tattha **panādo nāma so rājāti** atīte panādo nāma so rājā ahoṣīti attabhāvaantarahitāya attānaṃ paraṃ viya niddisati. So eva hi rajje ṭhitakālato paṭṭhāya sadā ussāhasampattiādinā mahatā rājānubhāvena mahatā ca kittisaddena samannāgatattā “rājā mahāpanādo”ti paññāyittha. **Yassa yūpo suvaṇṇayoti** yassa rañño ayaṃ yūpo pāsādo suvaṇṇamayo. **Tiriyaṃ soḷasubbedhoti** vitthārato soḷasakaṇḍapātappamaṇḍo. So pana aḍḍhajojanamatto hoti. **Ubbhāmāhu sahasadhāti** ubbhaṃ uccaṃ evamassa pāsādassa sahasadhā sahasakaṇḍapappamaṇḍamāhu. So pana yojanato pañcavīsatiyojanappamaṇḍo hoti. Keci panettha gāthāsukhatthaṃ “āhū”ti dīghaṃ kataṃ. Āhu ahoṣīti atthaṃ vadanti.

Sahassakaṇḍoti sahasabhūmiko. **Satageṇḍūti** anekasataniyyūhako. **Dhajālūti** tattha tattha

niyyūhasikharādīsu patiṭṭhāpītehi yaṭṭhidhajapaṭākadhajādīdhajehi sampanno. **Haritāmayoti** cāmīkarasuvanṇamayo. Keci pana “haritajātīmanīsarikkhako”ti vadanti. **Gandhabbāti** naṭā. **Chasahassāni sattadhāti** chamattāni gandhabbasahassāni sattadhā tassa pāsādassa sattasu ṭhānesu rañño abhiramāpanatthaṃ naccīmsūti attho. Te evaṃ naccantāpi rājānaṃ hāsetuṃ nāsakkhīmsu. Atha sakko devarājā devanaṭe pesetvā samajjaṃ kāresi, tadā rājā hasīti.

Bhaddajittheragāthāvaṇṇanā niṭṭhitā.

3. Sobhitattheragāthāvaṇṇanā

Satimā pañṇavāti āyasmato sobhitattherassa gāthā. Kā uppatti? Ayampi purimabuddhesu katādhikāro tattha tattha bhava puñṇāni upacinanto padumuttarassa bhagavato kāle haṃsavatīnagare kulagehe nibbattitvā veyappatto satthu dhammadesanaṃ suṇanto satthāraṃ ekaṃ bhikkhuṃ pubbenivāsaññalābhīnaṃ bhikkhūnaṃ aggaṭṭhāne ṭhapentaṃ disvā sayampi taṃ ṭhānantaraṃ uddissa patthanaṃ katvā puñṇāni katvā sugatīsuveva saṃsaranto sumedhassa bhagavato kāle brāhmaṇakule nibbattitvā viññutaṃ patto brāhmaṇānaṃ vijjāsippesu nipphattiṃ gantvā nekkhammādhimutto gharāvāsaṃ pahāya tāpasapabbajjaṃ pabbajitvā himavantassa samīpe araññāyatane assamaṃ kāretvā vanamūlaphalāphalena yāpento buddhuppādaṃ sutvā sabbattha ekarattivāseveva bhaddavatīnagare satthāraṃ upasaṅkamitvā pasannaṃānaso “tuvaṃ satthā ca ketu cā”tiādīhi chahi gāthāhi abhitthavi, satthā cassa bhāviniṃ sampattiṃ pakāsesi. So tena puñṇakammena devamanussesu saṃsaranto imasmiṃ buddhuppāde sāvattiyaṃ brāhmaṇakule nibbatti. **Sobhitotissa** nāmaṃ akaṃsu. So aparena samayena satthu dhammadesanaṃ sutvā paṭiladdhasaddho pabbajitvā vipassanaṃ vaḍḍhetvā chaḷabhiñño ahoṣi. Pubbenivāsaññe ciṇṇavasī ca ahoṣi. Tena vuttaṃ **apadāne** (apa. thera 2.49.46-74) –

“Dakkhiṇe himavantassa, sukato assamo mama;
Uttamatthaṃ gavesanto, vasāmi vipine tadā.

“Lābhālābhena santuṭṭho, mūlena ca phalena ca;
Anvesanto ācariyaṃ, vasāmi ekako ahaṃ.

“Sumedho nāma sambuddho, loke uppajji tāvade;
Catusaccaṃ pakāseti, uddharanto mahājanaṃ.

“Nāhaṃ suṇomi sambuddhaṃ, napi me koci saṃsati;
Aṭṭhavasse atikkante, assosiṃ lokanāyakaṃ.

“Aggidāruṃ nīharitvā, sammajjitvāna assamaṃ;
Khāribhāraṃ gahetvāna, nikkhamiṃ vipinā ahaṃ.

“Ekarattiṃ vasantohaṃ, gāmesu nigamesu ca;
Anupubbena candavatiṃ, tadāhaṃ upasaṅkamaṃ.

“Bhagavā tamhi samaye, sumedho lokanāyako;
Uddharanto bahū satte, deseti amataṃ padaṃ.

“Janakāyamatikkamma, vanditvā jinasāgaram;
Ekaṃsaṃ ajinaṃ katvā, santhaviṃ lokanāyakaṃ.

“Tuvaṃ satthā ca ketu ca, dhajo yūpo ca pāṇinaṃ;
Parāyano patiṭṭhā ca, dīpo ca dvipaduttamo.

“Nepuñño dassane vīro, tāresi janataṃ tuvaṃ;
Natthañño tārako loke, tavuttaritaro mune.

“Sakkā theve kusaggena, pametuṃ sāgaruttame;
Na tveva tava sabbaññu, ñāṇaṃ sakkā pametave.

“Tuladaṇḍe ṭhapetvāna, mahiṃ sakkā dharetave;
Natveva tava paññāya, pamāṇamatthi cakkhuma.

“Ākāso minituṃ sakkā, rajjuyā aṅgulena vā;
Natveva tava sabbaññu, sīlaṃ sakkā pametave.

“Mahāsamudde udakaṃ, ākāso ca vasundharā;
Parimeyyāni etāni, appameyyosi cakkhuma.

“Chahi gāthāhi sabbaññuṃ, kittayitvā mahāyasam;
Añjalim paggahetvāna, tuṅhī aṭṭhāsahaṃ tadā.

“Yaṃ vadanti sumedhoti, bhūripaññaṃ sumedhasam;
Bhikkhusaṅghe nisīditvā, imā gāthā abhāsatha.

“Yo me ñāṇaṃ pakittesi, vippasannena cetasā;
Tamahaṃ kittayissāmi, suṇātha mama bhāsato.

“Sattasattati kappāni, devaloke ramissati;
Sahassakkhattuṃ devindo, devarajjaṃ karissati.

“Anekasatakkhattuñca, cakkavattī bhavissati;
Padesarajjaṃ vipulaṃ, gaṇanāto asaṅkhiyaṃ.

“Devabhūto manusso vā, puññakammasamāhito;
Anūnamanasaṅkappo, tikkhapañño bhavissati.

“Timsakappasahassamhi, okkākakulasambhavo;
Gotamo nāma gottena, sathā loke bhavissati.

“Agārā abhinikkhamma, pabbajissatikiñcano;
Jātiyā sattavassena, arahattaṃ phusissati.

“Yato sarāmi attānaṃ, yato pattosmi sāsaṇaṃ;
Etthantare na jānāmi, cetanaṃ amanoramaṃ.

“Saṃsaritvā bhava sabbe, sampattānubhaviṃ ahaṃ;
Bhoge me ūnatā natthi, phalaṃ ñāṇassa thomane.

“Tiyaggī nibbutā mayhaṃ, bhavā sabbe samūhatā;
Sabbāsavā parikkhīṇā, natthi dāni punabbhavo.

“Timsakappasahassamhi, yaṃ ñāṇamathaviṃ ahaṃ;
Duggatiṃ nābhijānāmi, phalaṃ ñāṇassa thomane.

“Kilesā jhāpitā mayhaṃ...pe... kataṃ buddhassa sāsana’nti.

So arahattaṃ pana patvā attano pubbenivāsaṃ anupaṭipāṭiyā anussaranto yāva asaṅṅabhavo acittakapaṭisandhi, tāva addasa. Tato pañca kappasatāni cittappavattiṃ adisvā avasāneva disvā “kimeta’nti āvajjento nayavasena “asaṅṅabhavo bhavissati’nti niṭṭhaṃ agamāsi. Tenāha bhagavā – “atthi, bhikkhave, asaṅṅasattā nāma dīghāyukā devā, tato cuto sobhito idhūpapanno, so etaṃ bhavaṃ jānāti, sobhito anussarati’nti (pārā. 232 atthato samānaṃ). Evaṃ nayavasena anussarantassa anussaraṅkosallaṃ disvā satthā therāṃ pubbenivāsaṃ anussarantānaṃ aggaṭṭhāne ṭhapesi. Tato eva cāyaṃ āyasmā savisesaṃ attano pubbenivāsānussatiñāṇaṃ tassa ca paccayabhūtaṃ paṭipattiṃ paccavekkhitvā somanassajāto tadatthadīpanaṃ udānaṃ udānento –

165. “Satimā pañṇavā bhikkhu, āradhābalavīriyo;
Pañca kappasatānāhaṃ, ekarattiṃ anussariṃ.

166. “Cattāro satipaṭṭhāne, satta aṭṭha ca bhāvayaṃ;
Pañca kappasatānāhaṃ, ekarattiṃ anussari’nti. – gāthāvayaṃ abhāsi;

Tattha **satimā**ti sayāṃ samudāgamanasampannāya satipaṭṭhānabhāvanāpāripūriyā sativepullappattiyā ca satimā. **Pañṇavā**ti chaḷabhiñṇāpāripūriyā pañṇāvepullappattiyā ca pañṇavā. Bhinnakilesatāya **bhikkhu**. Saddhādibalānañceva catubbidhasammappadhānavīriyassa ca saṃsiddhipāripūriyā **āradhābalavīriyo**. Saddhādīnañhettha balaggahaṇena gahaṇaṃ satipi satiādīnaṃ balabhāve, yathā “gobalibaddhā puñṇāñṇasambhārā’nti. **Pañca kappasatānāhaṃ, ekarattiṃ anussarinti** ekarattiṃ viya anussariṃ. Viya-saddo hi idha luttaniddiṭṭho, etena pubbenivāsānussatiñāṇe attano ñāṇavasābhāvaṃ dīpeti.

Idāni yāya paṭipattiyā attano satimantādibhāvo sātisaṃyāṃ pubbenivāsāñāṇaṃ siddhaṃ, taṃ dassetuṃ “**cattāro**’ntiādīnā dutiyaṃ gāthamāha. Tattha **cattāro satipaṭṭhāneti** kāyānupassanādike attano visayabhedena catubbidhe lokiyalokuttaramissake satisaṅkhāte satipaṭṭhāne. **Sattā**ti satta bojjhaṅge. **Aṭṭhā**ti aṭṭha maggaṅgāni. Satipaṭṭhānesu hi suppatiṭṭhitacittassa satta bojjhaṅgā bhāvanāpāripūriṃ gatā eva honti, tathā ariyo aṭṭhaṅgiko maggo. Tenāha dhammasenāpati – “catūsu satipaṭṭhānesu suppatiṭṭhitacittā satta bojjhaṅge yathābhūtaṃ bhāvetvā’ntiādīhi (dī. ni. 3.143) sattakoṭṭhāsikesu sattatiṃsāya bodhipakkhiyadhammesu ekasmiṃ koṭṭhāse bhāvanāpāripūriṃ gacchante itare agacchantā nāma natthīti. **Bhāvayanti** bhāvanāhetu. Sesāṃ vuttanayaṃeva.

Sobhitattheragāthāvaṇṇanā niṭṭhitā.

4. Valliyattheragāthāvaṇṇanā

Yaṃ kiccaṃ dalhavīriyenātiādīkā āyasmato valliyattherassa gāthā. Kā uppatti? Ayampi purimabuddhesu katādhikāro tattha tattha bhāve puñṇāni upacinanto sumedhassa bhāgavato kāle brāhmaṇakule nibbattivā viññutaṃ patto vijjāsippesu nipphattiṃ gato asītikoṭivibhavaṃ pahāya tāpasapabbajjaṃ pabbajitvā pabbatapāde arañṇāyatane ekissā nadiyā tīre assamaṃ kāretvā viharanto attano anuggaṇhanatthaṃ upagataṃ satthāraṃ disvā pasannamānaso ajinacammaṃ pattharivā adāsi. Tattha nisinnaṃ bhāgavantaṃ pupphehi ca candanena ca pūjetvā ambaphalāni datvā pañcapaṭiṭṭhitena vandi. Tassa bhāgavā nisinnāsanasampattiṃ pakāsento anumodanaṃ vatvā pakkāmi. So tena puñṇakamma devamanussesu saṃsaranto imasmiṃ buddhuppāde vesāliyaṃ brāhmaṇakule nibbattivā “kaṇhamitto’nti laddhanāmo vayappatto satthu vesāligamane buddhānubhāvaṃ disvā paṭiladdhasaddho mahākaccānattherassa santike pabbajī. So mandapañño dandhaparakkamo ca hutvā ciraṃ kālaṃ viññuṃ sabrahmacāriṃ nissāyeva vasati. Bhikkhū “yathā nāma valli rukkhādīsu kiñci anissāya vaḍḍhituṃ na sakkoti, evamayampi kañci paṇḍitaṃ anissāya vaḍḍhituṃ na sakkoti’nti **valliyot**veva samudācarimsu. Aparabhāge pana veṇudattatheraṃ upasaṅkamitvā tassa ovāde ṭhatvā sato sampajāno hutvā viharanto ñāṇassa paripākaṃ gatattā paṭipattikkamaṃ therāṃ pucchanto –

167. “Yaṃ kiccaṃ daḷhavīriyena, yaṃ kiccaṃ boddhumicchatā;
Karissaṃ nāvarajjhissam, passa vīriyaṃ parakkamaṃ.

168. “Tvañca me maggamakkhāhi, añjasaṃ amatogadham;
Ahaṃ monena monissaṃ, gaṅgāsotova sāgara”nti. – gāthādvayaṃ abhāsi;

Tattha **yaṃ kiccaṃ daḷhavīriyenā**ti daḷhena vīriyena thirena parakkamena, daḷhavīriyena vā purisadhoraḷhena yaṃ kiccaṃ kātappaṃ paṭipajjitappaṃ. **Yaṃ kiccaṃ boddhumicchatā**ti cattāri ariyasaccāni nibbānameva vā boddhuṃ bujjhituṃ icchantena paṭivijjhitaḷhena yaṃ kiccaṃ karaṇīyaṃ. **Karissaṃ nāvarajjhissanti** tamahaṃ dāni karissaṃ na virādhessaṃ, yathānusiṭṭhaṃ paṭipajjissāmi. **Passa vīriyaṃ parakkamanti** yathā paṭipajjamāne dhamme vidhinā īraṇato “**vīriyaṃ**”, paraṃ paraṃ ṭhānaṃ akkamanato “**parakkamo**”ti ca laddhanāmaṃ sammāvāyāmaṃ passa na saddhamevāti attano kattukāmataṃ dasseti.

Tvañcāti kammatṭhānadāyakaṃ kalyāṇamittaṃ ālapati. **Meti** mayhaṃ. **Maggamakkhāhī**ti ariyamaggaṃ kathehi, lokuttaramaggasampāpakaṃ catusaccakammatṭhānaṃ kathehīti attho. **Añjasanti** ujukaṃ majjhimaṃ paṭipadābhāvena antadvayassa anupagamanato. Amate nibbāne sampāpakabhāvena paṭiṭṭhitattā **amatogadham**. **Monenā**ti ñāṇena maggapaññāya. **Monissanti** jānissaṃ nibbānaṃ paṭivijjhissaṃ pāpuṇissaṃ. **Gaṅgāsotova sāgaranti** yathā gaṅgāya soto sāgaraṃ samuddaṃ avirajjhanto ekaṃsato ogāhati, evaṃ “ahaṃ kammatṭhānaṃ anuyuñjanto maggaññāṇena nibbānaṃ adhigamissāmi, tasmā taṃ kammatṭhānaṃ me ācikkhathā”ti therāṃ kammatṭhānaṃ yāci.

Taṃ sutvā veṇudattatthero tassa kammatṭhānaṃ adāsi. Sopi kammatṭhānaṃ anuyuñjanto nacirasseva vipassanaṃ ussukkāpetvā arahattaṃ pāpuṇi. Tena vuttaṃ **apadāne** (apa. therā 2.49.75-105)

“Pañca kāmagaṇe hitvā, piyarūpe manorame;
Asīti koṭiyo hitvā, pabbajim anagāriyaṃ.

“Pabbajitvāna kāyena, pāpakammaṃ vivajjayim;
Vacīduccaritaṃ hitvā, nadīkūle vasāmaṃ.

“Ekakaṃ maṃ viharantaṃ, buddhaseṭṭho upāgami;
Nāhaṃ jānāmi buddhoti, akāsiṃ paṭisanthāraṃ.

“Karitvā paṭisanthāraṃ, nāmagottamapucchahaṃ;
Devatānusi gandhabbo, adu sakko purindado.

“Ko vā tvaṃ kassa vā putto, mahābrahmā idhāgato;
Virocesi disā sabbā, udayaṃ sūriyo yathā.

“Sahassārāni cakkāni, pāde dissanti mārisa;
Ko vā tvaṃ kassa vā putto, kathaṃ jānemu taṃ mayaṃ.

“Nāmagottaṃ pavedehi, saṃsayam apanehi me;
Namhi devā na gandhabbo, namhi sakko purindado.

“Brahmabhāvo ca me natthi, etesaṃ uttamo ahaṃ;
Atīto visayaṃ tesam, dālayim kāmabandhanaṃ.

“Sabbe kilese jhāpetvā, patto sambodhimuttamaṃ;

Tassa vācaṃ suṇitvāhaṃ, idaṃ vacanamabravim.

“Yadi buddhosi sabbaññū, nisīda tvaṃ mahāmune;
Tamahaṃ pūjayissāmi, dukkhassantakaro tuvaṃ.

“Pattharivājinacammaṃ, adāsi satthuno ahaṃ;
Nisīdi tattha bhagavā, sīhova girigabbhare.

“Khippaṃ pabbatamāruya, ambassa phalamaggahim;
Sālakalyāṇikaṃ pupphaṃ, candanañca mahārahaṃ.

“Khippaṃ paggayha taṃ sabbaṃ, upetvā lokanāyakaṃ;
Phalaṃ buddhassa datvāna, sālappupphamapūjayim.

“Candanaṃ anulimpitvā, avandiṃ satthuno ahaṃ;
Pasannacitto sumano, vipulāya ca pītiyā.

“Ajinamhi nisīditvā, sumedho lokanāyako;
Mama kammaṃ pakittesi, hāsayinganto mamaṃ tadā.

“Iminā phaladānena, gandhamālehi cūbhayaṃ;
Pañcavīse kappasate, devaloke ramissati.

“Anūnamanasaṅkappo, vasavattī bhavissati;
Chabbīsaticappasate, manussattaṃ gamissati.

“Bhavissati cakkavattī, cāturanto mahiddhiko;
Vebhāraṃ nāma nagaraṃ, vissakammena māpitaṃ.

“Hessati sabbasovaṇṇaṃ, nānāratanabhūsitāṃ;
Eteneva upāyena, saṃsarissati so bhava.

“Sabbattha pūjito hutvā, devatte atha mānuse;
Pacchime bhava sampatte, brahmabandhu bhavissati.

“Agārā abhinikkamma, anagārī bhavissati;
Abhiññāpāragū hutvā, nibbāyissatināsavo.

“Idaṃ vatvāna sambuddho, sumedho lokanāyako;
Mama nijjhāyamānassa, pakkāmi anilañjase.

“Tena kammaṃ sukatena, cetanāpaṇidhīhi ca;
Jahitvā mānusaṃ dehaṃ, tāvatimsamagacchahaṃ.

“Tusitato cavitvāna, nibbattiṃ mātukucchiyaṃ;
Bhoge me ūnatā natthi, yamhi gabbhe vasāmahaṃ.

“Mātukucchigate mayi, annapānañca bhojanaṃ;
Mātuyā mama chandena, nibbattati yadicchakaṃ.

“Jātiyā pañcavassena, pabbajim anagāriyam;
Oropitamhi kesamhi, arahattamapāpuṇim.

“Pubbakammaṃ gavesanto, orena nāddasaṃ aham;
Tiṃsakappasahassamhi, mama kammamanussarim.

“Namo te purisājañña, namo te purisuttama;
Tava sāsanaṃāgamma, pattomhi acalaṃ padaṃ.

“Tiṃsakappasahassamhi, yaṃ buddhamabhipūjayim;
Duggatiṃ nābhijānāmi, buddhapūjayidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.
Arahattaṃ pana patvā aññaṃ byākaronto thero imāyeva gāthā abhāsīti.

Valliyattheragāthāvaṇṇanā niṭṭhitā.

5. Vītasokattheragāthāvaṇṇanā

Kese me olikhissantītiādikā āyasmato vītasokattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto siddhatthassa bhagavato kāle brāhmaṇakule nibbattivā brāhmaṇaṃ vijjāsippesu nipphattiṃ gato kāme pahāya isipabbajjaṃ pabbajitvā mahatā isigaṇena parivuto araññe vasanto buddhuppādaṃ sutvā haṭṭhatuṭṭho “udumbarapupphasadisā dullabhadassanā buddhā bhagavanto, idāneva upagantabbā”ti mahatiyā parisāya saddhiṃ sathhāraṃ daṭṭhuṃ gacchanto diyaḍḍhajojane sese byādhiko hutvā buddhagatāya saññāya kālaṅkato devesu uppajjitvā aparāparaṃ devamanussesu saṃsaranto imasmiṃ buddhuppāde aṭṭhārasavassādhikānaṃ dvinnāṃ vassasatānaṃ matthake dhammāsokarañño kaniṭṭhabhātā hutvā nibbatti, tassa **vītasokoti** nāma ahoṣi. So vayappatto khattiyakumārehi sikkhitabbavijjāsippesu nipphattiṃ gato giridattattheraṃ nissāya gihibhūto suttantapiṭake abhidhammapiṭake ca visārado hutvā ekadivasaṃ massukammasamaye kappakassa hatthato ādāsaṃ gahetvā kāyaṃ olokeno valitapalitādīni disvā sañjātasamvego vipassanāya cittaṃ otāretvā bhāvanaṃ ussukkāpetvā tasmimyeva āsane sotāpanno hutvā giridattattherassa santike pabbajitvā nacirasseva arahattaṃ pāpuṇi. Tena vuttaṃ **apadāne** (apa. thera 2.49.9-26) –

“Ajjhāyako mantadharo, tiṇṇaṃ vedāna pāragū;
Lakkhaṇe itihāse ca, sanighaṇḍusakeṭubhe.

“Nadīsotapaṭibhāgā, sissā āyanti me tadā;
Tesāhaṃ mante vācemi, rattindivamatandito.

“Siddhattho nāma sambuddho, loke uppajji tāvade;
Tamandhakāraṃ nāsetvā, ñāṇālokaṃ pavattayi.

“Mama aññataro sisso, sissānaṃ so kathesi me;
Sutvāna te etamatthaṃ, ārocesuṃ mamaṃ tadā.

“Buddho loke samuppanno, sabbaññū lokanāyako;
Tassānuvattati jano, lābho amhaṃ na vijjati.

“Adhiccuppattikā buddhā, cakkhumanto mahāyasā;
Yaṃnūnāhaṃ buddhasetthaṃ, passeyyaṃ lokanāyakaṃ.

“Ajinaṃ me gahetvāna, vākacīraṃ kamaṇḍalum;
Assamā abhinikkhamma, sisse āmantayim ahaṃ.

“Odumbarikapupphaṃva, candamhi sasakaṃ yathā;
Vāyasānaṃ yathā khīraṃ, dullabho lokanāyako.

“Buddho lokamhi uppanno, manussattampi dullabhaṃ;
Ubhosu vijjamānesu, savanañca sudullabhaṃ.

“Buddho loka samuppanno, cakkhuṃ lacchāma no bhavaṃ;
Etha sabbe gamissāma, sammāsambuddhasantikaṃ.

“Kamaṇḍaludharā sabbe, kharājīnanivāsino;
Te jaṭābhārabharitā, nikkhamuṃ vipinā tadā.

“Yugamattaṃ pekkhamānā, uttamattaṃ gavesino;
Āsattidosarahitā, asambhītāva kesarī.

“Appakiccā aloluppā, nipakā santavuttino;
Uñchāya caramānā te, buddhaseṭṭhamupāgamuṃ.

“Diyāḍḍhayojane sese, byādhi me upapajjatha;
Buddhaseṭṭhaṃ saritvāna, tattha kālaṅkato ahaṃ.

“Catunnavutito kappe, yaṃ saññamalabhiṃ tadā;
Duggatiṃ nābhijānāmi, buddhasaññāyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.
Arahattaṃ pana patvā aññaṃ byākaronto –

169. “Kese me olikhissanti, kappako upasaṅkama;
Tato ādāsamādāya, sarīraṃ paccavekkhisam.

170. “Tuccho kāyo adissittha, andhakāre tamo byagā;
Sabbe coḷā samucchinnā, natthi dāni punabbhavo’nti. – gāthādvayaṃ abhāsi;

Tattha **kese me olikhissanti, kappako upasaṅkamā**ti gihikāle massukammasamaye “mama kese olikhissam kappemī”ti kesādīnaṃ chedanādivasena kappanato kappako nhāpito maṃ upagacchi. **Tatoti** kappakato. **Sarīraṃ paccavekkhisanti** sabbakāyike ādāse palitavalitamukhanimittādidassanamukhena “abhibhūto vata jarāya me kāyo”ti jarābhībhūtaṃ attano sarīraṃ paccavekkhim. Evaṃ paccavekkhato ca **tuccho kāyo adissittha** niccadhuvasukhasabhāvādīhi ritto hutvā me kāyo adissatha paññāyi. Kasmā? **Andhakāre tamo byagā** yena ayonisomanasikārasaṅkhātena tamasā attano kāye andhagatā vijjamānampi asubhādisabhāvaṃ apassantā avijjamānaṃ subhādiākāraṃ gaṇhanti, tasmim andhakāre andhakarapaṭṭhāne kāye yonisomanasikārasaṅkhātena ñāṇālokena avijjātamo vigato, tato eva **sabbe coḷā samucchinnā** corā viya kusalabhaṇḍacchedanato, sādhuhi alātabbato asaṅghetabbato saṅkarakūṭādīsu chaḍḍitapilotikakhaṇḍaṃ viya issarajanena ariyajana jīgucchitabbatāya coḷā viyāti vā “coḷā”ti laddhanāmā kilesā samucchinnā. Aggamaggena samugghāṭitattā eva ca nesam **natthi dāni punabbhavo** āyatiṃ punabbhavābhiniḃbatti natthīti.

Vītasokattheragāthāvaṇṇanā niṭṭhitā.

6. Puṇṇamāsattheragāthāvaṇṇanā

Pañca nīvaraṇe hitvātiādikā āyasmato puṇṇamāsattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto tissassa bhagavato kāle kulagehe nibbattivā viññutaṃ patto ekadivasam satthari araññe viharante paṃsukūlacīvaram dumasākhāya laggetvā gandhakuṭiṃ pavitṭhe dhanuhattho gahanam pavitṭho satthu paṃsukūlam disvā pasannamānaso dhanuṃ nikkhipivā buddhaguṇe anussarivā paṃsukūlam vandi. So tena puññakammena devamanussesu saṃsaranto imasmiṃ buddhuppāde sāvattiyam kuṭumbiyakule nibbatti. Tassa kira jātadivase tasmim gehe sabbabhājanāni suvaṇṇaratanamayehi māsehi paripuṇṇāneva ahesuṃ. Tenassa **puṇṇamāsot**veva nāmaṃ akaṃsu. So vayappatto dārapariggahaṃ katvā ekasmiṃ putte uppanne gharāvāsam pahāya pabbajivā gāmakāvāse vasanto ghaṭento vāyamanto chaḷabhiñño ahoṣi. Tena vuttaṃ **apadāne** (apa. therā 2.49.1-8) –

“Tisso nāmāsi bhagavā, sayambhū aggapuggalo;
Paṃsukūlam ṭhapetvāna, vihāram pāvisi jino.

“Vinataṃ dhanumādāya, bhakkhatthāya carim ahaṃ;
Maṇḍalaggaṃ gahetvāna, kānanaṃ pāvisim ahaṃ.

“Tatthaddasaṃ paṃsukūlam, dumagge laggitaṃ tadā;
Cāpaṃ tattheva nikkhippa, sire katvāna añjalim.

“Pasannacitto sumano, vipulāya ca pītiyā;
Buddhaseṭṭhaṃ saritvāna, paṃsukūlam avandahaṃ.

“Dvenavute ito kappe, paṃsukūlamavandahaṃ;
Duggatiṃ nābhijānāmi, vandanāya idaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Chaḷabhiñño pana hutvā sāvattiṃ upagantvā satthāram vanditvā susāne vasati, tassa ca acirāgatasseva sato putto kālamakāsi. Dārakamātā therassa āgatabhāvaṃ sutvā, “mā idaṃ aputtakam sāpateyyaṃ rājāno hareyyu’nti taṃ uppabbājetukāmā mahatā parivārena therassa santikaṃ gantvā paṭisanthāram katvā palobhetuṃ ārabhi. Thero attano vītarāgabhāvajānāpanatthaṃ ākāse ṭhatvā attano paṭipattikittanamukhena tassā dhammaṃ desento –

171. “Pañca nīvaraṇe hitvā, yogakkhemassa pattiya;
Dhammādāsaṃ gahetvāna, ñāṇadassanamattano.

172. “Paccavekkhiṃ imaṃ kāyaṃ, sabbaṃ santarabāhiraṃ;
Ajjhattaṅca bahiddhā ca, tuccho kāyo adissathā’nti. –

Gāthādvayaṃ abhāsi.

Tattha **pañca nīvaraṇe hitvā**ti kāmaccandādike pañca nīvaraṇe pahāya jhānādhigamena viddhamsetvā. **Yogakkhemassa pattiya**ti kāmāyogādīhi catūhi yogehi khemassa anupaddutassa nibbānassa adhigamāya. **Dhammādāsanti** dhammabhūtaṃ ādāsaṃ. Yathā hi ādāso oloketassa rūpakāye guṇāguṇaṃ ādaṃseti, evaṃ vipassanāsānkhāto dhammānaṃ sāmāññavisesāvabodhanato ñāṇadassanabhūto dhammādāso vipassantassa vodānaṃkilesadhammavibhāvanena tappahānasādhanena ca visesato nāmakāye guṇaṃ ādaṃseti. Tenāha –

“Dhammādāsaṃ gahetvāna, ñāṇadassanamattano;

Paccavekkhiṃ imaṃ kāyaṃ, sabbaṃ santarabāhira’’nti. –

Imaṃ kāyaṃ dhammasamūhaṃ mama attabhāvaṃ ajjhattikabāhirāyatanabhāvato santarabāhiraṃ sabbaṃ anavasesaṃ dhammādāsaṃ gahetvā ‘‘anicca’’ntipi ‘‘dukkha’’ntipi ‘‘anattā’’ntipi patavekkhiṃ ñānacakkhunā passim. Evaṃ passatā ca mayā **ajjhattañca bahiddhā cāti** attano santāne parasantāne ca **tuccho kāyo adissatha** niccasārādivirahito tuccho khandhapañcakasaṅkhāto attabhāvakāyo ñānacakkhunā yāthāvato apassittha. Sakalampi hi khandhapañcakaṃ ‘‘avijjānivutassa, bhikkhave, bālassa taṇhāsaṃyuttassa evamayaṃ kāyo samudāgato’’tiādīsu (saṃ. ni. 2.19) ‘‘kāyo’’ti vuccati. ‘‘Adissathā’’ti ca iminā yadeva kāye daṭṭhabbaṃ, taṃ diṭṭhaṃ, na dānissa kiñci mayā passitabbaṃ atthīti katakiccatāṃ dassento aññaṃ byākāsi. Evaṃ thero imāhi gāthāhi purāṇadutiyikāya dhammaṃ desetvā taṃ saraṇesu ca sīlesu ca sampatiṭṭhāpetvā uyyojesi.

Puṇṇamāsattheragāthāvaṇṇanā niṭṭhitā.

7. Nandakattheragāthāvaṇṇanā

Yathāpi bhaddo ājañño āyasmato nandakattherassa gāthā. Kā uppatti? Ayampi purimabuddhesu katādhikāro tattha tattha bhava puññāni karonto sikhissa bhagavato kāle paccantadesa uppajjitvā viññutaṃ patto vanacāriko hutvā vicaranto ekadivasāṃ satthu caṅkamanatṭhānaṃ disvā pasannacitto vālukā okiri. So tena puññakammena devamanussesu saṃsaranto imasmim buddhuppāde campāyaṃ gahapatikule nibbatti, tassa **nandakoti** nāmaṃ akamsu. Jeṭṭhakabhātā panassa bhārato nāma. Tassa pubbayogo anantaravatthusmim āvibhavissati. Te ubhopi viññutaṃ patvā āyasmantaṃ soṇaṃ koḷivisaṃ pabbajitaṃ sutvā ‘‘soṇopi nāma tathāsukhumālo pabbaji, kimaṅgaṃ pana maya’’nti pabbajimsu. Tesu bhārato nacirasseva vipassanaṃ vaḍḍhetvā chaḷabhiñño ahoṣi. Nandako pana kilesānaṃ balavabhāvena tāva vipassanaṃ ussukkāpetuṃ nāsakkhi, vipassanāya kammaṃ karoti eva. Athassa bhāratatthero āsayaṃ ñatvā avassayo bhavitukāmo taṃ pacchāsamaṇaṃ katvā vihārato nikkhamitvā maggasaṃpāpe nisino vipassanākathaṃ kathesi.

Tena ca samayena sakaṭasatthe gacchante eko sakaṭe yutto goṇo cikkhallaṭṭhāne sakaṭaṃ uddharitūṃ asakkoṇo paripati. Tato naṃ satthavāho sakaṭā mocetvā tiṇaṅga pānīyaṅga datvā parissamaṃ apanetvā puna dhure yojesi. Tato goṇo vūpasantaparissamo laddhabalo taṃ sakaṭaṃ cikkhallaṭṭhānato uddharitvā thale patiṭṭhāpesi. Atha bhāratatthero nandakassa ‘‘passasi no tvaṃ, āvuso nandaka, imassa kamma’’nti taṃ nidassetvā tena ‘‘passāmi’’ti vutte ‘‘imamatthaṃ suṭṭhu upadhārehī’’ti āha. Itaro ‘‘yathāyaṃ goṇo vūpasantaparissamo pañkaṭṭhānato bhāraṃ ubbhāti, evaṃ mayāpi saṃsārapaṅkato attā uddharitabbo’’ti tamevārammaṇaṃ katvā vipassanāya kammaṃ karonto nacirasseva arahattaṃ pāpuṇi. Tena vuttaṃ **apadāne** (apa. thera 2.48.90-95) –

‘‘Migaluddo pure āsiṃ, araññe kānane ahaṃ;
Vātamaṃ gavesanto, caṅkamaṃ addasaṃ ahaṃ.

‘‘Ucchaṅgena pulinaṃ gayha, caṅkame okiriṃ ahaṃ;
Pasannacitto sumano, sugatassa sirīmato.

‘‘Ekatiṃse ito kappe, pulinaṃ okiriṃ ahaṃ;
Duggatiṃ nābhijānāmi, pulinassa idaṃ phalaṃ.

‘‘Kilesā jhāpitā mayhaṃ...pe... kataṃ buddhassa sāsana’’nti.
Arahattaṃ pana patvā attano jeṭṭhabhātikassa bhāratattherassa santike aññaṃ byākaronto –

173. ‘‘Yathāpi bhaddo ājañño, khalitvā patitiṭṭhati;
Bhiyyo laddhāna saṃvegaṃ, adīno vahate dhuraṃ.

174. “Evaṃ dassanasampannaṃ, sammāsambuddhasāvakaṃ;
Ājānīyaṃ maṃ dhāretha, puttaṃ buddhassa orasa”nti. – gāthādvayaṃ abhāsi;

Tattha **bhiyyo laddhāna saṃvegaṃ, adīno vahate dhuranti** “mayhaṃ jātibalavīriyānaṃ ananucchavikametaṃ yadidaṃ āgatassa bhārassa avahana”nti saṃvegaṃ labhitvā adīno adīnamānaso alīnacitto. “Alīno”ti vā pāṭho, so eva attho. Bhiyyo punappunaṃ bhiyyosomattāya attano dhuraṃ bhāraṃ vahate ubbahati. Sesam heṭṭhā ramaṇīyavīhārittherassa gāthāvaṇṇanāyaṃ vuttanayameva.

Nandakattheragāthāvaṇṇanā niṭṭhitā.

8. Bharatattheragāthāvaṇṇanā

Ehi, nandaka, gacchāmāti āyasmato bharatattherassa gāthā. Kā uppatti? Ayaṃ kira anomadassissa bhagavato kāle kulagehe nibbattitvā viññutaṃ patto ekadivasaṃ manuññadassanaṃ mudusukhasamphassaṃ upāhanadvayaṃ gahetvā gacchanto sathhāraṃ caṅkamantaṃ disvā pasannamānaso upāhanā upanāmetvā, “abhiruhatu bhagavā upāhanā, yaṃ mama assa dīgharattaṃ hitāya sukhāya”ti āha. Abhiruhi bhagavā tassa anuggaṇhanatthaṃ upāhanā. So tena puññakamma devamanussesu saṃsaranto imasmim buddhuppāde campānagare gahapatikule nibbatti, **bharatotissa** nāmaṃ ahoṣi. So viññutaṃ patto soṇattherassa pabbajitabhāvaṃ sutvā “sopi nāma pabbajī”ti sañjātasamvego pabbajitvā katapubbakicco vipassanāya kammaṃ karonto nacirasseva chaḷabhiñño ahoṣi. Tena vuttaṃ **apadāne** (apa. therā 2.48.71-89) –

“Anomadassī bhagavā, lokajetṭho narāsabho;
Divāvihārā nikkhamma, pathamāruhi cakkhumā.

“Pānadhīṃ sukataṃ gayha, addhānaṃ paṭipajjahaṃ;
Tatthaddasāsiṃ sambuddhaṃ, pattikaṃ cārudassanaṃ.

“Sakaṃ cittaṃ pasādetvā, nīharitvāna pānadhīṃ;
Pādāmūle ṭhapetvāna, idaṃ vacanamabraviṃ.

“Abhirūha mahāvīra, sugatinda vināyaka;
Ito phalaṃ labhissāmi, so me attho samijjhatu.

“Anomadassī bhagavā, lokajetṭho narāsabho;
Pānadhīṃ abhirūhitvā, idaṃ vacanamabravi.

“Yo pānadhīṃ me adāsī, pasanno sehi pāṇibhi;
Tamaṃ kittayissāmi, suṇātha mama bhāsato.

“Buddhassa giramaññāya, sabbe devā samāgatā;
Udagacittā sumanā, vedajātā katañjali.

“Pānadhīnaṃ padānena, sukhitoyaṃ bhavissati;
Pañcapaññāsakkhattuñca, devarajjaṃ karissati.

“Sahassakkhattuṃ rājā ca, cakkavattī bhavissati;
Padesarajjaṃ vipulaṃ, gaṇanāto asaṅkhiyaṃ.

“Aparimeyye ito kappe, okkākakulasambhavo;
Gotamo nāma gottena, sathā loke bhavissati.

“Tassa dhammesu dāyādo, oraso dhammanimmito;
Sabbāsave pariññāya, nibbāyissatināsavo.

“Devaloke manusse vā, nibbattissati puññavā;
Devayānapaṭibhāgaṃ, yānaṃ paṭilabhissati.

“Pāsādā sivikā vayhaṃ, hatthino samalaṅkatā;
Rathā vājaññasamyuttā, sadā pātubhavanti me.

“Agārā nikkhamantopi, rathena nikkhamiṃ ahaṃ;
Kesesu chijjamānesu, arahattamaṃpāpuṇiṃ.

“Lābhā mayhaṃ suladdhaṃ me, vāṇijjaṃ suppayojitaṃ;
Datvāna pānadhīṃ ekaṃ, pattomhi acalaṃ padaṃ.

“Aparimeyye ito kappe, yaṃ pānadhīmadāsahaṃ;
Duggatiṃ nābhijānāmi, pānadhissa idaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Chaḷabhiñño pana hutvā attano kaniṭṭhabhātikena nandakattherena heṭṭhā vuttanayena aññābyākaraṇe kate “idāni nandakopi arahā jāto, handa mayaṃ ubhopi satthu santikaṃ gantvā vusitabrahmacariyataṃ nivedessāmāti uppannaṃ parivittakkaṃ nandakattherassa kathento –

175. “Ehi nandaka gacchāma, upajjhāyassa santikaṃ;
Sīhanādaṃ nadissāma, buddhaseṭṭhassa sammukhā.

176. “Yāya no anukampāya, amhe pabbājayī muni;
So no attho anuppatto, sabbasaṃyojanakkhayo’nti. – gāthādvayaṃ abhāsi;

Tattha **nandakā**ti ālapanāṃ. **Ehī**ti tassa attano santikakaraṇaṃ. **Gacchāmā**ti tena attanā ca ekajjhaṃ kātabbakiriyāvacanaṃ, **upajjhāyassā**ti sammāsambuddhassa, sammāsambuddho hi samantacakkhunā buddhacakkhunā ca sattānaṃ āsayānusayacaritādīnaṃ yathābhūtavilokanena sadevakassa lokassa vajjāvajjaṃ upanijjhāyatīti visesato upajjhāyoti vattabbaṃ arahati. Yadatthaṃ gamanaṃ, taṃ dassetuṃ “**sīhanādaṃ nadissāma, buddhaseṭṭhassa sammukhā**”ti āha. Yathābhuccaguṇābhīyāhāratāya abhītanādabhāvato sīhanādaṃ buddhassa sammāsambuddhassa tato eva sabbasattuttamatāya seṭṭhassa, buddhānaṃ vā sāvakaḥādhīnaṃ seṭṭhassa sammukhā purato nadissāmāti attho.

Yathā pana sīhanādaṃ naditukāmo, taṃ dassento “**yāyā**”ti gāthamāha. Tattha **yāyā**ti yadatthaṃ, yāya yadatthānuppattiyāti attho. **Noti** amhākaṃ. **Anukampāyā**ti anuggaṇhanena amhe dvepi **pabbājayī** pabbājesi. **Munī**ti bhagavā. **So no attho anuppattoti** so attho sabbesaṃ saṃyojanānaṃ khayabhūtaṃ arahattaphalaṃ no amhehi anuppatto, adhigatoti attho.

Bharatatheragāthāvaṇṇanā niṭṭhitā.

9. Bhāradvājattheragāthāvaṇṇanā

Nadanti evaṃ sappaññāti āyasmato bhāradvājattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto ito ekatiṃse kappe kulagehe nibbattitvā viññutaṃ patto ekadivasaṃ sumanaṃ nāma paccekabuddhaṃ piṇḍāya carantaṃ disvā pasannamānaso paripakkaṃ vallikārapphalaṃ adāsi. So tena puññakammena devamanussesu saṃsaranto

imasmim buddhuppāde rājagahe brāhmaṇakule nibbattivā gottanāmena **bhāradvājotveva** paññāyittha. So vayappatto gharāvāsam vasanto ekaputtam labhi. Tassa “kaṇhadinno”ti nāmam akāsi. Tassa viññutam pattakāle “tāta, asukassa nāma ācariyassa santike sippam sikkhitvā ehi”ti tam takkasilam pesesi. So gacchanto antarāmagge satthu sāvakaṃ aññataram mahātheram kalyāṇamittam labhitvā tassa santike dhammam sutvā paṭiladdhasaddho pabbajitvā katapubbakicco vipassanāya kammaṃ karonto nacirasseva arahattam pāpuṇi. Tena vuttam **apadāne** (apa. therā 2.48.66-70) –

“Sumano nāma sambuddho, takkarāyam vasī tadā;
Vallikāraphalam gayha, sayambhussa adāsaham.

“Ekatiṃse ito kappe, yam phalam adadim tadā;
Duggatiṃ nābhijānāmi, phaladānassidam phalam.

“Kilesā jhāpitā mayham...pe... katam buddhassa sāsana”nti.

Athassa pitā bhāradvājo veḷuvane viharantaṃ bhagavantaṃ upasaṅkamtivā dhammam sutvā pabbajitvā nacirasseva arahattam sacchākāsi. Atha putto satthāram vanditum rājagaham āgato satthu santike nisinnam pitaram disvā tuṭṭhacitto “pitāpi kho me pabbajito, kiṃ nu kho tena pabbajjākiccam matthakam pāpita”nti vīmaṃsanto khīṇāsavabhāvam ñatvā tam sīhanādam nadāpetukāmo, “sādhu, kho tumhehi katam pabbajantehi, pabbajjākiccam pana matthakam pāpita”nti pucchi. Bhāradvājo puttassa adhigamaṃ dīpento –

177. “Nadanti evam sappaññā, sīhāva girigabbhāre;
Vīrā vijitasāṅgāmā, jetvā māram savāhanam.

178. “Satthā ca pariciṇṇo me, dhammo saṅgho ca pūjito;
Ahañca vitto sumano, puttam disvā anāsava”nti. – gāthādvayam abhāsi;

Tattha **nadantī**ti yathābhuccaguṇābhīyāhārasena abhītanādam nadanti gajjanti. **Evanti** idāni vattabbākāradassanam. **Sappaññāti** aggamaggapaññādhigamena sabbapaññādhigamena sabbapaññāvepullappattā. **Vīrāti** catubbidhasammappadhānavīriyasampannatāya vīrā, tato eva anavasesasamkilesapakhanimmathanena **savāhanam** kilesamāram abhisāṅkhāramāram devaputtamārañca **jetvā** sabbaso **vijitasāṅgāmā** nadanti sappaññāti sambandho.

Evam vijetabbavijayena sīhanādam dassetvā idāni ārādhettabbasamārādhanaena icchitabbasiddhiyā ca tam dassetum, “**satthā ca pariciṇṇo me**”ti dutiyam gāthamāha. Tattha **satthā ca pariciṇṇo meti** mama satthā sammāsambuddho yathānusiṭṭham ovādānusāsānikaraṇena mayā pariciṇṇo upāsito, na dhammādhikaraṇam visositoti adhippāyo. **Dhammo saṅgho ca pūjitoti** navavidhopi lokuttaradhammo, yathāpaṭipattiyāgatamaggānuppattiyā silādiṭṭhisīmaññāgamanaena ariyasāṅgho ca mayā pūjito mānito. **Ahañca vitto sumano, puttam disvā anāsavanti** mama puttam anāsavam sabbaso khīṇāsavam disvā dassanahetu ahampi vitto nirāmisāya pītiyā tuṭṭho, tatoyeva nirāmisena somanassena sumano jātoti attho.

Bhāradvājattheragāthāvaṇṇanā niṭṭhitā.

10. Kaṇhadinnattheragāthāvaṇṇanā

Upāsītā sappurisāti āyasmato kaṇhadinnattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto ito catunavute kappe kulagehe nibbattivā viññutam patto ekadivasam sobhitam nāma paccekabuddham disvā pasannacitto punnāgapupphehi pūjam akāsi. So tena puññakammaena devamanussesu saṃsaranto imasmim buddhuppāde rājagahe brāhmaṇakule nibbattivā **kaṇhadinnoti** laddhanāmo vayappatto upanissayasampattiyā codiyamāno dhammasenāpatim

upasaṅkamtivā dhammaṃ sutvā paṭiladdhasaddho pabbajitvā vipassanaṃ vaḍḍhetvā arahattaṃ pāpuṇi. Tena vuttaṃ **apadāne** (apa. thera 2.48.61-65) –

“Sobhito nāma sambuddho, cittakūṭe vasī tadā;
Gahetvā giripunnāgaṃ, sayambhuṃ abhipūjayiṃ.

“Catunnavutito kappe, yaṃ buddhamabhipūjayiṃ;
Duggatiṃ nābhijānāmi, buddhapūjāyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.
Arahattaṃ pana patvā aññaṃ byākaronto –

179. “Upāsītā sappurisā, sutā dhammā abhiṅhaso;
Sutvāna paṭipajjissaṃ, añjasaṃ amatogadhaṃ.

180. “Bhavarāgahatassa me sato, bhavarāgo puna me na vijjati;
Na cāhu na ca me bhavissati, na ca me etarahi vijjati”ti. –

Gāthādvayaṃ abhāsi.

Tattha **upāsītā**ti paricaritā paṭipattipayirupāsanaṃ payirupāsītā. **Sappurisā**ti santehi sīlādiguṇehi samannāgatā purisā, ariyapuggalā sārīputtattherādayo. Etena purimacakkadvayasampattimattano dasseti. Na hi patirūpadesavāsena vinā sappurisūpanissayo sambhavati. **Sutā dhammā**ti saccapaṭiccasamuppādādīpaṭisamyuttadhammā sotadvārānusārena upadhāritā. Etena attano bāhusaccaṃ dassento pacchimacakkadvayasampattiṃ dasseti. **Abhiṅhasoti** bahuso na kālena kālaṃ. Idañca padaṃ “upāsītā sappurisā”ti etthāpi yojetabbaṃ. **Sutvāna paṭipajjissaṃ, añjasaṃ amatogadhanti** te dhamme sutvā tattha vuttarūpārūpadhamme salakkhaṇādīto pariggahetvā anukkamena vipassanaṃ vaḍḍhetvā amatogadhaṃ nibbānapaṭiṭṭhaṃ taṃsampāpakaṃ añjasaṃ ariyaṃ aṭṭhaṅgikaṃ maggaṃ paṭipajjijjī pāpuṇiṃ.

Bhavarāgahatassa me satoti bhavarāgena bhavataṅhāya anādimati saṃsāre hatassa upaddutassa mama sato samānassa, aggamaggena vā hatabhavarāgassa. **Bhavarāgo puna me na vijjati**ti tato eva puna idāni bhavarāgo me natthi. **Na cāhu na me bhavissati, na ca me etarahi vijjati**ti yadipi pubbe puthujjanakāle sekkhakāle ca me bhavarāgo ahosi, aggamaggappattito pana paṭṭhāya na cāhu na ca ahosi, āyatimpī na me bhavissati, etarahi adhunāpi na ca me vijjati na ca upalabbhati, pahīnoti attho. Bhavarāgavacaneneva cettha tadekaṭṭhatāya mānādīnampi abhāvo vuttoti sabbaso parikkhīṇabhavasamyojanataṃ dasseti.

Kaṇhadinnattheragāthāvaṇṇanā niṭṭhitā.

Tatīyavaggavaṇṇanā niṭṭhitā.

4. Catutthavaggo

1. Migasirattheragāthāvaṇṇanā

Yato ahaṃ pabbajitoti āyasmato migasirattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto kassapassa bhagavato kāle brāhmaṇakule nibbattitvā viññutaṃ patto ekadivasam sathhāraṃ disvā pasannacitto kusaṭṭhakaṃ adāsī. So tena puññakamma devamanussesu saṃsaranto imasmiṃ buddhuppāde kosalaratṭhe brāhmaṇakule paṭisandhiṃ gahetvā migasiranakkhattena jātattā **migasiroti** laddhanāmo vayappatto brāhmaṇānaṃ vijjāsippesu nipphattiṃ

gato chavasīsamantaṃ nāma sikkhi, yaṃ parijappetvā tivassamatthake matānampi sīsaṃ nakhena ākoṭetvā “ayaṃ satto asukaṭṭhāne nibbato”ti jānāti.

So gharāvāsaṃ anicchanto paribbājakapabbajjaṃ pabbajitvā taṃ vijjaṃ nissāya lokena sakkato garukato lābhī hutvā vicaranto sāvattiṃ upagato satthu santikaṃ gantvā attano ānubhāvaṃ pakāsento – “ahaṃ, bho gotama, matānaṃ nibbattaṭṭhānaṃ jānāmi”ti vatvā, “kathaṃ pana tvaṃ jānāsī”ti vutte, “chavasīsāni āharāpetvā mantāṃ parijappetvā nakhena sīsaṃ ākoṭento nirayādikaṃ tehi tehi nibbattaṭṭhānaṃ jānāmi”ti kathesi. Athassa bhagavā parinibbutassa bhikkhuno sīsakapālaṃ āharāpetvā, “kathehi tāva tassa gatīṃ, yassidaṃ sīsakapāla”nti āha. So taṃ kapālaṃ mantāṃ parijappetvā nakhena ākoṭetvā neva antaṃ na koṭiṃ passati. Atha satthārā, “na sakkosi paribbājakā”ti vutte, “upaparikkhissāmi tāvā”ti vatvā punappunaṃ parivattentopi na passateva. Bāhirakamantena hi khīṇāsavassa gatīṃ kathaṃ jānissati, athassa matthakato kacchehi ca sedo mucci. So lajjitvā tuṇhībhūto aṭṭhāsī. Satthā “kilamasi paribbājakā”ti āha. So “āma, kilamāmi, na imassa gatīṃ jānāmi, tumhe pana jānāthā”ti. “Ahaṃ etaṃ jānāmi, ito uttaritarampi jānāmi”ti vatvā “nibbānaṃ gato so”ti āha. Paribbājako “imaṃ vijjaṃ mayhaṃ dethā”ti āha. “Tena hi pabbajā”ti vatvā taṃ pabbājetvā paṭhamaṃ samathakammaṭṭhāne niyojetvā jhānābhīṇāsū patiṭṭhitassa vipassanāya kammaṃ upadisi. So vipassanāya kammaṃ karonto nacirasseva arahattaṃ pāpuṇi. Tena vuttaṃ **apadāne** (apa. therā 2.48.56-60) –

“Kassapassa bhagavato, brāhmaṇassa vusīmato;
Pasannacitto sumano, kusaṭṭhakamadāsahaṃ.

“Imasmimyeva kappasmiṃ, kusaṭṭhakamadāsahaṃ;
Duggatiṃ nābhijānāmi, kusaṭṭhakassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.
Arahattaṃ pana patvā aññaṃ byākaronto –

181. “Yato ahaṃ pabbajito, sammāsambuddhasāsane;
Vimuccamāno uggacchiṃ, kāmādhātum upaccagaṃ.

182. “Brahmuno pekkhamānassa, tato cittaṃ vimucci me;
Akuppā me vimuttīti, sabbasaṃyojanakkhayā”ti. – gāthādvayaṃ abhāsi;

Tattha **yato ahaṃ pabbajito, sammāsambuddhasāsane**ti yato pabhuti ahaṃ pabbajito buddhassa bhagavato sāsane, pabbajitakālato paṭṭhāya. **Vimuccamāno uggacchinti** saṃkilesapakkhato paṭhamaṃ tāva samathavipassanāhi vimuccamāno vodānadhammasavanena uṭṭhahiṃ. Evaṃ uggacchanto **kāmādhātum upaccagaṃ** anāgāmimaggena accantameva kāmādhātum atikkamiṃ.

Brahmuno pekkhamānassa, tato cittaṃ vimucci meti sadevakassa lokassa aggabhūtattā seṭṭhaṭṭhena brahmuno buddhassa bhagavato mahākaruṇāyogena “ayaṃ kulaputto mama sāsane pabbajitvā kathaṃ nu kho paṭipajjati”ti pekkhantassa tato anāgāmimaggādhigamato pacchā aggamaggādhigamena mama cittaṃ sabbasaṃkilesato accantameva mucci. **Akuppā me vimuttīti, sabbasaṃyojanakkhayāti** tathāvimuttacittattā eva sabbesaṃ saṃyojanānaṃ khayā parikkhayā iti evaṃ akuppā me vimuttīti aññaṃ byākāsi.

Migasirattheragāthāvaṇṇanā niṭṭhitā.

2. Sivakattheragāthāvaṇṇanā

Aniccāni gahakānīti āyasmato sivakattherassa gāthā. Kā uppatti? Ayampi purimabuddhesu

katādhikāro tattha tattha bhava puññāni upacinanto vipassissa bhagavato kāle kulagehe nibbattivā viññutaṃ patto ekadivasam bhagavantam piṇḍāya carantam passivā pasannamānaso pattam ādāya kummāsassa pūretvā adāsi. So tena puññakammena devamanussesu saṃsaranto imasmiṃ buddhuppāde rājagahe brāhmaṇakule nibbatti, **sivakotissa** nāmaṃ ahosi. So vayappatto vijjāsippesu nipphattiṃ gato nekkhammajjhāsayatāya kāme pahāya paribbājakapabbajjam pabbajitvā vicaranto sathhāram upasaṅkamitvā dhammam sutvā paṭiladdhasaddho pabbajitvā vipassanāya kammaṃ karonto nacirasseva arahattam pāpuṇi. Tena vuttam **apadāne** (apa. therā 2.56.117-121) –

“Esaṇāya carantassa, vipassissa mahesino;
Rittakam pattam disvāna, kummāsam pūrayim aham.

“Ekanavutito kappe, yam bhikkhamadadiṃ tadā;
Duggatiṃ nābhijānāmi, kummāsassa idam phalam.

“Kilesā jhāpitā mayham...pe... katam buddhassa sāsana”’nti.
Arahattam pana patvā aññaṃ byākaronto –

183. “Aniccāni gahakāni, tattha tattha punappunam;
Gahakāram gavesanto, dukkhā jāti punappunam.

184. “Gahakāraka diṭṭhosi, puna geham na kāhasi;
Sabbā te phāsukā bhaggā, thūṇikā ca vidālītā;
Vimariyādikataṃ cittam, idheva vidhamissatī”’ti. – gāthādvayam abhāsi;

Tattha **aniccāni gahakāni, tattha tattha punappunanti** tasmim tasmim bhava punappunam nibbattamānāni gahakāni attabhāvagehāni na nibbāni anavaṭṭhitāni ittarāni parittakālāni. **Gahakāram gavesantoti** imassa attabhāvagehassa kārakam taṇhāvaḍḍhakim pariyesanto ettakam kālam anuvicariṇti adhippāyo. **Dukkhā jāti punappunanti** idam gahakārakagavesanassa kāraṇavacanam. Yasmā jarābyādhimaraṇamissatāya jāti nāmesā punappunam upagantum dukkhā, na ca sā tasmim aditthe nivattati, tasmā tam gavesanto vicariṇti attho.

Gahakāraka diṭṭhosī idāni pana yena so sakkā daṭṭhum, tena ariyamaggañānacakkhunā gahakāraka diṭṭho asi. **Puna gehanti** puna imasmiṃ saṃsāraṇaṭṭhe attabhāvasaṅkhātam mama geham **na kāhasi** na karissasi. **Sabbā te phāsukā bhaggā** tava sabbā anavasesakilesaphāsukā mayā bhaggā. **Thūṇikā ca vidālītā** idāni tayā kātabbassa attabhāvagehassa avijjāsaṅkhātā kaṇṇikā ca bhinnā. **Vimariyādikataṃ cittanti** mama cittam vigatantaṃ katam, āyatiṃ anuppattidhammataṃ āpāditaṃ. Tato eva **idheva vidhamissati** imasmiṃyeva bhava viddhamissati, carimakacittanirodhena nirujjhissatī attho.

Sivakattheragāthāvaṇṇanā niṭṭhitā.

3. Upavāṇattheragāthāvaṇṇanā

Araham sugatoti āyasmato upavāṇattherassa gāthā. Kā uppatti? Ayam kira padumuttarassa bhagavato kāle daliddakule nibbattivā viññutaṃ patto bhagavati parinibbute tassa dhātuṃ gahetvā manussadevanāgagaruḷakumbhaṇḍayakkhagandhabbehi sattaratanamaye sattayojanike thūpe kate tattha sudhotam attano uttarāsaṅgam veḷagge ābandhitvā dhajam katvā pūjam akāsi. Tam gahetvā abhisammatako nāma yakkhasenāpati devehi cetiyapūjarakkhaṇattham ṭhapito adissamānakāyo ākāse dhārento cetiyam tikkhattum padakkhiṇam akāsi. So tam disvā bhiyyosomattāya pasannamānaso ahosi. So tena puññakammena devamanussesu saṃsaranto imasmiṃ buddhuppāde sāvattiyam brāhmaṇakule nibbattivā **upavāṇoti** laddhanāmo vayappatto jetavanapaṭiggahaṇe buddhānubhāvam disvā

paṭiladdhasaddho pabbajitvā vipassanāya kammaṃ karonto arahattaṃ patvā chaḷabhiñño ahoṣi.
Tena vuttaṃ **apadāne** (apa. therā 2.56.122-178) –

“Padumuttaro nāma jino, sabbadhammāna pāragū;
Jalivā aggikkhandhova, sambuddho parinibbuto.

“Mahājanā samāgama, pūjayitvā tathāgataṃ;
Cittaṃ katvāna sugataṃ, sarīraṃ abhiropayum.

“Sarīrakiccaṃ katvāna, dhātuṃ tattha samānayum;
Sadevamanussā sabbe, buddhathūpaṃ akaṃsu te.

“Paṭhamā kañcanamayā, dutiyā ca maṇimayā;
Tatiyā rūpiyamayā, catutthī phalikāmayā.

“Tattha pañcamikā ceva, lohitaṅkamayā ahu;
Chaṭṭhā masāragallassa, sabbaṃ ratanamayūpari.

“Jaṅghā maṇimayā āsi, vedikā ratanāmayā;
Sabbasoṇṇamayo thūpo, uddhaṃ yojanamuggato.

“Devā tattha samāgantvā, ekato mantayum tadā;
Mayampi thūpaṃ kassāma, lokanāthassa tādino.

“Dhātu āveṇikā natthi, sarīraṃ ekapiṇḍitaṃ;
Imamhi buddhathūpamhi, kassāma kañcukaṃ mayam.

“Devā sattahi ratnehi, aññaṃ vaḍḍhesum yojanaṃ;
Thūpo dviyojanubbedho, timiraṃ byapahanti so.

“Nāgā tattha samāgantvā, ekato mantayum tadā;
Manussā ceva devā ca, buddhathūpaṃ akaṃsu te.

“Mā no pamattā assumha, appamattā sadevakā;
Mayampi thūpaṃ kassāma, lokanāthassa tādino.

“Indanīlaṃ mahānīlaṃ, atho jotirasaṃ maṇiṃ;
Ekato sannipātetvā, buddhathūpaṃ achādayum.

“Sabbam maṇimayaṃ āsi, yāvatā buddhacetiyaṃ;
Tiyojanasamubbedhaṃ, ālokakaraṇaṃ tadā.

“Garulā ca samāgantvā, ekato mantayum tadā;
Manussā devanāgā ca, buddhapūjaṃ akaṃsu te.

“Mā no pamattā assumha, appamattā sadevakā;
Mayampi thūpaṃ kassāma, lokanāthassa tādino.

“Sabbam maṇimayaṃ thūpaṃ, akarum te ca kañcukaṃ;
Yojanaṃ tepi vaḍḍhesum, āyataṃ buddhacetiyaṃ.

“Catuyojanamubbedho, buddhathūpo virocati;
Obhāseti disā sabbā, sataraṃsīva uggato.

“Kumbhaṇḍā ca samāgantvā, ekato mantayum tadā;
Manussā ceva devā ca, nāgā ca garuḷā tathā.

“Paccekaṃ buddhaseṭṭhassa, akaṃsu thūpamuttamaṃ;
Mā no pamattā assumha, appamattā sadevakā.

“Mayampi thūpaṃ kassāma, lokanāthassa tādino;
Ratanehi chādessāma, āyataṃ buddhacetiyaṃ.

“Yojanaṃ tepi vaḍḍhesum, āyataṃ buddhacetiyaṃ;
Pañcayojanamubbedho, thūpo obhāsate tadā.

“Yakkhā tattha samāgantvā, ekato mantayum tadā;
Manussā devanāgā ca, garuḷā ca kumbhaṇḍakā.

“Paccekaṃ buddhaseṭṭhassa, akaṃsu thūpamuttamaṃ;
Mā no pamattā assumha, appamattā sadevakā.

“Mayampi thūpaṃ kassāma, lokanāthassa tādino;
Phalikā chādayissāma, āyataṃ buddhacetiyaṃ.

“Yojanaṃ tepi vaḍḍhesum, āyataṃ buddhacetiyaṃ;
Chayojanikamubbedho, thūpo obhāsate tadā.

“Gandhabbā ca samāgantvā, ekato mantayum tadā;
Manujā devatā nāgā, kumbhaṇḍā garuḷā tathā.

“Sabbe akaṃsu buddhathūpaṃ, mayamettha akārakā;
Mayampi thūpaṃ kassāma, lokanāthassa tādino.

“Vediyo satta katvāna, dhajaṃ chattaṃ akaṃsu te;
Sabbasoṇṇamayaṃ thūpaṃ, gandhabbā kārayum tadā.

“Sattayojanamubbedho, thūpo obhāsate tadā;
Rattindivā na ñāyanti, āloko hoti sabbadā.

“Abhibhonti na tassābhā, candasūrā satārakā;
Samantā yojanasate, padīpopi na pajjali.

“Tena kālena ye keci, thūpaṃ pūjenti mānūsā;
Na te thūpaṃ āruhanti, ambare ukkhipanti te.

“Devehi ṭhapito yakkho, abhisammatanāmako;
Dhajaṃ vā pupphadāmaṃ vā, abhiropeti uttarim.

“Na te passanti taṃ yakkhaṃ, dāmaṃ passanti gacchato;
Evaṃ passitvā gacchantā, sabbe gacchanti suggaṭṭim.

“Viruddhā ye pāvacane, pasannā ye ca sāsane;
Pāṭihīraṃ daṭṭhukāmā, thūpaṃ pūjenti mānusa.

“Nagare haṃsavatiyā, ahosiṃ bhatako tadā;
Āmoditaṃ janaṃ disvā, evaṃ cintesahaṃ tadā.

“Uḷāro bhagavā neso, yassa dhātughare disaṃ;
Imā ca janatā tuṭṭhā, kāraṃ kubbaṃ na tappare.

“Ahampi kāraṃ kassāmi, lokanāthassa tādino;
Tassa dhammesu dāyādo, bhavissāmi anāgate.

“Sudhotam rajakenāham, uttareyyam paṭam mama;
Veḷagge ālaggetvāna, dhajam ukkhipimambare.

“Abhisammatako gayha, ambare hāsi me dhajam;
Vāteritam dhajam disvā, bhiyyo hāsam janasahaṃ.

“Tattha cittaṃ pasādetvā, samaṇaṃ upasaṅkamaṃ;
Taṃ bhikkhuṃ abhivādetvā, vipākaṃ pucchahaṃ dhaje.

“So me kathesi ānandī, pītisañjananaṃ mama;
Tassa dhajassa vipākaṃ, anubhossasi sabbadā.

“Hatthiassarathāpattī, senā ca caturaṅginī;
Parivāressanti taṃ niccaṃ, dhajadānassidaṃ phalaṃ.

“Saṭṭhitūriyasahassāni, bheriyo samalaṅkatā;
Parivāressanti taṃ niccaṃ, dhajadānassidaṃ phalaṃ.

“Chaḷasīti sahasāni, nāriyo samalaṅkatā;
Vicittavattābharaṇā, āmukkamaṇikuṇḍalā.

“Alārapamhā hasulā, susaññā tanumajjhimā;
Parivāressanti taṃ niccaṃ, dhajadānassidaṃ phalaṃ.

“Timsakappasahassāni, devaloke ramissasi;
Asītikkhattuṃ devindo, devarajjam karissasi.

“Sahassakkhattuṃ rājā ca, cakkavattī bhavissati;
Padesarajjam vipulaṃ, gaṇanāto asaṅkhiyaṃ.

“Kappasatasahassamhi, okkākulasambhavo;
Gotamo nāma gottena, sathā loke bhavissati.

“Devalokā cavitvāna, sukkamūlena codito;
Puññakammena saññutto, brahmabandhu bhavissasi.

“Asītikoṭiṃ chaḍḍetvā, dāse kammakare bahū;
Gotamassa bhagavato, sāsane pabbajissasi.

“Ārādhayitvā sambuddhaṃ, gotamaṃ sakyapuṅgavaṃ;
Upavāṇoti nāmena, hessasi satthu sāvako.

“Satasahasse kataṃ kammaṃ, phalaṃ dassesi me idha;
Sumutto saravego, kilese jhāpayiṃ mama.

“Cakkavattissa santassa, cātuddīpissarassa me;
Tīṇi yojanāni sāmanta, ussīyanti dhajā sadā.

“Satasahassito kappe, yaṃ kammamakariṃ tadā;
Duggatiṃ nābhijānāmi, dhajadānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’’nti.

Athāyasmā upavāṇo bhagavato upaṭṭhāko ahosi. Tena ca samayena bhagavato vātābādho uppajji. Therassa ca gihisahāyo devahito nāma brāhmaṇo sāvattiyāṃ paṭivasati. So therāṃ catūhi paccayehi pavedesi. Athāyasmā upavāṇo nivāsetvā pattacīvaramādāya tassa brāhmaṇassa nivesanaṃ upagacchi. Brāhmaṇo “kenaci aññena payojanena thero āgato’’ti ñatvā, “vadeyyātha, bhante, kenattho’’ti āha. Thero tassa brāhmaṇassa payojanaṃ ācikkhanto –

185. “Arahaṃ sugato loke, vātehābādhiko muni;
Sace uṇhodakaṃ atthi, munino dehi brāhmaṇa.

186. “Pūjito pūjaneyyānaṃ, sakkareyyāna sakkato;
Apacitopaceyyānaṃ, tassa icchāmi hātave’’ti. – gāthādvayaṃ abhāsi;

Tassattho – yo imasmiṃ **loke pūjaneyyānaṃ** pūjetabbehi sakkādīhi devehi mahābrahmādīhi ca brahmehi **pūjito, sakkareyyānaṃ** sakkātabbehi bimbisāraḥkosalarājādīhi **sakkato, apaceyyānaṃ** apacāyitabbehi mahesīhi khīṇāsavehi **apacito**, kilesehi ārakattādinā **arahaṃ**, sobhanagamanādinā **sugato** sabbaññū **muni** mayhaṃ satthā devadevo sakkānaṃ atisakko brahmānaṃ atibrahmā, so dāni **vātehi** vātahetu vātakkhobhanimittaṃ **ābādhiko** jāto. **Sace, brāhmaṇa, uṇhodakaṃ atthi, tassa** vātābādhavūpasamanatthaṃ taṃ **hātave** upanetuṃ **icchāmīti**. Taṃ sutvā brāhmaṇo uṇhodakaṃ tadanurūpaṃ vātārahaṇca bhesajjaṃ bhagavato upanāmesi. Tena ca satthu rogo vūpasami. Tassa bhagavā anumodanaṃ akāsīti.

Upavāṇattheragāthāvaṇṇanā niṭṭhitā.

4. Isidinnattheragāthāvaṇṇanā

Diṭṭhā mayāti āyasmato isidinnattherassa gāthā. Kā uppatti? Ayampi purimabuddhesu katādhikāro tattha tattha bhava puññāni karonto vipassissa bhagavato kāle kulagehe nibbattitvā viññutaṃ patto bījanīṃ gahetvā bodhiyā pūjaṃ akāsi. So tena puññakamma devamanussesu saṃsaranto imasmiṃ buddhuppāde sunāparantajanapade seṭṭhikule nibbattitvā **isidinnoti** laddhanāmo vayappatto satthu candanamāḷapaṭiggahaṇe pāṭihāriyaṃ disvā pasannamānaso satthāraṃ upasaṅkamtivā dhammaṃ sutvā sotāpanno hutvā agāraṃ ajjhāvasati. Tassa hitānukampinī devatā taṃ codentī –

187. “Diṭṭhā mayā dhammadharā upāsakā, kāmā aniccā iti bhāsamānā;
Sārattarattā maṇikuṇḍalesu, puttesu dāresu ca te apekkhā.

188. “Addhā na jānanti yatodha dhammaṃ, kāmā aniccā iti cāpi āhu;
Rāgaṇca tesāṃ na balatthi chettuṃ, tasmā sitā puttadāraṃ dhanañcā’’ti. –

Gāthādvayamabhāsi.

Tattha **diṭṭhā mayā dhammadharā upāsakā, kāmā aniccā iti bhāsamānā**ti idhekacce pariyattidhammadharā upāsakā mayā diṭṭhā, pariyattidhammadharattā eva “kāmā nāmete aniccā dukkhā vipariṇāmadhammā”ti kāmesu ādīnavapaṭisaṃyuttaṃ dhammaṃ bhāsamānā, sayam pana **sārattarattā maṇikuṇḍalesu, puttesu dāresu ca te apekkhā**ti sārattā hutvā bahalarāgarattā maṇisu kuṇḍalesu ca, maṇicitesu vā kuṇḍalesu, puttesu puttadhītāsu dāresu ca adhigatasnehā, aññaṃ bhaṇantā aññaṃ karontā diṭṭhā mayāti attho.

Yatoti yasmā te upāsakā sārattarattā maṇikuṇḍalesu puttesu dāresu ca apekkhavanto, tasmā **idha** imasmiṃ buddhasāsane **dhammaṃ** yāthāvato **addhā** ekamsena **na jānanti**. Evaṃ bhūtā ca “**kāmā aniccā**”**iti cāpi āhu** ahoṣi, sattapakati vicittasabhāvāti adhippāyo. **Rāgañca tesam na balatthi chettunti** tesam upāsakānaṃ yasmā rāgaṃ chettuṃ samucchindituṃ tādisaṃ ñāṇabalaṃ natthi, **tasmā** tena kāraṇena **sitā** taṇhāvasena nissitā **puttadāraṃ dhanañca** allīnā na vissajjentīti sabbametam devatā taṃyeva upāsakaṃ uddissa aññāpadesena kathesi. Tam sutvā upāsako saṃvegajāto pabbajitvā nacirasseva arahattaṃ pāpuṇi. Tena vuttaṃ **apadāne** (apa. thera 2.48.46-50) –

“Vipassino bhagavato, bodhiyā pādaputtame;
Sumano bījaniṃ gayha, abījiṃ bodhimuttamaṃ.

“Ekanavutito kappe, abījiṃ bodhimuttamaṃ;
Duggatiṃ nābhijānāmi, bījanāya idaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.
Arahattaṃ pana patvā aññaṃ byākaronto imā eva gāthā abhāsīti.

Isidinnattheragāthāvaṇṇanā niṭṭhitā.

5. Sambulakaccānattheragāthāvaṇṇanā

Devo cāti āyasmato sambulakaccānattherassa gāthā. Kā uppatti? Ayampi purimabuddhesu katādhikāro tattha tattha bhava puññāni karonto ito catunavutikapamatthake kulagehe nibbattitvā viññutaṃ patto ekadivasam sataraṃsiṃ nāma paccekabuddhaṃ nirodhā vuṭṭhahitvā piṇḍāya carantaṃ disvā pasannamānaso tālaphalaṃ adāsī. So tena puññakammaena devamanussesu saṃsaranto imasmiṃ buddhuppāde magadharaṭṭhe gahapatikule nibbattitvā “sambulo”ti laddhanāmo kaccānagottatāya **sambulakaccānoti** paññāyittha.

So vayappatto satthu santike dhammaṃ sutvā paṭiladdhasaddho pabbajitvā himavantasamīpe bheravāya nāma pabbataguhāyaṃ vipassanāya kammaṃ karonto viharati. Athekadivasam mahā akālamegho satapaṭalasaṃsapaṭalo thanento gajjanto vijjullatā nicchārento gaḷagaḷāyanto vuṭṭhahitvā vassituṃ ārabhi, asaniyo phaliṃsu. Tam saddaṃ sutvā acchataracchuvanamahiṃsahatthiādayo bhītatasitā bhitaravaṃ viraviṃsu. Thero pana āradhāvipassanattā kāye jīvite ca nirapekkho vigatalomaḥso tam acintento vipassanāyameva kammaṃ karonto ghammāpagamena utusappāyalābhena samāhitacitto tāvadeva vipassanaṃ usukkāpetvā saha abhiññāhi arahattaṃ pāpuṇi. Tena vuttaṃ **apadāne** (apa. thera 2.51.85-90) –

“Sataraṃsī nāma bhagavā, sayambhū aparājito;
Vivekā vuṭṭhahitvāna, gocarāyābhinikkhāmi.

“Phalahattho ahaṃ disvā, upagacchiṃ narāsabhaṃ;
Pasannacitto sumano, tālaphalaṃ adāsahaṃ.

“Catunnavutito kappe, yaṃ phalaṃ adadiṃ tadā;
Duggatiṃ nābhijānāmi, phaladānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’’nti.

Arahattaṃ pana patvā attano paṭipattiṃ paccavekkhitvā somanassajāto udānavasena aññaṃ byākaronto –

189. “Devo ca vassati, devo ca gaḷagaḷāyati,
Ekako cāhaṃ bherave bile viharāmi;
Tassa mayhaṃ ekakassa bherave bile viharato,
Natthi bhayaṃ vā chambhitattaṃ vā lomahaṃso vā.

190. “Dhammatā mamesā yassa me, ekakassa bherave bile;
Viharato natthi bhayaṃ vā, chambhitattaṃ vā lomahaṃso vā’’ti. –

Gāthādvayaṃ abhāsi.

Tattha **devo ca vassati, devo ca gaḷagaḷāyatī**ti devo megho vassati ca, “gaḷagaḷā’’ti ca karonto gajjatiṃ attho. Gajjantassa hi anukaraṇametaṃ. **Ekako cāhaṃ bherave bile viharāmi**ti ahañca ekako asahāyo sappātibhayaṃ pabbataguḥāyaṃ vasāmi, **tassa mayhaṃ** evaṃbhūtaṃ me sato **natthi bhayaṃ vā chambhitattaṃ vā lomahaṃso vā**ti cittutrāsasaññitaṃ bhayaṃ vā taṇnimittakaṃ sarīraṃ chambhitattaṃ vā lomahaṃsanamattaṃ vā natthi.

Kasmāti tattha kāraṇamāha “**dhammatā mamesā**’’ti. Apariññātavatthukassa hi tattha appahīnacchandarāgatāya bhayādīnā bhavitabbaṃ, mayā pana sabbaso tattha pariññātaṃ, tattha ca chandarāgo samucchinnō, tasmā bhayādīnaṃ abhāvo **dhammatā mamesā** mama dhammasabhāvo esoti aññaṃ byākāsi.

Sambulakaccānattheragāthāvaṇṇanā niṭṭhitā.

6. Nitakattheragāthāvaṇṇanā

Kassa selūpamaṃ cittanti āyasmato nitakattherassa gāthā. Kā uppatti? Ayampi purimabuddhesu katādhikāro tattha tattha bhava puññāni karonto vipassissa bhagavato kāle bandhumatīnagare ārāmagopako hutvā jīvanto ekadivasam bhagavantaṃ ākāseṇa gacchantam disvā pasannamānaso nāḷikeraphalaṃ dātukāmo ahoṣi. Sattā taṃ anuggaṇhanto ākāseyeva ṭhatvā paṭiggaṇhi. So taṃ datvā uḷāraṃ pītisomanassaṃ paṭisaṃvedi. So tena puññakammaṇa devamanussesu saṃsaranto imasmiṃ buddhuppāde kosalaratṭhe brāhmaṇakule nibbattitvā **nitakoti** laddhanāmo viññutaṃ patto satthu santike dhammaṃ sutvā paṭiladdhasaddho pabbajitvā kammaṭṭhānaṃ gahetvā araññe viharanto ghaṭento arahattaṃ pāpuṇi. Tena vuttaṃ **apadāne** (apa. therā 2.51.91-99) –

“Nagare bandhumatiyā, ārāmiko ahaṃ tadā;
Addasaṃ virajaṃ buddhaṃ, gacchantam anilañjase.

“Nāḷikeraphalaṃ gayha, buddhaseṭṭhassadāsahaṃ;
Ākāse ṭhitako santo, paṭiggaṇhi mahāyaso.

“Vittisañjanano mayhaṃ, diṭṭhadhammasukhāvaho;
Phalaṃ buddhassa datvāna, vippasannena cetasā.

“Adhigacchim tadā pītiṃ, vipulañca sukhattamaṃ;
Uppajjateva ratanaṃ, nibbattassa taḥiṃ taḥiṃ.

“Ekanavutito kappe, yaṃ phalaṃ adadiṃ tadā;
Duggatiṃ nābhijānāmi, phaladānassidaṃ phalaṃ.

“Dibbacakkhu visuddhaṃ me, samādhikusalo ahaṃ;
Abhiññāpāramippatto, phaladānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā there phalasukhena nibbānasukhena viharante padhānapariggāhako thero taṃ āraññāyatanaṃ gantvā tattha vasantānaṃ bhikkhūnaṃ pariggaṇhanatthaṃ “**kassa selūpama**”ntiadinā paṭhamaṃ gāthamāha.

191. Tattha **kassa selūpamaṃ cittaṃ, ʒhitaṃ nānupakampatī** imasmiṃ araññāyatane vasantesu kassa bhikkhuno cittaṃ aggaphalādhigamena ekaghanasilāmayapabbatūpamaṃ sabbesaṃ iñjanānaṃ abhāvato vasībhāvappattiyā ca ʒhitaṃ sabbehipi lokadhammehi nānukampati na vedhati. Idānissa akampanākāraṃ saddhiṃ kāraṇena dassetuṃ “**viratta**”ntiādi vuttaṃ. Tattha **virattaṃ rajanīyesūti** virāgasankhātēna ariyamaggena rajanīyesu rāgupattihetubhūtesu tebhūmakadhammesu virattaṃ, tattha sabbaso samucchinnarāganti attho. **Kuppanīyēti** paṭighaṭṭhānīye, sabbasmimpi āghātavatthusmiṃ. **Na kuppattī** na dussati na vikāraṃ āpajjati. **Yassevaṃ bhāvitāṃ cittaṃ** yassa ariyapuggalassa cittaṃ mano evaṃ vuttanayena tāḍibhāvena bhāvitāṃ, **kuto taṃ dukkhamessatīti** taṃ puggalaṃ kuto sattato saṅkhārato vā dukkhaṃ upagamissati, na tāḍisassa dukkhaṃ atthīti attho.

192. Evaṃ aniyamavasena pucchitamattaṃ nitakatthero attūpanāyikaṃ katvā vissajjento “**mama selūpamaṃ citta**”ntiadinā dutiyagāthāya aññaṃ byākāsi. Taṃ vuttatthameva.

Nitakattheragāthāvaṇṇanā niṭṭhitā.

7. Soṇapoṭiriyaputtattheragāthāvaṇṇanā

Na tāva supituṃ hotīti āyasmato soṇassa poṭiriyaputtassa gāthā. Kā uppatti? Ayampi purimabuddhesu katādhikāro sikhissa bhagavato kāle vanacaro hutvā jīvanto ekadivasaṃ satthāraṃ disvā pasannacitto kuraññiyaphalaṃ satthuno adāsi. So tena puññakammena devamanussesu saṃsaranto imasmiṃ buddhuppāde kapilavatthusmiṃ poṭiriyassa nāma gāmaḥojakassa putto hutvā nibbatti, **soṇotissa** nāmaṃ ahoṣi. So vayappatto bhaddiyassa sākiyarañño senāpati ahoṣi. Atha bhaddiyarāje heṭṭhā vuttanayena pabbajite, senāpati “rājāpi nāma pabbaji, kiṃ mayhaṃ gharāvāsenā”ti pabbaji? Pabbajitvā pana niddārāmo viharati, na bhāvanamanuyuñjati. Taṃ bhagavā anupiyāyaṃ ambavane viharanto attano obhāsaṃ pharāpetvā tenassa satīṃ janetvā imāya gāthāya taṃ ovadanto –

193. “Na tāva supituṃ hoti, ratti nakkhattamālinī;
Paṭijaggitumevesā, ratti hoti vijānatā.

194. “Hatthikkhandhāvapatitaṃ, kuñjaro ce anukkame;
Saṅgāme me mataṃ seyyo, yañce jīve parājito”ti. – gāthādvayaṃ abhāsi;

Tattha **na tāva supituṃ hoti, ratti nakkhattamālinī**ti atṭhahi akkhaṇehi vajjitaṃ navamaṃ khaṇaṃ labhitvā ʒhitassa viññujātikassa yāva na arahattaṃ hatthagataṃ hoti, tāva ayaṃ nakkhattamālinī ratti supituṃ niddāyituṃ na hoti, supanassa kālo na hoti. Apica kho **paṭijaggitumevesā, ratti hoti vijānatā**ti eṣā ratti nāma manussānaṃ migapakkhīnañca niddūpagamanena visesato nissaddavelābhūtā paṭipattiṃ attani sañjaggituṃ jāgariyānuyogamanuyuñjitumeva vijānatā viññunā icchitā hotīti.

Taṃ sutvā soṇo saṃviggataramānaso hirottappaṃ paccupaṭṭhapetvā abbhokāsikaṅgaṃ adhiṭṭhāya vipassanāya kammaṃ karonto “**hatthikkhandhova patita**”nti dutiyaṃ gāthamāha. Tattha **avapatitanti** avamukhaṃ patitaṃ uddhampādaṃ adhomukhaṃ patitaṃ. **Kuñjaro ce anukkameti** kuñjaro anukkameyya ce. Idaṃ vuttaṃ hoti – yadāhaṃ hatthimāruhitvā saṅgamaṃ pavīṭṭho hatthikkhandhato patito, tadāhaṃ **saṅgāme** tena hatthinā maddito mato ahoṣiṃ ce, taṃ **me** maraṇaṃ **seyyo, yañce** idāni kilesehi **parājito** jīveyyaṃ, taṃ na seyyoti. Imaṃ gāthaṃ vadantoyeva vipassanaṃ usukkāpetvā arahattaṃ pāpuṇi. Tena vuttaṃ **apadāne** (apa. therā 2.52.1-6) –

“Migaluddo pure āsiṃ, vipine vicaraṃ ahaṃ;
Addasaṃ virajaṃ buddhaṃ, sabbadhammāna pāraguṃ.

“Kurañjiyaphalaṃ gayha, buddhaseṭṭhassadāsahaṃ;
Puññakkhettassa tādino, pasanno sehi pāṇibhi.

“Ekatiṃse ito kappe, yaṃ phalaṃ adadiṃ tadā;
Duggatiṃ nābhijānāmi, phaladānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā “sathārā vuttaṃ, attanā vutta”nti ubhayañhi gāthaṃ
“hatthikkhandhāvapatita”ntiadinā paccudāhāsi. Tena idameva aññābyākaraṇaṃ ahoṣīti.

Soṇapoṭṭiriyaputtattheragāthāvaṇṇanā niṭṭhitā.

8. Nisabhattheragāthāvaṇṇanā

Pañca kāmagaṇe hitvāti āyasmato nisabhattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto vipassissa bhagavato kāle kulagehe nibbattitvā viññutaṃ patto ekadivasam sathāraṃ piṇḍāya carantaṃ disvā pasannacitto kapitthaphalamadāsi. So tena puññakammaena sugatīsuveva saṃsaranto imasmim buddhuppāde kolijayanapade kulagehe nibbattitvā **nisabhoti** laddhanāmo vayappatto sākiyakolijānaṃ saṅgāme buddhānubhāvaṃ disvā paṭiladdhasaddho pabbajitvā tadaheva arahattaṃ pāpuṇi. Tena vuttaṃ **apadāne** (apa. therā 2.52.7-11) –

“Suvaṇṇavaṇṇaṃ sambuddhaṃ, āhutīnaṃ paṭiggahaṃ;
Rathiyaṃ paṭipajjantaṃ, kapitthaṃ adadiṃ phalaṃ.

“Ekanavutito kappe, yaṃ phalaṃ adadiṃ tadā;
Duggatiṃ nābhijānāmi, phaladānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

So arahattaṃ pana patvā attano sahāyabhikkhū pamādavihārena kālaṃ vītināmente disvā te ovadanto –

195. “Pañca kāmagaṇe hitvā, piyarūpe manorame;
Saddhāya gharā nikkhamma, dukkhassantakaro bhava”ti. –

Paṭhamaṃ gāthaṃ abhāsi.

Tassattho – bālaputhujanassa piyāyitabbasabhāvatāya **piyarūpe** manuññasabhāvatāya **manorame** rūpādike **pañca kāmagaṇe** kāmakoṭṭhāse **hitvā** pahāya pariccajitvā kammaphalasaddhāya ratanattayasaddhāya ca vasena **gharā** gharabandhanato **nikkhamma** nikkhamitvā pabbajjaṃ upagato viññujātiko pabbajitakālato paṭṭhāya ghaṭento vāyamanto vaṭṭadukkhassa **antakaro bhava** bhaveyyāti.

Evam te bhikkhū ovaditvā “ayaṃ pare eva saññāpento viharati, “sayam pana akārako”ti mā cintayitthā”ti tesam attano paṭipannabhāvaṃ pakāsento –

196. “Nābhinandāmi maraṇaṃ, nābhinandāmi jīvitam;
Kālañca paṭikañkhāmi, sampajāno patissato”ti. –

Dutiyagāthāya aññaṃ byākāsi. Tattha **nābhinandāmi maraṇanti** maraṇaṃ na abhikañkhāmi. **Nābhinandāmi jīvanti** idaṃ pana tassa kāraṇavacanaṃ, yasmā nābhinandāmi jīvitam, tasmā nābhinandāmi maraṇanti. Yo hi āyatim jātijarāmarāṇāya kilesābhisañkhāre ācinoṭi upacinoṭi, so punabbhavābhiniḥhattim abhinandanto nāntariyakatāya attano maraṇampi abhinandati nāma kāraṇassa appahīnattā, khīṇāsavo pana sabbaso ācayagāmidhamme pahāya apacayagāmidhamme patitthito pariññātavatthuko sabbaso jīvitam anabhinandanto maraṇampi anabhinandati nāma kāraṇassa eva suppahīnattā. Tenāha – “nābhinandāmi maraṇaṃ, nābhinandāmi jīvita”nti. Yadi evam khīṇāsavassa parinibbānābhikañkhā, yāva parinibbānā avaṭṭhānañca kathanti āha “**kālañca paṭikañkhāmi, sampajāno patissato**”ti, kilesaparinibbāne siddhe satipaññāvepullappattiyā sato sampajāno kevalam khandhparinibbānakālam paṭikañkhāmi, taṃ udikkhamāno āgamayamāno viharāmi, na pana me maraṇe jīvite vā abhinandanā atthi arahattamaggeneva tassa samugghāṭitattāti.

Nisabhattheragāthāvaṇṇanā niṭṭhitā.

9. Usabhattheragāthāvaṇṇanā

Ambapallavasāṅkāsaṃti āyasmato usabhattherassa gāthā. Kā uppatti? Ayampi purimabuddhesu katādhikāro tattha tattha bhava puññāni karonto sikhissa bhagavato kāle kulagehe nibbattitvā viññutaṃ patto ekadivasam satthāraṃ piṇḍāya carantaṃ disvā pasannamānaso kosambaphalaṃ adāsi. So tena puññakammena devamanussesu saṃsaranto imasmim buddhuppāde kapilavatthusmim sākiyarājakule nibbattitvā **usabhoti** laddhanāmo vayappatto satthu ñāṭisamāgame buddhānubhāvaṃ disvā paṭiladdhasaddho pabbaji. So pabbajitakālato paṭṭhāya samaṇadhammaṃ akatvā divā saṅgaṇikārāmo sakalarattim niddāyamāno vītināmeti. So ekadivasam muṭṭhassati asampajāno niddam okkanto supine kesamassum ohāretvā ambapallavavaṇṇaṃ cīvaraṃ pārupitvā hatthigīvāyaṃ nisīditvā nagaram piṇḍāya pavitṭhaṃ tattheva manusse sampatte disvā lajjāya hatthikkhandhato oruyha attānaṃ disvā paṭibuddho, “īdisam nāma supinaṃ muṭṭhassatinā asampajānena niddāyamānena mayā diṭṭha”nti uppannasaṃvego vipassanaṃ paṭṭhapetvā nacirasseva arahattaṃ pāpuṇi. Tena vuttaṃ **apadāne** (apa. therā 2.52.12-16) –

“Kakudham vilasantaṃva, devadevaṃ narāsabham;
Rathiyam paṭipajantaṃ, kosambaṃ adadiṃ tadā.

“Ekatiṃse ito kappe, yaṃ phalaṃ adadiṃ tadā;
Duggatiṃ nābhijānāmi, phaladānassidaṃ phalaṃ.

“Kilesā jhāpitā mayham...pe... kataṃ buddhassa sāsana”nti.

Atha therō yathādiṭṭhaṃ supinaṃ aṅkusaṃ katvā arahattassa adhigatattā tasseva supinassa kittanavasena aññaṃ byākaronto –

197. “Ambapallavasāṅkāsaṃ, aṃse katvāna cīvaraṃ;
Nisinno hatthigīvāyaṃ, gāmaṃ piṇḍāya pāvīsīm.

198. “Hatthikkhandhato oruyha, saṃvegaṃ alabhiṃ tadā;
Sohaṃ ditto tadā santo, patto me āsavakkhayo”ti. – gāthādvayamāha;

Tattha **ambapallavasāṅkāsaṃ, aṃse katvāna cīvaranti** ambapallavākāraṃ pavāḷavaṇṇaṃ cīvaraṃ khandhe karitvā uttarāsāṅgaṃ karitvā. **Gāṃanti** attano rājadhāniṃ hatthikkhandhe **nisinno piṇḍāya pāvisiṃ**, pavitṭhamattova mahājanena olokiyamāno **hatthikkhandhato oruyha** ṭhito paṭibujjiṃ, pabuddhova **saṃvegaṃ alabhiṃ tadā** “muṭṭhassati asampajāno hutvā niddāyokkamaṇa etam jāta”nti. Apare pana “rājāva hutvā rattibhāge evarūpaṃ supinaṃ disvā vibhātāya rattiyā hatthikkhandhaṃ āruyha nagaravīthiyaṃ caranto taṃ supinaṃ saritvā hatthikkhandhato oruyha saṃvegaṃ labhitvā satthu santike pabbajitvā arahattaṃ patvā udānaṃ udānento imā gāthā abhāsī”ti vadanti. **Dittoti** tasmīṃ rājakāle jātimadabhogamadādiridappito samāno saṃvegamalabhinti yojanā.

Usabhattheragāthāvaṇṇanā niṭṭhitā.

10. Kappaṭakurattheragāthāvaṇṇanā

Ayamiti kappaṭoti āyasmato kappaṭakurattherassa gāthā. Kā uppatti. Ayampi purimabuddhesu katādhikāro tattha tattha bhava puññāni upacinanto vipassissa bhagavato kāle kulagehe nibbattitvā viññutaṃ patto ekadivasam bhagavantaṃ vinatāya nāma nadiyā tīre aññatarasmīṃ rukkhamūle nisinnaṃ disvā pasannamānaso ketakapupphehi pūjaṃ akāsi. So tena puññakamma devamanussesu saṃsaranto imasmīṃ buddhuppāde sāvattiyaṃ duggatakule nibbattitvā yāva vayappatti, tāva aññaṃ upāyaṃ ajānanto kappaṭakhaṇḍanivāsano sarāvahatto tattha tattha kuraṃ pariyesanto vicari, tena **kappaṭakuro** tveva paññāyittha. So vayappatto tiṇaṃ vikkiṇitvā jīvikaṃ kappento ekadivasam tiṇalāvanatthaṃ araññaṃ gato tattha aññataraṃ khīṇāsavattaraṃ disvā taṃ upasaṅkamitvā vanditvā nisīdi. Tassa thero dhammaṃ kathesi. So dhammaṃ sutvā paṭiladdhasaddho “kiṃ me imāya kicchajīvikāyā”ti pabbajitvā attano nivattakappaṭacoḷaṃ ekasmīṃ ṭhāne nikkhipi. Yadā cassa anabhirati uppajjati, tadā taṃ kappaṭaṃ oloketassa anabhirati vigacchati, saṃvegaṃ paṭilabhi. Evaṃ karonto sattakkhattuṃ uppabbaji. Tassa taṃ kāraṇaṃ bhikkhū bhagavato ārocesuṃ. Athekadivasam kappaṭakuro bhikkhu dhammasabhāyaṃ parisapariyante nisinno niddāyati, taṃ bhagavā codento –

199. “Ayamiti kappaṭo kappaṭakuro, acchāya atibharitāya;
Amataghaṭikāyaṃ dhammakaṭamatto, katapadaṃ jhānāni ocetuṃ.

200. “Mā kho tvam kappaṭa pacālesi, mā tvam upakaṇṇamhi tālessaṃ;
Na hi tvam kappaṭa mattamaññasi, saṅghamajjhamhi pacalāyamāno”ti. –

Gāthādvayaṃ abhāsi.

Tattha **ayamiti kappaṭo kappaṭakuro**ti kappaṭakuro bhikkhu “ayaṃ mama kappaṭo, imaṃ paridahitvā yathā tathā jīvāmī”ti evaṃ uppannamicchāvitakko **acchāya atibharitāya amataghaṭikāyaṃ** mama amataghaṭe taṃ taṃ vassante “amatamadhigataṃ ahamanusāsāmi, ahaṃ dhammaṃ desemi” (mahāva. 12; ma. ni. 1.286; 2.342). “Andhībhūtasmiṃ lokasmīṃ, āhañchaṃ amatadundubhi”ntiadinā (mahāva. 11; ma. ni. 1.285; 2.341) ghoṣetvā mayā dhammāmate pavassiyamāne **katapadaṃ jhānāni ocetuṃ** lokiyalokuttarajjhānāni upacetuṃ bhāvetuṃ katapadaṃ kaṭamaggavihitabhāvanāmaggaṃ idaṃ mama sāsanaṃ, tathāpi **dhammakaṭamatto** mama sāsanaḍhammato ukkaṇṭhacitto apagataṃānaso kappaṭakuroti taṃ codetvā punapissa sahoḍḍhaṃ coraṃ gaṇhanto viya pamādavihāraṃ dassento “**mā kho tvam, kappaṭa, pacālesi**”ti gāthamāha.

Tattha **mā kho tvam, kappaṭa, pacālesi**ti tvam, kappaṭakura, “mama dhammaṃ suñissāmī”ti nisīditvā mā kho pacālesi mā pacalāhi mā niddaṃ upagacchi. **Mā tvam upakaṇṇamhi tālessanti** taṃ niddāyamānaṃ upakaṇṇamhi kaṇṇasamīpe desanāhatthena ahaṃ mā patālessaṃ. Yathā ito paraṃ kilesappahānāya ahaṃ taṃ na ovadeyyaṃ, tathā paṭipajjāhīti attho. **Na hi tvam, kappaṭa, mattamaññasi**ti tvam, kappaṭa, **saṅghamajjhamhi pacalāyamāno** mattaṃ pamāṇaṃ na vā maññasi, “ayamatidullabho khaṇo paṭiladdho, so mā upajjhagā”ti ettakampi na jānāsi, passa yāva ca te

aparaddhanti codesi.

Evam bhagavatā dvīhi gāthāhi gāḷhaṃ taṃ niggayha codanāya katāya aṭṭhivedhaviddho viya caṇḍagajo maggaṃ otaranto viya ca sañjātasamvego vipassanaṃ paṭṭhapetvā nacirasseva arahattaṃ pāpuṇi. Tena vuttaṃ **apadāne** (apa. thera 2.52.17-22) –

“Vinatānadiyā tīre, vihāsi purisuttamo;
Addasaṃ virajaṃ buddhaṃ, ekaggaṃ susamāhitaṃ.

“Madhugandhassa pupphena, ketakassa ahaṃ tadā;
Pasannacitto sumano, buddhaseṭṭhamapūjayiṃ.

“Ekanavutito kappe, yaṃ pupphamabhipūjayiṃ;
Duggatiṃ nābhijānāmi, buddhapūjāyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā sathhārā vuttagāthādvayameva attano arahattādhigamanassa aṅkusabhūtanti paccudāhāsi. Tenassa tadeva aññābyākaraṇaṃ ahosīti.

Kappaṭakuratttheragāthāvaṇṇanā niṭṭhitā.

Catutthavaggavaṇṇanā niṭṭhitā.

5. Pañcamavaggo

1. Kumārakassapattheragāthāvaṇṇanā

Aho buddhā aho dhammāti āyasmato kumārakassapattherassa gāthā. Kā uppatti? Ayampi purimabuddhesu katādhikāro tattha tattha bhave puññāni upacinanto padumuttarassa bhagavato kāle brāhmaṇakule nibbattitvā viññutaṃ pāpuṇi. “Kulagehe”ti pana aṅguttaraṭṭhakathāyaṃ (a. ni. aṭṭha. 1.1.217) vuttaṃ. So satthu santikaṃ gantvā dhammaṃ suṇanto sathhāraṃ ekaṃ bhikkhuṃ cittakathikānaṃ aggaṭṭhāne ṭhapentaṃ disvā sayampi taṃ ṭhānantaraṃ ākaṅkhanto paṇidhānaṃ katvā tadanurūpāni puññāni karonto kassapassa bhagavato kāle samaṇadhammaṃ katvā sugatīsuveva saṃsaranto imasmiṃ buddhuppāde rājagahe seṭṭhidhītāya kucchimhi paṭisandhiṃ gaṇhi. Sā kira kumārikākāleyeva pabbajitukāmā hutvā mātāpitaro yācitvā pabbajjaṃ alabhamānā kulagharaṃ gatāpi gabbhasaṅghitaṃpi ajānantī sāmikaṃ ārādhetaṃ tena anuññātā bhikkhunīsu pabbajitā. Tassā gabbhinibhāvaṃ disvā bhikkhuniyo devadattaṃ pucchiṃsu. So “assamaṇī”ti āha. Puna dasabalaṃ pucchiṃsu. Sathhā upālitheraṃ paṭicchāpesi. Thero sāvatthinagaravāsīni kulāni visākhaṅca upāsikaṃ pakkosāpetvā sarājikāya parisāya vinicchinanto “pure laddho gabbho, pabbajjā arogā”ti āha. Sathhā “suvinicchitaṃ adhikaraṇa’nti therassa sādhuṅkāraṃ adāsi.

Sā bhikkhunī suvaṇṇabimbasaḍisaṃ puttaṃ vijāyi. Taṃ rājā pasenadikosalo posesi. “Kassapo”ti cassa nāmaṃ akaṃsu. Aparabhāge alaṅkaritvā satthu santikaṃ netvā pabbājesi. Kumārakāle pabbajitattā bhagavatā “kassapaṃ pakkosatha, idaṃ phalaṃ vā khādanīyaṃ vā kassapassa dethā”ti vutte “katarakassapassā”ti. “Kumārakassapassā”ti. Evam gahitanāmattā rañño posāvanikaputtattā ca vuḍḍhakālepi **kumārakassapot**veva paññāyittha.

So pabbajitakālato paṭṭhāya vipassanāya ceva kammaṃ karoti, buddhavacanaṅca uggaṇhāti. Atha tena saddhiṃ pabbatamatthake samaṇadhammaṃ katvā anāgāmī hutvā suddhāvāse nibbatto mahābrahmā “vipassanāya mukhaṃ dassetvā maggaphalappattiyā upāyaṃ karissāmī”ti pañcadasa pañhe abhisāṅkharitvā andhavane vasantassa therassa “ime pañhe sathhāraṃ puccheyyāsi”ti ācikkhitvā

gato. So te pañhe bhagavantam pucchi. Bhagavāpissa byākāsi. Thero sathārā kathitaniyāmeneva te uggañhitvā vipassanam gabbham gañhāpetvā arahattam pāpuṇi. Tena vuttam **apadāne** (apa. thera 2.54.150-177) –

“Ito satasahassamhi, kappe uppajji nāyako;
Sabbalokahito vīro, padumuttaranāmako.

“Tadāham brāhmaṇo hutvā, vissuto vedapāragū;
Divāvihāram vicaram, addasam lokanāyakam.

“Catusaccam pakāsentaṃ, bodhayantaṃ sadevakam;
Vicittakathikānaggam, vaṇṇayantaṃ mahājane.

“Tadā muditacittoham, nimantetvā tathāgataṃ;
Nānārattehi vatthehi, alaṅkaritvāna maṇḍapaṃ.

“Nānāratanaṃpajjotaṃ, sasaṅgham bhojayiṃ tahiṃ;
Bhojayitvāna sattāham, nānaggarasabhojanaṃ.

“Nānācittēhi pupphehi, pūjayitvā sasāvakaṃ;
Nipacca pādamūlamhi, taṃ ṭhāna patthayiṃ aham.

“Tadā munivaro āha, karuṇekarasāsayo;
Passathetaṃ dijavaram, padumānanalocanaṃ.

“Pītipāmojjabahulaṃ, samuggatatanūruham;
Hāsamhitavisālakkham, mama sāsanaḷālasam.

“Patitaṃ pādamūle me, ekāvattasumānasam;
Esa pattheti taṃ ṭhānam, vicittakathikattanaṃ.

“Satasahassito kappe, okkākakulasambhavo;
Gotamo nāma gottena, sathā loke bhavissati.

“Tassa dhammesu dāyādo, oraso dhammanimmito;
Kumārakassapo nāma, hessati satthu sāvako.

“Vicittapupphadussānam, ratanānañca vāhasā;
Vicittakathikānam so, aggataṃ pāpuṇissati.

“Tena kammena sukatena, cetanāpaṇidhīhi ca;
Jahitvā mānusaṃ deham, tāvatimsamagacchaham.

“Paribbhamam bhavābhava, raṅgamajjhe yathā naṭo;
Sākhmagatrajo hutvā, migiyā kucchimokkamim.

“Tadā mayi kucchigate, vajjhavāro upatṭhito;
Sākhena cattā me mātā, nigrodham saraṇam gatā.

“Tena sā migarājena, maraṇā parimocitā;

Pariccajitvā sapāṇaṃ, mamevaṃ ovadī tadā.

“Nigrodhameva seveyya, na sākhamupasamvase;
Nigrodhasmiṃ mataṃ seyyo, yañce sākhamhi jīvitam.

“Tenānusiṭṭhā migayūthapena, ahañca mātā ca tathetare ca;
Āgamma rammaṃ tusitādhivāsaṃ, gatā pavāsaṃ sagharaṃ yatheva.

“Puno kassapavīrassa, atthamentamhi sāsane;
Āruyha selasikharaṃ, yuñjivā jinasāsanam.

“Idānāhaṃ rājagahe, jāto seṭṭhikule ahuṃ;
Āpannasattā me mātā, pabbaji anagāriyam.

“Sagabbhaṃ taṃ viditvāna, devadattamupānayam;
So avoca vināsetha, pāpikaṃ bhikkhunim imam.

“Idānipi munindena, jinena anukampitā;
Sukhinī ajanī mayham, mātā bhikkhunupassaye.

“Taṃ viditvā mahīpālo, kosalo maṃ aposayi;
Kumāraparihānena, nāmenāhañca kassapo.

“Mahākassapamāgamma, aham kumārakassapo;
Vammikasadiṣaṃ kāyam, sutvā buddhena desitam.

“Tato cittaṃ vimucci me, anupādāya sabbaso;
Pāyāsim damayitvāham, etadaggamaṃpūṇim.

“Kilesā jhāpitā mayham...pe... kataṃ buddhassa sāsana’’nti.

Arahattaṃ pana patvā cittakathikabhāvena satthārā etadagge ṭhapito attano paṭipattim
paccavekkhitvā ratanattayaguṇavibhāvanamukhena aññaṃ byākaronto –

201. “Aho buddhā aho dhammā, aho no satthu sampadā;
Yattha etādisaṃ dhammaṃ, sāvako sacchikāhiti.

202. “Asaṅkheyyesu kappesu, sakkāyādhigatā ahū;
Tesamayam pacchimako, carimoyam samussayo;
Jātimaraṇasaṃsāro, natthi dāni punabbhavo’’ti. – gāthādvayam abhāsi;

Tattha **ahoti** acchariyatthe nipāto. **Buddhāti** sabbaññubuddhā, gāravavasena bahuvacanaṃ, aho acchariyā sambuddhāti attho. **Dhammāti** pariyattidhammena saddhim nava lokuttaradhammā. **Aho no satthu sampadāti** amhākaṃ satthu dasabalassa aho sampattiyo. **Yatthāti** yasmiṃ satthari brahmacariyavāsena. **Etādisaṃ dhammaṃ, sāvako sacchikāhīti** etādisaṃ evarūpaṃ suvisuddhajjhānābhīññāparivāraṃ anavasesakilesakkhayāvahaṃ santaṃ paṇītaṃ anuttaraṃ dhammaṃ sāvakopi nāma sacchikarissati, tasmā evaṃvidhaguṇavisesādhigamahetubhūtā aho acchariyā buddhā bhagavanto, acchariyā dhammaguṇā, acchariyā amhākaṃ satthu sampattiyoti ratanattayassa guṇādhimuttiṃ pavedesīti. Dhammasampattikittaneneva hi saṅghasuppaṭipatti kittitā hotīti.

Evam sādharmaṇavasena dassitaṃ dhammassa sacchikiriyaṃ idāni attupanāyikaṃ katvā dassento
“**asaṅkheyyesū**’’ti gāthamāha. Tattha **asaṅkheyyesūti** gaṇanapathaṃ vītivattesu mahākappesu.

Sakkāyāti pañcupādānakkhandhā. Te hi paramatthato vijjamānadhammasamūhatāya “sakkāyā”ti vuccanti. **Ahūti** nivattanūpāyassa anadhigatattā anapagatā ahesuṃ. **Tesamayaṃ pacchimako carimoyaṃ samussayoti** yasmā ayaṃ sabbapacchimako, tato eva carimo, tasmā **jātimaraṇasahito** khandhādipaṭipāṭisaññito **samsāro** idāni āyatim punabbhavābhāvato **punabbhavo natthi**, ayamantimā jāṭīti attho.

Kumārakassapatheragāthāvaṇṇanā niṭṭhitā.

2. Dhammapālattheragāthāvaṇṇanā

Yo have daharo bhikkhūti āyasmato dhammapālattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto atthadassissa bhagavato kāle kulagehe nibbattivā viññutaṃ patto kenacideva karaṇīyena vanantaṃ upagato satthāraṃ disvā pasannamānaso pilakkhaphalamadāsi. So tena puññakammena devamanussesu samsaranto imasmiṃ buddhuppāde satthari parinibbute avantiraṭṭhe brāhmaṇakule nibbattivā **dhammapāloti** laddhanāmo vayappatto takkasilam gantvā sippam uggahetvā paṇinivattento antarāmagge ekasmiṃ vihāre aññataram theram disvā tassa santike dhammam sutvā paṭiladdhasaddho pabbajitvā vipassanam vaḍḍhetvā chaḷabhiñño ahoṣi. Tena vuttaṃ **apadāne** (apa. thera 1.39.21-25) –

“Vanantare buddham disvā, atthadassim mahāyasam;
Pasannacitto sumano, pilakkhassādadiṃ phalam.

“Aṭṭhārase kappasate, yaṃ phalamadadiṃ tadā;
Duggatiṃ nābhijānāmi, phaladānassidaṃ phalam.

“Kilesā jhāpitā mayham...pe... kataṃ buddhassa sāsana”nti.

Chaḷabhiñño pana hutvā samāpattisukhena vītināmento ekadivasam tasmim vihāre dve sāmaṇere rukkhagge pupphāni ocinante ārūḷhasākhāya bhaggāya patante disvā thero iddhānubhāvena hatthena gahetvā arogeyeva bhūmiyam ṭhapetvā tesam sāmaṇerānam dhammam desento –

203. “Yo have daharo bhikkhu, yuñjati buddhasāsane;
Jāgaro sa hi suttesu, amogham tassa jīvitam.

204. “Tasmā saddhañca sīlañca, pasādam dhammadassanam;
Anuyuñjetha medhāvī, saram buddhāna sāsana”nti. – imā dve gāthā abhāsi;

Tattha **yoti** aniyamavacanam. **Haveti** dalhatthe nipāto. **Daharoti** taruṇo. Bhikkhatīti **bhikkhu**. **Yuñjatīti** ghaṭati vāyamati. **Jāgaroti** jāgaraṇadhammasamannāgato. **Suttesūti** supantesu. Idaṃ vuttaṃ hoti **yo bhikkhu daharova** samāno taruṇo “tathāham pacchā vuḍḍhakāle jānissāmī”ti acintetvā buddhānam **sāsane** appamādapāṭipattiyam **yuñjati** samathavipassanābhāvanāya yogam karoti, so **suttesu** avijjānidāya suttesu pamattesu saddhādijāgaradhammasamannāgamena **jāgaro**, tato eva attahitaparahitaparīpūriyā **amogham** avañjham **tassa jīvitam**, yasmā ca etadevaṃ, **tasmā saddhañca** “atthi kammam atthi kammavipāko”tiādīnayaṃpavattaṃ kammaphalasaddhañca, saddhūpanibandhattā sīlassa tadupanissayam catupārisuddhisīlañca, “sammāsambuddho bhagavā, svākhāto dhammo, suppaṭipanno saṅgho”ti evam pavattaratanattayappasādañca, vipassanāpaññāsahitāya maggapaññāya pariññādivasena catusaccadhammadassanañca **medhāvī** dhammojapaññāya samannāgato bhikkhu **buddhānam sāsanam** ovādam anusitṭhim anussaranto ādittampi attano sīsam ajjupekkhitvā **anuyuñjetha**, tattha anuyogam ātappam kareyyāti attho.

Dhammapālattheragāthāvaṇṇanā niṭṭhitā.

3. Brahmālittheragāthāvaṇṇanā

Kassindriyāni samathaṅgatāni āyasmato brahmālittherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭūpanissayaṃ kusalaṃ upacinanto vipassissa bhagavato kāle kulagehe nibbattitvā viññutaṃ patto ekadivasam satthāraṃ piṇḍāya carantaṃ disvā pasannamānaso vanditvā pādaphalaṃ adāsi. Satthā anumodanaṃ vatvā pakkāmi. So tena puññakamma devamanussesu saṃsaranto imasmiṃ buddhuppāde kosalaraṭṭhe brāhmaṇakule nibbattitvā **brahmāli**ti laddhanāmo viññutaṃ patto hetusampattiyā codiyamāno saṃsāre sañjātasamvego tādīsena kalyāṇamittasannissayena buddhasāsane pabbajitvā patirūpakammaṭṭhānaṃ gahetvā araṇṇe viharanto ñāṇassa paripākagatattā nacirasseva vipassanaṃ vadḍhetvā chaḷabhiñño ahoṣi. Tena vuttaṃ **apadāne** (apa. thera 2.51.63-67) –

“Suvaṇṇavaṇṇaṃ sambuddhaṃ, āhutiṇaṃ paṭiggahaṃ;
Rathiyam paṭipajantaṃ, pādaphalaṃ adāsahaṃ.

“Ekanavutito kappe, yaṃ phalaṃ adadiṃ tadā;
Duggatiṃ nābhijānāmi, phaladānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Chaḷabhiñño pana hutvā maggasukhena phalasukhena vītināmento ekadivasam padhānapariggāhakena therena tasmim araṇṇāyatane bhikkhū uddissa vuttaṃ padhānānuyogaṃ pariggaṇhanto –

205. “Kassindriyāni samathaṅgatāni, assā yathā sārathinā sudantā;
Pahīnamānassa anāsavassa, devāpi kassa pihayanti tādino.

206. “Mayhindriyāni samathaṅgatāni, assā yathā sārathinā sudantā;
Pahīnamānassa anāsavassa, devāpi mayhaṃ pihayanti tādino”ti. –

Gāthādvayaṃ abhāsi.

Tassattho – imasmiṃ araṇṇāyatane vasantesu bhikkhūsu **kassa** bhikkhuno therassa vā navassa vā majjhimassa vā chekena **sārathinā sudantā assā** viya manacchaṭṭhāni **indriyāni samathaṃ** dantabhāvaṃ nibbisevanabhāvaṃ **gatāni**. Kassa navavidhampi mānaṃ pahāya ṭhitattā **pahīnamānassa** catunnampi āsavānaṃ abhāvena **anāsavassa** iṭṭhādīsu tādilakkhaṇappattiyā **tādino devāpi pihayanti** manussāpi sammāpaṭipattidassanādīnā ca ādarena patthentīti.

Tattha ca gāthāyaṃ purimaḍḍhena anāgāminimaggādhigamo puṭṭho, anāgāminopi hi indriyāni pahīnakāmarāgabyāpādatāya samathaṃ nibbisevanataṃ gatāni honti. Itarena arahattamaggapaṭilābho, arahā hi “pahīnamāno anāsavo tādī”ti ca vuccati.

Athāyasmā brahmāli padhānapariggāhakena vuttaṃ “**kassindriyāni**”ti gāthaṃ paccanubhāsi. Tadatthaṃ attūpanāyikavasena vissajjento “**mayhindriyāni**”tiādīkāya dutiyagāthāya aññaṃ byākāsi, tattha **mayhindriyāni**ti mama cakkhādīni indriyāni. Sesam vuttanayameva.

Brahmālittheragāthāvaṇṇanā niṭṭhitā.

4. Mogharājattheragāthāvaṇṇanā

Chavipāpaka cittabhaddakāti āyasmato mogharājattherassa gāthā. Kā uppatti? Ayampi purimabuddhesu katādhikāro padumuttarassa bhagavato kāle kulagehe nibbattitvā viññutaṃ patto

ekadivasaṃ satthu santike dhammaṃ suṇanto satthāraṃ ekaṃ bhikkhuṃ lūkhacīvaradharānaṃ aggaṭṭhāne ṭhapentaṃ disvā taṃ ṭhānantaraṃ ākaṅkhanto paṇidhānaṃ katvā tattha tattha bhava puññāni karonto atthadassissa bhagavato kāle brāhmaṇakule nibbattivā brāhmaṇānaṃ vijjāsippesu nipphattiṃ gato brāhmaṇamaṇave vijjāsippāni sikkhāpento ekadivasaṃ atthadassiṃ bhagavantaṃ bhikkhusaṅghaparivutaṃ gacchantaṃ disvā pasannaṃ mānaso pañcapaṭiṭṭhitena vanditvā sirasi añjaliṃ katvā “yāvata rūpino sattā” tiādinā chahi gāthāhi abhitthavitvā bhājanaṃ pūretvā madhuṃ upanāmesi. Satthā madhuṃ paṭiggahetvā anumodanaṃ akāsi.

So tena puññakammena devamanussesu saṃsaranto kassapassa bhagavato kāle kaṭṭhavāhanassa nāma rañño amacco hutvā tena satthu ānayanatthaṃ purisasahassena pesito satthu santikaṃ gantvā dhammaṃ sutvā paṭiladdhasaddho pabbajitvā vīsativassasahassāni samaṇadhammaṃ katvā tato cuto ekaṃ buddhantaṃ sugatīsuyeva parivattento imasmiṃ buddhuppāde brāhmaṇakule nibbattivā **mogharājāti** laddhanāmo bāvarībrāhmaṇassa santike uggahitasippo saṃvegajāto tāpasapabbajjaṃ pabbajitvā tāpasasahassaparivāro ajitādīhi saddhiṃ satthu santikaṃ pesito tesāṃ pannarasamo hutvā pañhe pucchitvā pañhavissajjanapariyosāne arahattaṃ pāpuṇi. Tena vuttaṃ **apadāne** (apa. thera 1.4.64-83) –

“Atthadassī tu bhagavā, sayambhū aparājito;
Bhikkhusaṅghaparibyūḷho, rathiyaṃ paṭipajjatha.

“Sissehi samparivuto, gharamhā abhinikkhamiṃ;
Nikkhamitvānaṃ tattha, addasaṃ lokanāyakaṃ.

“Abhivādiya sambuddhaṃ, sire katvāna añjaliṃ;
Sakaṃ cittaṃ pasādetvā, santhaviṃ lokanāyakaṃ.

“Yāvata rūpino sattā, arūpī vā asaññino;
Sabbe te tava ñāṇamhi, anto honti samogadhā.

“Sukhumacchikajālena, udakaṃ yo parikkhipe;
Ye keci uduke pāṇā, antojāle bhavanti te.

“Yesañca cetanā atthi, rūpino ca arūpino;
Sabbe te tava ñāṇamhi, anto honti samogadhā.

“Samuddharasimaṃ lokaṃ, andhakārasamākulaṃ;
Tava dhammaṃ suṇitvāna, kaṅkhāsotaṃ taranti te.

“Avijjānivute loke, andhakārena otthaṭe;
Tava ñāṇamhi jotante, andhakārā padhaṃsitā.

“Tavaṃ cakkhūsi sabbesaṃ, mahātamapanūdano;
Tava dhammaṃ suṇitvāna, nibbāyati bahujjano.

“Puṭakaṃ pūrayitvāna, madhukhuddamaneḷakaṃ;
Ubho hatthehi paggayha, upanesiṃ mahesino.

“Paṭiggaṇhi mahāvīro, sahatthena mahā isi;
Bhuñjitvā tañca sabbaññū, vehāsaṃ nabhamuggami.

“Antalikkhe ṭhito satthā, atthadassī narāsabho;

Mama cittaṃ pasādentō, imā gāthā abhāsatha.

“Yenidaṃ thavitaṃ ñāṇaṃ, buddhaseṭṭho ca thomito;
Tena cittaṃ pasādena, duggatiṃ so na gacchati.

“Catuddasañca khattū so, devarajjaṃ karissati;
Pathabyā rajjaṃ aṭṭhasataṃ, vasudhaṃ āvasissati.

“Pañceva satakkhattuñca, cakkavattī bhavissati;
Padesarajjaṃ asankhēyaṃ, mahiyā kārayissati.

“Ajjhāyako mantadharo, tiṇṇaṃ vedāna pāragū;
Gotamassa bhagavato, sāsane pabbajissati.

“Gambhīraṃ nipuṇaṃ atthaṃ, ñāṇena vicinissati;
Mogharājāti nāmena, hessati satthu sāvako.

“Tīhi vijjāhi sampannaṃ, katakiccamañāsavaṃ;
Gotamo satthavāhaggo, etadagge ṭhapessati.

“Hitvā mānusakaṃ yogaṃ, chetvāna bhavabandhanaṃ;
Sabbāsava pariññāya, viharāmi anāsavo.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā satthalūkhaṃ suttalūkhaṃ rajanalūkhanti viśesena tividhenapi lūkhena samannāgataṃ paṃsukūlaṃ dhāresi. Tena naṃ satthā lūkhacīvaradharānaṃ aggaṭṭhāne ṭhapesi. Aparabhāge purimakammappaccayā parihārassa akaraṇato therassa sarīre daddupīlakādīni uppajjitvā vaḍḍhiṃsu. So “senāsaṇaṃ dussatī”ti hemantepe magadhakkhettesu palālasanthārāni attharivā seti. Taṃ ekadivasāṃ upaṭṭhānaṃ upasañkamitvā vanditvā ekamantaṃ nisinnaṃ satthā paṭisanthāravasena “**chavipāpakā**”tiādīnā paṭhamagāthāya pucchi.

207. Tattha **chavipāpakā**ti daddukacchupīlakāhi bhinnacchavibhāvato hīnacchavika duṭṭhacchavika. **Cittabhaddakā**ti anavasesakilesappahānena brahmavihārasevanāya ca bhaddacitta sundaracitta. **Mogharājāti** tassa ālapanā. **Satataṃ samāhitoti** aggaṭṭhāsamādhīnā niccakālaṃ abhiṇṇaṃ samāhitamānaṃ. **Hemantikāsītakālarattiyoti** hemantasamaye sītakālarattiyoti. Accantasamyoge cetāṃ upayogavacanāṃ. “Hemantikā sītakālarattiyoti”tipi pāḷi. Tattha **hemantikā**ti hemantogadhā hemantapariyāpannāti attho. **Bhikkhu tvaṃ sīti** bhikkhu ko tvaṃ asi, evaṃbhūto paresu tava senāsaṇaṃ katvā adentesu saṅghikañca senāsaṇaṃ apavisanto. **Kathaṃ karissasīti** yathāvutte sītakāle kathaṃ attabhāvaṃ pavattesīti satthā pucchi. Evaṃ pana puṭṭho thero satthu tamatthaṃ kathento

208. “Sampannasassā magadhā, kevalā iti me sutāṃ;
Palālacchannako seyyaṃ, yathaññe sukhajīvino”ti. – gāthamāha;

Tattha **sampannasassā**ti nipphanasassā. **Magadhā**ti magadharatṭhaṃ vadati. Magadhā nāma jānapadino rājakumārā, tesāṃ nivāso ekopi janapado ruḥhīvasena “magadhā”tveva bahuvacanena vuccati. **Kevalā**ti anavasesā. **Iti me sutanti** evaṃ mayā sutāṃ. Tattha yo aditṭho padeso, tassa vasena sutanti vuttaṃ. Tena edise kāle magadhesu yattha katthaci mayā vasitūṃ sakkāti dasseti. **Palālacchannako seyyaṃ, yathaññe sukhajīvino**ti yathā aññe sukhajīvino bhikkhū senāsanasappāyaṃ laddhā sundarehi attharaṇapāvuraṇehi sukkena sayanti, evaṃ ahampi palālasanthārameva heṭṭhā santharivā upari tiriyañca palālacchadaneneva chādītasarīratāya palālacchannako seyyaṃ sayiṃ,

seyyaṃ kappesinti attano yathālābhasantosam vibhāveti.

Mogharājattheragāthāvaṇṇanā niṭṭhitā.

5. Visākhapañcālaputtattheragāthāvaṇṇanā

Na ukkhipe no ca parikkhipe pareti āyasmato visākhassa pañcālaputtassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭūpanissayaṃ puññaṃ upacinanto ito cuddase kappe paccantagāme daliddakule nibbattitvā viññutaṃ patto ekadivasaṃ phalapariyesanaṃ carantehi tasmim gāme manussehi saddhim araññaṃ gato tattha ekaṃ paccekabuddhaṃ disvā pasannamānaso valliphalaṃ adāsi. So tena puññaakammena devamanussesu saṃsaranto imasmim buddhuppāde magadharaṭṭhe maṇḍalikaṛājakule nibbattitvā **visākhoti** laddhanāmo pañcālarājadhītuyā puttabhāvato pacchā **pañcālaputtoti** paññāyittha. So pitari mate rajjaṃ karento satthari attano gāmasamīpagate satthu santikaṃ gantvā dhammaṃ sutvā paṭiladdhasaddho pabbajitvā satthārā saddhim sāvattiṃ gato vipassanaṃ paṭṭhapetvā nacirasseva chaḷabhiñño ahosi. Tena vuttaṃ **apadāne** (apa. thera 1.39.31-36) –

“Sabbe janā samāgama, agamiṃsu vanaṃ tadā;
Phalamanvesamānā te, alabhiṃsu phalaṃ tadā.

“Tatthaddasāsiṃ sambuddhaṃ, sayambhuṃ aparājitaṃ;
Pasannacitto sumano, valliphalamadāsahaṃ.

“Catuddase ito kappe, yaṃ phalamadadiṃ tadā;
Duggatiṃ nābhijānāmi, phaladānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Chaḷabhiñño pana hutvā thero ñātīnaṃ anukampāya jātibhūmiṃ agamāsi. Tattha manussā theram upasaṅkamtivā kālena kālaṃ dhammaṃ suṇantā ekadivasaṃ “katihi nu kho, bhante, aṅgehi samannāgato dhammakathiko hoti”ti dhammakathikalakkaṇaṃ pucchiṃsu. Thero tesam dhammakathikalakkaṇaṃ kathento –

209. “Na ukkhipe no ca parikkhipe pare, na okkhipe pāragataṃ na eraye;
Na cattavaṇṇaṃ parisāsu byāhare, anuddhato sammitabhāṇi subbato.

210. “Susukhumanipuṇatthadassinā, matikusalena nivātavuttinā;
Saṃsevitabuddhasīlinā, nibbānaṃ na hi tena dullabha’nti. –

Gāthādvayaṃ abhāsi.

Tattha **na ukkhipeti** attānaṃ na ukkhipeyya, jātiādīhi bāhusaccādīhi ca attukkamsanaṃ na kareyya. **No ca parikkhipe pareti** pare parapuggale teheva jātiādīhi no parikkhipe paricchinditvā na khipeyya guṇaparidhaṃsanavasena vā na khipeyya. Na okkhipe pare iccevaṃ sambandho. Pare ojjhāpanavasena **na okkhipe** heṭṭhato katvā pare na olokāpeyya, na ojjhāpeyyāti attho. “Na ukkhipe”ti keci paṭhanti, so evattho. **Pāragatanti** saṃsārapāraṃ viya vijjāya pāraṃ gataṃ khīṇāsavaṃ tevijjaṃ chaḷabhiññaṃ vā **na eraye** na ghaṭṭaye na āsādeyya. **Na cattavaṇṇaṃ parisāsu byāhreti** attano vaṇṇaṃ guṇaṃ lābhasakkārasilokaṃ nikāmayamāno khattiyaparisādīsu na bhāseyya. **Anuddhatoti** uddhaccarahito. Uddhatassa hi vacanaṃ nādiyanti. **Sammitabhāṇīti** sammadeva mitabhāṇī, kālena sāpadesaṃ pariyaṇṭavatiṃ atthasañhitameva vācaṃ bhāsanasiṭoti attho. Ito aññathā vadantassa vacanaṃ agahaṇīyaṃ hoti. **Subbatoti** sundaravato sīlasampanno. “Siyā”ti kiriyāpadaṃ ānetvā yojetabbaṃ.

Evam thero sañkhepeneva dhammakathikalakkhaṇaṃ vatvā tesam guṇānaṃ attani labbhamānataṃ adhimuccitvā bhīyyosomattāya abhippasannaṃ mahājanaṃ ñatvā “evaṃvidhassa dhammakathikassa vimuttāyatanasannissitassa na nibbānaṃ dullabhaṃ, atha kho sulabhamevā”ti dassento “**susukhumanipuṇatthadassinā**”ti dutiyagāthamāha. Tassattho heṭṭhā vuttoyeva.

Visākhapañcālaputtattheragāthāvaṇṇanā niṭṭhitā.

6. Cūlakattheragāthāvaṇṇanā

Nadanti morā susikhā supekhuṇāti āyasmato cūlakattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭūpanissayaṃ kusalaṃ upacīnanto ito ekatīṃse kappe sikhissa bhagavato kāle kulagehe nibbattitvā viññutaṃ patto ekadivasaṃ satthāraṃ disvā pasannamānaso chattapaṇṇiphalaṃ adāsi. So tena puññakammena devamanussesu saṃsaranto imasmiṃ buddhuppāde rājagahe brāhmaṇakule nibbattitvā **cūlakoti** laddhanāmo vayappatto dhanapāladamane satthari laddhappasādo pabbajitvā samaṇadhammaṃ karonto indasālaguhāyaṃ vasati, so ekadivasaṃ guhādvāre nisīno magadhakkhettaṃ olokesi. Tasmīṃ khaṇe pāvusakālamegho gambhīramadhuranigghoso satapaṭalasaḥassapaṭalo añjana sikharasannikāso nabhaṃ pūretvā pavassati, mayūrasaṅghā ca meghagajjitaṃ sutvā haṭṭhatuṭṭhā kekāsaddaṃ muñcitvā tattha tattha padese naccantā vicaranti. Therassapi āvāsagabbhe meghavātaḥassehi apagatadhammattā passaddhakarajakāye kallataṃ patte utusappāyalābhena cittaṃ ekaggaṃ ahosi, kammaṭṭhānavīthiṃ otari, so taṃ ñatvā kālasampadādikittanamukhena attānaṃ bhāvanāya ussāhento –

211. “Nadanti morā susikhā supekhuṇā, sunīlagīvā sumukhā sugajjino;
Susaddalā cāpi mahāmahī ayaṃ, subyāpitambu suvalāhakaṃ nabhaṃ.
212. “Sukallarūpo sumanassa jhāyataṃ, sunikkamo sādhu subuddhasāsane;
Susukkasukkaṃ nipuṇaṃ sududdasaṃ, phusāhi taṃ uttamamaccutaṃ pada”nti. –

Dve gāthā abhāsi.

Tattha **nadanti morā susikhā supekhuṇā, sunīlagīvā sumukhā sugajjino**ti ete matthake utṭhitāhi sundarāhi sikhāhi samannāgatattā **susikhā**, nānāvaṇṇehi anekehi sobhanehi bhaddakapiñchehi samannāgatattā **supekhuṇā**, rājīvavaṇṇasañkāsāya sundarāya nīlavaṇṇāya gīvāya samannāgatattā **sunīlagīvā**, sundaramukhatāya **sumukhā**, manuññāvādītāya **sugajjino**, **morā** sikhāṇḍino chajjasamvādī kekāsaddaṃ muñcantā **nadanti** ravanti. **Susaddalā cāpi mahāmahī** ayanti ayañca mahāpathavī susaddalā sundaraharitatīṇā. **Subyāpitambūti** abhinavavutṭhiyā taṃ taṃ vissandamānasalīlatāya suṭṭhu byāpitajalā vitatajalā. “Susukkatambū”tipi pātho, suvisuddhajalāti attho. **Suvalāhakaṃ nabhanti** idañca nabhaṃ ākāsam nīluppaladalasannibhehi samantato pūretvā ṭhitehi sundarehi valāhakehi meghehi suvalāhakaṃ.

Sukallarūpo sumanassa jhāyanti idāni utusappāyalābhena suṭṭhu kallarūpo kammaniyasabhāvo tvam, nīvaraṇehi anajjhārūḥacittatāya sundaramanassa yogāvacarassa yaṃ ārammaṇūpanijjhānavasena lakkhaṇūpanijjhānavasena ca jhāyataṃ. **Sunikkamo...pe... accutaṃ padanti** evaṃ jhāyanto ca **sādhu subuddhassa** sammāsambuddhassa **sāsane** sundaranikkamo hutvā superisuddhasīlatāya **susukkaṃ**, visuddhasabhāvatāya sabbassapi saṃkilesassa gocarabhāvanupagamanato **sukkaṃ**, nipuṇaññagocaratāya **nipuṇaṃ**, paramagambhīratāya **sududdasaṃ**, paṇītabhāvena seṭṭhabhāvena ca **uttamaṃ**, niccasabhāvatāya **accutaṃ padaṃ taṃ** nibbānaṃ **phusāhi** attapaccakkhakarāṇena sammāpaṭipattiyā sacchikarohīti.

Evam thero attānaṃ ovaḍantova utusappāyalābhena samāhitacitto vipassanaṃ ussukkāpetvā arahattaṃ pāpuṇi. Tena vuttaṃ **apadāne** (apa. thera 1.39.37-42) –

“Kaṇikāraṃva jalitaṃ, puṇṇamāyeva candimaṃ;
Jalantaṃ dīparukkhamaṃ, addasaṃ lokanāyakaṃ.

“Kadaliphalaṃ paggayha, adāsiṃ satthuno ahaṃ;
Pasannacitto sumano, vanditvāna apakkamiṃ.

“Ekaṭiṃse ito kappe, yaṃ phalamadadiṃ tadā;
Duggatiṃ nābhijānāmi, phaladānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’’nti.

Arahattaṃ pana patvā thero attano paṭipattiṃ paccavekkhitvā pītisomanassajāto “**nadanti morā**’’tiadinā tāyeva gāthā paccudāhāsi. Tenassa idameva aññābyākaraṇaṃ ahoṣīti.

Cūlakattheragāthāvaṇṇanā niṭṭhitā.

7. Anūpamattheragāthāvaṇṇanā

Nandamānāgataṃ cittāti āyasmato anūpamattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭūpanissayaṃ puññaṃ upacinanto ito ekaṭiṃse kappe kulagehe nibbattitvā viññutaṃ patto ekadivasaṃ padumaṃ nāma paccekabuddhaṃ piṇḍāya carantaṃ rathiyam disvā pasannamānaso ankolapupphehi pūjesi. So tena puññakammena devamanussesu saṃsaranto imasmiṃ buddhuppāde kosalaratthe ibbhakule nibbattitvā rūpasampattiyā **anūpamoti** laddhanāmo vayappatto upanissayasampannatāya kāme pahāya pabbajitvā vipassanāya kammaṃ karonto arañhe viharati. Tassa cittaṃ bahiddhā rūpādiārammaṇesu vidhāvati. Kammatṭhānaṃ parivaṭṭati. Thero vidhāvantaṃ cittaṃ niggaṇhanto –

213. “Nandamānāgataṃ cittaṃ, sūlamāropamānakaṃ;
Tena teneva vajasi, yena sūlaṃ kaliṅgaraṃ.

214. “Tāhaṃ cittakaliṃ brūmi, taṃ brūmi cittadubbhakaṃ;
Satthā te dullabho laddho, mānatthe maṃ niyojayī’’ti. –

Imāhi dvīhi gāthāhi ovadi.

Tattha **nandamānāgataṃ cittāti** nandamāna abhinandamāna citta abhinandamānaṃ āgataṃ uppannaṃ. **Sūlamāropamānakaṃ** dukkhuppattiṭṭhānatāya sūlasadisattā sūlaṃ taṃ taṃ bhavaṃ kammakilesehi ettakaṃ kālaṃ āropiyamānaṃ. **Tena teneva vajasi, yena sūlaṃ kaliṅgaranti** yattha yattha sūlasaṅkhātā bhavā kaliṅgarasaṅkhātā adhikuṭṭānakā kāmagaṇā ca tena teneva, pāpacitta, vajasi, taṃ tadeva ṭhānaṃ upagacchasi, attano anattaṃ na sallakkhesi.

Tāhaṃ cittakaliṃ brūmiti taṃ tasmā pamattabhāvato cittakaliṃ cittakālakaṇṇiṃ ahaṃ kathayāmi. Punapi **taṃ brūmi** kathemi **cittadubbhakaṃ** cittasaṅkhātassa attano bahūpakārassa santānassa anattāhāvanato cittadubbhiṃ. “Cittadubbhagā’’tipi paṭhanti. Cittasaṅkhātaalakkhikaappapuññāti attho. Kinti brūhīti ce? Āha “**satthā te dullabho laddho, mānatthe maṃ niyojayī**’’ti. Kappānaṃ asaṅkhyeyyampi nāma buddhasuñño loko hoti, satthari uppannepi manussattasaddhāpaṭilābhādayo dullabhā eva, laddhesu ca tesu satthāpi dullabhoyeva hoti. Evaṃ dullabho satthā idāni tayā laddho, tasmīṃ laddhe sampatipi anattaṃ ahite āyatiṅca anattāhāve dukkhāhāve akusale maṃ mā niyojesīti. Evaṃ thero attano cittaṃ ovaḍanto eva vipassanaṃ vaḍḍhetvā arahattaṃ pāpuṇi. Tena vuttaṃ **apadāne** (apa. thera 1.37.16-19) –

“Padumo nāma sambuddho, cittakūṭe vasī tadā;

Disvāna taṃ ahaṃ buddhaṃ, sayambhuṃ aparājitaṃ.

“Ankolaṃ pupphitaṃ disvā, ocinitvānahaṃ tadā;
Upagantvāna sambuddhaṃ, pūjayaṃ padumaṃ jinaṃ.

“Ekatimse ito kappe, yaṃ pupphamabhipūjayaṃ;
Duggatiṃ nābhijānāmi, buddhapūjāyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.
Anūpamattheragāthāvaṇṇanā niṭṭhitā.

8. Vajjitattheragāthāvaṇṇanā

Samsaram dīghamaddhānanti āyasmato vajjitattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto ito pañcasaṭṭhime kappe ekasmiṃ paccantagāme nibbattivā viññutaṃ patto vanacarako hutvā vicaranto ekadivasaṃ upasantaṃ nāma paccekabuddhaṃ pabbataguhāyaṃ viharantaṃ addasa. So tassa upasamaṃ disvā pasannamānaso campakapupphena pūjaṃ akāsi. So tena puññakammena devamanussesu saṃsaranto imasmiṃ buddhuppāde kosalaratṭhe ibbhakule nibbato jātadivasaṃ paṭṭhāya mātugāmahatthaṃ gato rodati. Brahmalo kato kira cavitvā idhāgato yasmā mātugāmasamphassaṃ na sahati, tasmā mātugāmasamphassavajjanato **vajjitot**veva nāmaṃ jātaṃ. So vayappatto satthu yamakapāṭihāriyaṃ disvā paṭiladdhasaddho pabbajitvā vipassanaṃ paṭṭhapetvā tadaheva chaḷabhiñño ahosi. Tena vuttaṃ **apadāne** (apa. therā 1.37.27-30) –

“Upasanto ca sambuddho, vasatī pabbatantare;
Ekacampakamādāya, upagacchiṃ naruttamaṃ.

“Pasannacitto sumano, paccekamunimuttamaṃ;
Ubho hatthehi paggayha, pūjayaṃ aparājitaṃ.

“Pañcasaṭṭhimhito kappe, yaṃ pupphamabhipūjayaṃ;
Duggatiṃ nābhijānāmi, buddhapūjāyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.
Chaḷabhiñño pana hutvā attano pubbenivāsaṃ anussarivā dhammasaṃvegena –

215. “Saṃsaram dīghamaddhānaṃ, gatīsu parivattisaṃ;
Apassaṃ ariyasaccāni, andhabhūto puthujjano.

216. “Tassa me appamattassa, saṃsārā vinaḷīkatā;
Sabbā gatī samucchinnā, natthi dāni punabbhavo’nti. – dve gāthā abhāsi;

Tattha **samsaranti** saṃsaranto, tasmim tasmim bhava ādānanikkhepavasena aparāparaṃ sandhāvanto. **Dīghamaddhānanti** cirakālaṃ anādimati saṃsāre aparimāṇakālaṃ. **Gatīsūti** sukata dukkaṭānaṃ kammānaṃ vasena sugatiduggatīsu. **Parivattisanti** ghaṭṭiyantaṃ viya paribbhamanto cavanupapajjanavasena aparāparaṃ parivattiṃ. Tassa pana parivattanassa kāraṇamāha “**apassaṃ ariyasaccāni, andhabhūto puthujjano**”ti. Dukkhadīni cattāri ariyasaccāni nāñacakkhunā appasanto appaṭivijjhanto, tato eva avijjandhatāya andhabhūto puthūnaṃ janānādīhi kāraṇehi puthujjano honto gatīsu parivattisanti yojanā, tenevāha bhagavā –

“Catunnaṃ, bhikkhave, ariyasaccānaṃ ananubodhā appaṭivedhā evamidaṃ

dīghamaddhānaṃ sandhāvitaṃ saṃsaritaṃ mamañceva tumhākañcā’’ti (mahāva. 287; dī. ni. 2.155; saṃ. ni. 5.1091; netti. 114).

Tassa mayhaṃ vuttanayena pubbe puthujjanasseva sato idāni satthārā dinnanayena **appamattassa** appamādaṭṭipattiyā samathavipassanābhāvanāṃ matthakaṃ pāpetvā ʈhitassa. **Saṃsārā vinalīkatāti** saṃsaranti sattā etehīti ‘‘saṃsārā’’ti laddhanāmā kammakilesā aggamaggena samucchinnattā vigatanaḷā nimmūlā katā. **Sabbā gatī samucchinnāti** evaṃ kammakilesavaṭṭānaṃ vinalīkatattā nirayādikā sabbāpi gatiyo sammadeva ucchinnā viddhaṃsitā, tato eva **natthi dāni** āyatim **punabbhavoti** idameva ca therassa aññābyākaraṇaṃ ahoṣīti.

Vajjitattheragāthāvaṇṇanā niṭṭhitā.

9. Sandhitattheragāthāvaṇṇanā

Assatthe haritobhāseti āyasmato sandhitattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto ito ekatiṃse kappe sikhissa bhagavato kāle eko gopālako ahoṣi. So satthari parinibbute aññataraṃ therāṃ upasaṅkamitvā tassa santike buddhaguṇapaṭisaṃyuttaṃ dhammaṃ sutvā pasannamānaso ‘‘kuhiṃ bhagavā’’ti pucchitvā parinibbutabhāvaṃ sutvā ‘‘evaṃ mahānubhāvā buddhāpi nāma aniccatāvasaṃ gacchanti, aho saṅkhārā addhuvā’’ti aniccasaññaṃ paṭilabhi. Taṃ thero bodhipūjāya ussāhesi. So kālena kālaṃ bodhirukkhasamīpaṃ gantvā vipassanaṃ paṭṭhapetvā buddhaguṇe anussaranto bodhiṃ vandati. So tena puññakamma devamanussesu saṃsaranto imasmiṃ buddhuppāde kosalaratṭhe ibbhakule nibbattitvā **sandhitoti** laddhanāmo vayappatto aniccatāpaṭisaṃyuttaṃ dhammakathaṃ sutvā saṃvegajāto pabbajitvā vipassanaṃ paṭṭhapetvā nīṇassa paripākaṃ gatattā nacirasseva chaḷabhiñño ahoṣi. So attano pubbenivāsaṃ anussaranto sikhissa bhagavato kāle bodhivandanaṃ buddhānussatiṃ aniccasaññaṃ paṭilābhañca anussaritvā tadupanissayena attano visesādhigamaṃ pakāseto –

217. ‘‘Assatthe haritobhāse, saṃvirūḷhamhi pādape;
Ekaṃ buddhagataṃ saññaṃ, alabhitthaṃ patissato.

218. ‘‘Ekatiṃse ito kappe, yaṃ saññaṃmalabhiṃ tadā;
Tassā saññāya vāhasā, patto me āsavakkhaya’’ti. –

Dve gāthā abhāsi.

Tattha **assattheti** assatthaṭṭhānīye, yvāyaṃ etarahi amhākaṃ bhagavato bodhirukkho assattho, etassa ʈhāne tadā sikhissa bhagavato bodhirukkho puṇḍarīko ʈhitoti so assatthaṭṭhānīyatāya ‘‘assatthe’’ti vuttaṃ. Sattānaṃ assāsajananato vā. Apare pana ‘‘assattharukkhamūle nisīditvā tadā buddhānussatiyā bhāvitattā thero ‘assatthe’’ti avocā’’ti vadanti. **Haritobhāseti** haritehi sāramaṇivaṇṇehi obhāsamāne. **Saṃvirūḷhamhīti** suṭṭhu virūḷhe suppatiṭṭhite, sughananicitapattapalāsapallavehi virūḷhasañchanneti ca vadanti. **Pādapeti** rukkhe. **Ekaṃ buddhagataṃ saññaṃ, alabhitthaṃ patissatoti** buddhārammaṇaṃ ārammaṇassa ekajātiyattā ekaṃ ‘‘itipi so bhagavā’’tiādinayappavattaṃ buddhānussatisahagataṃ saññaṃ buddhaguṇānaṃ patipatisaraṇato patissato hutvā alabhiṃ.

Kadā pana sā saññā laddhā, kīvatāya siddhāti āha ‘‘**ekatiṃse ito kappe**’’tiādi. Ito bhaddakappato uddhaṃ ārohanavasena ekatiṃse kappe. **Yaṃ saññanti** yaṃ buddhānussatisahagataṃ saññaṃ, yaṃ vā buddhānaṃ aniccatāṃ disvā tadanusārena sabbāsaṅkhāresu tadā aniccasaññaṃ alabhiṃ. **Tassā saññāya vāhasāti** tassā yathāvuttāya saññāya kāraṇabhāvena taṃ upanissayaṃ katvā. **Patto me āsavakkhayaoti** idāni mayā āsavānaṃ khayō nirodho adhiगतoti imāyeva ca imassa therassa apadānagāthāpi. Yathāha (apa. therā 1.22.27-30) –

“Assatthe haritobhāse...pe... patto me āsavakkhayo.
 “Ito terasakappamhi, dhaniṭṭho nāma khattiyo;
 Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana’nti.
 Sandhitattheragāthāvaṇṇanā niṭṭhitā.

Pañcamavaggavaṇṇanā niṭṭhitā.

Niṭṭhitā ca dukanipātavaṇṇanā.

3. Tikanipāto

1. Aṅgaṇikabhāradvājattheragāthāvaṇṇanā

Tikanipāte **ayoni suddhimanvesanti** āyasmato aṅgaṇikabhāradvājattherassa gāthā. Kā uppatti? Ayampi purimabuddhesu katādhiḱāro tattha tattha bhava vivatṭūpanissayaṃ puññaṃ upacinanto ito ekatiṃse kappe sikhissa bhagavato kāle kulagehe nibbattitvā viññutaṃ patto ekadivasaṃ sathhāraṃ piṇḍāya carantaṃ disvā pasannamānaso pañcapatiṭṭhitena vanditvā añjaliṃ paggaṇhi. So tena puññakammena devamanussesu saṃsaranto imasmiṃ buddhuppāde himavantasamīpe ukkaṭṭhe nāma nagare vibhavasampannassa brāhmaṇassa gehe nibbattitvā **aṅgaṇikabhāradvājoti** laddhanāmo vayappatto vijjāsippesu nipphattiṃ gato nekkhammajjhāsayaṭāya paribbājakapabbajjaṃ pabbajitvā amaraṃ tapaṃ caranto tattha tattha vicaranto sammāsambuddhaṃ janapadacārikaṃ carantaṃ disvā pasannamānaso sattu santike dhammaṃ sutvā taṃ micchātaṃ pahāya sāsane pabbajitvā vipassanāya kammaṃ karonto nacirasseva chaḷabhiñño ahoṣi. Tena vuttaṃ **apadāne** (apa. therā 1.23.48-51) –

“Usabhaṃ pavaraṃ vīraṃ, vessabhuṃ vijitāvinaṃ;
 Pasannacitto sumano, buddhasettṭhamavandahaṃ.

“Ekatiṃse ito kappe, yaṃ kammamakarim tādā;
 Duggatiṃ nābhijānāmi, vandanāya idaṃ phalaṃ.

“Catuvīsatikappamhi, vikatānandanāmako;
 Sattaratanasampanno, cakkavattī mahabbalo.

“Kilesā jhāpitā mayhaṃ...pe... kataṃ buddhassa sāsana’nti.

Chaḷabhiñño pana hutvā vimuttisukhena viharanto ñātīnaṃ anukampāya attano jātibhūmiṃ gantvā bahū ñātake saraṇesu ca sīlesu ca patiṭṭhāpetvā tato nivattitvā kururaṭṭhe kuṇḍiyassa nāma nigamassa avidūre araññe vasanto kenacideva karaṇīyena uggārāmaṃ gato uttarāpathato āgatehi sandiṭṭhehi brāhmaṇehi samāgato tehi, “bho bhāradvāja, kiṃ disvā brāhmaṇānaṃ samayaṃ pahāya imaṃ samayaṃ gaṇhī”ti pucchito tesāṃ ito buddhasāsanato bahiddhā suddhi natthīti dassento –

219. “Ayonī suddhimanvesaṃ, aggaṃ paricariṃ vane;
 Suddhimaggaṃ ajānanto, akāsiṃ amaraṃ tapa’nti. – paṭhamaṃ gāthamāha;

Tattha **ayonī** ayoniso anupāyena. **Suddhinti** saṃsārasuddhiṃ bhavanissaraṇaṃ. **Anvesanti** gavesanto. **Aggaṃ paricariṃ vaneti** “ayaṃ suddhimaggo”ti adhippāyena araññāyatane agghutasālāyaṃ agyāgāraṃ katvā āhutiṃ paggaṇhanto aggidevaṃ paricariṃ vede vuttavidhinā pūjesiṃ. **Suddhimaggaṃ ajānanto, akāsiṃ amaraṃ tapaṃ** suddhiyā nibbānassa maggaṃ ajānanto aggiparicaraṇaṃ viya pañcatapatappanādiattakilamathānuyogaṃ “suddhimaggo”ti maññāya akāsiṃ

acarim paṭipajjim.

Evam thero assamato assamaṃ gacchanto viya vede vuttavidhinā aggiparicaraṇādinā anuṭṭhāya suddhiyā appattabhāvena bahiddhā suddhiyā abhāvaṃ dassetvā idāni imasmiṃyeva sāsane suddhi ca mayā adhigatāti dassento –

220. “Taṃ sukkena sukhaṃ laddhaṃ, passa dhammasudhammataṃ;
Tisso vijjā anuppattā, kataṃ buddhassa sāsana”nti. – dutiyagāthamāha;

Tattha **tanti** yassatthāya suddhiṃ anvesanto tassa maggaṃ ajānanto aggim paricarim amaraṃ tapam acarim, taṃ nibbānasukhaṃ sukkena samathavipassanāya sukhāya paṭipadāya attakilamathānuyogaṃ anupagamma mayā **laddhaṃ** pattaṃ adhigataṃ. **Passa dhammasudhammatanti** satthu sāsanaḍhammassa sudhammataṃ aviparītaniyyānikadhammasabhāvaṃ passa jānāhīti dhammālanavasena vadati, attānaṃ vā ālapati. Tassa laddhabhāvaṃ pana dassento –

“**Tisso vijjā anuppattā, kataṃ buddhassa sāsana**”nti. –

Āha, taṃ vuttatthameva. Evam suddhiyā adhigatattā “ito paṭṭhāyāhaṃ paramatthato brāhmaṇo”ti dassento –

221. “Brahmabandhu pure āsim, idāni khomhi brāhmaṇo;
Tevijjo nhātakocamhi, sottiyo camhi vedagū”ti. – tatiyaṃ gāthamāha;

Tassattho – ito pubbe jātimmattena brāhmaṇabhāvato brāhmaṇānaṃ samaññāya **brahmabandhu** nāma **āsim**. Bāhitapāpattā pana **idāni kho** arahattādhigamena paramatthato **brāhmaṇo ca amhi**. Ito pubbe bhavasañcayakarānaṃ tissannaṃ vedasañkhātānaṃ vijjānaṃ ajjhayanena samaññāmmattena tevijjo nāma hutvā idāni bhavakkhayakarāya vijjāya vasena tissannaṃ vijjānaṃ adhigatattā paramatthato **tevijjo ca amhi**. Tathā ito pubbe bhavassādagadhītāya nhātakavatanipphattiyā samaññāmmattena nhātakō nāma hutvā idāni aṭṭhaṅgikamaggajalena suvikkhālitakilesamalātāya paramatthato **nhātako camhi**. Ito pubbe avimuttabhavassādamantajjhānena vohāramattato sottiyo nāma hutvā idāni suvimuttabhavassādadhammajjhānena paramatthato **sottiyo camhi**. Ito pubbe appaṭinissatṭhapāpadhammānaṃ vedānaṃ gatammattena vedagū nāma hutvā idāni vedasañkhātēna maggañāṇena saṃsāramahoghassa vedassa catusaccassa ca pāraṃ gatattā adhigatattā nātattā paramatthato **vedagū** jātoti. Taṃ sutvā brāhmaṇā sāsane ulāraṃ pasādaṃ pavedesum.

Āṅgaṇikabhāradvājattheragāthāvaṇṇanā niṭṭhitā.

2. Paccayattheragāthāvaṇṇanā

Pañcāhāhaṃ pabbajitoti āyasmato paccayattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto ito ekanavute kappe vipassissa bhagavato kāle kulagehe nibbattivā viññutaṃ patto ekadivasam satthāraṃ vinatāya nāma nadiyā tīre gacchantaṃ disvā pasannamānaso manuññadassanāni mahantāni udumbaraphalāni ocinitvā upanāmesi. So tena puññakammaena sugatīsuyeva saṃsaranto imasmiṃ bhaddakappe kassape bhagavati loke uppajjitvā pavattavaradhammacakke veneyyanānuggahaṃ karonte tassa sāsane pabbajitvā vipassanaṃ paṭṭhapetvā bhāvanamanuyujjanto ekadivasam saṃsāradukkhaṃ cintetvā

Ativiya sañjātasamvego vihāre nisinno “arahattaṃ appatvā ito na nikkhamissāmī”ti cittaṃ adhiṭṭhāya vāyamanto nāṇassa aparipakkattā vipassanaṃ ussukkāpetum nāsakkhi. So kālaṅkatvā devamanussesu saṃsaranto imasmiṃ buddhuppāde rohitanaḡare khattiyakule nibbattivā **paccayoti** laddhanāmo vayappatto pitu accayena rajje patitṭhito ekadivasam mahārājabalim kātum ārabhi. Tattha mahājano

sannipati. Tasmim samāgame tassa pasādañjananattam satthā mahājanassa pekkhantasēva ākāse vessavaṇena nimmite ratanamayakūṭāgāre ratanamayasīhāsane nisīditvā dhammam desesi. Mahato janakāyassa dhammābhisamayo ahoṣi. Tam dhammam sutvā paccayarājāpi rajjam pahāya purimahetusāñcodito pabbaji. So yathā kassapassa bhagavato kāle paṭiññam akāsi, evam paṭiññam katvā vihāram pavisitvā vipassanam vaḍḍhento ñāṇassa paripākam gatattā tāvadeva arahattam pāpuṇi. Tena vuttam **apadāne** (apa. therā 1.39.15-20) –

“Vinatānadiyā tīre, vihāsi purisuttamo;
Addasam virajam buddham, ekaggam susamāhitam.

“Tasmim pasannamānaso, kilesamaladhovane;
Udumbaraphalam gayha, buddhaseṭṭhassadāsaham.

“Ekanavutito kappe, yam phalamadadiṃ tadā;
Duggatiṃ nābhijānāmi, phaladānassidaṃ phalam.

“Imamhi bhaddake kappe, samviggamānamānaso;
Kassapassa bhagavato, sāsane pabbajim aham.

“Tathā pabbajito santo, bhāvanam anuyuñjissam;
Na vihārā nikkhamissam, itī katvāna mānasam.

“Uttamattham asampatto, na ca pattomhi tāvade;
Idāni pana ñāṇassa, paripākena nibbuto;

Pattomhi acalam thānam, phusitvā accutam padam.

“Kilesā jhāpitā mayham...pe... katam buddhassa sāsana’nti.
Arahattam pana patvā attano paṭipattikittanamukhena aññam byākaronto –

222. “Pañcāhāham pabbajito, sekho appattamānaso;
Vihāram me pavitṭhassa, cetaso paṇidhī ahu.

223. “Nāsissam na pivissāmi, vihārato na nikkhame;
Napi passam nipātessam, taṇhāsalle anūhate.

224. “Tassa mevam viharato, passa vīriyaparakkamam;
Tisso vijjā anuppattā, katam buddhassa sāsana’nti. –

Imā tisso gāthā abhāsi.

Tattha **pañcāhāham pabbajitoti** pañcāho aham, pabbajito hutvā pañcāho, pabbajitadivasato pañcamo aho niṭṭhitoti attho. **Sekho appattamānasoti** adhisīlasikkhādīnam sikkhanato sekho. Anavasesato mānam siyati samucchindatīti mānaso, aggamaggo, tamnibbattito mānasato āgataṃ mānasam, arahattam, tam, so vā appatto etenāti appattamānaso. **Vihāram me pavitṭhassa, cetaso paṇidhī ahūti** evam sekhasa me vasanakavihāram ovarakam pavitṭhassa sato evarūpo idāni vuccamānākāro cetopaṇidhi ahoṣi, evam mayā cittam paṇihitanti attho.

Nāsissantiādīnā cittapaṇidhiṃ dasseti. Tattha **nāsissanti** yaṃkiñci bhojanam na bhuñjissam na bhuñjissāmi **taṇhāsalle** mama hadayagate **anūhate** anuddhateti evam sabbapadesu yojetabbam. **Na pivissāmīti** yaṃkiñci pātabbam na pivissāmi. **Vihārato na nikkhame**ti imasmā idāni mayā

nisinnagabbhato na nikkhameyyaṃ. **Napi passam nipātesanti** mama sarīrassa dvīsu passesu ekampi passam kāyakilamathavinodanattam na nipātesam, ekapassenapi na nipajjissāmīti attho.

Tassa mevam viharatoti tassa me evam cittaṃ pañidhāya dalhavīriyādhiṭṭhānaṃ katvā vipassanānuyogavasena viharato. **Passa vīriyaparakkamanti** vidhinā īrayitabbato “vīriyam” param ṭhānaṃ akkamanato “parakkamo”ti ca laddhanāmaṃ ussoḷhībhūtaṃ vāyāmaṃ passa jānāhi. Yassa pañānubhāvena mayā **tisso vijjā anuppattā, kataṃ buddhassa sāsananti** vuttatthameva.

Paccayattheragāthāvaṇṇanā niṭṭhitā.

3. Bākulattheragāthāvaṇṇanā

Yo pubbe karaṇīyānīti āyasmato bākulattherassa gāthā. Kā uppatti? Ayampi kira atīte ito kappasatasahassādhikassa asaṅkhyeyyassa matthake anomadassissa bhagavato uppattito puretameva brāhmaṇakule nibbattitvā vayappatto tayo vede uggahetvā tattha sāraṃ apassanto “samparāyikattham gavesissāmī”ti isipabbajjam pabbajitvā pabbatapāde viharanto pañcābhiññāaṭṭhasamāpattilābhī hutvā viharanto buddhuppādaṃ sutvā satthu santikaṃ gantvā dhammaṃ sutvā saraṇesu paṭiṭṭhito satthu udarābādhe uppanne araññato bhesajjāni āharitvā taṃ vūpasametvā tattha puññaṃ ārogyatthāya pariṇāmetvā tato cuto brahmaloke nibbattitvā ekaṃ asaṅkhyeyyam devamanussesu saṃsaranto padumuttarabuddhakāle haṃsavatīnagare kulagehe nibbato satthāraṃ ekaṃ bhikkhuṃ appābādhanam aggaṭṭhāne ṭhapentaṃ disvā sayam taṃ ṭhānantaram ākaṅkhanto pañidhānaṃ katvā yāvajīvaṃ kusalaṃ upacinitvā sugatīsuveva saṃsaranto vipassissa bhagavato nibbattito puretameva bandhumatīnagare brāhmaṇakule nibbato purimanayeneva isipabbajjam pabbajitvā jhānābhiññālābhī hutvā pabbatapāde vasanto buddhuppādaṃ sutvā satthu santikaṃ gantvā dhammaṃ sutvā saraṇesu paṭiṭṭhito bhikkhūnaṃ tiṇapupphakaroge uppanne taṃ vūpasametvā tattha yāvatāyukaṃ ṭhatvā tato cuto brahmaloke nibbattitvā ekanavutikappe devamanussesu saṃsaranto kassapassa bhagavato kāle bārāṇasiyam kulagehe nibbattitvā gharāvāsaṃ vasanto ekaṃ jīṇṇam vinassamānaṃ mahāvihāraṃ disvā tattha uposathāgārādikaṃ sabbaṃ āvasathaṃ kāretvā tattha bhikkhusaṅghassa sabbaṃ bhesajjam paṭiyādetvā yāvajīvaṃ kusalaṃ katvā ekaṃ buddhantaram devamanussesu saṃsaranto amhākaṃ bhagavato uppattito puretameva kosambiyam seṭṭhigehe nibbatti. So arogabhāvāya mahāyamunāya nhāpiyamāno dhātiyā hatthato macchena gilito macche kevaṭṭhatthagate bārāṇasiseṭṭhibhāriyāya vikkiṇitvā gahite phāliyamānepi puññabalena arogoyeva hutvā tāya puttoti gahetvā posiyamāno taṃ pavattiṃ sutvā janakehi mātāpitūhi “ayaṃ amhākaṃ putto, detha no putta”nti anuyoge kate raññā “ubhayesampi sādharmaṇo hotū”ti dvinnaṃ kulānaṃ dāyādabhāvena vinicchayaṃ katvā ṭhapitattā **bākuloti** laddhanāmo vayappatto hutvā mahatiṃ sampattiṃ anubhavanto āsītiko hutvā satthu santike dhammaṃ sutvā paṭiladdhasaddho pabbajitvā sattāhameva puthujjano ahosi, aṭṭhame aruṇe saha paṭisambhidāhi arahattaṃ pāpuṇi. Tena vuttaṃ **apadāne** (apa. thera 1.40.386-411) –

“Himavantassāvidūre, sobhito nāma pabbato;
Assamo sukato mayhaṃ, sakasissehi māpito.

“Maṇḍapā ca bahū tattha, pupphitā sindhuvārakā;
Kapitthā ca bahū tattha, pupphitā jīvajīvakā.

“Niggaṇḍiyo bahū tattha, badarāmalakāni ca;
Phārusakā alābū ca, puṇḍarīkā ca pupphitā.

“Āḷakā beluvā tattha, kadalī mātulungakā;
Mahānāmā bahū tattha, ajjunā ca piyaṅgukā.

“Kosambā saḷalā nimbā, nigrodhā ca kapitthanā;

Ediso assamo mayhaṃ, sasissohaṃ tahiṃ vaṣiṃ.

“Anomadassī bhagavā, sayambhū lokanāyako;
Gavesaṃ paṭisallānaṃ, mamassamamupāgami.

“Upetamhi mahāvīre, anomadassimahāyase;
Khaṇena lokanāthassa, vātābādho samuṭṭhahi.

“Vicaranto araṇṇamhi, addasaṃ lokanāyakaṃ;
Upagantvāna sambuddhaṃ, cakkhumantaṃ mahāyasaṃ.

“Iriyañcāpi disvāna, upalakkhesahaṃ tadā;
Asaṃsayañhi buddhassa, byādhi no udapajjatha.

“Khippaṃ assamamāgañchiṃ, mama sissāna santike;
Bhesajjaṃ kattukāmoḥaṃ, sisse āmantayim tadā.

“Paṭissuṇitvāna me vākyam, sissā sabbe sagāravā;
Ekajjhaṃ sannipatiṃsu, satthugāravatā mama.

“Khippaṃ pabbatamāruya, sabbosadhamahāsahaṃ;
Pānīyayogaṃ katvāna, buddhaseṭṭhassadāsahaṃ.

“Paribhutte mahāvīre, sabbaññulokanāyake;
Khippaṃ vāto vūpasami, sugatassa mahesino.

“Passaddhaṃ darathaṃ disvā, anomadassī mahāyaso;
Sakāsane nisīditvā, imā gāthā abhāsatha.

“Yo me pādāsi bhesajjaṃ, byādhiñca samayī mama;
Tamahaṃ kittayissāmi, suṇātha mama bhāsato.

“Kappasatasahassāni, devaloke ramissati;
Vādite tūriye tattha, modissati sadā ayaṃ.

“Manussalokamāgantvā, sukkamūlena codito;
Sahassakkhattuṃ rājā ca, cakkavattī bhavissati.

“Pañcapanñāsakappamhi, anomo nāma khattiyo;
Cāturanto vijitāvī, jambumaṇḍassa issaro.

“Sattaratanasampanno, cakkavattī mahabbalo;
Tāvatiṃsepi khobhetvā, issaraṃ kārayissati.

“Devabhūto manusso vā, appābādho bhavissati;
Pariggahaṃ vivajjetvā, byādhiṃ loke tarissati.

“Aparimeyye ito kappe, okkākakulasambhavo;
Gotamo nāma gottena, sathā loke bhavissati.

“Tassa dhammesu dāyādo, oraso dhammanimmito;
Sabbāsave pariññāya, nibbāyissatināsavo.

“Kilese jhāpayitvāna, taṇhāsotaṃ tarissati;
Bākulo nāma nāmena, hessati satthu sāvako.

“Idaṃ sabbam abhiññāya, gotamo sakyapuṅgavo;
Bhikkhusaṅghe nisīditvā, etadagge ṭhapessati.

“Anomadassī bhagavā, sayambhū lokanāyako;
Vivekānuvilokento, mamassamamupāgami.

“Upāgataṃ mahāvīraṃ, sabbaññuṃ lokanāyakaṃ;
Sabbosadhena tappesiṃ, pasanno sehi pāṇibhi.

“Tassa me sukataṃ kammaṃ, sukhetta bījasampadā;
Khepetuṃ neva sakkomi, tadā hi sukataṃ mama.

“Lābhā mama suladdhaṃ me, yohaṃ addakkhi nāyakaṃ;
Tena kammāvasesena, pattomhi acalaṃ padaṃ.

“Sabbametam abhiññāya, gotamo sakyapuṅgavo;
Bhikkhusaṅghe nisīditvā, etadagge ṭhapesi maṃ.

“Aparimeyye ito kappe, yaṃ kammamakariṃ tadā;
Duggatiṃ nābhijānāmi, bhesajjassa idaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Arahattaṃ pana patvā ekadivasam satthārā attano sāvake paṭipāṭiyā ṭhānantare ṭhapentena appābādhānaṃ aggaṭṭhāne ṭhapito so parinibbānasamaye saṅghamajjhe bhikkhūnaṃ ovādamukhena aññaṃ byākaronto –

225. “Yo pubbe karaṇīyāni, pacchā so kātumicchati;
Sukhā so dhamṣate ṭhānā, pacchā ca manutappati.

226. “Yañhi kayirā tañhi vade, yaṃ na kayirā na taṃ vade;
Akarontaṃ bhāsamaṇaṃ, pari jānanti paṇḍitā.

227. “Susukhaṃ vata nibbānaṃ, sammāsambuddhadesitaṃ;
Asokaṃ virajaṃ khemaṃ, yattha dukkhaṃ nirujjhatī’ti. – gāthāttayamabhāsi;

Tattha **yo pubbe karaṇīyāni, pacchā so kātumicchati**ti yo puggalo pubbe puretaraṃ jarārogādīhi anabhibhūtakāleyeva kātabbāni attano hitasukhāvahāni kammāni pamādavasesena akatvā pacchā so kātabbakālaṃ atikkamitvā kātuṃ icchati. **Soti** ca nipātamattaṃ. Tadā pana jarārogādīhi abhibhūtattā kātuṃ na sakkoti, asakkonto ca **sukhā so dhamṣate ṭhānā, pacchā ca manutappati**ti so puggalo sukhā ṭhānā saggato nibbānato ca tadupāyassa anuppāditattā parihāyanto “akataṃ me kalyāṇa’ntiadinā (ma. ni. 3.248; netti. 120) pacchā ca anutappati vippaṭisāraṃ āpajjati. **Ma**-kāro padasandhikaro. Ahaṃ pana karaṇīyaṃ katvā eva tumhe evaṃ vadāmīti dassento “**yañhi kayirā**”ti dutiyaṃ gāthamāha.

Tattha **pari jānanti**ti “ettako aya’nti paricchijja jānanti na bahuṃ maññanti attho. Sammāpaṭipattivasena hi yathāvādī tathākārī eva sobhati, na tato aññathā. Karaṇīyapariyāyena

sādhāraṇato vuttamattham idāni sarūpato dassetuṃ “**susukham vatā**”tiādinā tatiyaṃ gāthamāha. Tassattho – sammā sāmaṃ sabbadhammānaṃ buddhattā **sammāsambuddhena** bhagavatā **desitaṃ** sabbaso sokahetūnaṃ abhāvato **asokaṃ** vigatarāgādirajattā **virajaṃ** catūhi yogehi anupaddutattā **khemam** nibbānaṃ suṭṭhu **sukham vata**, kasmā? **Yattha** yasmim nibbāne sakalaṃ **vaṭṭadukkham nirujjhati** accantameva vūpasamatīti.

Bākulattheragāthāvaṇṇanā niṭṭhitā.

4. Dhaniyattheragāthāvaṇṇanā

Sukhañce jīvitum iccheti āyasmato dhaniyattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto sikhissa bhagavato kāle kulagehe nibbattitvā viññutaṃ patto ekadivasam satthāraṃ disvā pasannamānaso naḷamālāya pūjam akāsi. So tena puññakammena devamanussesu saṃsaranto imasmim buddhuppāde rājagahe kumbhakārakule nibbattitvā **dhaniyoti** laddhanāmo vayappatto kumbhakārakammena jīvati. Tena ca samayena satthā dhaniyassa kumbhakārassa sālāyaṃ nisīditvā pukkusātissa kulaputtassa **chadhātu vibhaṅgasuttam** (ma. ni. 3.342 ādayo) desesi. So taṃ sutvā katakicco ahosi. Dhaniyo tassa parinibbutabhāvaṃ sutvā “niyyānikaṃ vata buddhasāsanam, yattha ekarattiparicayenāpi vaṭṭadukkhato muñcituṃ sakkā”ti paṭiladdhasaddho pabbajitvā kuṭimaṇḍanānuyutto viharanto kuṭikaraṇam paṭicca bhagavatā garahito saṅghike senāsane vasanto vipassanaṃ vaḍḍhetvā arahattaṃ pāpuṇi. Tena vuttaṃ **apadāne** (apa. thera 2.48.1-7) –

“Suvaṇṇavaṇṇam sambuddham, āhutīnaṃ paṭiggahaṃ;
Vipinaggena gacchantaṃ, addasaṃ lokanāyakaṃ.

“Naḷamālam gahetvāna, nikkhamanto ca tāvade;
Tatthaddasāsīm sambuddham, oghatiṇṇamanāsavaṃ.

“Pasannacitto sumano, naḷamālamapūjayim;
Dakkhiṇeyyaṃ mahāvīraṃ, sabbalokānukampakaṃ.

“Ekatiṃse ito kappe, yaṃ mālamabhiropayim;
Duggatiṃ nābhijānāmi, buddhapūjāyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā ye bhikkhū dhutaṅgasamādhānena attānaṃ ukkaṃsetvā saṅghabhattādiṃ sādiyante aññe bhikkhū avajānanti, tesam ovādadānamukhena aññaṃ byākaronto –

228. “Sukhañce jīvitum icche, sāmāññasmiṃ apekkhavā;
Saṅghikaṃ nātimaññeyya, cīvaraṃ pānabhojanaṃ.

229. Sukhañce jīvitum icche, sāmāññasmiṃ apekkhavā;
Ahi mūsikasobbhaṃva, sevetha sayanāsanaṃ.

230. Sukhañce jīvitum icche, sāmāññasmiṃ apekkhavā;
Itarītarena tusseyya, ekadhammañca bhāvaye”ti. – tisso gāthā abhāsi;

Tattha **sukhañce jīvitum icche, sāmāññasmiṃ apekkhavā**ti sāmāññasmiṃ samaṇabhāve apekkhavā sikkhāya tibbagāravo hutvā sukham jīvitum iccheyya ce, anesanaṃ pahāya sāmāññasukhena sace jīvitukāmoti attho. **Saṅghikaṃ nātimaññeyya, cīvaraṃ pānabhojananti** saṅghato ābhattaṃ cīvaraṃ āhāraṃ na avamaññeyya, saṅghassa uppajjanakalābho nāma parisuddhuppādo hotīti taṃ

paribhuñjantassa ājīvapārisuddhisambhavena sāmaññasukhaṃ hatthagatamevāti adhippāyo. **Ahi mūsikasobbhaṃvāti** ahi viya mūsikāya khatabilaṃ **sevetha** seveyya senāsanam. Yathā nāma sappo sayamattano āsayam akatvā mūsikāya aññena vā kate āsaye vasitvā yena kāmaṃ pakkamati, evamevaṃ bhikkhu sayam senāsanakaraṇā saṃkilesam anāpajjitvā yattha katthaci vasitvā pakkameyyāti attho.

Idāni vutte avutte ca paccaye yathālābhasantoseneva sāmaññasukhaṃ hoti, na aññathāti dassento āha **“itaritarena tusseyyā”**ti, yena kenaci hīnena vā pañītena vā yathāladdhena paccayena santosam āpajjeyyāti attho. **Ekadhammanti** appamādabhāvaṃ, tañhi anuyuñjantassa anavajjam sabbam lokiyasukhaṃ lokuttarasukhañca hatthagatameva hoti. Tenāha bhagavā – “appamatto hi jhāyanto, pappoti vipulaṃ sukha”nti (ma. ni. 2.352; dha. pa. 27).

Dhaniyattheragāthāvaṇṇanā niṭṭhitā.

5. Mātaṅgaputtattheragāthāvaṇṇanā

Atisītanti āyasmato mātaṅgaputtattherassa gāthā. Kā uppatti? Ayaṃ kira padumuttarassa bhagavato kāle himavantasamīpe mahato jātassarassa heṭṭhā mahati nāgabhave mahānubhāvo nāgarājā hutvā nibbato ekadivasam nāgabhanato nikkhamitvā vicaranto satthāram ākāsenā gacchantam disvā pasannamānaso attano sīsamañinā pūjam akāsi. So tena puññakammena devamanussesu saṃsaranto imasmiṃ buddhuppāde kosalaratṭhe mātaṅgassa nāma kuṭumbikassa putto hutvā nibbato **mātaṅgaputtot**veva paññāyittha. So viññutaṃ patto alasajātiko hutvā kiñci kammaṃ akaronto ñātakehi aññehi ca garahito “sukhajīvino ime samaṇā sakyaputtiyā”ti sukhajīvitaṃ ākaṅkhanto bhikkhūhi kataparicayo hutvā satthāram upasaṅkamtivā dhammaṃ sutvā paṭiladdhasaddho pabbajitvā aññe bhikkhū iddhimante disvā iddhibalaṃ patthetvā satthu santike kammaṭṭhānaṃ gahetvā bhāvanam anuyuñjanto chaḷabhiñño ahoṣi. Tena vuttaṃ **apadāne** (apa. therā 2.48.8-29) –

“Padumuttaro nāma jino, sabbadhammāna pārāgū;
Vivekakāmo sambuddho, gacchate anilañjase.

“Avidūre himavantassa, mahājātassaro ahu;
Tattha me bhavanaṃ āsi, puññakammena saṃyutaṃ.

“Bhavanā abhinikkamma, addasaṃ lokanāyakaṃ;
Indīvaraṃva jalitaṃ, ādittaṃva hutāsanam.

“Vicinaṃ naddasaṃ pupphaṃ, pūjayissanti nāyakaṃ;
Sakaṃ cittaṃ pasādetvā, avandiṃ satthuno ahaṃ.

“Mama sīse maṇiṃ gayha, pūjayiṃ lokanāyakaṃ;
Imāya maṇipūjāya, vipāko hotu bhaddako.

“Padumuttaro lokavidū, āhutaṃ paṭiggaho;
Antalikkhe ṭhito satthā, imaṃ gāthaṃ abhāsatha.

“So te ijjhātu saṅkappo, labhassu vipulaṃ sukhaṃ;
Imāya maṇipūjāya, anubhoḥi mahāyasaṃ.

“Idaṃ vatvāna bhagavā, jalajuttamanāmako;
Agamāsi buddhaseṭṭho, yattha cittaṃ pañīhitaṃ.

“Saṭṭhikappāni devindo, devarajjamakārayiṃ;
Anekasatakkhattuñca, cakkavattī ahosahaṃ.

“Pubbakammaṃ sarantassa, devabhūtaṃ me sato;
Maṇi nibbattate mayhaṃ, ālokakaraṇo mamaṃ.

“Chalāsītisahassāni, nāriyo me pariggahā;
Vicittavathābharaṇā, āmukkamaṇikuṇḍalā.

“Alārapamhā hasulā, susaññā tanumajjhimā;
Parivārenti maṃ niccaṃ, maṇipūjāyidaṃ phalaṃ.

“Soṇṇamayā maṇimayā, lohitaṅkamayā tathā;
Bhaṇḍā me sukatā honti, yadicchasi piḷandhanā.

“Kūṭāgarā gahā rammā, sayanañca mahārahaṃ;
Mama saṅkappamaññāya, nibbattanti yadicchakaṃ.

“Lābhā tesam suladdhañca, ye labhanti upassutiṃ;
Puññakkhettaṃ manussānaṃ, osadhaṃ sabbapāṇinaṃ.

“Mayhampi sukataṃ kammaṃ, yohaṃ adakkhi nāyakaṃ;
Vinipātā pamuttomhi, pattomhi acalaṃ padaṃ.

“Yaṃ yaṃ yonūpapajjāmi, devattaṃ atha mānusaṃ;
Divasañceva rattiñca, āloko hoti me sadā.

“Tāyeva maṇipūjāya, anubhotvāna sampadā;
Ñāṇāloko mayā diṭṭho, pattomhi acalaṃ padaṃ.

“Satasahassito kappe, yaṃ maṇiṃ abhipūjayiṃ;
Duggatiṃ nābhijānāmi, maṇipūjāyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Chalābhīṇo pana hutvā puggalādhiṭṭhānavasena kosajjaṃ garahanto attano ca vīriyārambhaṃ
kittento –

231. “Atisītaṃ atiuṇhaṃ, atisāyamidaṃ ahu;
Iti vissaṭṭhakammante, khaṇā accenti māṇave.

232. “Yo ca sītañca uṇhañca, tiṇā bhiyyo na maññati;
Karaṃ purisakiccāni, so sukhā na vihāyati.

233. “Dabbaṃ kusaṃ poṭakilaṃ, usīraṃ muṅjapabbajaṃ;
Urasā panudissāmi, vivekamanubrūhaya’nti. – gāthāttayamāha;

Tattha **atisītanti** himapātavaddalādinā ativiya sītaṃ, **idaṃ ahūti** ānetvā sambandho. **Atiuṇhanti** dhammaparītāpādinā ativiya uṇhaṃ, ubhayenapi utuvasena kosajjavatthumāha. **Atisāyanti** divasassa pariṇātiyā atisāyaṃ, sāyaggahaṇeṇeva cettha pātopi saṅgayhati, tadubhayena kālavasena kosajjavatthumāha. **Iti** iminā pakārena. Etena “idha, bhikkhave, bhikkhunā kammaṃ kattabbaṃ hotī’ tiādinā (a. ni. 8.80; dī. ni. 3.334) vuttaṃ kosajjavatthum saṅgaṇhāti. **Vissaṭṭhakammanteti**

pariccattayogakammante. **Khaṇā**ti buddhuppādādayo brahmacariyavāsassa okāsā. **Accentī**ti atikkamanti. **Māṇaveti** satte. **Tiṇā bhiyyo na maññā**tīti tiṇato upari na maññāti, tiṇaṃ viya maññāti, sītuṇhāni abhibhavivā attanā kattabbaṃ karoti. **Karanti** karonto. **Purisakiccā**nīti vīrapurisena kattabbāni attahitaparahitāni. **Sukhā**ti sukhato, nibbānasukhatoti adhippāyo. Tatiyagāthāya attho heṭṭhā vuttoyeva.

Mātaṅgaputtattheragāthāvaṇṇanā niṭṭhitā.

6. Khujjasobhitattheragāthāvaṇṇanā

Ye cittakathī bahussutāti āyasmato khujjasobhitattherassa gāthā. Kā uppatti? Ayaṃ kira padumuttarassa bhagavato kāle kulagehe nibbattivā viññutaṃ patto ekadivasaṃ bhagavantaṃ mahatā bhikkhusaṅghena saddhiṃ gacchantaṃ disvā pasannamānaso dasahi gāthāhi abhitthavi. So tena puññakammena devamanussesu saṃsaranto imasmiṃ buddhuppāde pāṭaliputtanagare brāhmaṇakule nibbatti, “sobhito” tissa nāmaṃ ahosi. Thokaṃ khujjadhātukatāya pana **khujjasobhito**veva paññāyittha. So vayappatto satthari parinibbute ānandattherassa santike pabbajitvā chaḷabhiñño ahosi. Tena vuttaṃ **apadāne** (apa. therā 2.47.49-58) –

“Kakudhaṃ vilasantaṃva, devadevaṃ narāsabhaṃ;
Rathiyāṃ paṭipajjantaṃ, ko disvā na pasīdati.

“Tamandhakāraṃ nāsetvā, santāretvā bahuṃ janāṃ;
Ñāṇālokena jotantaṃ, ko disvā na pasīdati.

“Vasīsatasahassehī, nīyantaṃ lokanāyakaṃ;
Uddharantaṃ bahū satte, ko disvā na pasīdati.

“Āhanantaṃ dhammabheriṃ, maddantaṃ titthiye gaṇe;
Sīhanādaṃ vinadantaṃ, ko disvā na pasīdati.

“Yāvataṃ brahmalokato, āgantvāna sabrahmakā;
Pucchanti nipuṇe pañhe, ko disvā na pasīdati.

“Yassañjaliṃ karitvāna, āyācanti sadevakā;
Tena puññaṃ anubhonti, ko disvā na pasīdati.

“Sabbe janā samāgantvā, sampavārenti cakkhumaṃ;
Na vikampati ajjhittṭho, ko disvā na pasīdati.

“Nagaraṃ pavisato yassa, ravanti bheriyo bahū;
Vinadanti gajā mattā, ko disvā na pasīdati.

“Vīthiyā gacchato yassa, sabbābhā jotate sadā;
Abbhunnatā samā honti, ko disvā na pasīdati.

“Byāharantassa buddhassa, cakkavāḷampi suyyati;
Sabbe satte viññāpeti, ko disvā na pasīdati.

“Satasahassito kappe, yaṃ buddhamabhikittayim;
Duggatiṃ nābhijānāmi, kittanāya idaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.

Chaḷabhiñño pana hutvā paṭhamamahāsaṅgītikāle rājagahe sattapaṇṇiguhāyaṃ sannipatitena saṅghena “āyasmantaṃ ānandaṃ āmantehī”ti āṇatto pathaviyaṃ nimujjitvā therassa purato utthahitvā saṅghassa sāsanaṃ ārocetvā sayāṃ puretaraṃ ākāseṇa gantvā sattapaṇṇiguhādvāraṃ sampāpuṇi. Tena ca samayena mārasa mārakāyikānaṃca paṭisedhanatthaṃ devasaṅghena pesitā aññatarā devatā sattapaṇṇiguhādvāre thitā hoti, tassā khujjasobhito thero attano āgamaṇaṃ kathento –

234. “Ye cittakathī bahussutā, samaṇā pāḷaliputtavāsino;
Tesaññataroyamāyuvā, dvāre tiṭṭhati khujjasobhito”ti. – paṭhamaṃ gāthamāha;

Tattha **cittakathī** vicittadhammakathikā, saṅkhipanaṃ, vitthāraṇaṃ gambhīrakaraṇaṃ uttānīkaraṇaṃ kaṅkhāvinodanaṃ dhammapatiṭṭhāpananti evamādīhi nānāyehi paresaṃ ajjhāsayānurūpaṃ dhammassa kathanasīlāti attho. **Bahussutā**ti pariyattipaṭivedhabāhusaccapāripūriyā bahussutā. Sabbaso samitapāpatāya **samaṇā. Pāḷaliputtavāsino, tesaññataroti** pāḷaliputtanagaravāsītāya pāḷaliputtavāsino, tesāṃ aññataro, **ayaṃ āyuvā** dīghāyu āyasmā. **Dvāre tiṭṭhatī**ti sattapaṇṇiguhāya dvāre tiṭṭhati, saṅghassa anumatiyā pavisitunti attho. Taṃ sutvā sā devatā therassa āgamaṇaṃ saṅghassa nivedentī –

235. “Ye cittakathī...pe... dvāre tiṭṭhati māluterito”ti. – dutiyaṃ gāthamāha;
Tattha **māluteritoti** iddhicittajanitena vāyuna erito, iddhibalena āgatoti attho.

Evam tāya devatāya niveditena saṅghena katokāso thero saṅghassa santikaṃ gacchanto –

236. “Suyuddhena suyitṭhena, saṅgāmajayena ca;
Brahmacariyānuciṇṇena, evāyaṃ sukhamedhatī”ti. –

Imāya tatiyagāthāya aññaṃ byākāsi.

Tattha **suyuddhenā**ti pubbabhāge tadaṅgavikkhambhanappahānavasena kilesehi suṭṭhu yujjanena. **Suyitṭhenā**ti antarantarā kalyāṇamittehi dinnasappāyadhammānena. **Saṅgāmajayena cāti** samucchadappahānavasena sabbaso kilesābhisaṅkhāranimmathanena laddhasaṅgāmajayena ca. **Brahmacariyānuciṇṇenā**ti anuciṇṇena aggamaggabrahmacariyena. **Evāyaṃ sukhamedhatī**ti evaṃ vuttappakārena ayaṃ khujjasobhito nibbānasukhaṃ phalasaṃpattisukhaṃca edhati, anubhavatīti attho.

Khujjasobhitattheragāthāvaṇṇanā niṭṭhitā.

7. Vāraṇattheragāthāvaṇṇanā

Yodha koci manussesūti āyasmato vāraṇattherassa gāthā. Kā uppatti? Ayampi purimabuddhesu katādhikāro tattha tattha bhava puññāni karonto ito dvānavute kappe tissassa bhagavato uppattito puretameva brāhmaṇakule nibbattitvā brāhmaṇānaṃ vijjāsippesu pāragū hutvā isipabbajjaṃ pabbajitvā catupaṇṇāsasahassānaṃ antevāsikānaṃ mante vācento vasati. Tena ca samayena tissassa bhagavato bodhisattabhūtaṃ tusitā kāyā cavitvā carimabhava mātukucchiṃ okkamanena mahāpathavikampo ahoṣi. Taṃ disvā mahājano bhīto saṃviggo naṃ isiṃ upasaṅkamitvā pathavikampanakāraṇaṃ pucchi. So “mahābodhisatto mātukucchiṃ okkami, tenāyaṃ pathavikampo, tasmā mā bhāyathā”ti buddhuppādassa pubbanimittabhāvaṃ kathetvā samassāsesi, buddhārammaṇaṃca pītiṃ paṭivedesi. So tena puññakammaṇa devamanussesu saṃsaranto imasmiṃ buddhuppāde kosalaratṭhe brāhmaṇakule nibbattitvā **vāraṇoti** laddhanāmo vayappatto aññatarassa āraññakassa therassa santike dhammaṃ sutvā laddhappasādo pabbajitvā samaṇadhammaṃ karoti. So ekadivasaṃ buddhupaṭṭhānaṃ gacchanto antarāmagge ahinakule aññaṃaññaṃ kalahaṃ katvā kālaṅkate disvā “ime sattā aññaṃaññavirodhena jīvitakkhayaṃ pattā”ti saṃviggamānaso hutvā bhagavato santikaṃ gato,

tassa bhagavā cittācāraṃ ñatvā tadanurūpameva ovādaṃ dento –

237. “Yodha koci manussesu, parapāṇāni hiṃsati;
Asmā lokā paramhā ca, ubhayā dhaṃsate naro.
238. “Yo ca mettena cittena, sabbapāṇānukampati;
Bahuñhi so pasavati, puññaṃ tādīsako naro.
239. “Subhāsītassa sikkhetha, samaṇūpāsanassa ca;
Ekāsanassa ca raho, cittavūpasamassā cā’ti. – tisso gāthā abhāsi;

Tattha **yodha koci manussesūti** idha manussesu yo koci khattiyo vā brāhmaṇo vā vesso vā suddo vā gahaṭṭho vā pabbajito vā. Manussaggahaṇaṅcettha ukkaṭṭhasattanidassananti daṭṭhabbaṃ. **Parapāṇāni hiṃsatīti** parasatte māreti vibādhati ca. **Asmā lokāti** idha lokato. **Paramhāti** paralokato. **Ubhayā dhaṃsateti** ubhayato dhaṃsati, ubhayalokapariyāpannahitasukhato parihāyatīti attho. **Naroti** satto.

Evam parapīlakkhaṇaṃ pāpadhammaṃ dassetvā idāni parapīlānivattilakkhaṇaṃ kusalaṃ dhammaṃ dassento “**yo ca mettenā**”tiādinā dutiyaṃ gāthamāha. Tattha **mettena cittenāti** mettāsampayuttena cittena appanāpattena itarītarena vā. **Sabbapāṇānukampatīti** sabbe pāṇe attano orasaputte viya mettāyati. **Bahuñhi so pasavati, puññaṃ tādīsako naroti** so tathārūpo mettāvihārī puggalo bahuṃ mahantaṃ anappakaṃ kusalaṃ pasavati paṭilabhati adhigacchati.

Idāni taṃ sasambhāre samathavipassanādhamme niyojento “**subhāsītassā**”tiādinā tatiyaṃ gāthamāha. Tattha **subhāsītassa sikkhethāti** appicchakathādibhedam subhāsitaṃ pariyattidhammaṃ savanadhāraṇaparipucchādivasena sikkheyya. **Samaṇūpāsanassa cāti** samitapāpānaṃ samaṇānaṃ kalyāṇamittānaṃ upāsakānaṃ kālena kālaṃ upasaṅkamitvā payirupāsanaṅceva paṭipattiyā tesam samīpacariyaṅca sikkheyya. **Ekāsanassa ca raho cittavūpasamassa cāti** ekassa asahāyassa kāyavivekaṃ anubrūhantassa raho kammaṭṭhānānuyogavasena āsanaṃ nisajjaṃ sikkheyya. Evam kammaṭṭhānaṃ anuyuñjanto bhāvanaṅca matthakaṃ pāpento samucchedavasena kilesānaṃ cittassa vūpasamaṅca sikkheyya. Yāhi adhisīlasikkhādīhi kilesā accantameva vūpasantā pahīnā honti, tā maggaphalasikkhā sikkhantassa accantameva cittaṃ vūpasantaṃ nāma hotīti. Gāthāpariyosāne vipassanaṃ vaḍḍhetvā arahattaṃ pāpuṇi. Tena vuttaṃ **apadāne** (apa. therā 2.47.59-72) –

“Ajjhogāhetvā himavaṃ, mante vācemaṃ tadā;
Catupaññāsasahassāni, sissā mayhaṃ upaṭṭhahaṃ.

“Adhitā vedagū sabbe, chaḷaṅge pāramiṃ gatā;
Sakavijjāhupatthaddhā, himavante vasanti te.

“Cavitvā tusitā kāyā, devaputto mahāyaso;
Uppajji mātukucchismiṃ, sampajāno patissato.

“Sambuddhe upapajjante, dasasahassi kampatha;
Andhā cakkhuṃ alabhiṃsu, uppajjantamhi nāyake.

“Sabbākāraṃ pakampittha, kevalā vasudhā ayaṃ;
Nigghosasaddaṃ sutvāna, ubbijjiṃsu mahājanā.

“Sabbe janā samāgamma, āgacchuṃ mama santikaṃ;
Vasudhāyaṃ pakampittha, kiṃ vipāko bhavissati.

“Avacāsiṃ tadā tesam, mā bhetha natthi vo bhayaṃ;
Visatṭhā hotha sabbepi, uppādoyaṃ suvatthiko.

“Aṭṭhahetūhi samphussa, vasudhāyaṃ pakampati;
Tathā nimittā dissanti, obhāso vipulo mahā.

“Asaṃsayam buddhaseṭṭho, uppajjissati cakkhumā;
Saññāpetvāna janataṃ, pañcasīle kathesahaṃ.

“Sutvāna pañcasīlāni, buddhuppādañca dullabham;
Ubbegajātā sumanā, tuṭṭhahaṭṭhā ahaṃsu te.

“Dvenavute ito kappe, yaṃ nimittam viyākarim;
Duggatiṃ nābhijānāmi, byākaraṇassidaṃ phalaṃ.

“Kilesā jhāpitā mayham...pe... kataṃ buddhassa sāsana’nti.
Vāraṇattheragāthāvaṇṇanā niṭṭhitā.

8. Vassikattheragāthāvaṇṇanā

Ekopi saddho medhāvī āyasmato vassikattherassa gāthā. Kā uppatti? Ayampi purimabuddhesu katādhikāro tattha tattha bhava puññāni karonto atthadassissa bhagavato kāle kulagehe nibbattivā viññutaṃ patto ekadivasam sathhāram disvā pasannacitto pilakkhaphalāni adāsi. So tena puññakammena devamanussesu saṃsaranto imasmiṃ buddhuppāde kosalaratṭhe brāhmaṇakule nibbattivā **vassikoti** laddhanāmo vayappatto satthu yamakapāṭihāriyaṃ disvā paṭiladdhasaddho pabbajivā samaṇadhammaṃ karonto ābādhiko ahoṣi. Atha naṃ ñātakā vejjapariditṭhena bhesajjavividhinā upaṭṭhahitvā arogamakamsu. So tamhā ābādhā vuṭṭhito saṃvegajāto bhāvanam ussukkāpetvā chaḷabhiñño ahoṣi. Tena vuttam **apadāne** (apa. thera 2.47.40-44) –

“Vanantare buddham disvā, atthadassim mahāyasaṃ;
Pasannacitto sumano, pilakkhassa phalaṃ adā.

“Aṭṭhārase kappasate, yaṃ phalaṃ adadiṃ tadā;
Duggatiṃ nābhijānāmi, phaladānassidaṃ phalaṃ.

“Kilesā jhāpitā mayham...pe... kataṃ buddhassa sāsana’nti.

Chaḷabhiñño pana hutvā ākāseṇa ñātakānaṃ santike gantvā ākāse ṭhito dhammaṃ desetvā te saraṇesu sīlesu ca paṭiṭṭhāpesi. Tesu keci kālaṅkatā saraṇesu sīlesu ca paṭiṭṭhitattā sagge nibbattiṃsu. Atha naṃ sathhā buddhupaṭṭhānaṃ upagataṃ “kiṃ te, vassika, ñātīnaṃ ārogya’nti pucchi. So ñātīnaṃ attanā kataṃ upakāraṃ satthu kathento –

240. “Ekopi saddho medhāvī, assaddhānīdha ñātīnaṃ;
Dhammaṭṭho sīlasampanno, hoti atthāya bandhunaṃ.

241. “Niggayha anukampāya, coditā ñātayo mayā;
Ñātibandhavapemena, kāraṃ katvāna bhikkhusu.

242. “Te abbatitā kālaṅkatā, pattā te tidivaṃ sukham;
Bhātaro mayham mātā ca, modanti kāmakāmino’nti. –

Tisso gāthā abhāsi.

Tatthāyaṃ paṭhamagāthāya attho – yo kammaphalasaddhāya ca ratanattayasaddhāya ca vasena **saddho**, tato eva kammassakataññādiyogato **medhāvī**, satthu ovādadhamme navalokuttaradhamme ca ṭhitattā **dhammaṭṭho**, ācārasīlassa maggasīlassa phalasīlassa ca vasena **sīlasampanno**, so **ekopi** yathāvuttāya saddhāya abhāvena **assaddhānaṃ idha** imasmiṃ loke “amhākaṃ ime”ti ñātabbaṭṭhena **ñātīnaṃ**, tathā pemabandhanena bandhanaṭṭhena “**bandhū**”ti ca laddhanāmānaṃ bandhavānaṃ **atthāya** hitāya **hotīti**.

Evam sādharmaṇato vuttamatthaṃ attūpanāyikaṃ katvā dassetuṃ “**niggayhā**”tiādinā itaragāthā vuttā. Tattha **niggayha anukampāya**, **coditā ñātayo mayāti** idānipi duggatā kusalaṃ akatvā āyatim parikkilesaṃ puna mānubhavittāti niggahetvā ñātayo mayā ovaditā. **Ñātibandhavapemena** “amhākaṃ ayaṃ bandhavo”ti evaṃ pavattena pemena mama ovādaṃ atikkamituṃ asakkontā **kāraṃ katvāna bhikkhūsu** pasannacittā hutvā cīvarādipaccayadānena ceva upaṭṭhānena ca bhikkhūsu sakkārasammānaṃ katvā **te abbhatitā kālaṅkatā** hutvā imaṃ lokaṃ atikkantā. Puna **teti** nipātamattaṃ. **Tidivaṃ sukhanti** devalokapariyāpannasukhaṃ, sukhaṃ vā iṭṭhaṃ tidivaṃ adhigatā. “Ke pana te”ti āha. “**Bhātaro mayhaṃ mātā ca, modanti kāmakāmino**”ti. Attanā yathākāmitavattukāmasamaṅgino hutvā abhiramanṭīti attho.

Vassikattheragāthāvaṇṇanā niṭṭhitā.

9. Yasojattheragāthāvaṇṇanā

Kālapabbaṅgasāṅkāsoti āyasmato yasojattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto vipassissa bhagavato kāle ārāmagopakakule nibbattitvā viññutaṃ patto ekadivasam vipassim bhagavantaṃ ākāsenā gacchantam disvā pasannamānaso labujaphalaṃ adāsi.

So tena puññakammaena devamanussesu saṃsaranto imasmiṃ buddhuppāde sāvattinagaradvāre kevaṭṭagāme pañcakulasatajeṭṭhakassa kevaṭṭassa putto hutvā nibbatti, **yasojo**tissa nāmaṃ akamsu. So vayappatto attano sahāyehi kevaṭṭaputtehi saddhim macchagahaṇatthaṃ aciravatiyaṃ nadiyaṃ jālaṃ khipi. Tattheko suvaṇṇavaṇṇo mahāmaccho antojālaṃ pāvīsi. Taṃ te rañño pasenadissa dassetuṃ. Rājā “imassa suvaṇṇavaṇṇassa macchassa vaṇṇakāraṇaṃ bhagavā jānāti”ti macchaṃ gāhāpetvā bhagavato dassesi. Bhagavā “ayaṃ kassapassa sammāsambuddhassa sāsane osakkamāne pabbajitvā micchā paṭipajjanto sāsanaṃ osakkāpetvā niraye nibbatta ekaṃ buddhantaṃ niraye paccitvā tato cuto aciravatiyaṃ maccho hutvā nibbatta”ti vatvā tassa bhaginīnaṃca niraye nibbattabhāvaṃ, tassa bhātikattherassa parinibbutabhāvaṃca teneva kathāpetvā imissā aṭṭhuppattiyā **kapilasuttaṃ** desesi.

Satthu desanaṃ sutvā yasojo saṃvegajāto saddhim attano sahāyehi bhagavato santike pabbajitvā patirūpe ṭhāne vasanto ekadivasam saporiso bhagavantaṃ vandituṃ jētavanaṃ agamāsi. Tassa āgamane senāsanapaññāpanādinā vihāre uccāsaddamahāsaddo ahoṣi. Taṃ sutvā “bhagavā saporisaṃ yasojaṃ paṇāmesi”ti (udā. 23) sabbaṃ udāne āgatanayena vedītabbaṃ. Paṇāmito pana āyasmā yasojo kasābhīhato bhaddo assājānīyo viya saṃviggamānaso saddhim parisāya vaggumudāya nadiyā tīre vasanto ghaṭento vāyamanto vipassanaṃ vaḍḍhetvā antovasseyeva chaḷabhiñño ahoṣi. Tena vuttaṃ **apadāne** (apa. therā 2.47.32-39) –

“Nagare bandhumatiyā, ārāmiko ahaṃ tadā;
Addasaṃ virajaṃ buddhaṃ, gacchantam anilañjase.

“Labujaṃ phalamādāya, buddhaseṭṭhassadāsahaṃ;
Ākāseva ṭhito santo, paṭiggaṇhi mahāyaso.

“Vittisañjānāno mayhaṃ, diṭṭhadhammasukhāvaho;

Phalaṃ buddhassa datvāna, vippasannena cetasā.

“Adhigañchiṃ tadā pītiṃ, vipulaṃ sukhamuttamaṃ;
Uppajjateva ratanaṃ, nibbattassa tahiṃ tahiṃ.

“Ekanavutito kappe, yaṃ phalaṃ adadiṃ tadā;
Duggatiṃ nābhijānāmi, phaladānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Chaḷabhiññaṃ pana samānaṃ sapaṛisaṃ āyasmantaṃ yasojaṃ satthā pakkosivā āneñjasamāpattinā paṭisanthāramakāsi. So sabbepi dhutaṅgadharme samādāya vattati. Tenassa sarīraṃ kisaṃ ahoṣi lūkhaṃ dubbaṇṇaṃ, taṃ bhagavā paramappicchatāya pasamsanto –

243. “Kālapabbaṅgasaṅkāso, kiso dhamanisanthato;
Mattaññū annapānamhi, adīnamānaso naro”ti. – paṭhamaṃ gāthamāha;

Tattha **kālapabbaṅgasaṅkāso**ti maṃsūpacayavigamena kisadusaṅghitasarīrāvayavatāya dantilatāpabbasadiṣaṅgo, tenāha “**kiso dhamanisanthato**”ti. **Kisoti** moneyyapaṭipadāpūraṇena kisasarīro. **Dhamanisanthato**ti dhamanīhi santhatagatto appamaṃsalohitatāya pākaṭīhi kaṇḍarasirāhi vitatasarīro. **Mattaññū**ti pariyesanapaṭiggahaṇaparibhogavissajjanesu pamāṇaññū. **Adīnamānasoti** kosajjādīhi anabhibhūtattā alīnacitto akusītavutti. **Naroti** puriso, porisassa dhurassa vahanato porisalakkhaṇasampanno purisadhorayhoti adhippāyo.

Evam thero satthārā pasattho pasatthabhāvānurūpaṃ attano adhivāsanakhantivīriyārambhavivekābhīratikittanamukhena bhikkhūnaṃ dhammaṃ kathento –

244. “Phuṭṭho ḍaṃsehi makasehi, araññasmiṃ brahāvane;
Nāgo saṅgāmasīseva, sato tatrādhiṃvāsaya.

245. “Yathā brahmā tathā eko, yathā devo tathā duve;
Yathā gāmo tathā tayo, kolāhalaṃ tatuttari”nti. –

Imā dve gāthā abhāsi.

Tattha **nāgo saṅgāmasīsevā**ti yathā nāma ājāneyyo hatthināgo yuddhamaṇḍale asisattitomarādippahāre adhivāsetvā parasenaṃ viddhaṃseti, evaṃ bhikkhu **araññasmiṃ brahāvane** araññāniyaṃ ḍaṃsādīparissaye **sato** sampajāno adhivāseyya, adhivāsetvā ca bhāvanābalena mārabalaṃ vidhameyya.

Yathā brahmāti yathā brahmā ekako cittappakoparahito jhānasukhena niccaveva sukhto viharati **tathā ekoti** bhikkhupi eko adutiyo vivekasukhamanubrūhento sukhaṃ viharati. Ekassa sāmāññasukhaṃ pañṭanti hi vuttaṃ. Etena ekavīhārī bhikkhu “brahmasamo”ti ovādaṃ deti. **Yathā devo tathā duveti** yathā devānaṃ antarantarā cittappakopopi siyā, tathā dvinnaṃ bhikkhūnaṃ saḥavāse ghaṭṭanāpi bhavēyyāti sadutiyaṃvāsena bhikkhu “devasamo”ti vutto. **Yathā gāmo tathā tayoti** asmimeva pāṭhe tiṇṇaṃ bhikkhūnaṃ saḥavāso gāmaṃvāsasadiṣo vivekavāso na hotīti adhippāyo. **Kolāhalaṃ tatuttarinti** tato tayato upari ca bhūnaṃ saṃvāso kolāhalaṃ uccāsaddamahāsaddamahājanasannipātasadiṣo, tasmā ekavīhārīnaṃ bhavitabbanti adhippāyoti.

Yasojattheragāthāvaṇṇanā niṭṭhitā.

10. Sāṭimattiyattheragāthāvaṇṇanā

Ahu tuyhaṃ pure saddhāti āyasmato sāṭimattiyattherassa gāthā. Kā uppatti? Ayampi purimabuddhesu katādhikāro tattha tattha bhava puññāni upacinanto siddhatthassa bhagavato kāle kulagehe nibbattivā viññutaṃ patto ekadivasaṃ satthāraṃ disvā pasannamānaso tālavaṇṭaṃ adāsi. So tena puññakammena devamanussesu saṃsaranto imasmiṃ buddhuppāde magadharatṭhe brāhmaṇakule nibbattivā **sāṭimattiyoti** laddhanāmo vayappatto hetusampannatāya āraññakabhikkhūnaṃ santike pabbajitvā vipassanāya kammaṃ karonto chaḷabhiñño ahoṣi. Tena vuttaṃ **apadāne** (apa. therā 1.38.43-47) –

“Siddhatthassa bhagavato, tālavaṇṭamadāsahaṃ;
Sumanehi paṭicchannaṃ, dhārayāmi mahārahaṃ.

“Catunnavutito kappe, tālavaṇṭamadāsahaṃ;
Duggatiṃ nābhijānāmi, tālavaṇṭassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Chaḷabhiñño pana hutvā bhikkhū ovadati anusāsati bahū ca satte dhammaṃ kathetvā saraṇesu ca sīlesu ca paṭiṭṭhāpesi. Aññatarañca kulaṃ assaddhaṃ appasannaṃ saddhaṃ pasannaṃ akāsi. Tena tasmīṃ kule manussā there abhippasannā ahesuṃ. Tatthekā dārikā abhirūpā dassanīyā therāṃ piṇḍāya pavitṭhaṃ sakkaccaṃ bhojanena parivisati. Athekadivasaṃ māro “evaṃ imassa ayaso vaḍḍhissati, appatitṭho bhavissati”ti cintetvā therassa rūpena gantvā taṃ dārikaṃ hatthe aggahesi. Dārikā “nāyaṃ manussasamphasso”ti ca aññāsi, hatthañca muñcāpesi. Taṃ disvā gharajano there appasādaṃ janesi. Punadivase therō taṃ kāraṇaṃ anāvajjento taṃ gharaṃ agamāsi. Tattha manussā anādaraṃ akamsu. Thero taṃ kāraṇaṃ āvajjento mārassa kiriyāṃ disvā “tassa gīvāyaṃ kukkurakuṇapaṃ paṭimuñcatū”ti adhiṭṭhahitvā tassa mocanattaṃ upagatena mārena atitadivase katakiriyāṃ kathāpetvā taṃ tajjetvā vissajjesi. Taṃ disvā gharasāmiko “khamatha, bhante, accaya”nti khamāpetvā “ajjatagge ahameva, bhante, tumhe upaṭṭhahāmi”ti āha. Thero tassa dhammaṃ kathento –

246. “Ahu tuyhaṃ pure saddhā, sā te ajja na vijjati;
Yaṃ tuyhaṃ tuyhamevetāṃ, natthi duccharitaṃ mama.

247. “Aniccā hi calā saddhā, evaṃ diṭṭhā hi sā mayā;
Rajjantipi virajjanti, tattha kiṃ jiyjate muni.

248. “Paccati munino bhattaṃ, thokaṃ thokaṃ kule kule;
Piṇḍikāya carissāmi, atthi jaṅghabalaṃ mamā”ti. –

Tisso gāthā abhāsi.

Tattha **ahu tuyhaṃ pure saddhā, sā te ajja na vijjati**ti, upāsaka, ito pubbe tava mayi “ayyo dhammacārī samacārī”tiādinā saddhā ahoṣi, sā saddhā te tava ajja idāni na upalabbhati. Tasmā **yaṃ tuyhaṃ tuyhamevetanti** catupaccayadānaṃ, tuyhameva etaṃ hotu, na tena mayhaṃ attho, sammā pasannacittena hi dānaṃ nāma dātābanti adhippāyo. Atha vā **yaṃ tuyhaṃ tuyhamevetanti** yaṃ tava mayi ajja agāraṃ pavattaṃ, taṃ tuyhameva, tassa phalaṃ tayā eva paccanubhavitabbaṃ, na mayāti attho. **Natthi duccharitaṃ mamā**ti mama pana duccharitaṃ nāma natthi maggeneva duccharitahetūnaṃ kilesānaṃ samucchinnatā.

Aniccā hi calā saddhāti yasmā pothujjanikā saddhā aniccā ekantikā na hoti, tato eva calā assapitṭhe ṭhapitakumbhaṇḍaṃ viya, thusarāsismihi nikhātakhāṇukaṃ viya ca anavaṭṭhitā. **Evaṃ diṭṭhā hi sā mayāti** evaṃ bhūtā ca sā saddhā mayā tayi diṭṭhā paccakkhato viditā. **Rajjantipi virajjanti**ti evaṃ tassā anavaṭṭhitattā eva ime sattā kadāci katthaci mittasanthavavasena rajjanti sinehampi karonti, kadāci virajjanti virattacittā honti. **Tattha kiṃ jiyjate muni**ti tasmīṃ puthujjanānaṃ rajjane virajjane ca muni

pabbajito kiṃ jīyati, kā tassa hānīti attho.

“Sace mama paccaye na gaṇhatha, kathaṃ tumhe yāpethā”ti evaṃ mā cintayīti dassento “**paccatī**”ti gāthamāha. Tassattho **munino** pabbajitassa **bhattaṃ** nāma **kule kule** anugharaṃ divase divase **thokaṃ thokaṃ** paccate, na ca tuyhaṃ eva gehe. **Piṇḍikāya carissāmi, atthi jaṅghabalaṃ mamāti** atthi me jaṅghabalaṃ, nāhaṃ obhaggajaṅgho na khañjo na ca pādarogī, tasmā piṇḍikāya missakabhikkhāya carissāmi, “yathāpi bhamaro puppha”ntiādinā (dha. pa. 49; netti. 123) satthārā vuttanayena piṇḍāya caritvā yāpessāmīti dasseti.

Sāṭimattiyattheragāthāvaṇṇanā niṭṭhitā.

11. Upālittheragāthāvaṇṇanā

Saddhāya abhinikkhammāti āyasmato upālittherassa gāthā. Kā uppatti? Ayampi padumuttarassa bhagavato kāle haṃsavatīnagare kulaghare nibbato ekadivasaṃ satthu dhammaṃ suṇanto satthāraṃ ekaṃ bhikkhuṃ vinayadharānaṃ aggaṭṭhāne ṭhapentaṃ disvā adhikārakammaṃ katvā taṃ ṭhānantaraṃ patthesi. So yāvajīvaṃ kusalaṃ katvā devamanussesu saṃsaranto imasmiṃ buddhuppāde kappakagehe paṭisandhiṃ gaṇhi, **upālītissa** nāmaṃ akaṃsu. So vayappatto anuruddhādīnaṃ channaṃ khattiyānaṃ pasādako hutvā tathāgate anupiyambavane viharante pabbajanatthāya nikkhamantehi chahi khattiyehi saddhiṃ nikkhamitvā pabbajī. Tassa pabbajjāvidhānaṃ pāḷiyaṃ āgatameva (cūḷava. 330).

So pabbajitvā upasampanno satthu santike kammatṭhānaṃ gahetvā “mayhaṃ, bhante, araṇṇāvāsaṃ anujānāthā”ti āha. Bhikkhu tava araṇṇe vasantassa ekameva dhuraṃ vaḍḍhissati, amhākaṃ pana santike vasantassa ganthadhuraṇca vipassanādhuraṇca paripūressatīti. Thero satthu vacanaṃ sampaṭicchitvā vipassanāya kammaṃ karonto nacirasseva arahattaṃ pāpuṇi. Tena vuttaṃ **apadāne** (apa. therā 1.1.441-595) –

“Nagare haṃsavatīyā, sujāto nāma brāhmaṇo;
Asītkoṭṭinīcayo, pahūtadhanadhaññāvā.

“Ajjhāyako mantadharo, tiṇṇaṃ vedāna pāragū;
Lakkhaṇe itihāse ca, sadhamme pāramiṃ gato.

“Paribbājā ekasikhā, gotamā buddhasāvākā;
Carakā tāpasā ceva, caranti mahiyā tadā.

“Tepi maṃ parivārenti, brāhmaṇo vissuto iti;
Bahujjano maṃ pūjeti, nāhaṃ pūjemi kiñcanaṃ.

“Pūjārahaṃ na passāmi, mānatthaddho ahaṃ tadā;
Buddhoti vacanaṃ natthi, tāva nuppajjate jino.

“Accayena ahorattaṃ, padumuttaranāmako;
Sabbhaṃ tamaṃ vinodetvā, loke uppajji cakkhumā.

“Vitthārike bāhujaññe, puthubhūte ca sāsane;
Upāgami tadā buddho, nagaraṃ haṃsasavhayaṃ.

“Pitu atthāya so buddho, dhammaṃ desesi cakkhumā;
Tena kālena parisā, samantā yojanaṃ tadā.

“Sammato manujānaṃ so, sunando nāma tāpaso;
Yāvataṃ buddhapaṇḍitaṃ, pupphahaṇḍitaṃ tadā.

“Catusaccaṃ pakāseṇa, seṭṭhe ca pupphahaṇḍitaṃ;
Koṭṭisatasahasānaṃ, dhammābhisamayo ahu.

“Sattarattindivaṃ buddho, vassetvā dhammavuttḥiyo;
Aṭṭhame divase patte, sunandaṃ kittayī jino.

“Devaloke manusse vā, saṃsaranto ayaṃ bhava;
Sabbesaṃ pavaro hutvā, bhavesu saṃsarissati.

“Kappasatasahasamhi, okkākakulasambhavo;
Gotamo nāma gottena, sathā loke bhavissati.

“Tassa dhammesu dāyādo, oraso dhammanimmitto;
Mantāṇiputto puṇṇoti, hessati satthu sāvako.

“Evaṃ kittayī sambuddho, sunandaṃ tāpasaṃ tadā;
Hāsayaṃto janaṃ sabbaṃ, dassayaṃto sakaṃ balaṃ.

“Katañjalī namassanti, sunandaṃ tāpasaṃ janā;
Buddhe kāraṃ karitvāna, sodhesi gatimattano.

“Tattha me ahu saṅkappo, sutvāna munino vacaṃ;
Ahampi kāraṃ kassāmi, yathā passāmi gotamaṃ.

“Evāhaṃ cintayitvāna, kiriyāṃ cintayimā mama;
Kyāhaṃ kammaṃ ācarāmi, puññakkhette anuttare.

“Ayaṅca pāṭhiko bhikkhu, sabbapāṭhissa sāsane;
Vinaye agganikkhitto, taṃ ṭhānaṃ patthaye ahaṃ.

“Idaṃ me amitaṃ bhogaṃ, akkhobhaṃ sāgarūpamaṃ;
Tena bhogena buddhassa, ārāmaṃ māpaye ahaṃ.

“Sobhanaṃ nāma ārāmaṃ, nagarassa puratthato;
Kiṇṇitvā satasahasena, saṅghārāmaṃ amāpayim.

“Kūṭāgāre ca pāsāde, haṇḍitaṃ hammiye guhā;
Caṅkame sukate katvā, saṅghārāmaṃ amāpayim.

“Jantāgharaṃ aggisālaṃ, atho udakamāḷakaṃ;
Nānāgharaṃ māpayitvā, bhikkhusaṅghassa dāsahaṃ.

“Āsandiyo pīṭhake ca, paribhoge ca bhājane;
Ārāmikaṅca bhesajjaṃ, sabbametaṃ adāsahaṃ.

“Ārakkhaṃ paṭṭhapetvāna, pākāraṃ kārayimā dalaṃ;
Mā naṃ koci viheṭhesi, santacittāna tādinaṃ.

“Satasahassenāvāsaṃ, saṅghārāme amāpayiṃ;
Vepullaṃ taṃ māpayitvā, sambuddhaṃ upanāmayiṃ.

“Niṭṭhāpito mayārāmo, sampañccha tuvaṃ muni;
Niyādessāmi taṃ vīra, adhvāsehi cakkhuma.

“Padumuttaro lokavidū, āhutiṇaṃ paṭiggaho;
Mama saṅkappamaññāya, adhvāsesi nāyako.

“Adhvāsanamaññāya, sabbaññussa mahesino;
Bhojanaṃ paṭiyādetvā, kālamārocayīṃ ahaṃ.

“Ārocitamhi kālamhi, padumuttaranāyako;
Khīṇāsavasahashehi, ārāmaṃ me upāgami.

“Nisinnaṃ kālamaññāya, annapānena tappayīṃ;
Bhuttāviṃ kālamaññāya, idaṃ vacanamabraviṃ.

“Kīto satasahassena, tattakeneva kārito;
Sobhano nāma ārāmo, sampañccha tuvaṃ muni.

“Iminārāmadānena, cetanāpaṇidhīhi ca;
Bhave nibbattamānohaṃ, labhāmi mama patthitaṃ.

“Paṭiggahetvā sambuddho, saṅghārāmaṃ sumāpitaṃ;
Bhikkhusaṅghe nisīditvā, idaṃ vacanamabravi.

“Yo so buddhassa pādāsi, saṅghārāmaṃ sumāpitaṃ;
Tamahaṃ kittayissāmi, suṇātha mama bhāsato.

“Hatthī assā rathā pattī, senā ca caturāṅginī;
Parivāressantimaṃ niccaṃ, saṅghārāmassidaṃ phalaṃ.

“Saṭṭhi tūrasahassāni, bheriyo samalaṅkatā;
Parivāressantimaṃ niccaṃ, saṅghārāmassidaṃ phalaṃ.

“Chaḷasītisahassāni, nāriyo samalaṅkatā;
Vicittavattābharaṇā, āmuttamaṇikuṇḍalā.

“Aḷārapamhā hasulā, susaṇṇā tanumajjhimā;
Parivāressantimaṃ niccaṃ, saṅghārāmassidaṃ phalaṃ.

“Timsakappasahassāni, devaloke ramissati;
Sahassakkhattuṃ devindo, devarajjaṃ karissati.

“Devarājena pattabbaṃ, sabbaṃ paṭilabhissati;
Anūnabhogo hutvāna, devarajjaṃ karissati.

“Sahassakkhattuṃ cakkavattī, rājā raṭṭhe bhavissati.
Pathabyā rajjaṃ vipulaṃ, gaṇanāto asaṅkhiyaṃ.

“Kappasatasahassamhi, okkākakulasambhavo;
Gotamo nāma gottena, sathā loke bhavissati.

“Tassa dhammesu dāyādo, oraso dhammanimmito;
Upāli nāma nāmena, hessati satthu sāvako.

“Vinaye pāramiṃ patvā, ṭhānāṭhāne ca kovido;
Jinasāsanam dhārento, viharissatināsavo.

“Sabbametam abhiññāya, gotamo sakyapuṅgavo;
Bhikkhusaṅghe nisīditvā, etadagge ṭhapessati.

“Aparimeyyupādāya, patthemī tava sāsanaṃ;
So me attho anuppatto, sabbasaṃyojanakkhayo.

“Yathā sūlāvuto poso, rājadaṇḍena tajjito;
Sūle sātam avindanto, parimuttiṃva icchati.

“Tathevāhaṃ mahāvīra, bhavadaṇḍena tajjito;
Kammāsūlāvuto santo, pipāsāvedanaṭṭito.

“Bhave sātam na vindāmi, ḍayhanto tīhi aggibhi;
Parimuttiṃ gavesāmi, yathāpi rājadaṇḍito.

“Yathā visādo puriso, visena paripīlito;
Agadam so gaveseyya, visaghātāyupālanam.

“Gavesamāno passeyya, agadam visaghātakam;
Tam pivitvā sukhī assa, visamhā parimuttīyā.

“Tathevāhaṃ mahāvīra, yathā visahato naro;
Sampīlito avijjāya, saddhammāgadamesahaṃ.

“Dhammāgadam gavesanto, addakkhiṃ sakyasāsanaṃ;
Aggam sabbosadhānam tam, sabbasallavinodanam.

“Dhammosadham pivitvāna, visam sabbam samūhaniṃ;
Ajarāmaram sītibhāvam, nibbānam phassayiṃ aham.

“Yathā bhūtaṭṭito poso, bhūtaggāhena pīlito;
Bhūtavejjam gaveseyya, bhūtasamā parimuttīyā.

“Gavesamāno passeyya, bhūtavijjāsu kovidam;
Tassa so vihane bhūtam, samūlañca vināsaye.

“Tathevāhaṃ mahāvīra, tamaggāhena pīlito;
Ñāṇālokaṃ gavesāmi, tamato parimuttīyā.

“Athaddasam sakyamuniṃ, kilesatamasodhanam;
So me tamam vinodesi, bhūtavejjova bhūtakam.

“Samsārasotaṃ sañchindim, taṇhāsotaṃ nivārayim;
Bhavaṃ ugghāṭayim sabbam, bhūtavejjova mūlato.

“Garuḷo yathā opatati, pannagaṃ bhakkhamattano;
Samantā yojanasataṃ, vikkhobheti mahāsaraṃ.

“Pannagaṃ so gahetvāna, adhosīsaṃ viheṭṭhayaṃ;
Ādāya so pakkamati, yena kāmaṃ vihaṅgamo.

“Tathevāhaṃ mahāvīra, yathāpi garuḷo balī;
Asaṅkhatam gavesanto, dose vikkhālayim aham.

“Diṭṭho aham dhammavaraṃ, santipadamanuttaraṃ;
Ādāya viharāmetaṃ, garuḷo pannagaṃ yathā.

“Āsāvati nāma latā, jātā cittalatāvane;
Tassā vassasahassena, ekaṃ nibbattate phalaṃ.

“Tam devā payirupāsanti, tāvadūraphale sati;
Devānaṃ sā piyā evaṃ, āsāvati latuttamā.

“Satasahassupādāya, tāhaṃ paricare muni;
Sāyaṃ pātaṃ namassāmi, devā āsāvatiṃ yathā.

“Avañjhā pārīcariyā, amoghā ca namassanā;
Dūrāgatampi maṃ santaṃ, khaṇoyaṃ na virādhayi.

“Paṭisandhim na passāmi, vicinanto bhava aham;
Nirūpadhi vip̐pamutto, upasanto carāmaṃ.

“Yathāpi padumaṃ nāma, sūriyaraṃsena pupphati;
Tathevāhaṃ mahāvīra, buddharaṃsena pupphito.

“Yathā balākayonimhi, na vijjati pumo sadā;
Meghesu gajjamānesu, gabbhaṃ gaṇhanti tā sadā.

“Cirampi gabbhaṃ dhārenti, yāva megho na gajjati;
Bhārato parimuccanti, yadā megho pavassati.

“Padumuttarabuddhassa, dhammameghena gajjato;
Saddena dhammameghassa, dhammagabbhaṃ agaṇhahaṃ.

“Satasahassupādāya, puññagabbhaṃ dharemaṃ;
Nappamuccāmi bhārato, dhammamegho na gajjati.

“Yadā tuvaṃ sakyamuni, ramme kapilavatthave;
Gajjasi dhammameghena, bhārato parimuccahaṃ.

“Suññataṃ animittaṅca, tathāppaṇihitampi ca;
Caturo ca phale sabbe, dhammevaṃ vijanayim aham.

“Aparimeyyupādāya, patthemī tava sāsanaṃ;
So me attho anupatto, santipadamanuttaraṃ.

“Vinaye pāramaṃ patto, yathāpi pāṭhiko isi;
Na me samasamo atthi, dhāremi sāsanaṃ ahaṃ.

“Vinaye khandhake cāpi, tikacchede ca pañcake;
Ettha me vimati natthi, akkhare byañjanepi vā.

“Niggahe paṭikamme ca, ṭhānāṭhāne ca kovido;
Osāraṇe vuṭṭhāpane, sabbattha pāramaṃ gato.

“Vinaye khandhake vāpi, nikkhipitvā padaṃ ahaṃ;
Ubhato viniveṭhetvā, rasato osareyyahaṃ.

“Niruttiyā sukusalo, atthānatthe ca kovido;
Anaññātaṃ mayā natthi, ekaggo satthu sāsane.

“Rūpadakkho ahaṃ ajja, sakyaputtassa sāsane;
Kaṅkhaṃ sabbaṃ vinodemi, chindāmi sabbasaṃsayamaṃ.

“Padaṃ anupadañcāpi, akkharañcāpi byañjanaṃ;
Nidāne pariyosāne, sabbattha kovido ahaṃ.

“Yathāpi rājā balavā, niggaṇhitvā parantape;
Vijjinitvāna saṅgāmaṃ, nagaraṃ tattha māpaye.

“Pākāraṃ parikhañcāpi, esikaṃ dvārakoṭṭhakaṃ;
Aṭṭālake ca vividhe, kāraye nagare bahū.

“Singhāṭakaṃ caccarañca, suvibhattantarāpaṇaṃ;
Kārayeyya sabhaṃ tattha, atthānatthavinicchayaṃ.

“Nigghātatthaṃ amittānaṃ, chiddāchiddaṇca jānituṃ;
Balakāyassa rakkhāya, senāpaccaṃ ṭhapeti so.

“Ārakkhatthāya bhaṇḍassa, nidhānakusalaṃ naraṃ;
Mā me bhaṇḍaṃ vinassīti, bhaṇḍarakkhaṃ ṭhapeti so.

“Mamatto hoti yo rañño, vuddhiṃ yassa ca icchati;
Tassādhikaraṇaṃ deti, mittassa paṭipajjituṃ.

“Uppātesu nimittesu, lakkhaṇesu ca kovidaṃ;
Ajjhāyakaṃ mantadharaṃ, porohicca ṭhapeti so.

“Etehaṅgehi sampanno, khattiyoti pavuccati;
Sadā rakkhanti rājānaṃ, cakkavākova dukkhitaṃ.

“Tatheva tvaṃ mahāvīra, hatāmittova khattiyo;
Sadevakassa lokassa, dhammarājāti vuccati.

“Titthiye nihanitvāna, mārañcāpi sasenakaṃ;
Tamandhakāraṃ vidhamitvā, dhammanagaraṃ amāpayi.

“Sīlaṃ pākārakaṃ tattha, ñāṇaṃ te dvārakoṭṭhakaṃ;
Saddhā te esikā vīra, dvārapālo ca saṃvaro.

“Satipaṭṭhānamaṭṭhālaṃ, paññā te caccaraṃ mune;
Iddhipādañca siṅghāṭaṃ, dhammavīthi sumāpitā.

“Suttantaṃ abhidhammañca, vinayañcāpi kevalaṃ;
Navaṅgaṃ buddhavacanaṃ, esā dhammasabhā tava.

“Suññataṃ animittañca, vihārañcappaṇihitaṃ;
Āneñjañca nirodho ca, esā dhammakuṭī tava.

“Paññāya aggo nikkhitto, paṭibhāne ca kovido;
Sāriputtoto nāmena, dhammasenāpatī tava.

“Cutūpapātakusalo, iddhiyā pāramaṃ gato;
Kolīto nāma nāmena, porohicco tavaṃ mune.

“Porāṇakavaṃsadharo, uggatejo durāsado;
Dhutavādīguṇenaggo, akkhadasso tavaṃ mune.

“Bahussuto dhammadharo, sabbapāṭhī ca sāsane;
Ānando nāma nāmena, dhammārakkho tavaṃ mune.

“Ete sabbe atikkamma, pamesi bhagavā mamaṃ;
Vinicchayaṃ me pādāsi, vinaye viññudesitaṃ.

“Yo koci vinaye pañhaṃ, pucchati buddhasāvako;
Tattha me cintanā natthi, taññevatthaṃ kathemahaṃ.

“Yāvataṃ buddhakhettamhi, ṭhapetvā taṃ mahāmuni;
Vinaye mādiso natthi, kuto bhiyyo bhavissati.

“Bhikkhusaṅghe nisīditvā, evaṃ gajjati gotamo;
Upālissa samo natthi, vinaye khandhakesu ca.

“Yāvataṃ buddhabhaṇitaṃ, navaṅgaṃ satthusāsaṇaṃ;
Vinayogadhaṃ taṃ sabbaṃ, vinayamūlapassino.

“Mama kammaṃ saritvāna, gotamo sakyapuṅgavo;
Bhikkhusaṅghe nisīditvā, etadagge ṭhapesi maṃ.

“Satasahassupādāya, imaṃ ṭhānaṃ apatthayaṃ;
So me attho anuppatto, vinaye pāramaṃ gato.

“Sakyānaṃ nandijanano, kappako āsahaṃ pure;
Vijahitvāna taṃ jātiṃ, putto jāto mahesino.

“Ito dutiyake kappe, añjaso nāma khattiyo;
Anantatejo amitayaso, bhūmipālo mahaddhano.

“Tassa rañño ahaṃ putto, candano nāma khattiyo;
Jātimadenupatthaddho, yasabhogamadena ca.

“Nāgasatasahassāni, sabbālaṅkārahūsitā;
Tidhāpabhinnā mātaṅgā, parivārenti maṃ sadā.

“Sabalehi paretohaṃ, uyyānaṃ gantukāmakō;
Āruyha sirikaṃ nāgaṃ, nagarā nikkhamiṃ tadā.

“Caraṇena ca sampanno, guttadvāro susaṃvuto;
Devalo nāma sambuddho, āgacchi purato mama.

“Pesetvā sirikaṃ nāgaṃ, buddhaṃ āsādayiṃ tadā;
Tato sañjātakopo so, nāgo nuddharate padaṃ.

“Nāgaṃ ruṇṇamanaṃ disvā, buddhe kodhaṃ akāsahaṃ;
Vihesayitvā sambuddhaṃ, uyyānaṃ agamāsahaṃ.

“Sātaṃ tattha na vindāmi, siro pajjalito yathā;
Pariḷāhena ḍayhāmi, macchova baḷisādako.

“Sasāgarantā pathavī, ādittā viya hoti me;
Pitu santikupāgama, idaṃ vacanamabraviṃ.

“Āsīvisamaṃva kupitaṃ, aggikkhandhaṃva āgataṃ;
Mattaṃva kuñjaraṃ dantiṃ, yaṃ sayambhumasādayiṃ.

“Āsādito mayā buddho, ghorō uggatapo jino;
Purā sabbe viṇassāma, khamāpessāma taṃ muniṃ.

“No ce taṃ nijjhāpessāma, attadantaṃ samāhitaṃ;
Orena sattadivasā, raṭṭhaṃ me vidhamissati.

“Sumekhlo kosiyo ca, siggavo cāpi sattako;
Āsādayitvā isayo, duggatā te saraṭṭhakā.

“Yadā kuppanti isayo, saññatā brahmacārino;
Sadevakaṃ viṇāsenti, sasāgaraṃ sapabbataṃ.

“Tiyojanasahassamhi, purise sannipātayiṃ;
Accayaṃ desanathāya, sayambhuṃ upasaṅkamīṃ.

“Allavatthā allasirā, sabbeva pañjalikatā;
Buddhassa pāde nipatitvā, idaṃ vacanamabravum.

“Khamassu tvaṃ mahāvīra, abhiyācati taṃ jano;
Pariḷāhaṃ vinodehi, mā no raṭṭhaṃ viṇāsaya.

“Sadevamānusā sabbe, sadānavā sarakkhasā;
Ayomayena kūṭena, siraṃ bhindeyyu me sadā.

“Dake aggi na saṅṭhāti, bījaṃ sele na rūhati;
Agade kimi na saṅṭhāti, kopo buddhe na jāyati.

“Yathā ca bhūmi acalā, appameyyo ca sāgaro;
Anantako ca ākāso, evaṃ buddhā akhobhiyā.

“Sadā khantā mahāvīrā, khamitā ca tapassino;
Khantānaṃ khamitānañca, gamanaṃ taṃ na vijjati.

“Idaṃ vatvāna sambuddho, pariāhaṃ vinodayaṃ;
Mahājanassa purato, nabhaṃ abbhuggamī tadā.

“Tena kammenahaṃ vīra, hīnattaṃ ajjhupāgato;
Samatikkamma taṃ jātiṃ, pāvisiṃ abhayaṃ puraṃ.

“Tadāpi maṃ mahāvīra, ḍayhamānaṃ susaṅṭhitaṃ;
Pariāhaṃ vinodesi, sayambhuñca khamāpayiṃ.

“Ajjāpi maṃ mahāvīra, ḍayhamānaṃ tihaggibhi;
Nibbāpesi tayo aggī, sītibhavañca pāpayiṃ.

“Yesaṃ sotāvadhānatthi, suṇātha mama bhāsato;
Atthaṃ tuyhaṃ pavakkhāmi, yathā diṭṭhaṃ padaṃ mama.

“Sayambhuṃ taṃ vimānetvā, santacittaṃ samāhitaṃ;
Tena kammenahaṃ ajja, jātomhi nīcayoniyāṃ.

“Mā vo khaṇaṃ virādhetha, khaṇātītā hi socare;
Sadatthe vāyameyyātha, khaṇo vo paṭipādito.

“Ekaccānañca vamaṇaṃ, ekaccānaṃ virecanaṃ;
Visaṃ halāhalaṃ eke, ekaccānañca osadhaṃ.

“Vamaṇaṃ paṭipannānaṃ, phalaṭṭhānaṃ virecanaṃ;
Osadhaṃ phalalābhīnaṃ, puññakkhettaṃ gavesinaṃ.

“Sāsanena viruddhānaṃ, visaṃ halāhalaṃ yathā;
Āsīviso diṭṭhaviṇṇo, evaṃ jhāpeti taṃ naraṃ.

“Sakiṃ pītaṃ halāhalaṃ, uparundhati jīvitaṃ;
Sāsanena virujjhivā, kappakoṭimhi ḍayhati.

“Khantiyā avihimsāya, mettacittavatāya ca;
Sadevakaṃ so tāreti, tasmā te avirādhiyā.

“Lābhālābhe na sajjanti, sammānanavimānane;
Pathavīsadisā buddhā, tasmā te na virādhiyā.

“Devadatte ca vadhake, core aṅgulimālake;
Rāhule dhanapāle ca, sabbesaṃ samako muni.

“Etesaṃ paṭigho natthi, rāgomesaṃ na vijjati;
Sabbesaṃ samako buddho, vadhakassorasassa ca.

“Panthe disvāna kāsāvaṃ, chaḍḍitaṃ mīlhamakkhitaṃ;
Sīrasmiṃ añjaliṃ katvā, vanditabbaṃ isiddhajaṃ.

“Abbhatitā ca ye buddhā, vattamānā anāgatā;
Dhajanānena sujjhanti, tasmā ete namassiyā.

“Satthukappaṃ suvinayaṃ, dhāremi hadayenaṃ;
Namassamāno vinayaṃ, viharissāmi sabbadā.

“Vinayo āsayo mayhaṃ, vinayo ṭhānacaṅkamaṃ;
Kappemi vinaye vāsaṃ, vinayo mama gocaro.

“Vinaye pāramippatto, samathe cāpi kovido;
Upāli taṃ mahāvīra, pāde vandati satthuno.

“So ahaṃ vicarissāmi, gāmā gāmaṃ purā puram;
Namassamāno sambuddhaṃ, dhammassa ca sudhammataṃ.

“Kilesā jhāpitā mayhaṃ...pe... kataṃ buddhassa sāsana’nti.

Tattha hi naṃ satthā sayameva sakalaṃ vinayaṇṇakam uggaṇhāpesi. So aparabhāge bhārukacchakavatthum (pārā. 78) ajjukavatthum (pārā. 158) kumārakassapavatthunti imāni tīṇi vatthūni vinicchayi. Satthā ekekasmim vinicchite sādhuḥkāraṃ datvā tayopi vinicchaye aṭṭhuppattiṃ katvā theram vinayadharānaṃ aggaṭṭhāne ṭhapesi. So aparabhāge ekasmim uposathadivase pātimokkhuḍdesasamaye bhikkhū ovaḍanto –

249. “Saddhāya abhinikkhamma, navapabbajito navo;
Mitte bhajeyya kalyāṇe, suddhājīve atandite.

250. “Saddhāya abhinikkhamma, navapabbajito navo;
Saṅghasmim viharāṃ bhikkhu, sikkhetha vinayaṃ budho.

251. “Saddhāya abhinikkhamma, navapabbajito navo;
Kappākappesu kusalo, careyya apurakkhato’ti. – tisso gāthā abhāsi;

Tattha **saddhāyāti** saddhānimittaṃ, na jīvikatthanti attho. **Saddhāyāti** vā kammaphalāni ratanattayaḅuṇaṅca saddahitvā. **Abhinikkhammāti** gharāvāsato nikkhamitvā. **Navapabbajitoti** navo hutvā pabbajito, paṭhamavaye eva pabbajito. **Navoti** sāsane sikkhāya abhinavo daharo. **Mitte bhajeyya kalyāṇe suddhājīve atanditeti** “piyo garu bhāvaṇīyo”tiādinā (a. ni. 7.37) vuttalakkhaṇe kalyāṇamitte, micchājīvavivajjanena suddhājīve, āradhaviṛiyatāya atandite bhajeyya upasaṅkameyya, tesam ovādānusāsanaṇṇapaṭiggahaṇavasena seveyya. **Saṅghasmim viharanti** saṅhe bhikkhusamūhe vattapaṭivattapūraṇavasena viharanto. **Sikkhetha vinayaṃ budhoti** bodhañāṇatāsukusalo hutvā vinayapariyattiṃ sikkheyya. Vinayo hi sāsanaṃ āyu, tasmim ṭhite sāsanaṃ ṭhitaṃ hoti. “Buddho”ti ca paṭhanti, so evattho. **Kappākappesūti** kappiyākappiyesu kusalo suttavasena suttānulomavasena ca nipuṇo cheko. **Apurakkhatoti** na purakkhato taṇhādīhi kutoci purekkhāraṃ apaccāsīsanto hutvā vihareyya.

Upālittheragāthāvaṇṇanā niṭṭhitā.

12. Uttarapālattheragāthāvaṇṇanā

Paṇḍitaṃ vata maṃ santanti āyasmato uttarapālattherassa gāthā. Kā uppatti? Ayampi purimabuddhesu katādhikāro tattha tattha bhave puññāni upacinanto vipassissa bhagavato gamanamagge setuṃ kārāpesi. So tena puññakammena devamanussesu saṃsaranto imasmiṃ buddhuppāde sāvattiyaṃ brāhmaṇakule nibbattivā **uttarapāloti** laddhanāmo vayappatto yamakapāṭihāriyaṃ disvā paṭiladdhasaddho pabbajivā samaṇadhammaṃ karoti. Tassa ekadivasaṃ ayonisomanasikāravasena anubhūtārammaṇaṃ anussarantassa kāmarāgo uppajji. So tāvadeva sahoḍḍhaṃ coraṃ gaṇhanto viya attano cittaṃ niggahetvā saṃvegajāto paṭipakkhamanasikārena kilese vikkhambhetvā vipassanāya kammaṃ karonto bhāvanaṃ ussukkāpetvā arahattaṃ pāpuṇi. Tena vuttaṃ **apadāne** (apa. thera 2.47.16-20) –

“Vipassino bhagavato, caṅkamantassa sammukhā;
Pasannacitto sumano, setuṃ kārāpayiṃ ahaṃ.

“Ekanavutito kappe, yaṃ setuṃ kārāyīṃ ahaṃ;
Duggatiṃ nābhijānāmi, setudānassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.
Arahattaṃ pana patvā attano paṭipattiṃ paccavekkhitvā sīhanādaṃ nadanto –

252. “Paṇḍitaṃ vata maṃ santaṃ, alamaṭṭhavicintakaṃ;
Pañca kāmagaṇṇā loke, sammohā pātayīṃsu maṃ.

253. “Pakkhando māraṇisaye, daḷhasallasamappito;
Asakkhiṃ maccurājassa, ahaṃ pāsā pamuccituṃ.

254. “Sabbe kāmā pahīnā me, bhavā sabbe padālītā;
Vikkhīṇo jātisaṃsāro, natthi dāni punabbhavo’nti. –

Tisso gāthā abhāsi.

Tattha **paṇḍitaṃ vata maṃ santanti** sutacintāmayāya paññāya vasena paññāsampannampi nāma maṃ samānaṃ. **Alamaṭṭhavicintakanti** attano ca paresaṅca atthaṃ hitaṃ vicintetuṃ samatthaṃ, alaṃ vā pariyattaṃ atthassa vicintakaṃ, kilesaviddhaṃsanasamatthaṃ atthadassināṃ vā, sabbametaṃ attano antimabhavikatāya thero vadati. **Pañca kāmagaṇṇāti** rūpādayo pañca kāmakoṭṭhāsā. **Loketi** tesāṃ pavattiṭṭhānadassanaṃ. **Sammohāti** sammohanimittaṃ ayonisomanasikārahetu. **Sammohāti** vā sammohanā sammohakarā. **Pātayīṃsūti** dhīrabhāvato pātesuṃ, lokato vā uttaritukāmaṃ maṃ loke pātayīṃsūti attho.

Pakkhandoti anupaviṭṭho. **Māraṇisayeti** kilesavisaye kilesamāraṇassa pavattiṭṭhāne, tassa vasaṃ gatoti adhippāyo. Devaputtamāraṇassa vā issariyaṭṭhāne taṃ anupavisitvā ṭhito. **Daḷhasallasamappitoti** daḷhaṃ thiraṃ, daḷhena vā sallena samappito, rāgasallena hadayaṃ āhacca viddho. **Asakkhiṃ maccurājassa, ahaṃ pāsā pamuccitunti** aggamaggasaṇḍāsena rāgādisallaṃ anavasesato uddharantoyeva rāgabandhanasāṅkhātā maccurājassa pāsā ahaṃ parimuccituṃ asakkhiṃ, tato attānaṃ pamocesīṃ.

Tato eva ca **sabbe kāmā pahīnā me, bhavā sabbe padālītāti** vatthārammaṇādibhedena anekabhedabhinnā sabbe kilesakāmā ariyamaggena samucchadavasena mayā pahīnā. Kilesakāmesu hi

pahīnesu vatthukāmāpi pahīnā eva honti. Tathā kāmabhavakammabhavādayo bhavā sabbe maggañāṇasīnā padālītā viddhamṣitā. Kammabhavesu hi padālītesu upapattibhavā padālītā eva honti. Evaṃ kammabhavānaṃ padālītattā eva **vikkhīṇo jātisamsāro, natthi dāni punabbhavoti**. Tassattho heṭṭhā vuttoyeva. Idameva ca therassa aññābyākaraṇaṃ ahoṣi.

Uttarapālattheragāthāvaṇṇanā niṭṭhitā.

13. Abhibhūtatheragāthāvaṇṇanā

Suṇātha ñātayo sabbeti āyasmato abhibhūtatherassa gāthā. Kā uppatti? Ayampi purimabuddhesu katādhikāro tattha tattha bhave puññāni upacinanto vessabhussa bhagavato kāle kulagehe nibbattitvā viññutaṃ patto tādīsena kalyāṇamittasannissayena sāsane abhippasanno ahoṣi. So sathari parinibbute tassa dhātuṃ gahetuṃ mahājane ussāhaṃ karonte sayam sabbapaṭhamam gandhodakena citakaṃ nibbāpesi. So tena puññakammena devamanussesu saṃsaranto imasmiṃ buddhuppāde veṭṭhapuranagare rājakule nibbattitvā **abhibhūtoti** laddhanāmo pitu accayena rajjam kāreti. Tasmīṃca samaye bhagavā jānapadacārikaṃ caranto anupubbena taṃ nagaraṃ pāpuṇi. Tato so rājā “bhagavā kira mama nagaraṃ anupatto”ti sutvā sathu santikaṃ gantvā dhammaṃ sutvā dutiyadivase mahādānaṃ pavattesi. Bhagavā bhuttāvī tassa rañño ajjhāsayanurūpaṃ anumodanaṃ karontoyeva vitthārato dhammaṃ desesi. So dhammaṃ sutvā laddhappasādo rajjam pahāya pabbajitvā arahattaṃ sacchākāsi. Tena vuttaṃ **apadāne** (apa. therā 2.47.11-15) –

“Dayhamāne sarīramhi, vessabhussa mahesino;
Gandhodakaṃ gahetvāna, citaṃ nibbāpayiṃ ahaṃ.

“Ekatiṃse ito kappe, citaṃ nibbāpayiṃ ahaṃ;
Duggatiṃ nābhijānāmi, gandhodakassidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Arahattaṃ pana patvā vimuttisukhena viharante tasmīṃ tassa ñātakā amaccā pārisajjā nāgarā jānapadāti sabbe samāgantvā, “bhante, kasmā tvaṃ amhe anāthe katvā pabbajito”ti paridevīṃsu. Thero te ñātipamukhe manusse paridevante disvā tesam attano pabbajjakāraṇavibhāvanamukhena dhammaṃ kathento –

255. “Suṇātha ñātayo sabbe, yāvattettha samāgatā;
Dhammaṃ vo desayissāmi, dukkhā jāti punappunaṃ.

256. “Ārambhatha nikkamatha, yuñjatha buddhasāsane;
Dhunātha maccuno senaṃ, naḷāgāraṃva kuñjaro.

257. “Yo imasmiṃ dhammavinaye, appamatto vihassati;
Pahāya jātisamsāraṃ, dukkhassantaṃ karissatī”ti. – tisso gāthā abhāsi;

Tattha **suṇāthāti** nisāmetha, idāni mayā vuccamānaṃ ohitasotā sotadvārānusārena upadhārethāti attho. **Ñātayoti** ñātī pamukhe katvā tesam sabbesaṃ ālapanam, tenāha “**sabbe yāvattettha samāgatā**”ti, yāvanto yattakā ettha samāgame, etissaṃ vā mama pabbajjāya samāgatāti attho.

Idāni yaṃ sandhāya “suṇāthā”ti savanāṇattikavacanaṃ kataṃ, taṃ “**dhammaṃ vo desayissāmi**”ti paṭijānitvā “**dukkhā jāti punappuna**”ntiādinā desetum ārabhi. Tattha **dukkhā jāti punappunanti** jāti nāmesā gabbhokkantimūlakādibhedassa jarādibhedassa ca anekavihitassa dukkhassa adhiṭṭhānabhāvato dukkhā. Sā punappunaṃ pavattamānā ativiya dukkhā.

Tassā pana jātiyā samatikkamanattham ussāho karaṇīyoti dassento āha “**ārambhathā**”tiādi. Tattha **ārambhathā**ti ārambhadhātusāṅkhātāṃ vīriyaṃ karotha. **Nikkamathā**ti kosajjapakkhato nikkhantattā nikkamadhātusāṅkhātāṃ taduttariṃ vīriyaṃ karotha. **Yuñjatha buddhasāsane**ti yasmā sīlasaṃvaro indriyesu guttadvāratā bhojane mattaññūtā satisampajaññanti imesu dhammesu patiṭṭhitānaṃ jāgariyānuyogavasena ārambhanikkamadhātuyo sampajjanti, tasmā tathābhūtā samathavipassanāsāṅkhāte adhisīlasikkhādīsāṅkhāte vā bhagavato sāsane yuttappayuttā hotha. **Dhunātha maccuno senaṃ, naḷāgāraṃva kuñjaroti** evaṃ paṭipajjantā ca tedhātuissarassa maccurājassa vasaṃ satte neṭīti tassa senāsāṅkhātāṃ abalaṃ dubbalaṃ yathā nāma thāmbalūpapanno kuñjaro naḷehi kataṃ agāraṃ khaṇeṇeva viddhamseti, evameva kilesagaṇaṃ dhunātha vidhamatha viddhamsethāti attho.

Evaṃ pana buddhasāsane ussāhaṃ karontassa ekaṃsiko jātidukkassa samatikkamoti dassento “**yo imasmi**”ntiādinā tatiyaṃ gāthamāha. Taṃ suviññeyyameva.

Abhibhūtattheragāthāvaṇṇanā niṭṭhitā.

14. Gotamatheragāthāvaṇṇanā

Saṃsaranti āyasmato gotamatherassa gāthā. Kā uppatti? Ayaṃ kira purimabuddhesu katādhikāro tattha tattha bhava puññāni karonto sikhimhi bhagavati parinibbute tassa citakaṃ devamanussesu pūjentesu aṭṭhahi campakapupphehi citakaṃ pūjesi. So tena puññakammena devamanussesu saṃsaranto imasmiṃ buddhuppāde sakyarājakule nibbattitvā **gotamoti** gottavaseneva abhilakkhitanāmo vayappatto satthu ñāṭisamāgame paṭiladdhasaddho pabbajitvā vipassanāya kammaṃ karonto chaḷabhiñño ahoṣi. Tena vuttaṃ **apadāne** (apa. thera 2.47.6-10) –

“Jhāyamānassa bhagavato, sikhino lokabandhuno;
Aṭṭha campakapuppāni, citakaṃ abhiropayaṃ.

“Ekatiṃse ito kappe, yaṃ pupphamabhiropayaṃ;
Duggatiṃ nābhijānāmi, citapūjāyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana”nti.

Chaḷabhiñño pana hutvā vimuttisukhena viharanto ekadivasaṃ ñātakehi “kasmā, bhante, amhe pahāya pabbajito”ti puṭṭho saṃsāre attanā anubhūta dukkhañceva idāni adhigataṃ nibbānasukhañca pakāsento –

258. “Saṃsarañhi nirayaṃ agacchissaṃ, petalokamagamaṃ punappunaṃ;
Dukkhamamhipi tiracchānayanayaṃ, nekadhā hi vusitaṃ ciraṃ mayā.

259. “Mānusoṃ ca bhavobhirādhitā, saggakāyamaṃ sakim sakim;
Rūpadhātusu arūpadhātusu, nevasaññisu asaññisuṭṭhitaṃ.

260. “Sambhavā suviditā asārakā, saṅkhatā pacalitā saderitā;
Taṃ viditvā mahamahattasambhavaṃ, santimeva satimā samajjhaga”nti. –

Tīhi gāthāhi tesam dhammaṃ desesi.

Tattha **saṃsaranti** anādimati saṃsāre saṃsaranto kammakilesehi pañcasu gatīsu cavanupapātavasena aparāparaṃ saṃsarantoti attho. **Hīti** nipātamattaṃ. **Nirayaṃ agacchissanti** sañjīvādikaṃ aṭṭhavidhaṃ mahānirayaṃ, kukkuḷādikaṃ soḷasavidhaṃ ussadanirayañca paṭisandhivasena upagacchim. “**Punappuna**”nti idaṃ idhāpi ānetabbaṃ. **Petalokanti** pettivisaṃsaṃ,

khuppiṭṭāsādibhedam petattabhāvanti attho. **Agamanti** paṭisandhivasena upagacchim upapajjim. **Punappunanti** aparāparam. **Dukkhamamhipī** aññamaññaṃ tikhiṇakasāpatodābhigghātādidukkhehi dussahāyapi. Liṅgavipallāsena hetam vuttam “dukkhamamhipī”ti. **Tiracchānayanoyanti** migapakkhīādibhedāya tiracchānayanoyam. **Nekadhā hī**ti oṭṭhagoṇagadrabhādivasena ceva kākabalākakulalādivasena ca anekappakāram anekavāraṇca **ciram** dīghamaddhānam **mayā vusitam** niccam utrastamānasatādivasena dukkham anubhūtam. Tiracchānayanoyam nibbattasatto mahāmūlhatāya cirataram tattheva aparāparam parivattatīti dassanattam idha “cira”nti vuttam.

Mānusoṭṭhā ca bhavobhirādhitoti manussattabhāvopi mayā tādisena kusalakammunā samavāyena abhirādhito sādhitō adhigato. Kāṇakacchapopamasuttamettha (ma. ni. 3.252; sam. ni. 5.1117) udāharitabbam. **Saggakāyamagamam sakim sakinti** saggagatisaṅkhātam kāmāvacaradevakāyam sakim sakim kadāci kadāci upapajjanavasena agacchim. **Rūpadhātusūti** puthujjanabhavaggapariyosānesu rūpabhavesu **arūpadhātusūti** arūpabhavesu. **Nevasaññisu asaññisuṭṭhitanti** rūpārūpadhātūsu ca na kevalam saññisu eva, atha kho nevasaññīnāsaññīsu asaññīsu ca upapajja ṭhitam mayāti ānetvā yojetabbam. Nevasaññiggahaṇena hettha nevasaññīnāsaññībhave gahito. Yadipime dve bhavā rūpārūpadhātuggahaṇeneva gayhanti, ye pana ito bāhirakā tattha niccasaññino bhavavimokkhasaññino ca, tesam tassā saññāya micchābhāvadassanattam visum gahitāti daṭṭhabbam.

Evam dvīhi gāthāhi bhavamūlassa anupacchinnatā anādimati saṃsāre attano vaṭṭadukkhānubhavam dassetvā idāni tadupacchedena vivaṭṭasukhānubhavam dassento “**sambhavā**”tiadinā tatiyam gāthamāha. Tattha **sambhavāti** bhavā. Kāmabhavādayo eva hi hetupaccayasamavāyena bhavantīti idha sambhavāti vuttā. **Suviditāti** vipassanāpaññāsahitāya maggapaññāya suṭṭhu viditā. **Asārakāti**ti tesaṃ viditākāradassanam. Tattha **asārakāti** niccasarādisārarahitā. **Saṅkhatāti** samecca sambhuyya paccayehi katā. **Pacalitāti** saṅkhatatā eva uppādarādīhi pakārato calitā anavaṭṭhitā. **Saderitāti** sadā sabbakālam bhaṅgena eritā, ittarā bhaṅgagāmino pabhaṅgunoti attho. **Tam viditvā mahamattasambhavanti** tam yathāvuttam saṅkhatasabhāvam attasambhavam attani sambhūtam attāyattam issarādivasena aparāyattam pariññābhisamayavasena aham viditvā tappaṭipakkhabhūtam **santimeva** nibbānameva maggapaññāsatiyā **satimā** hutvā **samajjhagam** adhigacchim ariyamaggabhāvanāya anuppattoti. Evam thero ñātakānam dhammadesanāmukhena aññaṃ byākāsi.

Gotamattheragāthāvaṇṇanā niṭṭhitā.

15. Hāritattheragāthāvaṇṇanā

Yo pubbe karaṇiyānīti āyasmato hāritattherassa gāthā. Kā uppatti? Ayampi padumuttarassa bhagavato kāle kulagehe nibbattitvā viññutam patto satthari parinibbute tassa citakapūjāya kayiramānāya gandhena pūjam akāsi. So tena puññakammena devamanussesu saṃsaranto imasmim buddhuppāde sāvattiyam brāhmaṇakule nibbattitvā **hāritoti** laddhanāmo vayappatto jātimānam nissāya aññe vasalavādena samudācarati. So bhikkhūnam santikam gantvā dhammam sutvā paṭiladdhasaddho pabbajitopi ciraparicitattā vasalasangārahāram na vissajji. Athesadivasam satthu santike dhammam sutvā sañjātasamvego vipassanam paṭṭhapetvā attano cittappavattim upaparikkhanto mānuddhaccaviggahitātam disvā tam pahāya vipassanam ussukkāpetvā arahattam pāpuṇi. Tena vuttam **apadāne** (apa. thera 2.46.63-67) –

“Citāsu kurumānāsu, nānāgandhe samāhaṭe;
Pasannacitto sumano, gandhamuṭṭhimapūjayim.

“Satasahassito kappe, citakam yamapūjayim;
Duggatim nābhijānāmi, citapūjāyidaṃ phalam.

“Kilesā jhāpitā mayhaṃ...pe... kataṃ buddhassa sāsana’nti.

Arahā pana hutvā vimuttisukhaṃ anubhavanto “**yo pubbe karaṇīyāni**”tiādinā tīhi gāthāhi bhikkhūnaṃ ovādadānamukhena aññaṃ byākāsi. Tāsaṃ attho heṭṭhā vuttoyeva.

Hāritattheragāthāvaṇṇanā niṭṭhitā.

16. Vimalattheragāthāvaṇṇanā

Pāpamitteti āyasmato vimalattherassa gāthā. Kā uppatti? Ayampi purimabuddhesu katādhikāro tattha tattha bhava vivaṭṭūpanissayaṃ puññaṃ upacinanto padumuttarassa bhagavato kāle kulagehe nibbattitvā viññutaṃ patto satthari parinibbute sādhuḷīṇanadivasesu vītivattesu satthu sarīraṃ gahetvā upāsakesu jhāpanaṭṭhānaṃ gacchantesu satthu guṇe āvajjitvā pasannamānaso sumanapupphehi pūjamaḥkāsi. So tena puññaḥkamma devamanussesu saṃsaranto imasmiṃ buddhuppāde bārāṇasiyaṃ brāhmaṇakule nibbattitvā **vimaloti** laddhanāmo vayappatto somamittattheraṃ nissāya sāsane pabbajitvā teneva ussāhito vipassanaṃ paṭṭhapetvā nacirasseva arahattaṃ pāpuṇi. Tena vuttaṃ **apadāne** (apa. thera 2.46.58-62) –

“Nīharante sarīraṃhi, vajjamānāsu bherisu;
Pasannacitto sumano, paṭṭipupphamapūjayiṃ.

“Satasahassito kappe, yaṃ pupphamabhipūjayiṃ;
Duggatiṃ nābhijānāmi, dehapūjāyidaṃ phalaṃ.

“Kilesā jhāpitā mayhaṃ...pe... kataṃ buddhassa sāsana’nti.
Arahattaṃ pana patvā attano sahāyassa bhikkhussa ovādaṃ dento –

264. “Pāpamitte vivajjetvā, bhajeyyuttamapuggalaṃ;
Ovāde cassa tiṭṭheyya, patthento acalaṃ sukhaṃ.

265. “Parittaṃ dārumāruya, yathā sīde mahaṇṇave;
Evaṃ kusītamāgamma, sādhuḷīvīpi sīdati;

Tasmā taṃ parivajjeyya, kusītaṃ hīnavīriyaṃ.

266. “Pavivittehi ariyehi, pahitattehi jhāyibhi;
Niccaṃ āraddhavīriyehi, paṇḍitehi sahāvase’nti. –

Tisso gāthā abhāsi.

Tattha **pāpamitteti** akalyāṇamitte asappurise hīnavīriye. **Vivajjetvāti** taṃ abhajanavasena dūrato vajjetvā. **Bhajeyyuttamapuggalanti** sappurisaṃ paṇḍitaṃ kalyāṇamittaṃ ovādānusāsanaṅgahaṇavasena seveyya. **Ovāde cassa tiṭṭheyyāti** assa kalyāṇamittassa ovāde anusīṭṭhiyaṃ yathānusīṭṭhaṃ paṭipajjanavasena tiṭṭheyya. **Patthentoti** ākaṅkhanto. **Acalaṃ sukhanti** nibbānasukhaṃ phalasukhaṇca. Tampi hi akuppabhāvato “acala’nti vuccati. Sesam vuttatthameva.

Vimalattheragāthāvaṇṇanā niṭṭhitā.

Tikanipātavaṇṇanā niṭṭhitā.

Paṭthamo bhāgo niṭṭhito.